

*В.К. Радаев*



**КОЧКАЗЬ  
ПРОИЗВЕДЕНИЙ**



*В.К. Радаев*



КОЧКАЗЬ  
ПРОИЗВЕДЕНИЯТ



УДК 821.511.152.1  
ББК 84.(2Рос=Морд)  
Р 15



Пурныцьясь *Т.В. Разгуляева*

## КНИГАНЬ ПУРНЫЦЯНТЬ ПЕЛЬДЕ

Зярдэ кортамось тукшны эрзянь литературанть чачомадо-кеме-кставомадо, свал ледстяви МАССР-нь народной (1987) ды заслуженной (1982) писателесь Василий Кузьмич Радаев — минек сёрмадей-тнестэ вейкесь ды, паряк, сехте эрзянсь, раськень оймень смустень содыцьясь-чарькодицьясь ды произведениясонзо тень невтеме парсте маштыцьясь. Эрямонзо перть Василий Кузьмич явсь покш мель эрзянь-мокшонь фольклоронь пурнамонть-тонавнеманть, кезз-рень ёвтамотнень-моротнень коряс сёрмадынзе масторлангонь келес содавикс «Сияжар», «Тюштя», «Пенза ды Сура», «Сурай» ды лия поэматнень. Теде башка, литературанок сюпалгавтызе пек паро ламо повестьэ, ёвтнемасо, ёвтамосо ды стихотворениясо.

Василий Кузьмич Радаев чачсь 1907-це иень мартонь 13-це чистэ Самарань губерниянь Бугурусланонь уездэнь (ней Самарань областень Похвистневань район) Покш Толкан велень сокицьянь-видицьянь покш семьясо. Важдеме, темень вечкеме тонадсь вишкинестэ саезь. Текень коряс, улема, сёрмадеенть творчествасо трудонь темась ды важов ломанень уцякась аштить васенце таркасо.

Эрзянь сюпавёжомарямосо каезь, В. Радаев пек вечкилинзе раськень моротнень, ёвтамотнень, содамоёвкстнень ды аноколь апак лотксе кунсолемс эсест велень побаскань ёвтницятнень ды морыцятнень: А.С. Журавлёвонь, К.Г. Батраевонь, И.П. Новокаевонь, П.П. Верховцевонь ды лиятнень. Эряви меремс, Покш Толкансо телень чокшнетнестэ сынст якавтсть кудодо кудос ды кунсолыцяст ламольть.

1919-це иестэ Вася Радаев прядызе колмо иень школанть. Шкась сестэ стакаль, секс седе тов тонавнемс тензэ эзь саво. Ялатеке цёрынесь ламо ловнось. Пек кенярдсь, зярдэ 1920-це иестэ тиринь велесэнзэ панжовсь библиотека. Ловномо вечкеманзо кис сонзэ саекшнизь мик библиотекаренень лездыцякс.

Иень-кавтонь ютазь велень зярыя од ломантне пурнакшность спектаклянь налксицьянь кужине. Юткозост човорякшность Вася-як. Курок од артистнень пьесаст ваномо сакшныльть омбо велетнестэяк.

Мейле Покш Толканонь коммунистнэ кармасть нолдамо эсест газета. Сеедьстэ тов эсь сёрмадовксонзо макснесь Радаевгак.

1925-це иестэ Покш Толкансо пурназель комсомолонь ячейка. Комсомолецэкс сеске прынзо сёрмадстокшнызе Васяяк. Мейле

**Радаев В.К.**  
Р 15 Кочказь произведеният / В.К. Радаев; [пурныцьясь Т.В. Разгуляева]. — Саранск: Мордовской книжной издательствась, 2008. — 208 с. — Мордов.-эрзя яз.  
ISBN 978 — 5 — 7595 — 1769 — 6

**Радаев В.К.**  
Избранные произведения.

УДК 821.511.152.1  
ББК 84 (2Рос=Морд)

ISBN 978 — 5 — 7595 — 1769 — 6

© Мордовское книжное издательство, 2008  
© Разгуляева Т.В., составление,  
вступительная статья, 2008

ульнесь ячейканть прявтоккак, ВЛКСМ-нь Бугурусланонь уезднь комитетэнь членккак. Теке шкастонть эрзянь цёрась таштась содамочить рабфаксо ды комвузсо, сёрмалесь «Од ломанень вайгель», «Од веле» губерниянь ды «Якстере Теште», «Сокицянь-видицянь газета», «Беднота» московонь газетатнес. Тов кучнесь од эрямонть шнамодо ды таштонть сялдомодо стихотворениянзо ды ёвтнеманзо. Сёрмадсь рузонь ды тиринь кельтнесэ. «Пастухонь думт» васенце стихотворениянзо лиссь 1926-це иестэ «Якстере Теште» газетасо. Эсензэ васенце ёвтнеманть — «Истя эрсесь» — В. Радаев сёрмадызе эрзянь кезэрень ёвтамонть коряс, конань марсизе С.Ф. Дунышина сырькаензэ пельде.

1929-це иестэ Василий Радаевень кочкизь вельсоветэнь прявтокс. Сон ламо тейсь «1 Мая» колхозонь панжомантень ды ульнесь вейсэнь хозяйстванть прявтокс.

1930-це иестэ Василий Радаев велькоронтъ ды вейсэнь тевень топавтыцянтъ кучизь Ленинград ошонь историянь-лингвистикань институтсо тонавтнеме. Тосоак сон сёрмады стихть, ёвтнемат, очеркть, эрзянь ды мокшонь литературано статьят.

Институтонть прядомадо мейле (1933 — 1935) В.К. Радаев важдось «Колхозтнэнь кис» Орданьбуень ды «Омбоце пятилетканть кис» Дубёнкань райгазетатнень редакторокс, мейле — «Сятко» журналонь литературань редакторокс. 1935 — 1937-це иетнестэ ульнесь Мордовиянь культурань научно-исследовательской институтонь (МКНИИ) учёной секретарекс, научной старшей сотрудникекс. Тосо важдомстэ яксесь фольклоронь экспедицияв Нижней Новгородонь, Оренбургонь, Пензань ды Самарань областнева. Шкань ютазь тосто ускозь эрзянь ёвтамонтне-моронтне пек маштовсть тензэ эпикань произведениянзо — поэманзо, ёвтамонзо, ёвксонзо — сёрмадомасо.

1941-це иестэ В.К. Радаев тусь войнав. Фашисттнэнь каршо тюрсь Сталинградонтъ ало ды Ине Отечественной войнаень лия фронттнэсэ.

Кудов велявтсь 1946-це иень август ковсто. 1948-це иес Василий Кузьмич важдось тиринь велень сисем иень школань завучокс, мейле, 1953-це иес, Вишка Толканонь педагогонь училищасо тонавтсь эрзянь кель ды литература.

Седе тов Василий Кузьмичень эрямось пачтизе Куйбышеввань областен Клявлинань райононь Ташто Маклауш эрзянь велев. Тосонь школасонтъ важдось учителекс, завучокс, директорокс. Тосо эрямсто сёрмадызе Сияжардо ёвтамонтъкак.

Мордовияв В.К. Радаев одов пачкодсь 1960-це иестэнтъ. Важдома кучизь Ицялов — сон ульнесь ушодкс школань прявтокс ды тонавтсь эрзянь кель ды литература педагогонь училищасонтъ. Теде башка, ветясь литературань кужо, пурнась фольклор, аноктась тонавтома книгат школатнень туртов, сёрмадсь художественной произведеният.

Пенсияв туемадонзо мейле Василий Кузьмич семиянзо марто сась эрямо Лямбирень райононь Берсеневка велев. Меельце чизэнзэ сёрмадсь. Яля прядыксэлизе «Тюштя» поэманть. Теке шкастонть, «Эрзянь правда» газетань редакциясо ветясь «Тештине» литературань вейсэндявкс, тонавтсь од сёрмадыцянтнень — витнесь-петнесь произведенияст.

В.К. Радаев писателесь кулось 1991-це иень декабрянь 6-це чистэ. Калмазь Берсеневкань калмазырьсэ.

Василий Кузьмич Радаев седе пек содавикс кода «Сияжар» эпикань поэмань сёрмадыця. Ансяк мель явовтыть лия произведениянзояк, ютксост «Сад» повестесь (печатазь «Сятко» журналсо 1940 — 1941), «Тюштя», «Сурай», «Пенза ды Сура», «Мокшонь тейтерь», «Умарица» поэматне, «Гурьян», Михаил Боровдо ёвтамонтне ды ламодояк ламо ёвтнематне. Меельцетнень сёрмадомо ушодсь XX пингень комсеце иетнестэ. Эйсэст содазь пачти революциядо мейлень, войнаень пингень ды войнадо мейлень шкань эрямодонок. Ялатеке, партианть шнамодо башка, мезесь косо редяви, косо арась, авторось маштсь невтеме ломанень виев обуцят, видечинь кис аштицят, эсь масторонь певтеме вечкият ды эрямонь вадрялгавтомо бажицят. Секс, нать, В. Радаевень ёвтнеманзо покш мель марто ловновить нейкак.

Истя, «Тетят-цёрат» ёвтнемась содавты минек масторсо революциядо мейлень од эрямонь кемекставома шкадонть, сестэнь ломантнеде, конат апак пеле тюрсть олячист кисэ. Прявт героесь — Сёмака. Те цёрынентъ тетязо партизанонь отрядсолъ. Сон аванзо марто эрясь Поляна велесэ. Весть велентень састь Белопольский офицерэнтъ прявтос колчаковецт ды ушодсть эрицянтнень лангсо нарьгамо. Сёмакань аванзояк маштызь, кудосткак пултызь. Ансяк цёрынесь мусь вийть модемс партизантнэненень ашогвардеецтнэнь нулгодькс тевдест ёвтамо. Ки лангсо пек майси, цють а кельми, ялатеке пачкоди минектнэненень.

«Бишка» ёвтнемасонтъ пачтяви колхозонь теевема шкатнеде. Кулактнэ ды Советэнь властентъ каршо лия аштицятне эрьва кода бажить калавтомс вийс совиця од эрямонть — маштнить активисттнэнь, салыть ды пултыть вейсэнь улипаронтъ. Каршост стить колхозниктне ды мик ёйкакшосткак. Женя ды Лёня цёрынетне Бишка кискаст марто мусызь яттнэнь пизэст ды ёвтыть покштнэненень.

Теке темась панжови «Комсомолецэнь седей» ёвтнемасонтъкак.

«Оксана Карповна» ёвтнемасонзо В.К. Радаев пачти седе, кодамо покш питне савсь пандомс минек ломантнэненень фашистэнь Германиянтъ изнямсто. Сон невти мазый, виев обуця тейтерь-авань образ, кона пек вечкилизе тиринь масторонзо ды, зярдэ эрявсь, максызе кисэнзэ эрямонзояк. Оксана Карповна тонавтгыцясь лездась менемс полонсто пек ламо советской солдаттнэненень, ды тень кисэ

немецтне маштызь. Ялатеке сон изнясь — эрямозо поладовсь ломантнень мельсэ-арсемасо.

Минек солдаттнень геройксчидест авторось ёвтни «Давол» ёвтне-масонть. Давол фамилия марто солдатось пек ёжов ды эрыза разведчик, алкуккак, ульнесь прок давол: мездеяк эзь пеле ды мельганзо ветясь лиятненьгак. Разведкасто свал пачтиль питней кулят ды пек лезксэв «кельть». Тень пингстэ сон зярдояк эзь шна пря.

В.К. Радаевень ламо ёвтнеманзо — «Авань седей», «Иля раксе лиянь лангсо», «Кото эйденъ ава», «Лектор», «Сынст кист» ды лиятне — алтазь минек седе малавикс эрямонтень, сенень, кода изнямодонтъ мейле кепедевсть тапазь оштнэ ды велетне, вельмевтевсь каладозь хозяйствась, кода ломантне кецнесь олячинтень. Ламонь мельсэ-превсэ чачить од арсемат, ютксост — лия ёжот. Нама, аволь весе тевтне топавтовить валанясто-шождасто, ломантнень ютксо вастневить прябезарькст, ансяк видечись, вадрясь свал изнить: сын аштить эрямонь икелев шаштыця виекс. Ламо персонажтнэ кувать а стувовить, сынст тевет, эрямоствеевсь лиятненень невтемапелекс. Ёвтнематне ловновить шождасто, келест мазый, ванькс, эрзянь.

Василий Кузьмич Радаев сёрмадсь зяря ёвтнемат эйкакштнень туртовгак. Ютксост «Кавто бюстт», «Тараска», «Тантей прякат», «Вант парсте, козонь озамс», «Вармазейка». Ловномост чарькодят: авторось пек парсте содылинзе эйкакштнень мелест-арсемат, обуцяст. Секс, улема, образонзо алкуксонь ды виевть. «Визькс», «Максозь вал», «Орлик», «Тимуровецт» ды лия ёвтнеманзо совасть эрзянь ды мокшонь тонавтома книгатнес.

В.К. Радаевень прозань вишкине произведениянзо лиссть башка пусминетнесэ — «Вечкевикс содавиксэнъ» (1964), «Шошма леентъ чиресэ» (1967), «Истяк сакшны часиясь» (1969).

Те книгантень кочказь эрзянь содавикс сёрмадьцянтъ ламо ёвтнемастонзо сетне, конат, койсэнек, тензэ удалась седе пек. Сын максовить сёрмадомань неень лувтнень коряс аламодо витнезь.



## ЁВТНЕМАТ

### КОМСОМОЛЕЦЭНЬ СЕДЕЙ

Те ульнесь 1919-це иень март ковсто, зярд Рав леентъ маласо таркатнесэ азаргалесь «чапанной восстаниясь»: эсертнэ, кулактнэ ды ашогвардеецтнэ зяря районсо кепетекшнесь Советской властень каршо. А мезть кортамс, шкась ульнесь а шождыне. Советской од масторось эрва ёндо пирызель ятонь кирьксэ. Рав чирень весе коммунисттнэ ды комсомолецтнэ тюрсть чапановецтнень ды Колчаконь бандатнень каршо.

Комськавтово иесэ комсомолецэс Литвин Григорий Михайлович се шкастонть важдось Черказонь районь милициянь начальникенъ полавтыцякс ды а умок пурнавозь комсомолонь райкомонь секретарекс. Сон кучозель Покш Кужо велев, косто састъ кулят кулактнень зыянов тевет.

Ниле-вете чить Литвин эрясь Покш Кужосо. Мезеяк зыянов эзь муе. Эрясть, лангс ваномс, сэтьместэ. Литвин кармакшнось кавтолдомо: видеть-аволь те веледентъ истят кулятне? Лездыцянозьяк ульнесь парт. Икелевгак, сонсь велень Советэнь прявтось Пекшов Михаил Фёдорович, лия ниле коммунисттнэ, конат ульнесь сестэ велесэнтъ ды вейкине комсомолкась — школасо тонавтыцясь Евгения Георгиевна Ливанова, кона ветясь нилеце классонтъ. Мелявтсть-арсестъ пек, ансяк восстаниянь анокстыцятне кодаяк эзь муеве.

Литвинэнь, сонензэ максозь теветнень башка, ульнесь лияяк, кода мерить, эсензэ, седей ёжонь тебезэ. Цёрась седейшкава вечкилизе од тонавтыцянтъ Ливановань, конанень сестэ топодекшнесь кевейксэ иеть. Ды саиксэлизе те мазый тейтерентъ эстензэ полак. Сын весе виест-мелест путозь тейсть сень, мезе тенст мерезель.

Кулактнень пурнавкшнома пизэдест икелевгак марясь комсомолкась. Вестъ мольсь меельце урок. Евгения Георгиевнань весе тебензэ прядовсть. Варштась часонзо лангс — тонавтнема шкась умок ютась. Аламось учось — кияк мезеяк, баягинесь каштмоли.

«Мезть тейни тосо Лёка бабам?» — арсезевсь тейтересь. Лиссь ды варштась. Бабинесь табуретка лангсо озадо уды. Сазе баягиненть ды сонсь дилиньгавтызе. Удыцясь мик эзь сыр-гозьяк.

Эйкакштнэнь кудов нолдамодост мейле Ливанова кевкстизе бабиненть, мезе истя ульсь мартонзо.

— Иля кортаяк, Эвгакай, — мелявтозевсь сон. — Колмо веть эзинь удо. Мон ведь, тень... Школадонтъ башка, Марианнань кудотнень шлян-нардан. Монашканть, паряк, содасынк? Кудо ютксоак лездан тензэ. Ансяк туян — серьгедьсамам. Ней эрва вене ломанть кедьсэнзэ. Мень-бути тевть, койсэст, якавтыть...

— Паряк, озныть? — кевкстизе Ливанова.

— Арась, эзинь нее. Симемадо рединь. Копорить ёнсто.

— Кувать эрсить тосо?

— Чокшне кода пурнавить, валске малас сёвныть яла кинь-бути. Од властесь, марят, мелезэст эзь туге...

Седе тов тонавтыцясь кевкстнеме эзь карма. Сеске теде ёвтась Литвиннэнь. Веть ванстызь ды мик кунсолызыгак. Виде, кулактнэ анокстыть восстания. Ансяк зярдо, теде кодаяк эзь саво марямс. Литвин сеске озась айгоронзо лангс ды виртнень пачк, кува седе маласо, ливтязь ливтясь районов.

— Кулактнэ неть зыяновт, — мерсь тензэ райвоенкомось, зярдо сон ёвтнизе, мезе моли Покш Кужосо. — Минек районсоак зярдыя велесэ кармасть пряст кепсеме. Эсенек виенек, сесень вант, а карми сатомо каршост. Энялдынек Самаранть икеле. Алтасть. Вейке эшелон течи чопоньпелев карми улеме Черкасы станциясонть. Бути мезе, — лездатано.

— Валскес мертядо теске удомодо? — Литвин кевкстизе военкомонтъ. — Авам сась Самарасто...

— Удодо, — ков-бути капшамсто мерсь военкомось, — ансяк ванодо, илинк стувтне, кодамо шкась.

Литвин лишментъ аравтызе конюшняс ды чийсь квартиразонзо. Авазо кенярдозь каявсь каршонзо, кутмордызе ды палызе, прок вишкинестэ.

— Ванта, кода моли тетъ милиционерэнь оршамопелесь, — варштызе авазо прясто пильгс. — Виде-паронь цёраломань. Ёжоткак, неяви, аволь берянь.

— Седе вадря а ков, авай. Аштек аламось, тонгак ва киштеме туят. Тон эзик стувто Женькань? Мон ёвтнинь тетъ эйстэн-

зэ... Ней минь таго вастовинек мартонзо. Сон Покш Кужонь школасо тонавтыця. Ванды кортан мартонзо. Чинь-кавтонь ютазь усктан чиявтомонзо. Кода тон тень лангс ванат?

— Мезть ней кевкстнят? — певтеме вечкезь варштась Анна Кирьяновна цёранзо лангс. — Те сонсь валдо уцяскась валгсь аволь шождыне кить лангс. Содаса, тон берянь а кочкат.

Зярсья кортасть се вестэнтъ ават-цёрат, весе эрямоост арсизь икелепелев. А берянь сон карми улеме. Удомс а пек ламо савсь тенст. Валске рана стясть. Литвин ансяк кенерсь аламодо ярсамо, сеске састь кисэнзэ. Эрявсь модемс отделэв. Начальникеськак туекшнесь ков-бути. Савсь сёрмадомс пек эрявикс конёвт.

Секс мекев Покш Кужов Литвин сырғась кеменце чассто. Ардсь секе киванть, кува сакшнось. Айгорось кандсь эйсэнзэ шождынестэ. Аванзо марто кортамодо мейле цёранть ёжозо пароль. Мелявтсь ансяк вейкеде: кода оймавтомс восстаниянь кепедеме бажицятнень. Истямо покш тев марто сон вастовсь васенцеде. Косто содави, кода весе те лиси? Аволь аламо марсесь кулактнэнь азарсьчидест. Содась седеяк, кода сынь нарьгасть коморозост понгиця коммунистнэнь лангсо. Ледемс эзьледне. Повсесць эйсэст, живстэ эй алов ёртнесть, мода потс вальсесць. Кутьмерезэст вете ужо марто тештькак керсесць. Теде Литвин эзь пеле. Ды, паряк, мезеяк истямо а улиак? Мейс икелев теде мелявтомс? Вансынек. Тосо карми неяви, мезть тейнемс эряви. Ды сон арсезевсь Женькадо, од тейтердентъ. Пек паро тейтересь, мазыйгак, комсомолка, видестэ чарькодьсы весе сень, мезе моли масторонтъ лангсо те шкастонть. Сонзэ, Литвинэнь, комськавтово иензэ. Ансяк ней шкась пек стака. Аволь сэтме эрямонь ки кочкась сон. Школасо тонавтнесь парсте. Вечксы ловноманть. Кемнилее иесэ кармасть роботамо заводсо. Сёрмадызе прянзо од ломанень революционной кружокс. Ловнось революционной книгат, большевикень газетат. Оружия марто тюрсь од властентъ кис. 1918-це иестэ совась комсомолс. Тердизь сонзэ роботамо милицияв. Кеместэ савсь тензэ тюремс Советской властенъ врагнэнь каршо. Ней велесэ кемекты од койтнень. Чинек-венек тюремань икельце таркасонть. Ансяк мезеяк а теят, вечкемась эри од ломантнень седейсэ истямо шканеяк, а пели пулянь вешкемадонтькак, сабялянь гайнемадонтькак. Алкукс сырёмсь цёранть седеезэ, а ёвтавияк, мезе моли потсонзо. Истя эрявсь тензэ те тейтересь — сон

нейке ардоволь икелензэ ды ёвтавлинзе тензэ седей потмаксонь, лисьмапрянь ведень кондямо ванькс мелензэ. Кемсь: тейтереськак панжсы тензэ валдо седей ёжонзэ. Тень ловнызе Женькань сиянь пикстерькав сэнь сельмтнестэ васенцеде вастомост. Ды учось. Течинь вастомась пингень пес сюлмасынзе сынст вейс. Седе кеместэ ноцковтынзе панст ведьметнень. Айгорось седеяк эрязасто тусь.

Литвин пачкодсь Покш Кужо веленть удало вирентень. Эзи-зе маря виренть сэтэмечинзэ ды тундо ёнксонь мазычинзэяк эзизе нее. А кона шкане ульнесь таргсемс оймензэ вирень ванькс коштсонть. Сон капшась... Седеезэ марясь мезе-бути истямо, кона кодаяк тензэ пестэ-пев эзь чарькодеве. Учось вастома...

Те шкастонть меельце латконть трокс ютамсто сонзэ пилес каятось ломанень вайгель. Кирдинзе панст ведьметнень. Айгорось тусь седе састо.

— Лоткадоя, Литвин ялгай! — серьгедсть тензэ латкованть пурдыця кинть ёндо.

Сон таргизе револьверэнзэ ды лоткавтызе айгоронть.

— Ков тынь? — пешксэнь тусто таркасто лиссь эйзэнзэ Каргонь Максим, кона а умок сась Якстере Армиясто ды кочказель крайкомонь председателекс.

— Покш Кужов, — кекшизе револьверэнзэ Литвин.

— Велявтодо мекев, — капшазевсь Каргин. — Тосо восстаня... Кулактнэ кепететсть... Ютазь вестэ саизь ды пекстызь весе коммунистгнэнь, зярья активистт. Понгсть райисполкомонь предэс Исайкин ды милициянь прявтось Байгин. Сынст ки лангсто кундызь.

Литвин аламось талакадокшнось, сеске валгак тензэ эзь муеве. Ансяк зярдо чарькодсь, кодашка тев прась сонзэ лавтовтнэнь лангс, кевкстизе:

— Тон кода тезэнь понгить?

— Мон веленть те песэ эрян. Пекшов кенерсь тень кулянь пачтямо. Седе курок ардозан районов. Ласте эзинь кенере озамо. Латашов марто кавонек ношкстынек. Велестэнтэ лисемстэ леднест лангозонок. Сонзэ ранизь. Кулома лангсо. Мезть тейнемс?

«Ушодовсь, — арсезевсь Литвин ды мельтне прясонзо лаказы лаказевсть. — Эряви капшамс! Бути пекстатнень те шкас эзизь ледне, снартомс менстямс сынст». Кирнявтсь айгоронть лангсто.

— Озак! — мерсь Каргиннэнь. — Козоньгак апак лотксе ардт военкомонтень. Ёвтник. Лездаст.

Каргин озась, ды лишмесь ливтязь ливтязевсь.

Литвин чийсь, кода ансяк виезэ сатотсь. Велентень совась алопе ёндо. Кияк эзизе лоткавто. Ульцянтэ кувалт моламстэ веломаньгак эзь нее, каршошонзояк кияк эзь понго. Весе ортанеяк, вальматнеяк пекстнезь. Мик кискатнеяк эзь онго. Истя пек тандавтнезь велесь. Ансяк покш сэденть трокс ютамодо мейле Макар Ивашонь кудостонть лиссь каршонзо Евгения Георгиевнань ялгазо Антонина Николаевна.

— Григорий Михайлович, — чийсь эйзэнзэ, — совадо седе курок миненек. Илядо яка веленть куншкав. Тосо кие соды мезе моли. Ламо пекстазть. Леднесызь, келя, курок. Тынк эйсэяк вешнесть. Кокак мольгядо — пекстатадызь. Аядо, кекшеде. Чокшнес, паряк, оймай. Чоподава мон ильтятадызь Женьканень. Сон пек учи эйсэнк...

Аёвтавияк, кодамо паро ульнесь Литвиннэнь марямс те вечкевикс лементь. Аламось кавтолдсь. Паряк, кадовомс, видеяк, Женька марто? Паряк, кекшемс. Седе тов мезе? Кие лезды пекстазь ялгатненень? Ёндо локс ютасть неть мельтне пряпотмованзо ды седейганзо.

— Сюкпря тенк, Антонина Николаевна, — кеместэ сювордызе од тонавтыцянтэ лембе кедензэ. — Молян ансяк варштан ды сеске — тей. Тыненк вана кодамо энялдомам. Вирьсэнтэ, Вишка Кужо ёно кинть чиресэ, те ёндо васенце латконтэ, Латашов Архип стакасто ранявозь. Тосо тарад лангсо сон. Тувако больницав ускинк.

— Мезе истя сонзэ марто теевсь?

— Неть, чапантнэ...

— Валске, паряк, — арсезевсь тонавтыцясь. — Миньгак маринек те леднеманть. Илядо мелявто. Нейке усксынек.

— Уледе шумбра. Сюкпря Женьканень...

Антонина Николаевна таго снартнесь икелензэ энялдомо. Литвин кунсолемояк эзь карма — яходсь кедьсэнзэ ды капшазь тусь Чагаень кавто этажсо кудонтэ ёнов. Тосоль се шкастонть волисполкомось. Перьканзо — ломанть, прок вирь. Пижнить, шалнить, сёвннить, прок модань явшемстэ. Литвин ютамсто совесесь кудов. Тесэяк снартнестэ а нолдамс сонзэ. Апак корта чемоданстонзо сайсь колмо гранатат ды капшазь лиссь.

Сеске чийсь талныця ломантнень юткс. Сынъ истя лажность ды кинень-бути эрдекстнезь\* кортасть, мик кияк эйстэст эзь варштаяк ёнонзо. Совась мекев-васов эвтиця ломантнень юткова покш залонтень, кона пешксель а содавикс ломанде ды суволдсь, прокярмунка, кармась эцеме волисполкомонь председателенть кабинетэнзэ пелев, косо сонензэ аволь весть савкшнось улемс. Пачкодсь малав ды лотказевсь: кенкшенть кавто пельга аштесть кавто а пек сыре цёрат, кедьсэст винтовкат. Верьгизт, авольломанть. Сельмсэст латтадызь. Савсь лоткамс. Мезть тейнемс?

Учомс кувать эзь саво. Панжовсь кабинетэнь кенкшесь, ды кедьсэнзэ конёв лист марто каштансто лиссь Латков. Тень Литвин содылизе. Пекшов ёвтнесь эйстэнзэ: сон велесэнтъ весе кулактнэнь прявт.

— Вана те сёрмадовксонтъ коряс ливтеде эйсэст подвалстонтъ кардазс кевень стенанть ёжос, — максызе конёвонтъ винтовка марто тненень. — Патрононк ламо?

— Ветень-ветень сатыть эрванть пряс, — чикоргадсь вейкесь.

— Эрде эно, — кончтась тенст Латков. — Кувать тевенк илядо таргсе.

Залсонть ломантне шалнозевсть ды эвтезевсть мекев-васов.

— Леднесызь... Бусран марто Карязт...

— Неть тетяст-авасткак килькшка понгавтнесызь.

— Кода истя?.. Судтомо?..

— Мень нетнень законт?..

— Чатьмонедэ! — пижакадсь Латков. — Тыньгак тов бажатадо? — невтсь подвалонть кенкшенть пелев.

Весе чатьмонезевсть.

Бусран капшазь панжизе подвалонть кенкшенть ды кармась конёвонтъ коряс сеереме:

— Пекшов, листь!

Сынсь арасть аламодо ве ёнов ды кармасть учомо. Каряз кальдерьгавтызе винтовкань затворонтъ.

Весе сэтъмемсть. Карвонь ливтямоськак маряволь. Ломантнень ютксто кие-бути аварьгадсь лайшема вайгельсэ. Те аламос таймаз-кавтынзе Каряз марто Бусранонь. Се шкастонть Литвин чиезь ютась вакскаст ды кирнявтсь подвалонтень, тосто пижакадсь:

— Кунсолодо, восстаниянь кепедицят! Тестэ кияк а лиси, зарс а арды тей чекань отрядось ды а кундсетядызь тынк контр-

\* Эрдекстнезь — сюдозь.

революциянь тевенк кисэ! Отрядось ки лангсо. Курок тесэ карми уleme. Снартындеряй кияк эйстэнк совамо тей эли ледеме, сенень вана! — невтсь тенст граната. — Вейкеяк эйстэнк живстэ а кадови!

Те прок маней пурьгине цярадсь восстаниянь кепедицятнень каршо. Мик оймень истямо сайницятнеяк, кодат Бусран марто Карязт, аламос талакадокшность. Весе лиятне юргозь-вешкезь кармасть лисеме кудостонтъ. Бусран марто Каряз седе курок пекстызь подвалонтъ ды совасть кабинетэнтень. Залонтень кадовсть ансяк кавто ванстыцят.

Подвалсонть ней ульнестъ комсьнест. Милициянь начальникесь Байгин ёжовтомоль. Пек чавизь саемстэнзэ. Литвин ёвтнизэ тенст, кодат тевтне.

Восстаниянь кепедицятнень ёжост ульнесь а вадрытнестэ. Каштмольсть, эрвась арсесь эсензэ эйстэ.

— Кода, тынк койсэ, видестэ кортась Литвин? — окойники кевкстинзе прявтост Урнаев, кона инязоронь армиясонть ульнесь подполковникекс.

Зярсья весе каштмольсть. Урнаев талакадозь ваннось лангозост.

— Сон кода тевесь ашти? — човонензэ ёзязь кортазевсь Якшамов. — Мон ломанесь военнаян. Аламодо содасынь якстертнень коест-кирдаст. Сёпомс а мезть. Сон видестэ кортась, апак пеле. Отряд сы. Мон лия ёндояк чультъ-чалъть маринь. Седе курок эряви теемс вейке пе.

— Кодамо? — сормизе коняно Урнаев.

— Монь койсэ, нейке нолдамс пекстатнень, эстенек сралемс седе курок. Мон икелеяк кортынъ. Анокстынек беряньстэ. Алтазь оружиянтъ эзизь уско тенек. Виев отрядонтень покш зыян а теят вете винтовкатнесэ. Сянго пулемётонтъ а изнясак. Сави учомс тенек, атят, седе паро шка.

— Те а виде! — рангстась Карязов. — Монгак порох чине никсинь. Илядо пеле. Литвин тандавтни эйсэнек. Сонензэ лия а мезе теемс. Отрядонтень а косто саевемс. Весе сынст виест ней аравтозь Колчаконь каршо. А мезть учомс. Пекстатнень леднемс седе курок!

— Мейле ков? — кевкстизе Урнаев. — Мезть карматано тейнеме, сындеряй отрядось? Мезе аравтат пулемётонтъ каршо?

Уракадсть восстаниянь ушодыцятне, сёвнзевсть вейкествейкест марто. Ды ялатеке прасть вейке мельс — нолдамс



пекстазтнень. Зярдю мольсть кенкшенть панжомо, тонат эзизь кеме: эзьт лисе. Ушодовсть кортамот. Литвинмезнень теке эрявськак. Кодаяк шканть таргсемс отрядонть самс. Меельцекс састь истямо мельс: кулактнень марто кортамо подвалстонть лиси вейке ломань.

Подвалонтень пекстазтне чарькодсть: восстаниянь кепедицятне пупордясть, секень вант, потазевить. Теке шкастонть весе маризь, кода кардазонть пижнесь Каряз, вешсь керосин подвалонть валномс. Содазь, истямо шкане лисемась, секень вант, канды зыян: а лисемаськак мезеяк паро а алтни.

— Кемень минутат тенк, — меельцеде пшкадсь тенст Бусран. — Бути кияк а лиси те шканть ютамс, подвалонть кирвазтьсынек.

Аламос каштмольсть.

— Монь койсэ, ялгат, киненьгак вейкенень лисемс эряви, — пшкадсь Литвин. — Те шкастонть, паряк, ардыть менстямонок. Бути мертядо, мон лисян.

— Тон парсте арсик, ков тетя сави эскельдымс? — кевкстизе Исаев.

— Мезе илязо уле, киненьгак лисемка, — пшкадсть ялгатне. — Учомась а свал парс вети.

Седе тов кортамонть эзь саво поладомс. Сонзэ сезизе сянгора пижакадома:

— Шканк ютась!

Литвин кавто гранататнень максынзе Пекшовнень, револьверэнзэ кекшизе ожа потмозонзо ды лиссь.

Сонзэ сеске ветизь кабинетэнтень, Урнаевнень. Тосо ульнесть кеменьшка ломанть. Сынь озадолить кавто ёнга стул лангсо. Прявтост аштесь столенть песэ. Литвинэнь лоткавтызь кияк-сонть куншкас, кияк эзизе терде.

— Ёвтыка, Литвин, кода тон понгить тезэнь? — кевкстизе Урнаев. — Минь тонь эзидизь саекшне.

— Мон монсь сын, — пшкадсь Литвин.

— Мейс? — койсэнзэ дивазевсь Урнаев.

— Сынь мартонк кортамо. Паряк, чарькодтядо, кодашка ильведькс теиде, кенгелиде ломантненень ды кепедиде восстания Советской властенть каршо. Арседея, мезе те истямось?..

Восстаниянь кепедицятне зярсыя каштмолезь аштесть ды ванность карадо-каршо. Кияк эйстэст тень кувалт кортамо эзь карма.

— Кунсолока, Литвин, — окойники кортазевсь Урнаев, — ёвтыка видьстэ, апак кенгеле, видеяк учотадо лездыцят?

— Аволь учан. Парсте содан: сыть.

— Зярдю?

— Курок.

— Сестэ мезе, миненек кадовсь вейке — кепедемс кеденек? — пейдезевсь Урнаев.

— Бути видьстэ ёвтамс, — кортазевсь Литвин, — лия тыненк мезеяк эзь кадово. Чарькодеде, Советской властентень тынь мезеяк а тейтядо. Сон аравтозь пингень пингес! Арась масторонть лангсо истямо вий, конанень куш аламос лоткавтоволь Советтнень икелев молемаст. Арась, ды а улиак! Кить молить мельганк? Эсенк велень ломантнеяк тенк эзь сыр-гавтово. Монь койсэ, пек парсте теевлиде, бути максовлинк оружиянк велень Советэнтень ды апак тюре тукшновлиде кудова.

— Вий, мерят, арась истямо, кона цидярдоволь Советтнень каршо? — лаказемсь Латков. — Минь аволь эйкакштано. Парсте содасынек. Чилисема ёндо даволкс сыть Колчаконь армиятне, обед ёндо — Деникин, венть ёндо — англичантнэ. Советской республикась саезь а покш кирьксэс. Курок Колчак юты Равонть трокс, вейсэндыви Деникинэнь ды англичантнень виест марто. Вейсэ сайсызь Московонтень. Ды тень лангс прядовить Советтнень чист-вест. Мезе тень кувалт ёвтат?

— Тень а стака неемс икелев, — Литвин варштасть човазь кинжалонь кондыт вановттнень каршо. — Васняк, Колчак Равонть трокс а юты. Сонзэ курок велявтсызь мекев. Истя карми чиеме, армиянзояк сравтнесынзе солдатонь пес. А седе паро эрямо учи лия генералтнень ды англичантненьгак. Ломантне парсте содыть: ансяк Советской властесь максызе тенст алкук-сонь олячинть. Секс ванстсызь те властенть сестэяк, бути кепетить каршост масторлангонь весе капиталисттнэ.

— Минь кить? Минь, паряк, аволь ломанть? — лиссь столенть эхистэ Каряз. — Чарькодть, якстерень пулопелькс! Минь аволь Советской властенть каршо. Минь Советтнень кисэ, ансяк коммунист тосо илязт уле!

Литвин эзь кенере каршонзо пшкадеме. Залстонть каятотесь вайгельть. Вейке ванстыцясь панжизе кенкшенть ды ёвтась:

— Сянгаевень штабсто ломань, конёв марто.

— Нолдынк.

Совась аволь сэрей, ёнсто оршазь ниленьгеменьшка иесэ цёра, мольсь столенть ваксс ды венстясь Урнаевнень конёв.

Тона васня ваннызе, мельспаросо пейдзевсь ды стясь.

— Кунсолодо весе, тонгак, Литвин, — ды валтнэнь чуросто ёвтнэзь кармась ловномо: «Урнаев подполковникентень. Черказонь коммунистнэ весе леднезь. Властесь минек кедьсэ. Весе велетне сыргасть минек знамянть ало. Кепединк эсенк велетнень ды Керькужо марто Човарлеенть трокс сыргадо Самара ёнов. Оружия тенк максыть Човарлейсэ. Икелев! Пазонтъ марто, Сянгаев». Чарькодиде? — кевкстизе Литвинэнь. — Муевсь каршонк виесь? Сон тескель!

— Вана кода! — чикордыця вайгельсэ рангстась Каряз. — Муевсь виесь, якстере сволочь! — ды сыргась Литвинэнь пелев.

— Илядо сыргсе таркастонк! — рангстась Литвин ды кепедизе гранатанть верев. — Бути чирьказевтядо, вейкеяк эйстэнк живстэ а кадови. Чарькодеде: тыненк кенгелить. Мон ансяк сынъ Черказсто...

Аламос весе энгамсть. Ялатеке паро учомс а кона ёндо: сёлтось сезевсь.

— Пизёлкин, Тумнов! — пижакадсь Каряз ванстыцятнень. — Саинк большевикенть! Нейке лединк!

Литвин, анокстась гранатанть кирдэзь, тохмадизе кенкшенть ды ношкстась улыцяв, кияк эзь кенере лоткавтомонзо.

— Кургстонк менстинк! — Кир-де-де! — пижакадсь а паро вайгельсэ Каряз ды ношкстась мельганзо.

Кадовикстнэяк бизмолгадсть.

— Кирдеде! — пижнэсть улыцясо аштиця ломантнень. — Оргоди ва! Кундынк седе курок!

Литвин те шкане улынэсь уш улыцянтъ куншкасо. Сонензэ эрявсь ансяк вейке — таргамс шканть. Кадык пижнить. Улыцясонть, зняро ломантнень ютксо, леднеме а кармить. Ансяк стьяко истя арсесь. Кие-бути пижакадсь. Литвин варшталъ уда-лов ды неизе, кода Каряз саизе вейке ванстыцянтъ кедьстэ винтовканть ды венстизе сонзэ пелев. «Мезть тейнемс? — арсезевсь Литвин. — Паросо те а прядови. Кадык чийть мельган седе васов». Мелензэ сезизе винтовкасто ледема. Пулясь вешкезевсь пилензэ вакска. Сон ношкстась улыцянтъ кувалт верепе ёнов. Ванносъ куншкасо сёлтонть трокс венстызь сэдентъ пелев, вирентень ветия кинть лангс.

— Кирдеде!

— Оргодсь! — пижнэсть мельганзо.

Те шкантень лиссть кудостонтъ Латков, Бусран, Тумкай, Пизёл ды весе ношкстась Литвинэнь мельга. Улыцянтень пурнавозтнэсть ламот ношкстась се ёнов, чийсть ды ракстерь, кода Каряз эскели кичкере пильгсэнзэ.

— Мезе вантадо? — чикордозь лексесь сон. — Менсь ведь! Лоткавтынк!

Литвин чийсь яла ды косто-косто леднесь револьверстэнзэ верев. Чагаень лавканть маласо зяряя цёрат пиризь кинзэ ды кундыксэлизь. Сон кепедизе револьверэнтъ — патрононзо весе. Таргизе меельце гранатанть. Икельдензэ цёратне ношкстась. Те шкастонть Карязмезть чийсть малазонзо, секень вант, кундасызь. Литвин ве ёнов, чаво таркас ёртызе гранатанть. Каятотсь пурьгинень кондымо виев зэртъ. Весе пракшность. Виде, маштовомс кияк эзь маштово. Литвин те шканть эзизе менстя. Сон чийсь лавканть видсь, пурдась сёлтонть пелев. Ды сестэ неизе Евгения Георгиевнань, кона сьль верепе ёндо. Сон пек парсте оршазель, мазыйдеяк мазый, капшась сонзэ марто вастовомо. Лоткамс шка арасель. Удадо пижнэсть азаргадозтне.

— Вастомазонк! — Литвин яходсь кедьсэнзэ вечкевикс тейтерентэнъ ды ношкстась сёлтонть трокс.

Ды сестэ понгсь каршонзо цитница од кемсэ ды ревень кедень од шубасо цёра. Прясонзо цитница коня марто картуз. Лоткась ды аламос вансь Литвинэнь мельга. Зярдэ маринзе пижницятнень, ношкстась сасамонзо. Чийсь, чийсь — кодаяк эзь сасавт. Ёртызе шубанзо ды ношкстась седе шождынэстэ. Ялатеке эзь стардово. Мейле ёртынзе кемензэ ды цюлкинесэ сасызе удалце улыцянтень лисемстэ. Ансяк кодаяк эзь кирдеве тензэ. Кармась сеереме, чийсть лездамо цёранзо марто Роштова. Колмонест кодаяк а кирдеви. Ужосо кудостонтъ лиссь оштё вейке цёра. Ниленест а правтови. Роштовань кодак стёгизе пиле юрс, се ёртовсь ловонть потс ды мик эзь стьяояк. Сестэ Роштовань цёрась каподсь пирявксонть ёжосто тумонь рицяга ды сень эйсэ вачкодизе Литвинэнь пря ланга. Се шкастонть пачкодсть тозонь азаргадозь пижницятнеяк ды кеменьшканест кармась мейсэ понгсь цёранть чавомо. Улыцясь пешкедсь ломанде.

Чиезь чийсь тозонь Евгения Георгиевна. Сон сеске чарькодсь, мейсэ теvesь. Ёндолкс ёртовсь маштыцятнень куншкасо ды пижакадсь:

— Кадынк! Нейке оргодеде маластонзояк!

Вайгелезэ каятотсь истя пштистэ, мик сехте азаргадотне-як аламос энгамкшность ды кадокшнызы пельскулозь Литвинэнь. Тейтересь пульзясь верьсэ пургсезь ловонть лангс ды нуварьгадсь вельксээнзэ. Сорныця кедьсэнзэ кепедизе вериязь прянзо ды лепштизе мештеэнзэ.

— Мезе истя те? — авардезь кевкстнесь сон. — Мейс? Варштадо, паро ломанть!

Литвин панжинзе раужо сельмензэ, конаньсэ оштё тештекс палсь эрямос бажамось. Сон содызе, кие велькссэнзэ.

— Сюкпря тенк, Евгения Георгиевна, — тошказевсть сонзэ верев турватне. — Илязт кенярдо. Монь таркась чаво а кадови... — Сонсь снартнесь стямо, ансяк эзь чалгаво пильгензэ лангс. — Энялдан икеленк, — тошкась тейтерентень, — илинк стувто нетнень идем ракшань чачост...

— Арась, мон тонь киненьгак а макстан! — авардезь тошкась Евгения Георгиевна, сонсь седеяк кеместэ лепштизе мештеэнзэ Литвинэнь прянтъ ды кармасть палсемензэ.

— Каряз, на тетъ сердешка! — серьгедсь удалдо раужо сакало атя.

— Мезде тандадыть? — Латков тохмадизе тейтерентъ пелев Бусранонь. — Теяк: паро ломанть! Мезе вантадо? Чевельдинк кавонест!

— Прядынк седе курок, — пижакадсть удалдо. — А мезть ваномс лангозост!..

Ды таго суволгадсть азартне. Коштканть ёндолкс кивчкадсь сердешкась. Мельганзо пертьпельксэнтъ лазызе Евгения Георгиевнань пшти вайгелесь:

— Велень паро ломанть! Мезе вантадо? Идинк чумовтомо ломаненть!

— Потомдынк кирьгапарензэ! — кие-бути пижакадсь. Сеске вачкодизь тейтерентъ чама ланга. Текень мельга велькссэнзэ кивчкадсь сердешкась, ды тейтересь ёртовсь ловонть потс.

Ульцянтъ ёндо чийсть кеменьшка од ават. Сынъ капшазь каявсть маштыцятнень куншкас, косо Ливанова ульнесь ёжовтомо.

— Тынь ков? — лоткавтыксэлинзе Латков.

— Оргодть икельденек, гуень кирьгапарь! — нулгодезь варштасть лангозонзо аватне. — Илинк токше минек тонавтыцянок. Сон минек ловномо тонавтымизь. — Саизь Евгения Георгиевнань ды тустъ мартонзо.

Латков варштась плошка сельмесэнзэ мельгаст, таргась зептэнзэ пеель ды чопавтсь маштыцятнень юткс.

Седе мейле зярсыя суволдсть стакасто лексезь. Марявсть прок тинге лангсо ботамот, а паро валсо сюдомат ды кроямот.

— Кенгелетядо, — меельцеде каятотсь Литвинэнь вайгелесь. — Весе а маштневтяно тенк!

Се шкастонть пурьгинекс каятотсь цёрань виев вайгель:

— Ор-го-де-де-е! Чекань отряд тей арды!

Маштыцятне аламос талакадокшность. Вереv сельмест келейстэ тетъкезь ванность вейкест-вейкест лангс. Сынъ эзть кеме. Марявсь истямо вайгель эли, паряк, эзь марявоак?

— Литвин, ялгат весе олясот! — омбоцеде каятотсь секе вайгелесь.

Проулкась сеске шлязь шлявсь. Конат ульцянтнева ношкстасть, конат латотнень удалга, соламо ушодыця ловонть потмова, пирень-пирень трокс. Карязмезть оргодсть вирентъ ёнов. Кеменьшка минутань ютазь кияк тозонь эзь кадово. Верьсэ пургсезь ды нерьгезь ловонть лангсо аштесь ансяк Литвинэнь сезнезь-лазнозь рунгось. Пертьпельксэсь сэтьмемсь. Валгиця чись весе якстерьгадсь, прок пургсезь чумовтомо ломантнень ванькс верьсэст. Секс, бульчом, капшазь кекшсь Чихан пандонть удалов.

Сестэ стамбаро, лембе кем ланга карсезь аршинэнь кувалмосо карензэ ускозь, мольсь сезэнь кодгемень сисемшка иесэ сыре атя, Ласкин Филипп Спиридонович, мартонзо — школасо тонавтниця кавто цёрынеть.

— Живат? — атясь комась Литвинэнь рунгонть вельксэс.

Каршонзо пшкадиця арасель. Филипп Спиридонович стакасто видимсь, саизе прястонзо зярся панкс марто малахаензэ ды чекась-покась.

— Удок сэтьместэ, Григорий Михайлович, — марямга кортазевсь сон. — Эсенек властенъ кис, валдо видечинтъ кис тон пукык прят. Истятнэнь ломантне а стувтсызь зярдоак.

Мейле цёрынетнень марто Легедень кардазсто кандсть олгт ды сынст лангс кепедизь Литвинэнь оштё лембе рунгонть.

— Вана кодамо сон алкуксонь паро ломанесь, — цёрынетнень марто котась атясь. — Весемэнзэ максызе ломантненень. Эсь прянзо пукызе сынст кис...

— Минь течи школав учинек эйсэнзэ, — авардемась кирдезь кортазевсь вейке цёрынесь. — «Интернационалонтъ» мо-рамо тонавтсь эйсэнек.

Те шкастонть ардсь тозонь чекань отрядось, мольсть подвалстонть менстызтнеяк, конатнень сатотсь виест пачкодемс. Мартост ульнесь комсомолонь райкомонь членэсь Кемаев Николай. Весе сайнизь шлёмост, картузост, шапкаст ды кашт-молезь пурнавсть Литвинэнь рунгонть перька.

— Эх, Гриша, Гриша, кода тон манявить сюдозь-азозь чапантнэнь? — прок жив марто кортазевсь Кемаев.

— Арась, цёрам, сон эзь маняво, — пшкадсь Ласкин атясь. — Кода мон чарькодьяса, Григорий Михайлович прянзо путызе ялганзо кисэ, конат пекстазельть кевень каськасонть.

— Истя, Ифя дедай, — кувакасто уктасть Кемаев. — Ялганзо ды лия ломантнень кисэяк прянзо зярдояк эзь жаля. Тень минь умок содасынек. Истямо уш сон, комсомолецэнь седеесь...

\*\*\*

Ней те таркасонть ашти Литвинэнь пси седеенть ладсо валдос-то пальця якстере теште марто ашо обелиск. Шкань-шкань сонзэ артыть одс. Эйсэнзэ нурыкинетэ сёрмадозь: «Тезэнь 1919-це иестэ Советской властенъ ятгнэнь каршо тюремстэ чавовсь комськав-тово иесэ комсомолецэсь Литвин Григорий Михайлович».

Перьканзо, кирьксэкс путозь, касыть кудряв килейть, конат тарадсост ды лопасост чинек-венек кортыть зярдояк а сезевиця эрямодонть ды валдо уцяскадонть. Сеедьстэ содавтне-сызь те тарканть велень од ломантне. Аволь чуросто сакшнось ды аштекшнесь килейтнень ало нуцьканзо марто Евгения Георгиевна Ливановак.

### КОМСЬ ИЕНЬ ЮТАЗЬ

Сентябрянь вейке маней чистэ улыцяванть чуросто эске-лязь мольсь пограничник, командир. Сон кенярдозь ваннось кудотнень лангс. Моли-моли, лотки аламос, варшты кодамо-як кудо ёнов ды таго сырги. Вана пачкодсь колхозонь умарь пирентень. Умарины ало, столь экшсэ, ашти озадо сыре, ансяк зярс шумбра атя. Чамазо валдо, сакалонзо миткелень кон-дят ашот, черензэ ансяк човоньсэнзэ — теке сиянь. Ве кедезэ путозь столенть лангс, омбоцесэнтъ кирди кургсонзо тонгозь пипканзо. Сельмензэ ваньть пиренть куншкав, косто маря-вить эйкакшонь вайгельть. Атясь а чирькиак, ансяк косто-

косто пухади пипкастонть ды нолды кургстонзо качамонь куванкс. Вейке ожолгадозь лопине, теке сырнень панкске, прась чувтонть лангсто ды лоткась атянь пряс. Сон саизе, пейдэзь варштась ды путызе икелензэ. Се шканть меньш-ка эйкакшт чийсть атянень ды энялдозь кортазевсть:

— Вася покштяй, прядык исенъ ёвксонть. Минь весе празь умартнень кочкинек. Мезе мерить, весе теинек.

Ашназа пря вейке цёрынесь кевкстизе:

— Вася покштяй, а се од цёрась, конадо ушодокшныде ёвтнеме, комсомолец ульнесь?

— Эно кода, — стукадизе атясь пипканзо столь ужонтень. — Содазь, кить истя героекс тюрьстэ сестэ. Ойседе, прядса эно.

Пионертнэ серьгедизь ялгасть ды курокасто ойсестэ покштянть перька.

Командирэсь оштё весть варштась умарь пиренть келес ды тусь седе тов.

«Прок сон, — арсезевсь модемстэ. — Пипказояк истямо. Вайгелезьяк нейгак пилесэнь ашти. Атясь прок те, ансяк аволь тесэ сон эрясь. Косо се вишка кудынесь, конань эйсэ мон уль-нинь комсь иеть теде икеле? Косо ульнесь чаво тарка, кассь карксамга тикше — ней истяшка чувтт. Ды велеськак лияк-стомсь. Паряк, аволь те велеськак?»

Зярсья сон якась ды ваннось веленть. Школанть икельде понгсть каршонзо ниле од тейтерть ды кавто од цёрат, конат, кенярксовсто кортнезь ды раксезь, састь парашютонь выш-канть ёндо.

— Аштедея аламос, од ломанть, — пшкадсь тенст коман-дирэсь, — ёвтынка, инеськетъ, те Пекшазейка велесь?

— Самай сон, командир ялгай, — мерсь вейке од цёрась, — ансяк ней колхозонок Карл Марксонь лемсэ.

— Ёвтынка, жив эли аволь Селей атя? — кевкстинзе воен-ноесь.

— Василий Трофимович? Жив! — кенярдозь пшкадсь ом-боце од цёрась. — Сон оштё доброволецэкс бажи Якстере Ар-мияв. Зярдю марьясь Хасан эрькенть вакссо тюрематнеде, чинь-чоп эзь тукшно репродукторонть вакссто. «Эх, мери, улелельть сизьгемень иень, оргодевлинь тов». Ней жо вейксэньгемень, аламодо ламо марявить — пели а сайсызь солдатокс.

— Косо эри Василий Трофимович? — кенярдозевсь коман-дирэсь.

— Весемед мазый таркасонть, — невтсть колхозонь умарь пиренть ёнов. — Аядо, миньгак мартонк мольтяно. Паряк, покштясь мезеяк ёвтни тенек. — Ды сыргасть весе вейсэ.

Ветешка минутань ютазь сынъ ульнесь уш умарь пиресэньт, рацякадозь чувтнэнь ало. Мольсть столенть ваксс, косо Вася атя ёвтни пионертенень икелень ушодовт ёвтнеманзо. Эйкаштнэнь сельместкак а липадить, истя мелявтозь вануть сиянь сакало атяньт лангс. Сыцятненъ ёнов мик эзть варштаяк.

Од цёратне ды од тейтертне, конатненъ марто сась командирэсь, лоткасть столенть маласо умарь чувто алов, ды сынъгак кармасть кунсолосо.

Вася атя самай прядыль:

— Истя зярсыя майсинь мартонзо. Уцясказонок, виемсь. Ды одоль алясь, виевель. Мейле, зярд сась Якстере Армиясь, сон озась ласте — ды теке неевтезэ. Туемстэнзэ мик кыргызон каяккшнось, прок эсень тиринь цёрам ильтия. Мерсь а стувтан, изнямодо мейле сан содавтомот. Ансяк эзь са мекс-бути. Пек уш а пелиця ульнесь. Бульчом, путызе прянзо кодамояк бойсэ. Арась, — таго таргизе пипканзо, — истямось а чавови. Пек виевель цёрась. Истяк, паряк, стувтымим. Вана Хасан эрькенть вакссо тевтнеде ёвтнемстэ ледстнесь истямо лем ды фамилия. Ансяк аздан, те сон-аволь.

Се шкастонть сазь командирэсь ютазь эйкаштнэнь юткова столенть малас, венстизе кедензэ атянтень ды кеме вайгельсэ пшкадсь:

— Шумбрань парочи тенк, Вася покштяй!

Абунгадомадонть атяньт пипказояк прась кедьстэнзэ. Сон стясь ды ваны икелензэ аштиця сэрей ды шумбра командирэньт лангс.

— Аштека, аштека, — понгавтынзе сельмуکشонзо — Лёва, те, паряк, тон? — Васня кавто кедьсэ каподизе кедензэ, мейле лиссь столенть экшстэ ды кутмордызе.

Эйкаштнэ, од цёратне ды од тейтертне апак чарькодть, дивазь ды теке марто кенярдозь, вансть истямо мазый вастовоманть лангс.

Зярд Вася атяненъ сась ёжо, кармасть весень капшавтомо:

— Женя, азё уряжеть кедьстэ путовтык самоваронть! Ды умарть сезнеде. Весемед партнеде. Анокстамс ярсамс эрва мезе. Курдат рестафт. Эрва мезе улезэ!

Сонсь яла мельспаросо вансь Лёвань лангс ды чарась перьканзо, эзь сода мезес кундамс. Мейле кундызе инженть кедте ды озавтызе столенть экшс.

— Косто истя тон тей пачкодить? Эр ёвтнек! — энядозь варштась лангозонзо. — Косо те шканть ульнить? Ведь комсь иеть ютасть седе мейле. Ванта, живат. Мон меринь: истятнэ киненьгак а изнявить.

— Покштяй, те ки? — салава кевкстизе удалонзо аштиця пионерэсь.

— Те самай сон, — кенярдозь ёвтась атясь. — Те самай се, конадо ёвтнинь тенк. Те Тагаев Лёва. Тагаев ялгась!

Весэ эйкаштнэ седеяк дивазь кармасть ваномо командирэньт лангс, кона те шкане шумбракстнесь весень марто, ды курошто теевь тенст прок умок содавиксэкс.

— Мон сынъ Василий Трофимовичень содавтомо, — ёвтнесь сон. Комсь иеть топодсть, кода эзия нее. Сон монень пек малавиксэкс сави. Тетянь кондямокс. Косто сынъ? Сынъ ней васолдо. Хасан эрькенть вакссо. Тосо служан пограничникень отрядонь начальникекс. — Аламос лоткась, мейле поладсь: — Хасан эрькенть вакссо бойтнесэ савсь тюремс монь отрядонтеньгак. Ульнинь госпитальсэ. Пичкинъ. Ней максть тень отпуск. Ардан Кузнецк ошов тетянь-авань кедьсэ оймсеме. Ды вана ютамсто совинь Вася покштянь содавтомо. Минь сонзэ марто умонь ялгат.

Истя нурыкинестэ ды эсь прянь апак шна ёвтнесь сон тюремдонть. Валгак эзь ёвта седе, кода ранявомадо мейлеяк эзь тукшно бойстэньт, вейке шумбра кедь марто ветясь боецтнэнь азаргадозь самурайтнень каршо. Чокшнес сестэ истя тюрсь, ды свал икелель. Зярд тюремась прядовсь, прась пильге лангсто. Ёжовтомо саизь госпиталев.

— Нетнень зярд максызь теть? — токинзе Вася атя мештэстэнзэ кавто ордентнэнь.

— Неть икелень, Василий Трофимович, — аламодо визделгадсь командирэсь. — Сынст эйстэ вейкенть максызь тынк марто вейсэ изнямонтъ кисэ. Паро койсэ, сон тыненк эрволь максомс.

Эсь прядонзо лия мезеяк эзь ёвта. Сень кисэ ламо ёвтнесь изнямотнеде, кодат тейнесь неть комсь иетнень перть лия ломантне. Ёвтнесь куватьс. Мейле ярсасть, ды инжесь мадсь Вася атянь кудос оймсеме.

Атянть перька пурнавсть колхозонь весе од ломантне ды таго ёвтневтизь кедьстэнзэ, ки те командирэсь, зярдоды косто кармась содамонзо.

Ды покштясь одов ёвтнизе аволь весть ёвтнезь теветень.

1919-це иестэ, маень васенце читнестэ, Колчаконь каршо фронтось ульнесь Пекшазейка веленть маласо. Тосо те шканть аштесь якстереармеецэнь часть. Велестэнтъ чилисема ёнов, виренть экшс, кемгавтово вайгельбень тарка лоткасть Колчаконь ушмотне. Зярсья истя ве таркасо аштесь фронтось. Лиясто ансяк ульнестъ вишка тюремат.

Маень нилеце ды ветеце читнестэ тюремат арасельть. Шкась ульнесь маней. Виресь пургондась, кармась пижелгадомо. Лугаськак пиже панаронзо оршизе.

Вася атянь эзь кирде седеезэ. Чопоньпелев саице берданканзо ды пирень пачк тусь вирентень, конань содылизе чувтонь пес. Чинзэ валгомс якась. Сундербгадомо ланга лиссь виренть тона пев, Марова веленть ёнов, косо аштестъ Колчаконь ушмотне. Озась виренть чиресэ мукорь лангс, кирвазтизе пипканзо, сонсь ваны Марова веленть ёнов.

Апак учо вирь неренть экшстэ кармасть леднеме. Вася атя стясь мукоренть лангсто ды кекшсь виренть потс. Се шкане вирь неренть экшстэ ёндолкс лиссь ласте ардыця. Мельганзо ливтязь ливтясть колмо лият, сынсь леднестъ икельцентъ мельга. Тона ардомсто велявтсь удалов ды ледсь. Мельганзо ардыцятнеде вейкесь кунст ёртовсь. Кадовозтне яла панить мельганзо, эль сасызь. Сестэ икеле ардыцясь таргизе шашканзо ды сеске велявтсь сасамонзо бажицятнень каршо. Лишметне, парктнезь ды кежевстэ цяхазь, эшкевсть карадо-каршо.

Вася атя неизе: сень, кона тюрьгадсь кавтотнень каршо ськамонзо, прысонзо якстере теште марто шапка; сасыцятне — погон марто. Сон чарькодсь мейсэ теvesь, берданказонзо путсь картечэ пештязь патрон.

Вана колчаковецтнеде вейкесь ёртовсь алашанть лангсто пельсцяподезь прынзо марто. Омбоцесь ледсь ды ранизе якстереармеецэнь, кона, сэредемань апак маря, эрейстэ велявтызе алашанть ды ардозевсь виренть чирева Вася атянь пелев. Колчаковецэсь кепедизе винтовканзо ды таго ледиксэль, ансяк эзь кенере: бахадсь Вася атянь берданкась. Колчаковецэсь сяворсь алашанть пильгалов.

Якстереармеецэнтъ алашась лоткась тусто виренть потс, козонь прась лангстонзо ломанесь. Вася атя чийсь эйзэнзэ ды ке-

педизе нардевтеме прынзо. Те ульнесь кемгавксовошка иесэ од цёра, кургстонзо чудесь верь. Панжинзе раужо сельмензэ ды ваны атянть лангс.

— Кие? — кевкстизе сянгора вайгельсэ.

— Мон, мон, — тошки покштясь, — эсенек.

— Ардодо штабов, — невтсь алашанть лангс, кона аштесь вельксэст. — Ёвтадо. Улзт анокт! Сырги наступления... — Лия мезеязь эзь ёвта цёрынесь: маштсь ёжозо.

Вася атя чарькодсь. Саице од цёранть, каице кареентъ лангс нучк, сонсь озась камбразонтень ды ношкстась виренть пачк Пекшазейкав, якстеретнень штабонтъ ёнов. Ансяк кодаяк паро ладсо а ардови: а кирдеви тензэ ранявозесь. Уш виренть кунш-касо якстереармеецэнтень сась ёжо.

— Кадомак, ардт, — верень сельгенезь кортазевсь сон. —

Седе курок пачтинк сень, мезе меринь... Тесэ эрва секундась питней... Мон Тагаев Лёва.

Атянть жаль марявсь цёрась, ансяк а кода ульнесь модемс каршонзо: валтнэ ёвтазь кармавтома ладсо. Сон мусь тусто тарка, путызе тозонь ранявозентъ ды ливтязь тусь якстеретненень.

Штабсонть кодак неизь алашанть, сеске чарькодсть. Вася атя капшазь ёвтнизе, мезе мерсь Тагаев, ды весементъ, мезе савсь тензэ неемс. Сеске весе кепететсть. Ансяк тюрьгадомс колчаковецтнень каршо ульнесь а кона шкане: пек малав кенерсть само. Савсь кадомс велесь.

Якстеретнень командирэсь туемстэ мерсь:

— Вана мезе, покштяй, Тагаев цёрась герой. Лездак тензэ. Ванстык эрямонзо, бути саты виеть. Кулындеряй, калмик содавикс таркас. Мекев савтано памятник путтано тензэ. — Сювордызе атянть кедензэ ды тусь.

Пельчасонь ютазь састъ Пекшазейкас ашотне. Теке марто копачизе веленть веськак.

Вася атя мелявтозь мольсь кудов. Салава ёвтнизе сырькаенстэнь весе, мезе савсь неемс тензэ неть аламо частнэнь перть. Комсешка минутань ютазь балакирсэ лембе ловсо ды а покшке сьолмо марто сынсь атят-бабат капшазь мольсть чопода виренть пачк. Куроксто муизь ранявозь боецэнтъ. Сон весе сорны. Оршамонзо начкт.

— Живат, Тагаев ялгай? — комась вельксэзэнзэ Вася атя. — Мон якинъ, ёвтынъ. Кадызь велентъ. Сюкпря мерсть тетъ ёвтамонть кис. Тагаев кельме кедьсэнзэ вийтеме сювордызе кедензэ. Истя сорнось — вал тензэ эзь ёвтаво.

Вася атя озавтызе ды бабась сюлминзе рананзо. Мейле оршавтсть лангозонзо коське понкст-панарт. Тагаев аламодо эжсь. Лембе ловсонть симемадо мейле овсе вадрылгядсь ёжозо. Ансяк превтне чарыть ды ранатне ризныть.

Теске Вася атя кавто палкасто тейсь носилкиненъ кондят. Ды теке венть атят-бабат кандызь сынсест пельскаладозь кудыненъ. Эсест пиренть пес аламодо апак пачкоде, понгсь каршозост Палакс Михал, сьупав ды горбун атя.

— Истя мезе кандтадо? — моданть ёжова нерензэ ветязь мольсь эйзэст.

— Тонь теветь арась! — кежейстэ тошказевсь Вася атя ды снартсь ранявозенть вельтямо.

— А-а-.а! — Тагаевень шапкастонть якстере тештенть неемадо мейле паразевсь Палакс. — Чарькодеви. — Ды ёматотсь чоподантень.

— Тевтне, баба, берянтъ, — кекшевемадонзо мейле салава коротазевсь Вася атя. — Те верде симицясь нейке ёвты колчаковецтнэненъ. Ледьсамизь. Эсенек питненек а покш. Алясь а мезень кисэ ёми. Мезть тейнемс?

А кона шкане ульнесь арсемс. Тагаевень кадызе сырькаенть марто лато удалов, сонсь сайсь пивсэма цётмар ды ношкстась пиретнень пева Палакс Михал атянь мельга.

Пиретнень удалга Палакс чииль колчаковецтнэнь штабов.

Вася атя совась вейке пирес, ютась троксканзо ды пирень омбоце уголонть эхштэ лиссь Палаксонь каршо. Апак корта цопадизе кирьга пакшто ды нежедизе пиравксонтень.

— Ков чият, нулгодькс? — пеень пачк мерсь атясь. — Аламо оштё минек ялгань ойметь сайтъ?

— Тон мезть? — ацирьгядсь Палакс. — Превсэнъгак арасель киненьгак ёвтамс.

— Эно мекс кудот вакска ашотнень штабонтъ ёнов чият?

— Паз ней, а кенгелян. Леляненъ истя моликсэлинь. Иля мелявто. Киненьгак мон а ёвтан.

— Учок, кемитинь тонь! — кежейстэ мерсь Вася атя. Седеяк кеместэ лепшитизе кирьгапакшонзо, цётмарсонть цярадизе пря шилдыменть ланга, ды прядовсь кулаконтъ эрямозо, новольсь прок наксадозь, киненьгак а эрявикс кескав. Вася атя, прок рудазсо вадневемадо мейле, нардынзе кедензэ пиравксонтъ нурыгиця нулас ды тусь мекев.

Зярдю пачкодсь сезэнь, козонь кадокшнынзе ранявозенть марто козяйканзо, Тагаев таго ульнесь ёжовтомо. Сынъ саизь ды седе куро к кандызь кудов. Лембе таркасонть куроксто сась тензэ ёжо. Бабинесь шлинзе рананзо лембе ведьсэ ды сяминзе одов. Те шканть Вася атя анокстась тензэ тарка каськас. Седе мейле андызь, симдизь чайде ды мадстизь анокстась таркантень. Лёвань ёжозо овсе ёнкстомсь. Сон тунь эзь сода, мейсэ бабинесь ваднинзе рананзо, ансяк маризе, кода лоткасть ризнэмадо ды аламось-аламось оймасть. Секс цёрась куроксто кеместэ матедевсь ды, апак сыргозе, удось омбоце чинть куншка видьс. Зярдю сыргозсь, ёжозо ульнесь овсе паро: ранатне лоткасть пултамодо, кува-кува кармасть аламодо кинетеме. Бабинесь таго ёрвалдынзе лембе ведьсэ ды одов сюлмсинзе.

Каськась малав ломанень сэрсьсэ, аламодо тесна, ды коштоськак а пек вадря, сень кисэ сэтьме. Ансяк косто-косто Лёвань пилес кайсететсь, прок васоло пурьгине, орудиянь зэртесь.

Вася атя чокшне ёвтась тензэ: кияк а соды сондензэ ды а содыть седе, ки саизе Палаксонь нулгодькс оймензэ.

Колчаковецтнэ малав ков ульнестъ велесэнтъ. Аволь пек васов савсь тенст молемс икелев. Тагаев те шканть виемсь ды Вася атянь марто вейсэ салава пурнасть од ломанень доброволецэнь отряд, конань эйс совастъ ведьгемень ломанть.

Атянтъ марто сынъ эрясть прок тетят-цёрат. Зярдю Якстере Армиясь кармасть панеме Колчаконь войскантень мекев Сибирь ёнов, Тагаев веть пурнызе отрядонзо ды каявсть сынъ ашотнень маштомо. Сайтъ ламо орудия, алашат.

Зярдю саизь мекев Пекшазейка велентъ, Тагаев отрядонзо марто мольсь штабов. Кенярдозь вастызь сонзэ, кияк эзь арсе седе: сон жив ды оштё отряд пурнась. Дивизиянь командирэсь кутмордызе мездеяк а пелиця разведчикентъ, палызе. Тагаев ульнесь аравтозь ротань командирэкс. Сестэ сонензэ топодекшнестъ кемзисемге иеть.

Эзизь стувто Вася атяньгак. Тагаевненъ лездамонтъ кисэ максызь кареентъ, конань лангсо сон сестэ ардсь штабов. Ды ёвтасть тензэ сьукпря.

Июнь ковонь вейке мазый валскестэ Вася атя ильтизе Лёвань прок эсензэ вечкевикс цёранзо.

— Сан содавтомонк, зярдояк а стувтадызь! — мерсь Тагаев, палызе атянтъ, кирнявтсь айгоронзо лангс ды нацяс ёматотсь лишментъ пильге алдо кепетевезь пулентъ потс.

Седе мейле, недлянь ютазь, велестэнтъ таго пурнавсь Якстере Армияв туицянь доброволецень отряд. Вася атя эзь вано сизыгемень иензэ лангс. Озась кареензэ лангс ды тусь отрядонтъ марто.

Ды ансяк сестэ, зярдо весе ашо бандатнень тапизь ды паниз советской масторонтъ лангсто, Вася атя сась кудов зепсээнзэ партийной билет марто. Ансяк Тагаевень костояк эзизе нее ды мезеяк эзь марьяк эйтэнзэ.

Ниле-вете иеть Вася атя важдось велень Советсэ. Сон ульнесь сетнеде вейкекс, конат ушодызь велесэнтъ од койсэ эрямонтъ — теизь колхозонтъ. Секе иестэнтъ путызь колхозонь умаринатнень. Те шкас ванстовсь умарь пиресь. Сеедьстэ ледстнекшнине Тагаевень, мазый ёвкс ладсо ёвтнекшнесь од геройдентъ, ансяк марьямс эйтэнзэ мезеяк тензэ эзь савкшно.

Ды ней вана, комсь иень ютазь, зярдо Тагаев теевсь пограничникень командирэкс, Вася атя — почётной колхозникекс, сынь таго вастовсть, вастовсть прок а изнявицят. Ансяк кулось Вася атянь эри ялгазо, кона истя вечкезь ды мелявтозь якась сестэ Лёвань мельга, зярдо савсь сонзэ кекшезь кирдемс каськасо.

Валске пурнавсть ламот сетнеде, конат тукшность Тагаев марто доброволецэкс. Покш мельспаросо ёвтнизь ды невтнизь тензэ весе паро тевест, конань сынь теизь неть комсь иетгнень ютамс, невтизь весе колхозонтъ. Ламот сестэнь од ломантнеде, комсомолецтнеде, ней уш умонь коммунист.

Чокшне колхозонь клубсонть ульнесь покш промкс, косо Тагаев ёвтнесь тенст Хасан эрькентъ лангсо тюрематнеде. Кавто част колхозниктне ды од ломантне кунсолость, кода ёвтнесь пограничникень командирэсь. Кортасть велень ломантькак, конат алтасть седейк сьупалгавтомс колхозонтъ.

Валске ильгизь Тагаевень станцияв.

— Сак, Лёва, илямизь стувто, — вагононтень молемстэ энялдсь тензэ Вася атя. — Мон тонь остатка чизэнь карман учомот ды ледстнеметь.

Тагаев алтасть сакшномс, палызе атянтъ ды кирнявтсь сыргиця поездэнтень.



## ВИЗЬКС

Обран атя ды Оря атя эреть шабрацек, кудост ваныть чинть каршо. Икелест вишка умарь пиринеть, кардаз удало умаринатне седе покшт. Кудост парт. Ашо рама марто вальматне пейдезь пейдить: кудо конятне — теке седикелень одирьвань коня пацят; вальма лазост аргозь сэньсэ. Ортаст — вейкенъ чилисема ёнов, омбоцень чивалгомав. Вейкетъ кудыкелькс кенкшесткак. Седикеле ортаст ды кудыкелькс кенкшесткак, келя, вансть карадо-каршо. Пирев яксекшность ве киява. Эмежень валнома лисьмаст ульнесь пирест межанть лангсо — кинень кода паро, истя валныль.

Эрясть Обран марто Оря оякчисэ. Кияк курилкасонть эзинзе марсе сёвномадо. А сынст эрьвейкенъ малав сизыгемень иензэ. Эйкашпингесткак, од цёракс шкасткак сынь ютавтызь ялгакс. Весе пингест перть эреть шабрацек. Лисить, бувала, кузтемлангс, озыть карадо-каршо ды басить эрямонь-аштемань тевтнеде. Лиясто кирвазтьсызь пипкаст ды зярсья каштмолезь таргить. Эли озыть селеентъ ало ашо кевентъ лангс ды, од лентгестэ кодазь карест ваннозь, арсить тевде-валдо. Лиясто молить калс, сайтъ мартост чапамодонтъ. Сестэ оргодть маластост: весе Сура лангось гайгиль, кода сынь рангстыльть моро калдо ярсамодо мейле.

Эрсестъ сынст ютксо салава тевтькак, конатнеде, эстедест башка, кияк эзь сода, мик козяйкасткак. Кодат ансяк тевть эзть эрсе! Лиясто Оря атя ваны — шабразо, Обран атя, веть вейсэнь лугасто уски пряс улав тикше; сорнозь ды капшазь чамдсы седе курок кардо пряс ридванонтъ, а сонсь празь пры — мади. Пшкадемс сестэ тензэ — кулыкс прынзо теевлize, меревель: цела сутка удан. Неилize тень Оря атя ды каштмолил. Кевкстевлизьгак сестэ: салась-эзь шабразо тикше, Оря атя меревель:

— Мезть стяко кортатадо атянтъ лангс. Сон арази теи истямо тев? Кода чачсь — ломанень вальмалдо тарад эзь сае.

Эли лиясто Обран атя ваны: шабразо, Оря атя, веть цела улав жердят ускс велень вирьстэ. Эрязкалезь кайсесынзе козоньгак пиципалакс потс ды калавтнесы ридванонтъ, чаротненьгак кардазс кевердсьынзе. Сонсь седе курок мади ды улы, мерят, азё вешнек зярдо. Неилize тень Обран атя ды теке а неилizeяк. Козьяканстэньгак мик кармавтыль:



— Неят — иля нее, марят — иля маря. Кевкстемс сестэ Обран атянь: салась-эзь шабразо жердят — сон сёвновлинзить:

— Паздонть пеледе! Кода а визтядо истямо паро ды сэтьме ломаньлангс стяко кортамо? Аволь жердя, олгинейк зярдоак эзь сала.

Ды кекшсынзе весе неть тевтнень чопода весь. Ютко шка-не жо озыльть таго селеенть алов ды арсылть.

Лиясто чокшне уш, чоподава, Ортя атянь ды Обран атянь удало ортатнева лисильть кавто лангсо, кавонст ридвансо ды туильть вивев. Истя сыргильть, ардомсто мик кальдертькак а маряви. Ридван ирдестнэнькак мик дёготьсэ ваднесызь — авольть маряво чикордомадо ды кальдердемадо. Зоря лангсо секе ортатнева совить пряс валязь кавто улавт ленть, велень вирьстэ ускозь. Пельчасошкань ютазь ридвантнэ калавтнезь, а сынсь, Обран атя марто Ортя атя, прок мезеяк арасельгак, оймсить.

Истямо оякчисэ эрясть Обран атя марто Ортя атя, кода мерить, ведь эзь валово ютковаст.

Ансяк эрязь-аштезь лиссь истямо тев, конань кувалт каладокшнось неть вейкест-вейкест вечкиця атятнень ялгакчист. Истя мик каладокшнось — седе а ков. Сестэ сынь ортаст теизь лия таркас, пирев кармакшность якамо умаст кавто ёнга, куншкасо кинть ланга кассь ломанень сэрсьэ марч, кадызь мик эмежень валнома лисьмантькак: эрьвейке эстензэ лисьма чувокшнось. Ансяк рацякадозь селеесь нусмакадозь аштесь таркасонзо, ды алонзо кияк эзь ойсе арсеме, пипкасо таргамо. Лисекшнесь те вана мекс.

Пурнасть велентень колхоз. Обран атя марто Ортя атя сесеке эзь сова колхозе. Васня вансынек, келя, кода тосо кармить эрямо, важдеме.

Весть озасть сынь селеенть алов. Каштмолезь таргизь пипкаст, вачкодизь кевентень ды пештизь табакто. Истя каштмолезь Обран атя кирватсь спичка, токавтызе эсензэ пипкантень, мейле толонть венстизе шабранстэнь. Пухадсть кавксть-колмоксть.

— Мезть, шабра? — окойники пшкадсь Обран атя. — Ломанть, тения, вейсэ кармасть роботамо. Тон мезть?

Ортя атя коцькердызе конянзо.

— Кортыть яла, — пипка чубуконть кургстонзо апак тарга мерсь шабранзо каршо. — Ды аздан. Кабу тараканонь кундсе-ме авольть карма.

Таго ноцковтсть пипкатнестэ, качамось, теке сэнь суре, лиси ды ёматы верев.

— Тон мезтькак арсят? — друк кевкстизе Обран атя.

— Мезде? — варштась Ортя атя ды пипканзояк кургозонзо пельскепедезь лоткавтызе.

— Ды теде... колхоздонть.

— Бабась оно мезть-бути липаи сельмсэнзэ тень, — талакадозь мерсь Ортя атя ды капшазь совась кардазов. А козяйказо костояк эзь неявоак. Ортя атя мерят пирестэ неизе сельмсэнзэ липаемадо.

Обран атя туемадонзо мейле зярсья аштесь ды яла таргась. Аздан шабранзо учось, аздан мезе. Ортя атя эзь лисе мекев.

Чинь-кавтонь ютазь таго лиснесть сынь кевенть лангс. Каштмолезь потясть пипкатнесэ. Кода-бути валгак а муить. Весть Ортя атя овсе пшкадиксэль, тердиксэлизе шабранзо чокшне тикшень саламо, ледсь мелезэнзэ: лугась ней колхозонь ды эзь пшкаде. Обран атянь мельсэ жо, колхоздонть башка, мезеяк араськак, свал теке валось чары кельпрясонзо. Ансяк пели пшкадеманзо: кодак ледстясы колхозонть, шабранстэнь козяйказо «липади сельмсэнзэ».

Зярсья таргасть.

— Монь ули мелем совамс колхозс, — друк кода-бути апак учо бухадсь Обран атя.

Ортя атянь цямк ансяк мольсть турванзо, истя ноцковтызе кургстонзо чубуконть.

— Эка, прахонь бабась! Ломань марто картамо а кадтанзат! — мерсь ды таго совась кардазс.

Обран атя таго пелевес аштесь кевенть лангсо ды таргась.

Валдомомо кармакшнось, зярдо совась кудов. Эзь маде. Зярсья аштесь. Мейле лиссь кардазов, якась пирев. Сонсь яла таргась ды арсесь: «Мезть ней тейнемс?»

Чись лиссь. Колхозниктне сыргасть роботамо. Обран атя путызе зепезэнзэ умок уш анокстазь яволявтоманть, кундызе гнейдой эльденть, тонгизе прызонзо ашконть ды саизе колхозов.

Кенярдозь примизь атянтень.

Седе мейле лоткасть нексневемадо кевенть лангсто Обран атя марто Ортя атя. Кевесь икеле валаня ульнесь, а ней мекев кармасть казякадомо: кияк а ойси лангозонзо. Озындеряй лиясто Ортя атя, а кенери пипканзо пештямо, вансы: Обран атя роботамсто сы — туи кардазов.

Аламонь-аламонь овсе лоткасть вастневемадо кавто шабратне. Ды а кона шканеяк. Обран атянень яла аютко — Оря атя сонсь а моли. Телень перть истя эрясть.

Уш тундо ёнов Обран атянь низэ пурнась-сэрнясь поминкат — аванзо куломадо мейле исем иеть топодсть. Тердизь шабрантькак. Тезэнь уш а самс а кода ульнесь. Сась Оря атяяк. Озась Обран атя марто чалгамо вакс ды аштить. Пипкатнень кирвазтемс а кода. Вейкест-вейкест лангс бажить а ваномо.

— Тундось, корьмаесь, лембестэ сась, — ушодсь Обран атя. — Сюротне парт кармить улеме.

— Истямо неяви ладозо, — карь прянзо лангс ваномсто мерсь Оря атя.

— Тон кода, оштё яла ськамот арсят пиеме-паломо? — овсе апак учо кевкстизе Обран атя. — Тараканонь кундсеме кабу аволить карма.

— У, те проклятоень бабась! — цопадизе сезнезь малахаензэ Оря атя ды озась мекев: козяйказо Обран атянь нинть марто столь анокстыть. Озась мекев ды таго кармасть карь прязо ванномо.

— Кода эно? — а кады эйсэнзэ Обран атя.

— Мезе?

— Ськамот, паряк, арсят эрямо?

Оря атя эзь фатяяк, кода таргизе пипканзо ды цярновтызе чалгамонтень, мейле истяк чаво пугызе кургозонзо. Аламось ашгесь, ноцковтызе ды тонгизе зепезэнзэ, кургстонзо буту качамо пувась.

— Мекс а кортат? — таго кевкстизе Обран атя.

— Мезде?

— Колхозс а соват?

— Аштек, ужо...

— Мекс?

— Бабанть марто кортнемс эряви.

— Икеле вестькак эзить кортне?

— Мень а кортнемат...

— Мейле?

— Каштмольть... — энялдозевсь Оря атя ды тандадозь варшась бабанзо ёнов. Тонань пиже толнэкс кивчкадсть сельмензэ.

Те лангс прядовсть кортамост атятнень, ды поминкатнень ютамс сынь каштмольсть.

Сась тундось. Колхозниктне пурнасть видеде, Обран атя чинек-венек роботы: сбруят аноксты. Весть позда сась, ярсась

ды мадсь. Эзь кенере нуваземе, марясь мень-бути калдордома ды пижнема. Кунсолы. Шалтось седеяк.

— Косо истя? — кевкстизе Обран атя бабанзо.

— Прок шабратнень ёно маряви.

— Эряви варштамс.

Эзь кенере таркастонзо стямо — кие-бути кармасть стукамо. Панжсть — поровтонть трокс празь прась шабранть низэ. Лангсонзо вень панарнэ, черензэ ланганзо, кепе. Чамалиця арась эйсэнзэ. Сонсь цють а аварди.

— Господи суси христа! — пижакадсь Обран атянь бабась. — Крестя, некак тон?

— Мон, Мала, сяткинем... Мон...

— Вай, Верепаз ванонзат, истя мезе теевсь? — талакадозь пшкадсь Крестя.

— Вай, иля корта. Аштек ужо, каштом лангс кузян. Сурневкс куронымим.

— Ды мекс истя? Кие?

— Атям азаргадсь... Трисподни туезэ...

— Истя мезть тейни?

— Иля кортаяк. Вай, некак зярдояк а эжангак.

— Вельтяк парынестэ, — седейшкава мелявты Обран атянь бабась, — копачак суманьсэ.

«Парсте «агитировизе» неяви, — пейдезь арси эсь пачканзо Обран атя».

Бабатне тошкасть-тошкасть лембе каштомонть лангсо ды тоск матедевсть.

Седе мейле колмошка чить ютасть. Обран атя валске рана стясь: течи колхозниктне лисить видеде. Сыргась роботамо. Мартонзо друк лиссь кардазсто Оря атяяк, кедьпесэнзэ буланоесь.

— Ков истя, Ортём Петрович? — кевкстизе Обран атя.

— Колхозов! — пейдезевсь Оря.

Ды таго шождынестэ таргизь оймест атятне, кармасть роботамо вейсэ — ков вейке, тов омбоце. Чокшне, сундерегадома шкане, таго кармасть сынст некшнемест селеенть ало ашо кевенть лангсто. Кирвазтьсызь пипкаст ды кортыть валост маштомас. Лиясто, лисить ваксозост козяйкасткак.

Ансяк пивсэма ланга таго лиссь ютксост истямо тев, кона кувать явокшнынзе атятнень.

Ульнесть августонь меельце чить. Сюронь пурнамонь сехте пси шкась. Весть чокшне Обран атя якась лия велев. Тосто сась

чоподава. Ютамсто лоткесесь тингенъ ванстыцянтъ ваксс. Аламос аштесь, пештизе пипканзо, кирвазтизе ды сыргась.

Шказо ульнесъ пелеве малав. Велентень апак пачкоде кадзые покш кинтъ ды тусь эсест пиретнень ёнов. Овс пирявкстнень маласта несъ ломань, конань кутьмерьсэ ульнесъ мезде-бути пештызъ кескав. «Мень тамашат»? — арсезевсь Обран атя ды лоткась, кармасть учомо пиретненень капшиця ломаненть. Вана сон маласо уш, стакасто лекси, натъ, мезеяк пек стака канды. Неизе Обран атянь — гурдякадсь\* ды, стакасто лексезь, тусь пирявкстнень кувалт. Обран атя — мельганзо. Тона капшась-капшась, понгсь пильгезэ мезес-бути, ды прась.

— Те кие? — мольсь малазонзо Обран атя.

— Простямак, шабра, те мон... — каятотсь Ортя атянь сорныця вайгелезэ.

— Тон мезть истя кандат? — дивазь кевкстизе Обран.

— Простямак, шабра! — прась икелензэ Ортя. — Пильгезэть сюконян. Ансяк киненьгак иля ёвта. Ёмавтсамак. Пелест эстетъ макссынъ.

Обран атя комась ды токизе кескавонть.

— Каштмольтъ! — теке сыртянь кшнистэ ноцковтызе кедензэ. — Косто салыть?

— Колхозонъ тингентъ лангсто. Илямак мие, шабра... Жалямак. Илямак ливте ломаньстэ.

— Ды мезть тон истя тейнить? Кода кедеть кепедевсь саламс колхозсто? Те ведь эсетъ, моньгак ды лиятненьгак. Те эдь эсенек сюрось!

— Простямак, шабра. Эзь кирде седеем. Икеле ладсо. Мерын, ки соды, кодамо карми улеме телесь.

— Эх, шабра! — мерсь Обран атя. — Тень кис чумондтадызь.

— Шабра! — кундызе кедензэ Ортя атя. — Эли ёвтат тон? Жалямак.

— Арась, мон а ёвтан, — зярсыя каштмолемадо мейле пшкадсь Обран атя. — Азё вана мезе тейть.

— Мезе?

— Азё саик кескавонть ды кандык колхозонъ председателентень. Мерть истя-истя, салакшныя.

— Шабра! — таго энялдозевсь Ортя атя. — Кода ней мон молян? Зярошка визькс карми улеме, арсека тонсь.

\* Гурдякадсь — мендявсь.

— А ней вана аволь визькс?

— Простямак, шабра. Иля ёвта киненьгак. Тон арсека, зяронъ тарка мон кандынъ. Саить пелест, бути эрявить. Мейле зярдояк ве зёрна а токан.

— Монень а эрявить, — потазевсь ве ёнов Обран атя. — Эрявиндеряйтъ, молян ды вешан. А тон сехте парсте теят, кандындерясыть колхозонъ председателентень.

— А кандовить, шабра. Визькс.

— Олят.

Обран атя сыргась кудо ёнов.

— Шабра! Энялдозь пшкадсь таго Ортя атя.

— Мезе?

— Ёвтат?

Обран атя лоткась ды ашти. Перькаст а куш а каш. Ансяк каштмолия тештне вансть лангозост. А сынъ аштитъ ды а содыть, мезть тейнемс. Аволь аламо салаванъ тевть сынъ тейнесъ, салава киява яксезь, ды кияк эзь сода. Аволь мешоксо — улавсо усксезь, ансяк венъ чоподадонть башка, кияк эзинзе нее ды эзинзе маря, а чоподась, келя, зярдояк ды киненьгак а ёвтнекшни. Мезе ней кескавось? Эйсэнзэ самай ламо колмониле пондт. Ялатеке нетъ пондтнэ истя токизь Обран атянь седеензэ, седе а ков. Мезе-бути талакавтынзе атятнень ды кодаяк а эскельдявить вейкест-вейкест эйс. Аштитъ карадо-каршо.

Обран атя аштесь-аштесь, васня мезть-бути пшкадиксэль, мейле яходсь кедьсэнзэ ды капшазь тусь кудо ёнов.

Ортяк пшкадиксэль, ды, мерят, келезэ кундатотсь. Зярсыя сельмень тетъкезь аштесь кескавонть велькссэ, теке превстэ лисезь. Мейле лексезь кепедизе лавтовонзо лангс ды кандызе эсензэ кудыкелев. Ансяк икеле ладсо эзь сова кудов ды эзь маде нинзэ ваксс. Прась сеск ды валскес сельмензэ апак коня аштесь.

Обран атя кудов совась ды бабанзо апак стявто прась каштомлангс. «Мезть тейнемс»? — арси сон эсь пачканзо.

Низэ маризе.

— Тол мекс эзитъ пува? Ужинат? — кевкстизе атянзо.

— Арась, пекем эзь вачо.

— Аволь мезетькак сэреди?

— Шумбран, — пшкадсь каштомлангсо аштицясь.

Се вестэнтъ Обран атянень матедедемс эзь саво. Ашти-ашти — велявты омбоце боканзо лангс. Ансяк сельмензэ

конясынзе — тееви икелензэ шабразо, лавтовонзо лангсо тов-зуро кескавовь. Теке мельга ледить мелезэнзэ колхозонь председателенть валтнэ: «Кона несы салыщанть ды а ёвты, се, лисни, лезды салыщантень, вейсэ мартонзо салы». Теке мельга леди мелезэнзэ сынст ламо иень перть оякчисэ эрямост, од шкаст, эйкакшпингест, вейкест-вейкест кувалт мелявтоматне. Эдь те шкас сынзэ эзь сёвнюяк вестьяк. Арази стувтсы Обран атя сень, кода весть алаша лангсто прась ды пильгензэ велявтокшнызе. Ортя ялгазо кавто вайгельбень тарка кандозь кандызе! Эли аламо ульнесть истят тевть? А ней на вана, мезе лиссь! Яходи Обран атя кедьсэнзэ, теке стувтызе весе тень, ды мади. Ансяк нувазечи, таго ледствяви. Жежейстэ велявты омбоце бо-канзо лангс ды таго а ойми.

- Обран, — пшкадсь низэ.
- Мезе?
- Мекс а удат?
- Мекс-бути а матедеван.
- Паряк, мезеяк лиссь ды арсят.
- Мезе ней лиси.
- Эно мекс?
- Истяк.

Аламось аштезь-теезь таго кевкстсьсы. Савсь ёвтнемс тензэ. Ансяк Обран кармавтызе киненьгак а ёвтнемс.

— Тень кис ней истя майсят? — дивазевсь бабазо. — Ули мезень кис ризнэмс. Мон арсинь таго мезе. Адя мадть сэтьместэ. Колхозонь председателесь сонськак тень лангс аволь варштаяк.

Обран атя аламодо оймась. Аламось матедевкшнесь. Онстонзояк текень несь, буто икелензэ Ортя атя, кутьмерьсэнзэ товзуро кескав — сонсь аварди, энялды икелензэ. Мейле кие-бути марто теке ловность: кармавольтькак весе истя саламо, колхозонтень мезеяк аволь кадово.

Валске стясь рана. Удомазо эзь ява, прязо теке чаво парго, чамазо ловтаня. Аламодо ёрвалдызе чаманзо ды лиссь роботамо.

Мартонзо вейсэ мольсь Ортя атяк. Вейкест-вейкест лангс эзь вано, эзь кортаяк. Визькс!

Козьякаст кандсть тенст ярсамс. Саизь ды тусть вейкедест-вейкедест эйстэ седе васов. Икеле свал ярсылть вейсэ ды яла мезеяк кортыльть. Ней каштмольсть, ды конасткак кедензэ-як эзизе токавтне ярсамопелентень.

— Тон мекс? — мольсь Обран атянь ваксс низэ.  
— Пекем эзь вачо.  
— Эдь чокшнеяк эзить ярса.  
— Оргодть! — рангстась лангозонзо Обран атя. — Азё кудов!  
— Осподи, некак превстэ кармасть лисеме? — ярсамопеленть пурнамсто ды ёнонзо пелезь ваношь кортась Мала баба.  
Седеяк веркасто тусь Ортянь козьякась — Крестя.  
Атятне таго каштмолезь кундасть роботамо. Жежень сазь седе парсте моли тевесь.

Обран атя сонськак а соды, мезть тейни. Кунды узере кечкень тееме, лиси чекушка, кундакшнось ажиянь тееме — лиссь гнёт. Ки лангскак а ваны, маряви тензэ: весе содыть те тевденть, аволь парсте ваныть лангозонзо. Эрьвейке теке корты: «Эх тон, неить ор, колхозонь сюронь салыщя, тонсь каштмолят. Лисни, тонськак салыть!» Ды узереькак цють а пры кедьстэнзэ.

Ортя атянь ёжозояк а эсензэ. Ломань лангскак а варштави. Чамазо ловташкандь. Сакалонзояк кода-бути нуьргамсть: визькс тензэ.

Чокшне састь кудов, селей ало кевесь учось эйсэст. Ды сынзэ эзь лисе, эзь оза лангозонзо.

Обран атя таго эзь ужинаяк. Бабазо ней уш каштмоли, а пшкадияк тензэ, ансяк ве ёндо ризнэзь ваны лангозонзо. Пелевес каштомлангсо кевересь, ды эзь матедеве. Мейле стясь, капшазь тусь ков-бути.

— Кона апаров истя ношкстась? — арси бабазо, зярсыя якась ве вальмасто омбоцес, ансяк мезеяк эзь нее.

Тумадонзо мейле, часошкань ютазь, шабраст икелев лоткасть крандазо. Марявсть кортыщят. Ортя атянь кудонтень кирвазсь тол. Мезть-бути кардазга якасть. Ды тол валдонть марто Обран атянь бабась неitze, кода ливтсть Ортя атянь кудькельксстэнтэ мезде-бути пешксе кескав. Саизь мартост Ортя атяньгак.

Обран атя сась кудов, ярсась пешкедемазонзо ды сэтьместэ мадсь.

\*\*\*

Ортя атянь панизь колхозсто, судизь. Макссть тензэ ие принуд робота. Обран атянь шнызь тень кис ды аравтызь колхозонь суро марто утомтнэнь ванстоמו.

Ялатеке Обран атянень аволь пек ён ульнесь: эдь Оря атя кода а кода ялгазо. Мейле чарькодсь: самай истя эряви тейнемс, бути арсят улеме виде чинь кис аштиця ломанекс.

Иень ютазь сась Оря. Веть появась. Салава совась пиретненень ды мольсь кудов. Васня недляшка ушовгак эзь лисне. Прянозяк киненьгак эзизе невтне. Мейле лиссь кардазов, мольсь пирев, кармась роботамо.

Весть Обран атя сась роботасто, вансы — шабразо кудыкелькс кенкшензэ чилисема ёнов теизе. Омбоцеде сась, ваны: ортазояк уш чилисема ёно. Пирев кармась якамо омбоце межаванть, аволь тува, кува икеле яксекшность Обран атя марто. Кадызе пиретненень куншкасо лисьмантькак.

Сёксентень Обран атяк кепедизе лия ёнов ортанзо.

Велявтсть вейкест-вейкест эйстэ удало ёндо. Свал бажить карадо-каршо а понгомс. Бути Обран атя пиресэ, Оря атя а моли пирев: молиндеряй — Обран атя туй кудов. Бути ульцясо кодаяк вастовить, сестэ вейкесь туй ульцянтэ ве ёнга, омбоцесь — омбоцева.

Сень кис нист вестькак эзь сёвно. Свал яла вастневсть ды мезть-бути кортнесть, мерят эзь содаяк вечкевикс атяст тевтнеде.

Тунда, видеме лисемадо икеле, Оря атя таго макссь яволявтома колхозс. Кортавтызь вейсэнть промкссо. Зярсья кавтолдсть. Оря атя визькстэнтэ пельсь кепедеме сельмензэ. Валтнэ теке молоткань вачкодевкст прасть прязонзо. Седе ламот каршольть. Оря атя нуваргадсь, теке якшамосо чавовт тикше, ливезькадсь. Мик янксеме кармась. Зяро визькс сави кирдемс. «Мейс мон каинь яволявтома? Весе Мала марто Крестят, кавто мазыйтне», — арсесь атясь.

— Ну мезе, лисни, а примасынек? — кевкстинзе колхозниктнень председателесь.

— Арась, арась!

— Аштеде! — стясь удало Обран атя. — Монь койсэ, примамс эряви.

Весе оймасть ды варштасть ёнонзо. Сон те шканть теевсь колхозонтэ весеменень содавиксэкс. Кунсолость ды вансть атянтэ мелензэ.

— Мон примамонзо кисэ! — поладсь Обран. Седе тов сон истя а теи. Мон содаса. Пингем эль ютавтса, мартонзо шабрацек эрязь...

Ды примизь Оря атянь таго колхозс.

Промксстонтэ сон сехте икеле тусь: пельсь варштамс Обран атянь сельмс, конадо весемеде пек виздсь. Обран атя кортыксэль мартонзо, ды вансы, шабрантень аволь ён — кадызе.

Кавто иеть седе мейле важдсть вейкест-вейкест туртов апак яка. Ансяк шкась яла мольсь ды кадсь удалов апаронтэ. Седе мейле сынть кармасть вейкест-вейкест лангс парстэ ваномо. Ды вейке чистэ каятотсь морамонь вайгелест Оря атянь умарь пирестэнтэ. Те лиссь седе мейле, зяро сынент парсте роботамонтэ кис Маень васенце чинтень макссть премия.

## ОКСАНА КАРПОВНА

### 1

**Ш** умбрачи, Днепрань томбалькс, монь вечкевикс тиринь таркан!

Неть ульнест Дубровой лейтенантонть васенце валонзо, зяро октябрюнь тарькс пиземе вестэ эсензэ взводонзо марто чалгась Днепрань вить ёно берёконтень. А ёвтавомашка кенярдома ды бажамо гайгсть сонзэ кеме вайгельсэнтэ. Ды кода эно! Эдь тестэ сядошка вайгельбет каднови чачома велезэнзэ, козонь кадынзе козийканзо ды кавто эйкакшонзо, конатнеде малав колмо иеть мезеяк эзь маря.

Ансяк а кона шкане ульнесь макснемс оля седейёжонь ризксэв арсемагненень. Днепранть трокс взводось ютась пелеведе мейле колмоце чассто. Сеске, апак оймсе, лия подразделениятнень марто вейсэ каявсть ятонть лангс. Чоп мольсь виевдеак виев тюрема. Аволь оймсемат — сускомс мезеяк, цигарка таргамс а кона шкане ульнесь. Пек бажаст фашисттнэ Днепранть эсь кедьсэст кирдемензэ, ансяк эзь саво. Куроксто панизь сынст тестэ ды потавтызь комсешка вайгельбень тарка. Чокшне, чоподава, лоткасть окоптнэс, конатнень кадызь немецтне. Зяря чинь перть апак лотксе тюремадонть мейле минек солдаттнёнень чокшне ансяк прась аламошка оймамошка.

Дубровоень взводстонтэ те боентэ прядома ёнов ранявсть колмо боецт. Командиресь ильгинзе сынст тылэв мелявтозь ды ризнэзь.

Васенце взводось понгсь оштё аволь допрок каладозь землянкас. Ушонь тарькстэнтъ мейле эйсэнзэ овсе ён марявсь. Кандсть ям, каша. Ярсасть псинеде. Сювордасть таргамс. Ко- дамо паро ульнесь! Совсесь ротань командиресь, старшей лей- тенантось Линьков ды старшинась Аксёнов.

Туемадост мейле Дубровой сонсь ютась посттнэнь ланга. Зярдось мекев землянкантень, солдатонзо весе удыльть, шинелест лангсост, винтовкаст, автоматост беремасост. Анокт. Сеске, совамо тарканть маласо, ульнесь патрононь чаво ящик. Озась сень лангс ды кирвазть папироска. Кор- тамс а мезть, сонгак парсте сизесь. Ялатеке удомась мала- ванзояк а яки. Ды арсемасо ютась Днепранть трокс, эсь ти- ринь ёнксозонзо. Тестэ аволь васоло Ротмистровка велезэ, козонь кадовсь семиязо. Армияв тусь войнань васенце чи- стэнтъ. Тейтерненстэнь, Раянень, сестэ топодекшнестъ ниле иеть. Кавто иеде тедэ икеле тейнестъ тензэ именинат, косо пек кенярксаволь козяйказо, Оксана Карповна, вестьяк эзь олакшно мизолксось сонзэ ашназа-якстере чамастонть; покш, раужо сельмензэ эйсэ цильдёрдсь певтеме лембе веч- кемань валдо. Истямокс кадовсь Дубровоень мельс. Ды зяр- дояк а тукшны сельмензэ икельде. Конясынзе сельмензэ — сон, мазыйстэ пейдезь, ашти икелензэ. Кодат уцяскавт уль- нестъ неть вете иетне, зярс эрясть вейсэ ды роботасть эсест велень средней школасонтъ! Сави-арась тенст оштё истя эрямс? Цёрынест туртов, Витяненъ, топодекшнесь ансяк ие, тукешнесь омбоцес. Якамо кармакшнось, зярдось простясь мартонзо Дубровой. Ней тензэ куроку ниле иеть топодить. Нама, тонадсь парсте кортамо. Живть эли аволь? Тоскот эли арасть? Сави-арась кутмордамс те кувака явомадонтъ мейле? Ней уш а кувать кадовсь учомс. Курок мени оляс сонзэ веч- кевикс велеськак. Паряк, сонськак понги эсь велензэ оляс менстямо? Кодамо уцяскав улелель бу сон, лисевельгак истя! Зярсыйа арсесь Дубровой ды некеть мельтнень марто мате- девськак.

Ансяк а кувать савсь удомс лейтенантонть. Сыргозсь ав- томатсо ды винтовкасо леднемадонть. Кунсолозевсь. Леднестъ яттнэнь ёндо. Боецтнэнь эзинзе кепеде. Лиссь землянкастонть. Посттнэ весе таркасост.

— Фрицтнэ бизмолгалить? — кевкстизе сон Инчин бое- цэнтъ, кона аштесь землянкантень совамо тарканть маласо.

— Монь койсэ, лейтенант ялгай, те ёнов ютыця лангс лед- нить, — чоподантень ванозь ды кунсолозь пшкадсь солдатось.

— Секень вант, — Дубровой нежедизе кенерепакарензэ траншея чирестэнтъ лисезь лаз пентень, ды сонгак кармасть кунсолемо.

Леднемась оймась. Весе пертьпельксэсь каштмолезевсь. Костояк мезеяк а маряви.

— Те, бульчом, истяк, — аламос аштезь мерсь лейтенан- тось. — Тандавтнезь варакась куракштояк пели. Сыненст ней чеерень каштордомаськак танконь урномакс маряви. — Ды арсесь совамо мекев землянкантень.

Те шкастонть сындест аволь васолдо каятотсь автоматонь очередь. Мельганзо омбоце, колмоце... Одс ушодовсь ледне- мась немецтнень ёндояк. Пулятне, мекшть прок, ливтнестъ велькскаст.

Ды апак учо те лакштордоманть пачк траншеянтъ маласто, чоподастонть, каятотсь сянгора, сизезь ломанень вайгель:

— Ял-га-ат!.. Эсе-не-ек!..

— Парсте марик? — велявтсь мекев взводонь командирэсь ды кевкстизе Инчинэнь.

— Вадрясто, лейтенант ялгай.

— Виде, нать, тона ёндо ютыця.

— Лейтенант ялгай, — мелявтозевсь Инчин, — мереди кар- шонзо лисемадо. Паряк, сон ранявозь...

— Ял-га-ат! — таго каятотсь секе вайгелесь.

Дубровой кучсь кавто боецт.

Комсешка минутань ютазь землянкантень ветясть пек си- зезь од цёра, кедьсэнзэ сювордазь немецень автомат, лангсон- зо сэрьс рудазов оршамот.

— Сюк-пря тенк, ял-гат! — мерсь ветязесь ды сонсь сеске прась. Паряк, матедевсь, паряк, ёжовтомокс теевсь.

Дубровой снартнесь стявтомонзо. Мезеяк эзь лисе. Ёвтась тедэ ротань командирэнтень.

— Кадык оймси аламос, — мерсь старшей лейтенантось те- лефон вельде. — Зярдось сыргози, ветинк тей.

Леднемась те шкане оймась. Таго аламос азорокс теевсь кашт- молемась. Дубровой мольсь ветязэнтъ вакс. Кунсолось. Ой- мензэ таргси парсте.

— Удок, удок, — чевтестэ мерсь. Сон парсте содасы, зярош- ка стакачи сави кирдемс тона ёндо сыця ломантненень. Те

аволь васенце. Лейтенантось оштё весть ноцковтсь цигаркас-  
тонть, ды сонськак нуваргадсь землянкантень.

Зоря ланга Дубровой стявтызе вень инженьт.

— Кода леметь? — икелевгак кевкстизе сон.

— Петра, лейтенант ялгай.

— Фамилият?

— Кастаргин.

— Видестэ кортат?

— Апак кенгеле.

— Костонят?

— Куйбышевань областень. Районось Клявлинань. Веле-  
нек — Урмалеевка. Паро велесь, лейтенант ялгай, содавли-  
как тынь. Эх, кодамо мазый сон...

«Кортакшов ды весёла алясь», — арсезевсь Дубровой.

— Кода тон тезэнь понгить? — марямга кевкстизе инженьт.

— Пленстэ оргодинь, лейтенант ялгай...

— Алякин, — пшкадсь взводонь командирэсь вейке солда-  
тонть, — азё ветик штабов. — Ды сонсь велявтсь кенкшенть  
ёнов, арсесь лисемс землянкастонть.

Боецэсь кальдерьгавтызе автоматонзо, ведьменть каизе  
кирьяванзо. Анок сыргамо.

Кастаргин кода-бути талакадсь, сельмензэ келейстэ теткезь  
ваннитъ весемень ланга.

— Косо ульнить пленсэ? — кевкстизе кие-бути боецтнеде.

— Меельцекс Ротмистровкасо, тестэ аволь пек васоло.

— Косо, косо? — дивазевсь Дубровой ды мольсь мекев ма-  
лазонзо.

— Ротмистровкасо. Марсиде истямо веле? Эйтэнзэ котош-  
ка вайгельбетъ Владимировка станциясь.

— Кода эно тосто оргодевить? — озась лейтенантось чаво  
ящик лангс.

— Маштынь, лейтенант ялгай, — кенярдозь кармась ёвтне-  
ме Кастаргин. — Ламольть оргодицятнеде. Тосонь эрицятне пек  
тенек лездасть. Минек эйсэ пансестъ яла вейке покш латконь  
трокс сэдень тееме. Зярсья роботынек тосо. Июль, август. Сен-  
тябрясто оргодинек. Сон кода тевесь ашти? Аватне сеедьстэ як-  
сестъ ваксканок, лиясто паксяв паньсызь, лиясто ков. Вакска-  
нок ютамсто маряса, салавине кортыть миненек: «Оргодеде  
фрицтнэнь экшстэ. Моледе минек велев. Кекштядызь». Весе-  
меде пек лездась тенек вейке учительница, Оксана Карповна.

Дубровой тарск тейсь те лементь ледстямодо мейле, мейс-  
бути саизе картузонзо ды мекев пугызе, витизе алдонзо ящи-  
кенть. Мейле кармась цигаркань тееме. Кодаяк а тапардави  
тензэ.

— Мазый авась, — поладсь ёвтнеманзо Кастаргин, — шум-  
бра, ашо чама. Сон мик план тенек макснесь, кодамо кудос  
совамс, бути сави оргодемс киненьгак.

— Да, улить ават минек масторонть лангсо! — пшкадсь Аля-  
кин. — Весёласто кенгелят, алыж, ансяк шкась минек эйсэ а  
учи. Адядо. Штабсо кадык кунсолотадызь. Тосо седе парсте  
чарькодтядызь, мезде видьстэ кортат, мезде кенгелят. Минек,  
секенъ вант, олгонь сэдъ ланга ветясамизь.

— Аштеде аламос, — мелявтозевезь пшкадсь Дубровой. —  
Таргатадо? — кевкстизе Кастаргинэнь.

— Ускан, лейтенант ялгай. Пек таргамом сась. Ветешка чи  
уш эзинь ноцковтне. Кирьяпаремгак весе казякадсь.

Лейтенантось венстсь тензэ табак марто кисет ды конёв.

— Мерят, пленстэ оргодить? — таго кевкстизе Кастарги-  
нэнь. — Паряк, ёвтнесак, кода?

— Аволь шождыне те тевесь, лейтенант ялгай, — нежедсь  
столбанть оляс меницясь. — Бути ули меленк, ёвтнеса. Апак  
кенгеле. Те а кувать. Сёпомс а сави, фашистнэнь кедьстэ орго-  
демась аволь шождыне. Ротмистровкасо лагересь МТС-нь ма-  
стерскойтнесэ. Пиризь пупиця уськсэ ды панимизь тозонь ке-  
росинэв ды автолов киякстнэнь лангс. Уськтне ниле рядсо.  
Электричествань ток марто. Веть стака ульнесь оргодемс ла-  
герьстэнтъ. Весе ульнесь пек валдомтозь. Сеедьстэ оргодильть  
чить роботамсто, кинень кода паро. Эрьвейкенень савсь ке-  
мемс эсь пильгензэ лангс. Весть Оксана Карповна пачтысь те-  
нек сёрмине. Мон сестэ оштё лемензэяк а содылия. Истяк не-  
кшния аватненъ ютксто. Парсте содамонзо мейле карминь.  
Сёрминесэнтъ сёрмадсь: «Анокстадо августонь 25-це чинтень.  
Электричествась а карми паломо. Чиеде обед ёно вирь колкан-  
тень». Максызь сёрмадовксонть сынненст содавикснэнь. Ла-  
герьсэнтъ ульнесь теке районь ломань Гриша Чипуренко. Ды  
оштё грузин, Цыбадзе. Кавонест ветясть оргодеманъ тевтень.

— Ламоненк ульниде лагерьсэнтъ? — кевкстизе Инчин.

— Кавтошка тёжат, — сельгизе цигарка пенть Кастаргин  
ды ёртызе землянка уголонтень. — Монень роботасо ёвтасть  
теде. Ансяк планом ульнесь лия. Чипуренко икеле уш ёвтызе

монень, ков эряви модемс, савиндеряй оргодемс. Видьстэ меремс, мон роботамсто арсинь туеме. Ды тевем лиссь. Понгинь се сэденть ваксс модань чувомо. Истя вейксэшка часос чувинек. Минек самолётт ливтясть зварямсто. Теде сын прок толдо пелить. Седе куро кистэнтъ — ве ёнов, кукурузанть потс. Минь понгинек табаксо путозь пакся пес. Ломань сэрьсэть недькстнэ. Совинек сетнень потс. Конвоесь эзь мере васов тумадо. Мон аламонь-аламонь айгинь седе ве ёнов ды шлия. Содазь, самолёттнень мекев ливтямодост мейле вешнестъ эйсэнь, леднестъ коштонть. Азё вешнек паксясто варманть. Мон васов пстидия. Чокшнентъ учия сэрей кукурузанть потсо. Веть молинь максозь адресэнтъ коряс Липянки велинентень. Муия аламодо удало аштиця кудыиненть. Ансяк веть эзинь сова. Кекшинь удало пиресэ вишнянь тусто куро потс ды учия валскенть. Ашолгадсь. Авинетне пансть колмо-ниле сеинетъ стадав. Аламос кортнестъ ды сралестъ. Кудыинестэнтъ лиссь аваломань ды моли пире кияванть, кедь песэнзэ ведра. Те ульнесь Оксана Карповна. Мон, вишня потсто прям апак невте, пшкадинь тензэ. Сон эзь дивазеве. «Тынь косто?» — салава кевкстимим. Тосто, мерян, лагерьстэнтъ. — «Чокшнес, мери, теске тетя сави аштемс. Ярсамопель тетя пачтятано». Сонсь тусь ленть ёнов, мерят, мезеяк эзь нейгак. Куроксто ютась мекев ведь марто. Аламо шкань ютазь яннэнтъ лангс появась котошка иесэ тейтерне, пек моли аванть ёнов: сельмензэ раужот, ашназа черензэ кудрявнэть. (Дубровой кода-бути кувакасто таргизе оймензэ, суволгадсь таркасонзо ды мезе-бути мерсь салава). Кедьпесэнзэ вишкине корзинкине, — поладсь Кастаргин. — Салава серьгедсь тень, муимим ды максызе ярсамопеленть. Сускинь аламодо ды мадинь. Чокшнес удынь. Сундэргадомодо мейле стявтымим Оксана Карповна. Пирень пачк ветимизь веленть омбоце пев. Тосо ульнесь уштозь баня. Шлинь. Макссть тень велень эрицянь оршамопельть. Андымизь таго ды кевкстимизь: «Ков ней? Партизанокс эли фронтонтъ трокс?» Эсенектненень, мерян, ютан. «Ванок, мерить, бути ули мелеть, ильгятадызь партизанонь отрядс». Видьстэ ёвтамс, ялатеке. Ансяк монь мелем тей ульнесь. «Сестэ, мерить, оймсек аламос, мейле ильгятадызь». Ды тейсть тарка тень кардо пряс. Мейле кевкстимизь: пачкодсь-арась лагерентень сынст сёрмась, ды мезть арсить тейнеме пленнойтне. Мон ёвтния. Аватне варштасть карадо-каршо ды мизолдозевсть. Ниле

чить оймсинь се кардонть пряс. Мейсэ-мейсэ лездынъ Горпина Павловнанень, конань кардазс кекшимизь. Те ульнесь Оксана Карповнань роднязо. Ветеце чинть валске рана рась Оксана Карповна ды мери: «Лагерьстэнтъ менстинек ламо пленнойть. Зяро — а содан, ансяк ламо. Тонеть зярс кекшемс эряви седе васов. Вешнить. Бути мутадызь, берянь ули». Кода менстизь, мон а содан, эзинь кевкстне. Ветимизь колхозонь бригадань чаво кардазс. Кузтимизь покш кардо пряс. Таркась пароль. Сеске, кардазонть удало, виресь. Бути мезе, ули ков ношкстамс. Колмо чить тосо эринь. Зяро шалтось оймась, ветимизь ташто тарказон ды ёвтасть тень: ведьгеменьшка ломанть менстясть лагерьстэнтъ. Ды весе сын тустъ партизанонь отрядс. Недляшка-кавто эринь седе мейле. Парсте виеминь. Арсинь туеме фронтонтъ трокс. Сестэ Оксана Карповна кирдимим аламос: арсестъ оштё вейке покш тевень тееме. Эрявсь тенст лездамс. «Ней, мери, весе пленнойтнень менстасынек Ротмистровкань лагерьстэнтъ». Планось, бульчом, арсезель партизанонь отрядонтъ марто вейсэ. Топавтомс жо сон эрявсь Оксана Карповна марто Галина Антоновнанень. Планось истямоль. Паксясонть ульнестъ оштё пултт. Немецтне аватнень кедьстэ усковтеть эйсэст ды пивсэвтеть. Паксяс, пулттнэнь потс, анокстасть винтовкат, автоматт ды гранатат. Сын эрявсь пултт улав марто ускомс се тарканть, сэденть ваксс, косо роботыть ламо пленнойть. Капоесызь оружиянтъ, леднесызь конвоентъ — ды весе ули олясо.

— Да-а, — мерезевсь кие-бути боецтнэде. — Ёнсто, бути а кенгелят.

— Кунсолодо, — мерсь тенст Дубровой. — Седе куро прядт, Кастаргин. Шканок аламо.

— Истя тейстькак, — кирвазть оштё вейке цигарка инжесь. — Роботамо сезэнь пансекшнестъ ламо пленнойть. Конвоесь аволь пек ламо эрсесь. Арсить кавто ёнга ды нувсезь ванстыть. Оксана Карповна истямо план арсесь. Вачкамс оружиянтъ кавто улавс. Ютамс се таркаванть, косо роботыть пленнойтне. Чиремтасызь вейке улавонть. Пленнойтне кундыть кепедемензэ. Пурнавить седе ламонест. Сайнесызь оружиянтъ, маштасызь конвоентъ, мейле лондавтасызь весе лагеренть. Видькстан, монгак васня тандадынъ те пландонть. Мик кортынъ Оксана Карповнанень. Сон сёвнымим. Мейле чарькодинь. Содазь, ули пелема. Ансяк тозонь понгиця ломантне а пелить.



Ды истя тейстькак. Кортасть, кодамо чистэ топавтсызы те планонтъ. Се чинть каршо вестэнтъ монгак лездынь тенст. Пурнавсть зярья винтовкат ды автоматт. Анокстынек ящик патронт. Валске, чинзэ лисезь, аватне ветешка алашасо сыргастъ пултс. Ютксост Оксана Карповнаяк ялганзо марто. Мон се вентъ ютавтыя паксясо. Ды вачкинек улавтнэнь. Крайга пултт, куншкас оружиянтъ. Ланга олгинесэ вельгинек. Мон пек дивазь ваньинь аватнень лангс. Сынъ тейсть прок истяк, эрва чинъ тев, апак пеле, апак капша. Туемадост икеле Оксана Карповна монень ды кемнилеешка иесэ цёрыненень мерсь саемс автоматт ды лисемс роботамо таркантень ветия кинть лангс. А сёпса, монъ ульнесь мелем простямс мартост, ёвтамс тенст сукпря. Кие соды, мезе лиси. Ансяк сынъ мезтькак эзть корта. Прок ведьс кучимизь. Монень мерсть: «Ванодо, зярдо минъ пачкодтяно, се шканть вейкеяк фашист илядо нолда а тей, а тосто. Бути появить, леднеде». Чамастонзо те шканть неявьс покш мелявкс. Раужо сельмесэнзэ цильдёрдомась невтсь мездеяк апелема ды а изнявиця вий. Истямокс кадови сон монъ мельс пингезэнь. Тусть. Пек седеем токнось каштордыця кукурузанть потмова комсезь-комсезь модемстэ. Кинтень лисинек вейке шкасто. Прынек кукурузань седе тусто таркас, косто кись парсте неяви эрва ёнов. Вантано. Кинть лангс лиссть пултнэнь марто улавтнэ ды тусть пленнойтнень ёнов. Оксана Карповна моли алашанть вакссо ды яхой таракесэ. Галина Антоновна моли омбоце улавонтъ вакссо. Вана пачкодсть роботыщятнень видьс. Конвоесь, неяви, мезть-бути корты Оксана Карповнанень. Паряк, шны эйсэнзэ Германиянтень истя мелявтозь сюронь анокстамонтъ кисэ. Невтсь, кува улавтнэненень седе паро ютамось. Зярдо пачкодсть куншка видьс, косо ульнесь пленнойтне, Оксана Карповнань улавстонтъ чарось лиссь, чиремсь. Сон пшкадсь конвоирэнтень, вешти лезкс. Конвоирэсь пижни, пленнойтне а молить. Прикладсо мик кавтошка риштясь. Мейле мольсть улавонтъ малас. Мельгаст эскельдясть лияткак. Ды зярья пурнавсть улавонтъ перька. Пижнесь, буту кепедить. Зярдо видимсь улавось, пленнойтне эрейстэ срадсть ды эрва ёнов конвоентъ лангс каятотсть автоматонь очередть. Сэдентъ вакссо сыремсь алкуксонь тюрема. Тов ваноманть марто допрок стувтокшныя эсень тевем. Варштынъ Ротмистровканть ёнов кинть лангс — видеэнек пачкодсь тарантасс кильдезь айгорсо ардыця фашистэнь

офицер, лагерень комендантонть лездыцязо. Кодак маризе леднеманть, мерсь кучерэнтень мекев велявтомато. Минъ кавто автоматсо — нардазь нардынек, пултос ёртовсть дрожкатнестэ. А тосо мезе мольсь! Конвоентъ весе леднизь. Эзизь менстэя десятиктненьгак. Пижнить, леднить. Мезеяк а чарькодят.

— А аватне? — кода-бути сорныця вайгельсэ кевкстизе Дубровой.

— Седе тов пландост ззинь сода, — уктась Кастаргин. — Се шкастонть саезь эзинь нее. Улавтнэ ардозь тусть сэдентъ ланга велентъ ёнов.

— Вадрясто! — шнынзе Инчин.

— Нетъ вана авинеть! — каясь вал Алякингак. — Героинят, бути а кенгелят.

— Мейле кода? Лагерсьэ пленнойтнень олякстомтынк? — кевкстизе Федоркин.

— Олякстомтомскак тосто а мезе ульнесь. Кодак чиинек, часовоитне ношкстнесь. Зяро-бути кенеринек стена ёжос аравтомо. Кить пленнойтнеде ульнесь лагерьсэнтъ, сеть тусть мартонок. Куватьс кадовомс тозонь миненек а кода ульнесь. Цыбадзэ пижакадсь: «Монъ мельга!» Сонсь ульнесь уш ласте самой се айгоронтъ лангсо, конань азоронзо минъ «каванинек». Лияткак кой-кить алашат косто-бути кундасть. Чипуренко лоткавтсь кавто машинат. Шофертнэнь — канакас. Зяро кельгсть, ойсестъ машинатнес. Ды весе ношкстастъ вирентъ ёнов, кода ульнесь кортазь икеле. Мон вастынъ кавто ялган, конатнень марто служинъ ды оргодемазон пленсэ ульнинъ. Сеске арсинек ютамо фронтонтъ трокс тей. Ансяк сеске эзинъ туеве. Арсинъ васня содамо седе, мезе теевь Оксана Карповнань ды Галина Антоновнань марто. Чокшнентъ учинек вирьсэнтъ. Салавине ваньинек, кода фашисттнэ машинасо ды мотоцикласо ардтнесь кияванть, паксяванть, вешнесь оргодицятнень. Веть молинек Липянки велентень. Ды цяк эзинек понго одов: кавонест кудынетнесэ ульнесь засада, Оксана Карповнаньгак, Горпина Павловнаньгак. Понговлинек бу. Ансяк васня молинь бригаданъ кардазонть, козонъ кекшнимизь. Тосо аламос аштинек. Апак учо мольсь эйзэнек се цёрынесь, конань марто минъ аштинек кинть лангсо ды леднинек фашисттнэнь. Сон кучозель тозонь партизанонь отрядонтъ пельде. Те цёркась ёвтась тенек: Галина Антоновна вирьсэ, партизанонь отрядсонть, а Оксана Карповна арась. «Кудозост,

мери, илядо моле. Тосо засада. Кундатадызь». Седе мейле минь сыргинек. Сынст кедьсэ винтовкат, монь — автомат. Передо-военть видь сынек парсте. Фронтонтъ трокс ютамсто срадынек. Вейке ялганок стакасто ранявсь, зярдо васенцеде кармасть леднеме. Зярьянь тарка ускинек лангсонок пеке киське лангсо шаштомсто. Эзь пачтяво. Кулось. Савсь кадомс. Омбоце марто явовинек, зярдо те ёндо кармасть леднеме. Сон тусь керш ёнов, лушминеванть, мон — видьстэ. Аволинь пачкоде. Пасиба тынк ялгатне лездасть.

— Леднемкась однэ, — чольдерьгавтызе Инчин автоматонтъ. Дубровой аштесь стакасто арсезевезь. Чамазо кода-бути ловташкась. Таго кирвазтьсэ цигарка. Венстясь инжентеньгак.

— Лейтенант ялгай, ротань командирэнтень! — тердизь Дубровоень.

— Адядо, Кастаргин ялгай, — стясь сон ящикенть лангсто. — Монсь молян мартонк.

Туемадост мейле солдаттнэ зярсья кортасть сеть аватнеде ды те алядонтькак.

Мекев Кастаргин сась солдатонь формасо. Сёрмадызь сонзэ Дубровоень взводонтень. Весе солдаттнэ вастызь кенярдозь ды кармасть каванямонзо. Кие венсти тензэ кши, кие — консерва банка, а Алякин кончась сельмсэнзэ, тердизе землянка уголонтень ды мезе-бути нуртась кружказонзо эсензэ фляжкастонтъ.

Дубровой взводонзо марто свал тюрсь боень сехте стака таркатнесэ. Лиясто седеензэ эждясь кенярдома, лиясто пултась семиянзо кувалт стака ризнэма. Кенярдовтьсэ эйсэнзэ ятонть каршо нинзэ бороцямысь, пек ризнэвтсь Кастаргинэнь меельце кулясь. Мезе жо ульнесь мартонзо? Седе курук бу тов! Кодамо стака кирдемс тень. Маласо — кедеть саты. Ялатеке а ношкстат. Сави кирдедемс, учомс. Ды те чарькодевияк. Кие а содасы, кодамо покш кеняркс модемс эсь велезеть изницякс ды оляс менстицяк! Ков а варшты — весе содавикс. Паряк, чинь-кавтонь ютазь, пачкоди чачома велезэнзэ, сови школазонзо, косо эйкакшпингестэ тонавтнесь ды институтонь прыдомадо мейле сонсь тонавтсь; косо зрясь поланзо, эйкакшонзо марто, косо роботась, бажась, мелявтсь.

Ансяк аволь истя, кода арсесь, пачкодсь эсь чачома велезэнзэ. Комсьветешка вайгельбетъ эсь велензэ видьс апак пачкоде Дубровой стакасто ранявсь снарядонь пелькссэ. Кас-

таргин кедь лангсонзо ливтизе сонзэ бойстэнтъ ды пачтизе санчастьсэ. Зярдо сась тензэ ёжо, чокшне, бойдентъ мейле, тердевтисе Петрань. Керш кедезэ ульнесь апак сюлмсе. Сень эйсэ сюрдордызе кедензэ.

— Пасиба теть, вечкевикс ялгай! Ансяк вейке энялдома. Инеськетъ, топавтык сонзэ. Зярдо пачкодят Ротмистровкас, муик Оксана Карповнань... Ёвтак... Сон монь козьяйкам...

— Лейтенант ялгай! — дивазь пижакадовсь Кастаргин ды тусть сельведензэ. — Мекс тынь икеле...

Дубровой эзизе кадо валонзо прыдомо.

— Илядо мелявто... Весе ули парсте... Марятадо?.. Мерезде шумбра... Палыть эйк...

Эсензэ сельмензэ конявсть, кедезэ васня соракадсь, мезе-бути прок кундась, мейле новольсь нардевтеме. Чаманзо артызе куломань ашо.

— Лейтенант ялгай! — тошказевсь Кастаргин ды авардезь пульзьясь походной койканть ваксс.

— Мезе? Таго ёжозо маштьсэ? — мольсь военврачось. — Виде, таго. Стака кирдемаст истят ранатнень. Азёдо, боец ялгай, сонензэ эряви оймамс.

Кастаргин оштё вестъ варшась лейтенантонть ловташкадозь чамантень, кепедизе ды вельтизе вельтякссонтъ новолезь кедензэ, стясь, нардынзе сельведензэ ды лиссь. А ёвтавишка ризкс пултась седеензэ. А эдь сон вете-кото чить ульнеськак мартонзо. Взводонтень мекев молемадо мейлеяк кодаяк эзь оймаво. Ды аволь ансяк сон. Весе взводось те вентъ эзь удо. Эрьва солдатось ледстнесь мезеяк паро Дубровой лейтенантонтъ. Эрьвейкенень сон ульнесь вечкевикс ломань.

Ансяк эзь саво сестэ Кастаргиннэньгак понгомс Ротмистровкав ды топавтомс Дубровой лейтенантонть мелензэ. Сынст частесь тусь лияв, Умань ошонть пелев. Ротмистровкась кадовсь эйтэст вить ёнов. Сонзэ менстизь оляс лия часть. Эрьва чистэ бойсэ, эрьва чистэ икелев молезь, Кастаргиннэнь кодаяк эзь саво марямс, мезе ульсь Дубровой лейтенантонть марто, жив сон, эли аволь; бути жив, кие соды кодамо госпитальсэ. Эсензэ пельдеяк кодамояк куля арасель. Истя мелявтозь ды арсезь, эсь прынзо апак жаля тюрезь мольсь яла Кастаргин весе марто икелев, чивалгомав, потыця ятонть мельга.

II

Кувака, стака ды теке марто героень ки ютась седе мейле Кастаргин Петра. Те кись мольсь Украинань, Бессарабиянь, Румыниянь, Венгриянь трокс Австрияв. Ниле государствань столицань оляс менстямсто тюрсь сон. Тюресь ютась Днепранть, Прутонть, Тиссанть трокс. Бороцясь Балатон эркенть чиресэяк. Ды прядовсь войнань кизэ Австриясо, Альпийской пандтнэнь ютксо, косо тапизь фашистэнь ордатнень кадовикс пельксэст ды косо мариць кенярдовтыця валтнэнь:

«Минь изниек! Фашистэнь звересь тапазь эсензэ пизэсэнзэ! Изнямонь кумацесь лыйни рейхстагонть вельксэ!».

Ие седе мейле служась Кастаргин Петра границянь томбале. Ды вана 1946-це иестэнтъ, июнь ковсто, ардсь кудов. Вана Владимировка станцияськак. Тестэ кото вайгельбень таркасо Ротмистровка велесь, косо сон ульнесь лагерьсэ, косо фашистэнь палачтнэнь нарьгамодо кулость ламо ялганзо. Тестэ менсь оляс пленстэ. Тесэ вастызе героиня-аванть — Оксана Карповнань. Паряк, Дубровой лейтенантоськак ней уш кудосо? Кода а молят? Кода а варштат неть таркатнень лангс?

Апак капша мольсь Кастаргин Петра Ротмистровкантъ ёнов. Шказо ульнесь кеменце час. Чизэ эждясь июнень чевте лембесэ. Валске марто ульнесь пиземе. Коштось ванькс. Кинть ланга тия-тува цилидёрдыть ведень чахмат. Кавто ёнга паксят-несэ чополгали товзюрось. Алты паро норов. Паксятнень вельксэ норовжорчонь моронь жойть, мерят, косо-бути певтеме сэньсэнтъ понгавтнезь горниповт чольдердить. Пек уцяскав ломанекс мольсь Кастаргин тиринь моданть ланга ды мельс-паросо ваннось касыця сюпавчинть лангс. Мештесэнзэ, прок норовжорчонь моронть каршо пшкालезь, кальдердсть боевой кинзэ тешкстыцятне — орденэнзэ ды медалензэ.

Вана Ротмистровка велеськак. Сон одс чачсь. Пултазь ды калавтозь кудотнень таркас путозь одт. Пачкодсь веле пентень. Тесэ МТС-сь, косо зярдо-бути ульнесь военнопленноень лагерерьсэ, конань эйстэ, содазь, меньгак тешккак эзь кадово. Весе мастерскойтне роботыть. Кардазганть мекев-васов ардтнить кавто машинат ды гусеничной трактор. Натъ, пансиль эйсэст витнемадо мейле. Тракторонть ветни од тейтерьава. Лиссь ортаванть чаво таркантень, чаравтсь-тейсь ды совась мекев.

Кастаргинэнь вакса ютамсто васня зярсыя вансь лангозонзо, мейле пейдезевсь ды яходсь кедьсэнзэ. Петра кенярдозевсь тенень. Косто неIZE те тейтерьаванть? Лоткась ды ваны мельганзо. Кардазсонть нилешка од цёрат, неIZE сонзэ ды мекс-бути кармасть ракамо. Петра капшазь совась велентень ды тусь ульцянтъ кувалт.

Сон арсесь модемс велень Советс ды тосо кевкстемс Оксана Карповнадо ды Дубровой лейтенантонтъ. Пачкодсь веленть куншкас. Керш ёно неIвсть кирьпечень кудот, вить ёно ушодовсь паркось, конань перька янгазь пирявксось витнезь одс ды красязь пиже краскасо. Паркстонть зярря покш тополоть, неIви, керязь, мукортнестэ виевстэ касыть одт.

Одс лаказевиця эрямонть лангс ванноманть ды тень кувалт кенярдоманть марто Петра стувтызе киньгак кевкстемс, косо велень Советэсь. Сонськак а соды, ков моли.

— Кастаргин! — каятотсь косто-бути гайтев вайгель.

Сон варштась перьканзо ульцянтъ ёнов, ансяк костояк эзизе нее тензэ пшкадицянтъ. Ды зярдо варштась парконть ёнов, неIZE, кода лиссь каршонзо цёраломань. Лангсонзо бастононь костюм, прысонзо шляпа, кирьгасонзо кикске марто галстук. Керш кедьсэнзэ кедень портфель, вить кедьпесэнзэ кавксошка иесэ тейтерне.

— Паряк, а содаван? — мольсь эйзэнзэ ломанесь.

— Лейтенант ялгай! — кенярдозевсь Кастаргин. — Вайгеленк сеске содыя... Ансяк эзидизь нее, кона ёндо пшкадиде...

Сынь солдатокс кеместэ кутмордасть ды колмоксть паласть.

— Мон тынк сеске содыдизь. Тынк гвардеецэнь рунгось а стувтови. Косто? Васолдо?

— Границянь томбальде.

— Кодак неитинь, сеске чарькодинь. Сеедьстэ арсинь тонь кувалт. Ды учинь. Кеминь. Содазь, сыть варштамо... Истя, истя. Монськак те ёжонть содаса. Эх, стувтыя. Рая, — пшкадсь тейтернентень, — шумбрактнек лелянтъ марто. Содави теть?

Тейтернесь чаравтсь прысонзо, сонсь эйкакшокс кеместэ сюрдызе солдатонтъ кедензэ.

— Вишкине ульнесь сестэ, — верде алов вансь лангозонзо Кастаргин, — стувтымим. Сонгак лездась тень, андсь яла эйсэнзэ, а мон налкшкетъ тензэ тейнинь.

— А-а, те тынь, Петя леляй! — кенярдозевсь эйзэнзэ тейтернесь.

— Самай сон, Раинька! — кепедизе ды кутмордызе Петра. — Покшто, покшто касыть седе мейле. Тонавнют?

— Васенце классонть прядья. Эх, зяро тынк орденэнк! Тетяньгак улить.

— Аядо, Кастаргин ялгай, — тердизе Дубровой. — Содазь, тынь сизиде ки лангсо. Обедатано, оймсетядо. Мейле уш кортнетяно, ледстясынек ютазь тевтнень ды варштатано икелепелевгак.

Сыргасть парконть кувалт виде килеень аллеява. Модемстэ Дубровой ёвтнесь тензэ.

— Кавксо ковт седе мейле усксесь эйсэнь госпитальстэ госпитальс. Вейксэ кшни пелькст таргасть бокастон. Ве шкане куломась пек кеместэ кундакшнось кирьга пакшозон. Ялатеке врачтнэ эзимизь максо тензэ. Ванстымизь. Прок одов чачинь. Видьстэ меремс, зярс тынь прядыде войнанть, монь ранан эйсэ пандтнесь. 1945-це иень февральстэ нолдымизь кудов. Сынь эсенек велев ды седе мейле те шкас роботан средней школань директорокс.

Паркось прядовсь. Певанзо сэтъместэ чуди Мистровка лейнесь. Тона ёнонзо зярыя паро кудот. Ютасть ялго якамо сэдне ланга. Яннэсь пурдась тусто ды сэрей вишня чувто потс ваязь ашосто белязь кудо ёнов.

— Вана те монь квартирам, — невтсь Дубровой. — Войнадонть икелеяк тесэ эринек. Фашисттнэ, кодак састь, панизь эйтэнзэ семиям. Староста эрясь эйсэнзэ. Секс кадовськак.

Вастынзе ниленьгемень ветешка иесэ ава, Горпина Павловна. Кастаргин сеске содызе. Авакськак сонзэ содызе. Каявьс кирьгазонзо ды палызе, прок эсь цёранзо.

— Ванта, эзимик стувто, — паця уголсонзо сельмензэ нардтнемстэ кортась авась. — Зяро тонь кондымо молодецт андынь, симдинь, шлинть-нардынь, кекшнинь. Куш вейке сась лангозон варштамо. Пасиба теть, Петра. Максынка мешоконт. Кайседе. Евгений, — пшкадсь Дубровойнень, — лездак тензэ шлямсто. Мон ярсамопель анокстан седе курок.

Совамстояк, шумбрактнемстэяк, кайсемстэяк Кастаргин учось яла, кода сови эли лиси костояк Оксана Карповна ды мизолдозеви каршонзо. Кевкстеманзо мекс-бути виздсь. Шлямо якасть Мистровка лейнентень. Те шкане Дубровой ёвтнесь тензэ Горпина Павловнадо. Те сонзэ патязо. Мирдензэ оштё одсто маштызь кулакт. Седе мейле кувать роботакшнось трак-

тористкакс, пелькстась Паша Ангелина марто. Пленнойтнень оляс менстямсто лездамонть кисэ пек чавизь фашисттнэ. Седе лавшомсь шумбрачизь. Войнадонть мейле эри сонзэ марто. Оксана Карповнадо валгак эзь ёвта.

Зярд совасть мекев кудос, столь лангсо ульнесь уш ярмопель ды цяркава кайсезь вина.

— Вастоманок кисэ! — озамодост мейле кепедизе цярканть Дубровой.

— Эх, орёлт, орёлт, — кувакасто уктась Горпина Павловна цяркатнень вейс-вейс токавтомадост мейле. — Кода бу кенярдоволь Оксана, улелельгак жив...

— Сон а жив? — чувтомсь прок Кастаргин ды кедьстэнзэ цють эзь пра цяркась. — Мезе ульнесь сонзэ марто?

— Мейле теде, Кастаргин ялгай, — кода-бути лепштявозь вайгельсэ энялдозевсь Дубровой. — Монь койсэ, тон а кармат капшамо. Весемед кортатано. А ней... Зярдояк а стувтомс чавозтнень ды шумбрачизь улемс эрицятнень.

Кода-бути амельсэ Петра симизе цярканть. Ярсамо тунь эзь моле тензэ. Кортамоськак одов ёнсто эзь ушодово. Эзь лездаомбоце цяркатнеяк. Горпина Павловна теке тев нардтнесь сельведензэ. Стакаль Дубровойненьгак. Секень вант, авардемасо прядовольгак вастомань васенце часось, аволь совак те шкане се тейтересь, конань Кастаргин самсто неизе тракторонть лангсто. Сон кенерсь уш шлямо ды парсте оршамо. Шумбра, свежа, лембеденть якстерьгадозь. Совась бойкасто ды весёласто.

— Шумбрачи тенк, — икелевгак кедензэ венстизе Кастаргиннень. — Курок стувтынк икелень содавиксэнк. Тынь кунсолодоя, Евгений Павлович, — ютась ваксан ды мик эзь шумбрактнеяк. Кода тынь тень лангс вантадо?

— Простямизь, Галина Антоновна, — кеместэ сюрордызе кедензэ Петра. — Виде-паро тынк ней стака содамс. Истямо отдак. Сестэ тынь лия ульниде. Мон колоньгеменьшка иесэ авакас ловинь эйсэнк.

Окойники Дубровоень чаманть валдомтызе пейдема.

— Аламо ли мезе ульнесь, — гайгезь кайсететсь Галинань вайгелесь. — Сестэ монень аволь ансяк авакас, сизьгемень иесэ сыре бабинекскак савкшнось тейневемс, куш иень ульнесь ансяк кевейксэе. Истя эрявьс. А мон тынк сеске содыдизь. Чарькодинь, ков сатадо. Энялдозевинь директоронть икеле. Нолдымим. Ды вана тесан.

Озась Кастаргинэнь ваксс. Дубровой одов пештинзе царкатнень.

— А тон, Горпина Павловна, неяви, авардить? — кевкстизе Галина. — Тыньгак, прок кельмесэ вачкодезядо, — варштаь Петра марто Дубровоень лангс. — Чарькодян. Ледстник Оксана Карповна. Виде, истямо ломантне зярдоак а стувтовить. Ансяк аволь авардезь ледстнемат. Оксана Карповна тень кисэ аволидизь шна: а вечкиль авардицят. Сон ульнесь одонт кисэ мездеак а пелиця тюрицякс, тень кисэ кулоськак. Мон куш а симнян, ялатеке те царканть симса Оксана Карповнань кисэ, ломантнень мельсэ пингень пингс эриця бороцицятнень кисэ!

— Мезе лиссь Оксана Карповнань марто? — кевкстизе Галинань Кастаргин.

— Ёвтнеса, — айгизе икелензэ рестаь ал марто тарелканть Галина. — Вана ярсан ды ёвтнеса. Ансяк апак аварде. Моненьгак сонзэ ледстнемась аволь шождыне. Вете иеть Оксана Карповна ульнесь минек классонь ветицякс. Парсте тонавтгымизь эрямонт чарькодеме. Зярдоак а стувтсынъ сонзэ сеедьстэ ледстневица валонзо: «Зярдоак иля синдеве зыянонтень, зярдоак иля чаракадо уцяскадонтъ». Мезненъгак сон эзь синдеве. Кулось алкуксонь боецэкс.

Обедамодо мейле весе мольсть вейсэнь калмонт лангс, кона ашти парконт обед ёно ужосонтъ, райисполкомонт каршо. Эйсэнзэ комськавтово калмот. Весе пурназь-сэрнязь парсте, пирязь цецянъ кумбосо ды пиже лугасо. Оксана Карповнань калмось омбоце рядсонть васенце, вакссонзо цёранзо, Витьканъ, калминесь. Сеске, пирявксонт ёжосо, пичень лазонъ ванькс эземне. Тесэ Галина Антоновна ёвтнизе, кода понгс фашисттнэнь кедьс ды героекс кулось Оксана Карповна.

Весе ульнесь арсезь парсте. Горпина Павловна эйкакштнэнь марто икеле чинть уш ульнесь ильтязь Липянкистэ лия велев. Оксана Карповна марто Галинат пленнойтнень менстямодо мейле туить вирев, партизанонь отрядс. Истя тейстькак. Зярдо пленнойтне тонгизь чаронт мекев, витизь улавонт ды каявьст конвоент лангс, сын алашатнень нолдызь икеле молиця улавтнэнь мельга, ваннозь кузсть губорьксэнт лангс ды совасть кукуруза потс. Те шкастонть ве ёно аштиця полицейскойтнедеяк зяро-бути кенерсть ношкстамо мельгаст. Ансяк

Оксана Карповна марто Галинат сынст эзизь нее. Секс апак пеле сыргасть виренть ёнов. Мольсть капшазь. Галина ульнесь икеле. Друк удалдотс каятотсь автоматонь очередь. Галина варштаь удалов ды несъ овсе маластотс кавто полицайть. Оксана Карповна нилексть ледсь. Полицайтне кекшнестъ. Сынъ таго ношкстаь виренть ёнов, тов, косо ёвтазь таркасо учить эйсэст партизантнэнь пельде кучозь ломанть. Галина оштё кавксть-колмоксть варштаь удалов, Оксана Карповна чийсь яла мельганзо. Седе тов кукурузась тустомгадсь, чиёмась стакалгадсь. Пелема таркась прок кадовсь удалов. Секс Галина, удалов апак ванно, капшась яла икелев. Овсе виренть маласто варштаь — Оксана Карповна эзь неяво. Велявтнесь мекев — эзь муеве тензэ. Вастсь пленстэ вейке менстятнеде. Кевкстизе. Сеяк эзизе нее. Кавонест ваннось — косяк арась. Паряк, менсь вирентень сындетс икеле? Чиезь ношкстаь. Муизь ёвтазь тарканть. Тосо учость эйсэст кавто партизант. Оксана Карповна арась. Састь оштё вете пленнойть. Оштё таго якасть кукурузанть потс. Ансяк Оксана Карповна тенст эзь муеве. Чокшне малав весе лагересь пурнавсь вирентень. Веть весемень ильгизь партизантнэненъ, конат саизь эсь марто лия таркав. Тесэ, келя, немецтне кармить карательной операциянь тееме. Вейке отряднэнь максозель задания: муемс Оксана Карповнань. Прявтокс те отрядонт марто тусь сонсь Брагин, партизанонь командирэсь. Содазь, марто тусь Галинаяк, сыре бабинекс наряжазь. Сонензэ максозель те: модемс эсест велев ды кодаяк марямс, арась ли Оксана Карповна гестапосо эли полицаень участкасо.

\*\*\*

Оксана Карповнанэнь ёжо сась гестапосо. Панжинзе сельмензэ. Пенксев стенат. Потолокстонть кува-кува штукатуркась прась, неявить раужкадозь лазт. Кшнинь решётка марто вальмаванть омбоце стенантень токась сёксень чинть нусманя валдозо. Коштось стака — ойметь а таргави. Састо озась. Ве пильгензэ мендизе. Омбоцесь эзь чирькавтовоаяк — таргозезь, прок чочко, сюрмезь бинтэ. Сон венстинзе кедензэ — весе рунгованзо тусь толокс пициця сэредема. Сельмензэ чополгадсть. Кияксось алдонзо велявьсь ды тусь алов. Аламось аштезь, таго кепедизе прынзо. Ванны. Косо сон? Ускозь ускизе рунгонзо вальманть ёнов. Кундась кевень вальмалангонтень ды сорнозь

кедьсэ, а ёвтавомашка сэредемань кирдезь, стясь ве пильгенть лангс. Варштась ды икелевгак неIZE ульцянтъ тона ёндо средней школанть, косо сон роботась войнадо икеле. Сеске новольс мекев. Чарькодсь. Тесэ икеле ульнесь райпотребсоюз. Те таркасонть эрсесь склад. Фашисттнэ теизь камеракс. Сон — гестапосо. Весе. Паро а мезе учомс. Ды арсезевсь седе, кода понгсь. Чиёмстэст, зярдо каятотсь автоматонь очередесь, сонзэ вить пильгезэ прок пси ведьсэ валовсь. Ледсь полицаенть лангс. Зярыянь тарка седе мейле чийсь. Мейле прок ямас чалгавсь ды прась. Пильгенть лангс уш эзь чалгаво. Кукурузанть потмова чийсь полицаесь. Оксана Карповна эзь фатяяк, кода леднинзе весе патрононзо. Кие-бути вачкодизе пря ланга. Седе мейле те шкас мезеяк а помни. Кода пленнойтне? Весе эли аволь менсть? Кода Галина? Жив эли аволь? Зярыя лия кевкстемат велясть прясонзо. Ледсь мелезэнзэ мирдезэ, эйкакшонзо, Горпина Павловна. Сон а кадсынзе эйкакштнэнь. (Оксана Карповна тунь эзь сода: се шкане Горпина эйкакштнэнь марто ульнесь пекстазь кевень утомсо). Содазь, сонензэ куломка. Сень кисэ тэжадо ламо пленстэ менстязь ломанть кармить эрямо ды тюреме фашисттнэнь каршо. Тень кисэ а жаль максомс эрямоткак. Неть мельтне прок нардызь седейстэнзэ стака ризкэнтъ. Сельмензэ валдомсть. Сон анок ульнесь куломо.

Те шкастонть косто-бути васолдо, прок пурьгине, каятотсь кодамо-бути зэрнема. Оксана Карповна варштась вальмаванть — ушось маней. Сентябрянь меельце чить. Пурьгинентень а косто улемс. Зэртесь таго каятотсь, ней седеяк виевстэ. Седе тов кармась марявомо апак лотксе, прок сядо пурьгинеть сорновтнестъ менелентъ. Чарькодсь: минектне! Сыть! Оксана Карповна озась. Те зэртесь макссь тензэ вий. Стясь ды ваны вальмаванть. Ульцяванть якиця ломантне лоткить, аламос кунсолыть увтонть ды кеняркс марто туить. Раужо кофгасо ды сёрмав пацясо вейке бабине лоткась школань умарь пире ужонтень, аламос кунсолось, чекась-покась ды мельспаросо тусь эсь кияванзо. Ды содызе сонзэ Оксана Карповна. Те ульнесь Галина. Сон сёрмадсь седе курок конёв панковс лангс зяробути валт. Ансяк максомс ульнесь а кода. (Те конёв панковс ванстовсь кофта зепсэнзэ). Ялатеке мельспаросо аштесь Оксана Карповна. Кодашка кенярдома ули, зярдо сы эсенек армиясь, зярдо мени фашисттнэнь раужо сёлмотнень алдо валдо чись? Ансяк учови-арась те кенярдомась сонензэ?

Шказо ульнесь, натъ, кавксошка част. Вакссонзо комнатастонть кармасть марявомо якицят ды кортыцят. Оксана Карповна сяворсь мекев начко кияксонтень. Калдоргадсь ды панковсь стака кенкшесь. Совасть полициянь начальникесть Садченко, сэрей, ашназа-серой сельме. Кулаконь тарад. Велестэнтъ тетяно панемадо мейле кияк эзь сода, косо ульнесь. Фашисттнэнь марто сась велентень полицаекс. Сизьгеменьшка ломанть повартсь районстонть. Секс аравтызь полициянь начальникекс. Мартонзо Тутман гестаповецэсь ды самай се вейке сельме полицаесь, кона чийсь мельганзо.

— Сон? — кевкстизе ве сельме полицаентъ Садченко ды невтсь Оксана Карповнань ёнов.

— Самай сон, господин обер-лейтенант, — чольдерькай кельсэ кортазевсь полицаесь. — Монсь, эсь сельмсэнь неия, господин обер-лейтенант, кода ветясь алашанть, кода буто чарозо лиссь, кода мейле ношкстась кукурузанть потс. Сон, сон, господин обер-лейтенант. Мон кундамонзо чиинь. Леднесь лангозюнок. Цапенконьгак сон ледизе. Моньгак ранимим, — невтизе сюлмсезь кедензэ. — Револьверэнтъкак кедьстэнзэ монсь муия.

Оксана Карповна сельме понанзо пачк вансь лангозюст.

— Стяк! — пстидизе пильгс Садченко.

Оксана Карповна кувсезевсь ды панжинзе сельмензэ.

— Стядо, гражданка, — седе чевтестэ кортазевсь полициянь начальникесть. — Миненек эряват кевкстнемс вейке а покшке тевень кувалт. Ёвтаса тетъ икелев. Тон гестапонъ кедьсат. Эряви тетъ содамс. Тесэ мезеяк а сёпови. Стядо!

— А стяван: пильгем ранязь, — нулгодезь мерсь каршонзо Оксана Карповна.

— А-а-а... Сестэ простямизь. Нейке лездатано. Дибич! — серьгедсь тона комнатанть ёнов. — Стул.

Кандсть стул.

Кавто ёндо озавтызь лангозонзо Оксана Карповнань — превензэ чарастъ, пильгезэ сэредсь. Ялатеке цидярдсь. Эзь невате икелест лавшочинзэ.

— Ну вана истя седе паро, — судонь пачк кортась Садченко. — Ней минь кевкстядызь ансяк вейке тевень кувалт. Ёвтак видьстэ: тон усик пленнойтненень оружиянтъ?

— Мон! — куватьс апак арсе мерсь Оксана Карповна.

— Те паро, пек паро! — капшазевсь полициянь начальникесть. — Ки марто?

— Съкамон.

— Кенгели, господин обер-лейтенант, — чольдерьгадсь таго ве сельме полицаесь. — Кенгели. Монсь неия ялганзо. Сон чийсь седе икеле. Ношкстась вирентень.

Оксана Карповна шождынестэ таргизе оймензэ. «Галина менсь. Жив», — арсесь кенярдозь.

— Кияк монь марто арасель, — марямга мерсь тенст.

— Кенгели... — таго чольдерьгадокшнось ве сельмесь. Садченко лоткавтызе.

— Паро, мерьсынек, съкамонт, — пшкадсь Оксана Карповнанень. — А ней ёвтак, косто саик зняро оружиянт?

— Тень а ёвтаса!

— Ну? — будто дивазевсь Садченко.

— Теде монь пельде вал а марятадо! — керязь керизе Оксана Карповна. — Уския мон. Мезе меленк теде мартон.

— Эка, — раказевсь Садченко. — Тынь, гражданка, стувтынк, нать, косо аштетядо. Содадо: тесэ кевентькак кармавтсызь кортамо, аволь ломаненть. Косто саик оружиянт?

Оксана Карповна каштмольсь. Те шкане таго виевстэ каятотсь васолдонь увтось. Авась пейдзевсь ды коня алга варштась нарьгицянзо лангс. «Марясынк? — кортась сонзэ вановтось. — Тынь уш судязядо. Оно сы приговоронь топавтыцясь».

— А карматадо кортамо? — пизямсь те вановттонт ды увттонт Садченко ды ютась мекев-васов. Сельме алонзо новолезезь мешоккетне кармасть сорномо, чамаумарензэ ноцкаетеzewсь, судозо сормавсь. — Максан тенк кеветее минутат. Арседе. Бути мезеяк а ёвтатадо, — пеняцядо эсь лангозонк. Минь содасынек, кода эряви кортамс аваломань мартояк.

Ды тусь.

Артиллериянь увтось седеяк пек кармасть марявомо. Оксана Карповнанень марявсь сон мазыйдеяк мазый музыкакс.

Пек сизесь. Састо новольсь стулонт лангсто ды сяворсь кияк-сонтень. Седеезэ кода-бути оймась. Галина жив. Эйкаштнэ мала-сот. Весе моли парте. Ды матедевсь неке мельтнень марто.

Стявтызе таго Садченко. Мартонзо Дибич.

— Тынь мекс таго масторотадо? Истямо культурной ломань рудазов киякссо. А лади. Дибич, лездака.

Таго озавтызь стулонт лангс.

— Тон, келя, учительница ульнить? — кевкстизе Садченко. Оксана Карповна эзь варштаяк лангозонзо.

— Мирдетькак, кортыть, учитель? Те виде? Ней сон косо? Каршо вал эзь маря.

— Эйкашонк ульнеть? — нолдызе меельце козырензэ палачесь. — Мон маринь, кавто. Андсынзе-арась кияк ней?

Эйкаштнэнь ледстямось прок кирви толсо невельдизе Оксана Карповнань седеензэ. Цють эзь мене турвастонзо вал. Ялатеке кирдсь. Эзь пшкаде.

— Илядо мелявто, — токизе лавтовс полициянь начальни-кесь. — Тынк эйкашонк паро таркасот. Минек кедьсэть! Таркаст лембе. Пекест пешксеть. Мартост тынк паро лездыцянк — Горпина Павловна Дубровая. Пейдевтиця авась.

Оксана Карповнань сельмензэ чополгадсть, чирьказевсь ды кармасть сявореме стулонт лангсто. Кирдизь.

— Ёвтак! — видьстэ сельмезэнзэ варштась Садченко. — Кортак! Мон ялатеке келеть панжса!

Оксана Карповна кепедизе прянзо ды сельгсь чамазонзо.

— А-а-а!.. — а паро вайгельсэ пижакадсь полициянь началь-никесь. — Тон вана кодамат! На! — вачкодизе зяро виезэ чама-ланга.

Оксана Карповна стулнэк сяворсь. Садченко азаргадозекс кармасть пстиемэнзэ кува понгсь. Авась эзь кувсезевеяк. Те се-деяк азаргавтызе палаченть. Кармасть чавомонзо, стулонткак янгизе лангозонзо. Ды, а паро валсо сюдозь, лиссь тосто.

Оксана Карповнанень седе мейле зярсыя эзь са ёжо. Аш-теть празь кода понгсь: прязо пурдавозь удалов, кедензэ прок велявтовозь. Кофтазо ды платязо сезневсть. Мештезэ штадо. Кирьгастонзо, судостонзо чудесь верь ды, раужкадозь, срадсь кияксканть.

Часошкань ютазь, сась тензэ ёжо. Весе рунгозо прок толсо палсь. Велявтсь кунст. Кедензэ эзть кепедеве. Икелевгак, мезень кувалт мелявтозевсь, — те се, чей, эзь ёвта ёжонь маш-тозь мезеяк эсенектнеде. Эдь сон весемеде соды.

Кальдерьгадсь кенкшесь. Совасть таго секе палачтнэ.

— Стяко ансяк эсь прят майсевтыт ды минек мелявтовтат, — будто чевтестэ кортазевсь Садченко. — Тевесь теельсь ков седе шождынестэ. Тонь ялгась, Галина Антоновна Чередниченко, конань марто вейсэ ускинк оружиянт, весе ёвтизе. Минь содатоно весемеде. Бути а кемат, вана вант. Неть кинь орша-мотне? — Ды каясь ваксозонзо васня пиже кофта, парсеень ожо платия, ашо беретка ды хромовой якстере туфлят.

Оксана Карповна вансь весе тень лангс ды арсесь Галинадо ёвтазь Садченконь валтнэде. Арась, Галина истя а теи, арсить манямонзо.

Садченко те шкане ёвтнесь, косо партизанонь штабось, кить максызь тенст оружиеянтъ, кить велесэнтъ лездыть партизантнэненъ. Ламот эйстэст кундазь. Курок весе улишь маштозь.

Оксана Карповна салава варштась ваксозонзо каязь оршамопельгнень лангс. Виде, сынъ Галинанъ. Ды тень эйстэ седеяк парсте чарькодизе аволь превей манчемаст. «Мезеяк а содатадо», — кенярдозь арсезевсь авась. Сыненст марямга мерсь:

— Манчетядо, гадт! Монь ялган ютксто а мутадо преда- тельть!

— Дибич! — рангстась Садченко ды тусь. Сеске совастъ кав- то палачт...

Ёжо тензэ сась ветъ. Комнатасонтъ тунь мезеяк а неят. «Да, ве, — арсезевсь Оксана Карповна. — Ве. Паряк, те весь сась пингень пес? Кода а шкасто!» Артиллериянь увтось марявсь овсе виевстэ. Кодашка мелезэ Оксана Карповнанъ неемс из- нямонть!

Тона комнатастонтъ каятось авардиця эйкакшонь вайгель. Аванть ноцк тейсь седеезэ: те вайгелесь ульнесь сонзэ цёры- нентъ — Витянь. Кода сон тезэнь понгсь? Арась, те он. Мик ёжозояк ёнкстомсь. Пиштякась эдь эзь сода, мейс туизь тей сонзэ эйкакшонтъ палачтнэ.

Потолоконтень кирвазсь лампочка. Теке шкастонтъ жо ке- лес панжовсь кенкшесь. Поровтонть лангсо аштесь Оксана Карповнанъ цёрынесь.

— Витька, сяткинем! — пижакадовсь авась.

Эйкакшось васня талакадсь, мейле содызе аванзо, чийсь верев кияксканть ды педязь педясь эйзэнзэ.

— Витенька, седейпелькскем, кие марто сыть? — кевкст- несь эйсэнзэ авась.

— Монь марто! — эскельдьясь поровтонть трокс Садченко ды ноцковтызе аванть эйстэ эйкакшонтъ кедте.

Витька бажи аванстэнь — сон уски эстензэ.

— Меельцеде кевкстан, — пеень сускозь кортась полици- янь начальникесь. — Ёвтак, ки максызе тенк оружиеянтъ?

— Азарсь киска! — рангстась Оксана Карповна.

— Дибич! — серьгедсь Садченко. — Саик! — ды тулкадизе тензэ эйкакшонтъ.

— Зверть! — укстась Оксана Карповна. — Кадынк аламос, куш меельцеде варштан лангозонзо.

Кавто гестаповецт стенанть ёжос путсь стул, озавтызь лан- гозонзо Оксана Карповнанъ ды сюлмизь пикссэ — илязо пра. Малазонзо путсь эзем. Сень лангс мадстизь Витьканъ, штав- тызь кутьмерензэ ды кармасть локшошо чавомонзо аванзо ике- ле. Эйкакшось ёжовтомо авардсь.

Оксана Карповна ашолгадсь, прок лов. Кепедизе прянзо, варштась чавицятнень лангс ды нуваргадсь. Мик валткак эзь муе сынст сюдомс.

Садченко лоткавтынзе.

— Кортак! — велявтсь аванть ёнов. — Ки максызе тенк ору- жиянтъ?

Оксана Карповна таго сельгсь лангозонзо.

— Дибич! — серьгедсь Садченко ды невтсь сурсонзо пото- локонтень.

Палачтнэ понгавтсь потолоконтень килькш, вейкесь эй- стэст кузь стул лангс, омбоцесь максызе тензэ ёжовтомо эй- какшонтъ. Авась ёмавтызе ёжонзо...

— Понгавтынк киска левксэнтъ ваксс авантькак! — мерсь палачтнэненъ Садченко.

Юкисзь стулстонтъ, ды Оксана Карповна прась масторов нар- девтеме. Валызь кельме ведьсэ — ёжо тензэ эзь са.

Те шканть коридорстонтъ мезе-бути калдоргадсь, кая- тотсь пижакадома. Садченко ялганзо марто каявсть тона комнатантень. Тосто каршозост ванность винтовкат ды ав- томатт.

— Кеденк верев! — рангстась виев вайгель.

Садченко каподсь кабуразонзо, ансяк эзь кенере револьве- рэнзэ таргамо — чевельдизь ялганзо марто ды сюлмизь. Га- лина сеске совась омбоце комнатантень.

— Маштызь... — каявсь Оксана Карповнанъ эйс ды саизе прянзо беремазонзо. — Оштё лембине... Оксана Карповна!.. Оксана Карповна!.. — Эзь кирде, кармасть авардеме. — Кода истя минь эзине кенере?...

Лия партизантнэ ёжомарязь менстизь килькштэнтъ Вить- канъ. Оксана Карповнанъ ды Витьканъ васня калмакшнызь вирентъ куншкосо вишка кужинес. Зярд Советской Армиясь панинзе неть таркатнестэ фашистнэнь, ускизь тиринь веле- зэст ды калмизь вейсэнь калмонтень.



## ДАВОЛ

Минь, Вирь Яндава велень учительтне, тонавтнема иенть прядомадо мейле пурнавинек ветененек ды молинек Кинельча лей лангов калонь кундамо.

Ков седе паро оймсема? Сэтьме вирь, сиянь кондымо лей, эрва ёно певтеме пиже. Весе ваязь пиже сырнес. А коштось? А чись? Экшелят чевте коштсо, чинть лембесэ, сиянь ведьсэ.

Кундынек ён калт. Вейке сэнеесь\* Иван Дмитриевичень пильге лангсто мик правтокшнызе. Ялатеке кирдизе атысь ды мельспа-росо кандызе крандазонзо ваксс. Пельпондо сталмозо.

Пидинек кал ям. Сэнеенть эйтэ рестынек пачалго лангсо. Ярсамс пурнынек сядо иесэ кудряв тумо алов. А сёпса: икелевгак корштынек аламодо. Мейле ярсынек. Жойневтинек сэтьме виренть моронь вайгельсэ, патефононь гайтьсэ ды ушодынек ёвтнеме, кода чавинек фашисттнэнь Сталинград ало, Днепранть трокс ютамсто, Будапештс, Прагас, Венас совамсто, Берлинэнтэ саемстэ. Ды эрвейке яла ледстнесь, ко- дамо паро ялга-оя марто савкшнось тосо тензэ вастневемс.

— Кодат ансяк ломанть эзь савкшно вастомс войнань шка- стонт! — ушодсь Иван Спиридонович. — Весе ломантнень войнась невтинзе вейкест-вейкест туртов. Икеле онстоткак аволить нее истямо ломань, кодамо марто савсь тетя удсемс вейке шинель ало, ярсамс вейке вакансто, вейсэ ваномс куло- манть сельмс. Минек частьсэ ульнесь вейке сибиряк, Фёдор Тихонович Давол. Косто понгсь сонензэ те фамилиясь, а со- дан. Покштяньгак, мери, ды покштянь покштянтякак истя- моль фамилияст. Моненьгак, келя, теке марто сави якамс ма- сторланга. Дивань ломань ульнесь. Виде, прок давол, — якасть эйтэнзэ кулятне. Сонзэ сеедьстэ кучнизь разведкас, пек веч- килизе «кель» мельга якамонть. Охотникель цёрась. Секс пек бажиль те тевентень. Тень коряс кортнесь сондензэ аволь ан- сяк минек батальонсонть. Газетаскак ламоксть сёрмалесть ко- рязонзо. Разведкас монгак яксекшнинь, ансяк «келень» кис эзь савкшно тень модемс вестьяк. Сеедьстэ арсекшнинь, кодамо, мерян, те ломанесь? Виде, тамашань тевть ёвтнесь эйтэнзэ.

Мейле весть сась ротань командирэсь ды кевкстимим:

— Сурков, тон ютазь венть парсте удить.

\* Сэней — сам.

— Ёнсто, мерян, лейтенант ялгай.

— Оймсек, мери, парынесть, чокшне разведкас молят. Мон мадинь окопс ды зярсыя удынь.

Чокшне старшинанть марто молинек штабонь землянканть икелев. Тосо васенце ротань старшинась, мартонзо кавто бо- ецт. Аламос аштинек — сьргедимизь. Совинек. Батальононь командирэкс ульнесь Степанов майорось. Мартонзоль ансяк штабонь начальникусь. Сеск мельганок совась лейтенант, ко- нань содылия. Сон ульнесь батальонсонть инженерной служ- бань начальникекс.

— Вана мезе, ялгат, — ушодсь майорось, те венть кандом- ка тенек «кель». Тынь тесэ весе паро разведчиктядо. Мар- тонк моли Давол ялгась, конань весе содасынк. Командиркс мартонк карми улеме Хопров лейтенантось. Весе, мезе эря- ви, сон содасы.

Мон варштынь Давол лангс. Цёрась аштесь прок гранитэнь покш пелькс. Аволь пек сэрей, чамазо якстере, кирьксала\*, сельмензэ пштить, ваны кода-бути конянзо алдо. Гимнастёр- кась лангсонзо мерят педязь ашти. Пракстасо тапардазь пиль- гензэ прок стальстэ валозь.

Туинек шождынесть. Саинек мартонок ансяк автоматт, те- сакт, кавтонь-кавтонь гранатат ды, зяро эрявсть, патронт. Стув- токшныя. Давол тесаконть таркас сайсь кинжал.

Тевесь ульнесь Сталинград ало. Мольгяно фрицтнэнь икель- це линиянтень. Весь ульнесь аволь пек чопода. Арсика, Иван Дмитрич, кодамо те молемась. Видьстэ штыкест лангс эцят.

Шашттано пекекиськенек лангсо. Сестэ карминь содамо, кодамо ломанесь Давол. Миньгак цёратне ульнинек аволь бе- рянтъ. Ялатеке кодаяк а кенерят мельганзо. Прок нучко\*\* ведь- га уи. Кадовтано эйтэнзэ — учосамизь, таго туи.

Пачкодинек немецень икельце линиянтень. Косоак а куш а каш. Оборонась аштесь Плодовитой велень пиретнень пева. Модемс эрявсь истя: аволь ансяк кальдердема — кашторкс илязо марьяво. Весемеде икеле — Давол. Пачкодинек окопо- зост. Лоткинек. Сон якась, ваннось аламос ды сась. Туинек. Перьянок каштмолема. Ялатеке содат: эрва косо аштить часо- войть. Секень вант, тонсь эртеват эйзэст. Солдатост удить. Секс веть каштмолить. Ютынек траншеяст трокс. Аламос лоткинек.

\* Кирьксала — круглый.

\*\* Нучко — щука.

Арсинь, тестэ кундатано «кель». Мезть-бути тошкасть Давол марто лейтенантось. Ды таго сыргинек. Пачкодинек пиретненень. Тесэ аламось оймсинек. Ульцястонть тестэ-тосто марявсть немецек кортыцят.

Шкась ульнесь пелеве. Оштё вейкеяк фриц эзинек нее. Лейтенантось ды Марков колмоце боецэсь тусть пиретненень ванномо. Минь Давол марто тешкстынек вастома тарканть ды туинек ульцянтъ ды кардазгнэнь исковамо. Паряк понги кодамояк кедь малазонк. Ветешка кардазс совсинек — арась. Ваньнынек ульцянтъ. Тува якить патрульть, тостояк а ён кода-бути. Совинек мекев пиретненень ды туинек се таркантень, косто явинек. Тов модемстэ савсь тенек ютамс аволь пек келей проулкань трокс. Вантано — проулкаванть якить, кавто патрульнойть. Вейкесь пелевидьс ды мекев ульцянтень, омбоцесь пелевидьс ды окоптнэнь. «Те вана ён таркась», — салава тошказевсь Давол, ды молинек сезэнь, косо тенек вастома ялганок марто. Лейтенантось ды Марков састъ. Сыныгак пек ён тарка эзь муе. Аламось оймсинек ды молинек пиретнева се проулканть малав, косто неинек кавто патрультень.

Мадинек пекенек лангс пиравксонтъ ёжос — ванстано, кода ды кона ёндо кундамс. Ванан, пиравксонтъ маласо касы аволь пек серэй чувто. Рашконзо васов сравтовсть проулканть куншкав, кинть вельксэс. Немецтне якасть пиравксонтъ кувалт се чувтонть видьс. Вейкесь ульцянтъ ёндо чувтонть видьс, омбоцесь окоптнэнь ёндо. Вансынек, вейкесь мольсь чувтонть алов ды лоткась. Аламось аштесь — омбоцеськак мольсь эйзэнзэ. Мезть-бути кортасть вейкест-вейкест марто ды кармасть якамо вейсэ.

Давол ваннось-ваннось, мезть-бути аламось тошкасть лейтенантонть марто ды, прок сэней, ёматотсь моданть ёжова.

— Аядо мельган, — салава тердимизь лейтенантось. Молинек аламось тарка пиреванть ды лоткинек чувтонть коряс.

— Давол чувтонть прясо, — ёвтнесь тенек лейтенантось. — Сон вейкенъ кундасы, омбоцень лазсы. Миненек эряви лездамс тензэ кавонест седе куроку теи саемстэст. Мон лездан сонензэ. Тынь кавоненк лазозентъ теи ускусынк. Ваннодо пиравксонтъ варят, кува седе куроку ютамс тензэ лездамо.

«Тейсынек, лейтенант ялгай», — меринь эсь пачкан. Монсь мекс-бути сорнынъ. Те теvesь аволь шождыне. Аволь эрвейкенень теви. Ансяк пелемадо а кона шкане ульнесь арсемс.

Ды вантано. Чувтось икеленек, прысонзо ялганок. Вана стамбарнэ сыть фрицтнэ. Сэрцеку молить ды мезть-бути кортыть. Вана маласот, секунданъ-кавтонъ ютазь вейкенень куломка. Седеем кармасть виевстэ чавома. Врагтнэ пачкодсть чувтонть алов. Коморонок сынсь сювордавсть, минсь прок сталень пружинакс теевинек, аноктано каявома.

Пачкодсть... Буравокс пели мелесь пряпотмотнень. Учотано... Ды ёмась весе те виень пурнамось стяко. Фрицтнэ ютасть чувтонть алга апак тока... Давол каштмоли. «Мекс истя?» — арсесь эрвейке эсь пачканзо. Лиля таркасо пижакадовлитъ, кровявлик ялгат. Тесэ каштмолят ды пеень порезь учат. Автоматонть истя сювордасак, секень вант, туи чудеме эйстэнзэ ведь.

Таго учотано ды вантано. Истя виевстэ бажат ванномо, мик сельме юроткак сэредить чоподанть изнязь. Фрицтнэ пачкодсть ульцянтъ видьс ды велявтсть мекев. Таго маласот, сыть прок кавто чопода сулейть. Таго аноктано. Кода мезе — ёндолкс кивчкадьяно лездамо. Пачкодсть... Кеденьгак нежединъ модантень, анокан кирнявтомо. Ойдемгак стувтокшныя таргсемс... Ды... таго ютасть апак тока. «Паряк Давол араськак чувтонть прясо?» — эскекс сялговсь пряпотмозон мель. Содавлинкак, кодамо апаро ульнесь се шканть!... Снартыка истямо таркасо учоманть! Шкась кавто част. Лисемась аволь шождыне ули — капшамка...

Ды вана таго сыть чувтонть ёнов чопода сулейтне. Ней кодабути седе ойминек. Видьстэ ёвтамс, кемемадо як лоткакшнынъ. Арсинь, мезеяк а лиси. Визькс ули «кельтеме» мурдамось. Васенцеде сынъ «келень» кис, ды кода мекев модемс чавонъ кедть. Ванан фрицтнэ пачкодсть чувтонть алов. Пувазевсь варма. Марявсь прок тарадке сивсь ды лоскатетсь мезе-бути. Минь пиравксонтъ пачк прок ливтинек тов, мезенекак эзь понгоне козоньгак. Чоподасонтъ ансяк кедем нерьгстыя немецень штыкс. Давол вейкенъ кирдсь кирьгапакшто, омбоцень пачк ульнесь пезнавтозь кинжалозо. Лейтенантось седе куроку сюлмизе живентъ кургонзо. Сон истякак, секень вант, аволь пижне: апак учо истямо теветнъ ёжозо маштсь, теевсь нардеветмекс. Седе куроку, кода кортынек, кавонест ускинек пиретнень.

Чавозентъ каинек тикше пулос ды сыргинек. Эзинек кадо немецень кавто винтовкатненьгак. Давол марто Марковт сазизь «келентъ», минь лейтенантонть марто — винтовкатнень.

Мекев самось тов молеманть коряс сядоксть седе стака ульнесь. Сизинек венъ перть пекекиське лангсо яказь. Снартыка,

тонсь шаштт пекекиське лангсо ды сюлмсець фрицэнтъ кува ускозь уск, кува кандозь кандт. Сестэяк весемеде ламо кандсь эйсэнзэ Давол. Виде, немецесь аволь пек покш ульнесь, яла-теке стакаль. Давол сайсы кода-бути лангозонзо ды уезь уи мартонзо. Ансяк зярдо эсенектнень малас пачкодинек, сестэ аламодо видеминек, туинек кува пульзядо, кува стядо.

Сынек сестэ ёнсто. Ансяк зярдо пачкодинек эсенек окоптнэнь, немецтнень ёндо кармасть леднеме. Паряк, мольсть полавтомост, ды патрультне арасельть.

Штабс пачкодемознок чилисемась кармась якстерьгадомо. Зярдо ветинек фрицэнтъ, майорось «молодецт» мерсь тенец. Нурькинесть ёвтневтизе, кода кундынек, мерсь нолдамодо литра вина, паро ярсамка ды кармавтсь оймсеме удо-манок явамс.

— Немецень винтовкатнень мень торлань кис кандынек зняронь тарка? — дивазевсь Иван Тимофеевич.

— Монгак истя арсинь васня, — мерсь каршонзо Иван Спиридонович. — Мик жежень сакшность. Мейле ёвтнизь тень. Даволонь истямо коезэ. Сон «келентъ» тусы оружиянек-мезнек. Ванодо, мери, аволь обозсо ардтница кодаможак кундынь. Давол марто теевинек сестэ паро ялгакс. Истя сон ветась комськолмовоце «кель».

— Седе мейлеяк савкшность якамс мартонзо? — кевкстизе Иван Дмитриевич.

— Яксинек...

— Эрьва модемстэ яла «кель» туилиде?

— Эрсестъ истят тевтькак, Иван Дмитриевич, зярдо аволь «кель», — минсь цяк\* живстэ менилинек.

Цярканы потмаксось таго ветешкаксть цитнезевсь чинть каршо. Сускинек рестаць сэнеень сывельдентъ. Теинек таргамс. Весе каштмолинек. Иван Дмитриевич пейдезь вансь Иван Спиридонович лангс ды пелевидьс симезь графинэнтъ ёнов.

— Те цёранть шумбрачинзэ кис, монь койсэ, аволь меша бу цярканы-цярканы нолштам! — сыремти яла сонсь ёвтнициянтъ. Иван Спиридонович раказевсь.

— Сонзэ марто шождыне ульнесь разведкас якамось, — таго ушодсь сон. — Меряг чинева марясы се тарканть, кува эряви ютамс. Лиясто фрицтнэнь судост алга ютавтсамизь: кардазга,

\* Цяк — еле-еле.

чоподава ютковаст якилинек. Вестъ удьця фрицэнь пилоткас Давол мик венельдясь ды путызе пряпезэнзэ. Понгонинек а понгомаскак.

Вестъ мерсть тенец туемеде «кель», ансяк улезэ офицер. А сёпса: мон талакадынь, кода ёвтасть тень. Истяк солдатонть кундамозо аволь стака: эрьва косто вастсыть. Удомстост кодамо мелезэть туи, истямо сайтъ. Офицерэнтъ кундамозо — аволь шождыне.

— Тевтне, цёрат, вана кодат, — кортазевсь Давол, зярдо лисинек штабсто. — Тевесь, алужт, меремс, аволь шождыне. Бути кие мезе, пели, видькстазо нейке. Разведкасо ёвтазь вейкенъ лемесь — кулома весенень. Офицертнэ весе штабтнэнь перька аштить. Лиясто куроц сынст а мусыть. Секс муемка тенец икелевгак штаб. Тосо мейле вансынек. Тесэ, икельце линияст удало велесэнтъ, арась штаб. Сон те велентъ томбале велесэнтъ, Кириасовкасо. Велетнень юткост ниле вайгельбетъ. Пек тенец капшамка, оят. Секс сыргатанокак чокшне сеск, ансяк чопоти.

Содазь, кие истямо таркасо мери «пелян»... Монь, виде, канжамон сорность, ялатеке эзинь видькста, каштмолезь кунсолынь, мезть кортасть Давол. Марковгак, ялганок, каштмольсь, се, виде, а пелиця ульнесь. Сон, косо а эряви, эзь капша — тевензэ тейсь арсезь ды маштозь.

Кириасовканы пачкодинек куроц, козоньгак эзь савкшно тенец лотксемс. Ансяк штабонть вешнемстэ куватьс тенец савсь «уйнемс» пиретнева ды кардазтнэва. Мезес ансяк эзинек понгоне се вестэнтъ! Давол вейке кардаз удало весе пекензэ ваднизе. Чинесь эйстэнзэ — малазонзо а молеват. Киненьгак совамс ды кевкстемс — а кода: эрьва кудосо фрицт. Мейле совинек вейке кардаз. Кудось аштесь кода-бути ве ёно, эрьке чиресэ. Вантано — мезеяк истямо а неяви. Марясынек, кудыкельксэнтъ ава корты, сюды-азы немецтнень.

Давол мусь мень-бути вальмине ды пшкадсь авантень, мерсь лисемеде ушов... Авась тандадсь — аволь ушов лисемат, вальмантень кодаяк а моли. Савсь ёвтамс тензэ, кить минь. Сестэ лиссь ды каявсь Даволонь кирьгас. Сонсь кармасть авардеме:

— Мезеяк эзь кадт сисем прясо гуйтне: а скал, а сараз...

— Аштек ужо, уряж, — тошки пилезэнзэ Давол. — Иля авардть... Сельведтнень эйсэ ней мезеяк а теят... Иля ризнэ, весе мекев сайсынек... Тон, уряж, тень, ёвтык ансяк миненек, косо штабост.

— Паряк соватадо аламос, лембе сяткиненъ, сельведензэ паця пезэнзэ нардтнемстэ кортась авась. — Косо-бути тувонь сывелем ули аламошка ды винынем кекшезь... Мирдем яла учинь.

— Миненек, уряж, а кона шкане, кортась тензэ Давол. — Мейле симдтяно, зярдо паньсынек... Сестэ уш тетъ соватано инжекс.

— Я, я, эно, теде, теде эсь тевенк, Пазось ванодызь неть ялго ведунтнэде, — капшазевсь авась. — Сезнинк инегуень пряст... Покш начальниkest? Вана тия, пиретнева моледе, ульцястонть нетядызь... Сон школанть вакссо учителень кудосонть... Учителень эсензэ повизь... Нейгак понгавтозь ашти... Се кудосонть весе покштнэ... Школасонть алашаст, масторонть пачк чаразь-велязь туест вейкест пес...

Ёвтынек тензэ сюкпря ды туинек.

Школанть курокто муинек. Вакссонзо учителень кудонть-как. Перьканзо зярыя часовойть. Давол ваннынзе, кода сынъ аштеть, ды совинек кардазганть удалонзо вишнянь садонтень. Ваньсынек, тесэяк часовой, мекев-васов яки кардазонть удалга. Тень манинек. Давол ёртсь кев шабра пирентень. Маризе кевень прамонть — мольсь шабронтень пирявксонть ёжос ды аштеть тосо зярсья. Минь се шканть удалце кенкшканть совинек кардазонть. Чопода латалкссонть марявсь паркнесь алаша. Кардазонть ульнеть колмо машинат — кавто легковойть, вейке грузовой, колмо мотоциклат ды ветешка велосипедт. Кардаз ёно вальматнестэ неявсь тол: палсь карбиткань лампа. Зярсья ваньнек — ве ёндо вальматнева мезеяк а неяви. Сестэ Давол мольсь вальматнень алов. Варштась. Тосо ульнеть немецень ниле офицерт. Ванность карта лангс ды мезть-бути кортасть.

Давол мольсь малазонк мекев.

— Карматано учомо, — салава мерсь лейтенантонть. — Тестэ сави тенек «кель» саемс.

«Кода ней кудосто кундасак?» — арсинь мон эсь пачкан. Рунгован мик кельме коткудавт кармасть якамо.

Давол тусь кардазонть парсте ванномо.

Мон чарькодинь, эрвейкенъ мельсэ аштеть вейке кевкстема: кода ней кундамс? Омбоце — кода тестэ ливтемс? Эрва ёно часовойть. Офицертнэ кудосот. Вана косо задачась, Иван Дмитриевич!

Сась Давол. Минь аштинек мень-бути пельс лондадозь кардынесэ. Аламос аштинек истя, мерят, арастянокак тосо. Весе тапинек прятнень секе кевкстеманть лангсо: кода ней туят чаво кедь марто?

Давол салава тошкась мезе-бути лейтенантонть. Лейтенантось мери монень.

— Тон молят Давол марто. Марков кадови монъ ваксс. Туинь Давол мельга. Лейтенантось ды Марков кадовсть удало пирев лисема кенкшенть лангс.

Давол монъ совавтымим венельдямо тарканть, кона аштеть сеске, кудыкелькстэнтъ аволь васоло, школанть ёно пирявксонть ёжосо.

— Сави тесэ учомс, — салава мерсь тенъ сон. — Кода мон ваннынъ кардазонть, лиснесь, вейке ды совесь тей. Кундыксэлия, ансяк тынь васоло ульниде... Пелинь аволинек керчаво теск. — Аламос кунсолось ды поладсь: — Сындряй, вант, мон кирьгапакшто кундаса, тон кедтнень. Илязо кенерь оружианъ таргамо... Тон арак тезэнь, мон — тезэнь...

Ды арынек пирявксонть ёжос. Мик раказевинь эсь пачкан. Вана косто арсетяно кундамо! Ды сон лиякс а кодаяк. Мезе теят, меремс? Кодамояк уставсо атак сёрмадт се, кода эряви кундамс «кель». Ды кодаяк икелев а содави, косто ды кода кармат кундамо. Тевентъ теемстэ эряви ваномс ды теемс истя, кода сави тоско, таркасо. Тесэ эряви ёрокчи, пшти превть. Ансяк Даволонъ кондят эрявить истямо тевс. Сонтемензэ аздан совавлинек-аволинек тозонь.

Кувать аштинек, паряк час, паряк седе ламо, венелев лисиця яла арась. Эрва минутась иеде кувакаль.

Марясынек — кенкшесь панжовсь, лиссь кодамо-бути, чаравтсь машинатнень перька, сайсь таго-мезе ды совась мекев.

— Теяк а берянь ульнесь саемс, — эзь кирдть Давол. — Ёмась... Ды те аволь офицер ульнесь, — поладсь аламос каштмолемадо мейле. — Мезе-бути сайсь машинастонть.

Седе мейле аволь куватькак савкшнось тенек учомс. Таго панжовсь кенкшесь, каятотсь немецекс кортамо ды ракамо. Лиссь кодамо-бути. Марясынек — сы уборноенть ёнов. Таго аноктано каявомо. Монъ койсэ, сельменек сестэ толкс палсть. Фрицэсь атак капша мольсь венельдямо тарканъ кенкшентень, юксизе карксонзо ды понгавтызе кундамканть, пистолетэсь кальдерк эшкевсь лазтнэненъ. Совась венельдямо. Кузсь лазтнэнь лангс,

менстинзе плаштянзо ды ландясь видьстэ Даволонь каршо, нерезэ цяк эзь тока монь ялгантень. Аштян. Мезень аштемат. Пильге сур прянокак лыказемсть. Ней уш а кона шкане учнемс. Давол цопадизе кирьгапакшонзо прок сталень клещасо, ды лапшкадсь немеценек. Мон кундынь кедензэ, конат прок чувтомсть ды весе сорность. Давол кепедизе кирьгадонть седе верев, мон сюлминь кедензэ.

— Кепедить понксонзо! — тошки Давол.

Немець менчеви, прок сянгсо сялгозь гуй, мон понксонзо кепедян. Кодаяк а муевить плаштятне.

— Карксонть иляк стувто, мерсь Давол. Сонсь эцесь немецень кургс пакля, ды сюлминек кургонзо.

Саинек ды — латалксонтень, косо учость ялганок. Кандомсто, кедь ёжосон мария, мештесэнзэ зярыя крёстт. Ён, арсян, кундынек «сазанонть», ансяк кода ливтьсынек тестэ?..

Видеяк, лисемась ульнесь аволь шождыне. Часовоесь якась кенкшенть малава. Кода иля листь — нетянтат. Мезть тейнемс? Учнемс а кона шкане, курок карми ашолгадомо. Тесэяк лездась тенек Давол, идимизь. Сон ванстызе часовоенть, прок тигра, каявсь удалдо лангозонзо ды лепштизе, се оймензэ таргамояк эзь кенере. Минь се шканть лисинек ды, эрва ёнга ваннозь, сыргинек.

Пиретнева ды сынст икельце линиянть трокскаяк ютынек ёнсто, козоньгак эзь савкшно тенек лотксемс куватьс. Виде, стака ульнесь немецесь. Пек кувака — жердя прок усктано мельганок.

Пачкодинек эсенек икельце линиянть малав. Ойме сась тенек седе парсте а ков. Тынсь арсинк кодашка те тевесь: офицер ветятано. Молинек уш кува комадо, кува стядо. Перьканок а куш а каш, мерят войнак арась. Мезеяк а теят — война-соаяк эрсить сэтьме шкат. Кенярдоманок пезэяк арасель. Курок пачкодтяно. Весе стакась ней кадовсь удалов. Лоткинек, аламось оймсинек. Таргамом пек сась — а аштевангак. Мезе, вень перть апак тарга. Мон ловинь: ней паро, весе, минь кудосотано. Ды арсинь седе, кода тантейстэ тарган молемадо мейле ды мадян оймсе. Тевесь аволь истя лиссь. Тестэяк эль живстэ кадовинек.

— Марят? — токимим бокас Давол.

— Мезе? — коминь мон эйзэнзэ.

— Кунсолодо, — мерсь сон весеменень. — Марясынк, кашторкс...

Кунсолотано. Марясынек — лексить, каштордыть. Яла седе маласо.

— Неть фрицт, разведкасто сыть, — мерсь Давол. — Лейтенант ялгай, варштасынь.

Ды, каршо валонь апак учо, тусь прок уезь. Сеске велявтсь мекев.

— Колмо немецть мезе-бути ускить, — ёвтась сон лейтенантонть. — Монь койсэ, ломань... Минек кодамояк улы бизнай «келькс» кундасть.

Аламось весе абунгадынек. Монь кенярксом таго весе срадсь. Мезть ней тейнемс? Истямо тевсэ, тынсь содасынк, арсемс а кона шкане.

— Кундамс! — макссь команда лейтенантось. — Тон, Марков, кадоват теске, фрицэнтъ ваксс. Тынь, Давол ды Сурков, монь мельга.

Туинек вить ёнов, каршост. Сынь молить кува комадо, кува стядо. Таркась розь потмо. Хоть розесь тапазь, ялатеке пек марявить каштордомадо. Молинек пек малазост. Вантано — сыньгак «кель» ветить. Минек колмоце ротань поваронть кундакшнызь. Истямо удомань вечкиця ульнесь, седе а ков. Мейле каднызе удоманзо. Икеле кавтотне ветясть кундазенть, вейкесь мольсь мельгаст. Минь стядо стинек ды каявинек лангозост. Давол ды лейтенантось икельцетнень лепштизь модантень, прок кренчт кундасть ципакат. Мон аламодо эзинь кенере. Удалцесь кода ношксты, кода максы кувака очередь автоматсто. Мон автоматстон нолдынь кавто нулька очередть — сон сюконаясь. Содазь, немецтне кода кармить леднеме! Минь седе курок прядынек кавто фрицтнэньгак ды юксинек эсенек поваронть. Сонензэ ёжо кодаяк а сы. Содазь, тандадсь цёрась.

Те шканть сырёмсь виде-паро вень тюрема. Маштсть кавто ёндо, масторось весе сорны. Тевенек кальдявгадсть. Немецтне, паряк, чарькодсть офицерэст ёмамонтень, истя азаргадсть, мик артиллериясткак кармась леднеме.

Минь пекекиське лангсо молинек тов, козонь каднынек ялганок немецень марто. Се шканть лейтенантось ранявсь лавтовс. Давол ды Марков саизь «келенть», мон седе курок тапария лейтенантонть лавтовонзо, ды сыргинек састыне, мельганок — поварось. Лейтенантонть стакаль модемс — савсь лездамс тензэ.

Молинек-молинек — Давол ранявсь пукшос. Сонзэяк савсь тапарямс. Модемс моли, кандомась тензэ стака. Вана косо!

Кадовськак аволь ламо. Чилисемась кармась ашолгадомо. Боесь седеяк сыремсь, немецень автоматтнэ удалдонок марявсть овсе маласто. Сестэ седейшкава талакалинь. Ансяк ков эри малав сыця эсенектнень леднемась витьс аламодо седей ёжонок. Тынсь арседе, кадовинек кавонек. Марков фрицэнтъ уски, мон — лейтенантонть лездан. Даволонок ранязь. Поварось сонсь эль молеви. Ранявиндерятано миньгак, арсян, эряви эрямонок. Ашолгадындеряй — немецтне лепштясамизь. Капшинец козонь сатотсь виенек. Прок аволь икелев мольтяно — удалов потатано. Те шкась сядо иеде кувака тень марявсь. Леднеманть коряс эсенектне пек маласот. Кавкстешкаксть мик пижакадынек. Ды кие ней марятанзат истямо бойстэ? Се шканть лейтенантось таго ранявсь, ней пильгс, кумажадо верьга, эчке пукшонзо пачк ютась пулясь. Карминь тапарямонзо — эсень керш кедесь ранявсь, лавтовонть малава ютась пулясь. Давол серьгедсь Марковнэнь, сон аламодо икеле ульнесь ды ськамонзо кадовсь апак раняво. Мольсь ваксононок.

— Азё эсенектненень, — мерсь тензэ лейтенантось. — Ёвттак, саст каршонок. Лиякс а пачкодтяно.

Марков тусь.

Кармась ашолгадомо. Боесь седеяк пек сыремсь. Минатне ды снаряйтнэ прыть перьканок, сравтнить ланганок мода ды кшни пелькст. Сизевксесь пандокс лепшти эйсэнек модантень.

Давол васня тапаризе лейтенантонть, мейле — монь.

— Тесэ учнемс а мезе... — пшкадсь лейтенантось, зярдо Давол прядызе монь кедень тапарямонть. — Учомась — кулома... Эряви сыргамс...

Ды таго сыргинек. Давол, пеензэ чикорсо порезь, усксь «келенть», поварось ды мон кандынек лейтенантонть. Кодамо стака ульнесь молемасть, а ёвтневияк. Ансяк се сонзэ содасы, кона сонсь мольсь истя. Меньгак ёжо арасель, сзредьксккак эзь маряво. Ансяк вейке палсь седейсэнек ды превсэнек: икелев, тов, косо учить эйсэнек. Ды те паловоль седейсэнек ойменек лисемс. Тынсь арседе, зярошка вень кувалмо пекеть лангсо якамс, теэмс истямо тев, зярдо эйсэть верень эрва петняксоь лакась а ёвтавома вийсэ ды зяро верь чудесь рананок эйтэ.

Эсенек окоптнэненень кавто сядошка метрань таркат апак пачкодть вастымизь Марков, мартонзо вете боецт. Сеть пачтимизь эсенек окоптнэс. Лейтенантонть ды Даволонь сеске

саизь санчастев. Мон, командирэнь таркас, ды Марков ветинек штабов «келенть». Капитаноль. Мештьсэнзэ ульнесь ниле крётт ды зярыя медалень кондят.

Госпитальсэяк Давол марто вейсэ ульнинек.

Иван Дмитриевич те шканть, зярдо пев кармась пачкодеме ёвтнемась, кундась графинэнь кирьгантень ды пештизе цярканть.

— Монь койсэ, — мизолдозь варштасть весеменик ланга, зярдо прядовсь ёвтнемась, — кияк а мурнесамизь, бути истямо паро цёранть шумбрачинзэ кис симтяно оштё вейкенё-вейкенё цярка.

Симинек цярканы-цярканы, пекенек пешкедемс ярсынек рестаь сэнеень сывельде ды маднинек оймсеме сыре тумотнень алов истямо таркава, кинень кодамо тусь мелезэнзэ.

## КИТЬ ДЫ КИУЛОТ

Валя сыргозсь кевейкее чассто. Чись манеель: парсеень шаршавсо копачазь вальматнень пачк валдось совась удома таркантень. Комнатась пешксель тантей коштто. Таркась ды вельтямось истят чевттэ: од авась марясь прянзо прок коштсонть тапардазекс. Ваньксчисэнтэ, сеедьстэ шлямосо-нардамосо кольневтезь сонзэ од чахракс панжозь рунгось марясь кеме, алкукс кенярдовтыця шумбрачи. Кодамо паро! Кодамо уцяскав сон!

Арась Валянь мелезэ стямс. Ды капшамскак ней а ков. Весе мелявкстнэ кадовсть удалов. А ней курок кадсызь мелень мольстиця ошонть ды туить мирдензэ марто оймсеме тов, косо Раужо морянь чевте толкунтнэ кольнить кевень берёктнень марто. Чи, кошт, ведь! Певтеме мазычи! Ардыть сынть тов эсест Москвичсэнтэ. Ков седе покш уцяска?

Видеяк, мезе лия эряви ломанентень? Мирдезэ, Макс Тариасович Вильдеур, университетэнь доцент. (Илядо арсе алянть кувалт мезеяк берянь. Тынь, паряк, мертядо: сон аволь эрзяяк? Манявтадо. Алкуксонь койсэ те ломанесь Максим Тариасович Вильдяев. Ансяк те лемесь сонзэ мельс эзь туге. Секс полавтызьяк. Созаь, ков седе парсте, койсэнзэ, каяты, зярдо серьгедить: «Макс Тариасович Вильдеур!»). Важдось сон а беряньстэ. Вейсэнть тевсэяк лиядо эзь кадново. Промкссоаяк эсь

пряно ветясь истя, кода эряви: зярдю весе кепедьсызь кедест, сонзэсь — весемеде вере, зярдю весе а кепедьсызь, сонзэсь — таркастонзояк а чирьки. Виде, Валядо сон аламодо седе сыре. Кеветеешка иеде, меремс. Ялатеке тень лангс эзь вано. Эрясть седе парсте а ков. Курок вете иеть топодить, кода теевсть мирдекс-полак. Катринка тейтернест колмоце иес тусь.

Течи валске Макс Тариасович вейксэце чассто тусь университетэв. Максуть тензэ отпуск ды ярмакт, ды вейсэ туить лембе масторов. Валя стясь, шлясь-нардась, озась ярсамо.

Обед малав чиезь совась мирдзэ: чамазо кодамо-бути сумбора, голойгадомо кармиця прясонзо моцюдалксонь кондямо черь клокозо стядо, сэньшкандозь турванзо сорныть.

— Тон кунсолока, Валюша, — сорныця вайгельсэ кортазевсь. — Тон кунсолока! Кодат подлецт улить масторонть лангсо! Эзь тонадо эрямо. Ды зярдю истят кенгелицятнень онкстясь. Тон монень ёвтыка?

— Мезе? Мезе лиссь? — кевкстизе Валя ды мелявтозь стясь каршонзо. — Чаматкак сэньшкандь. Эзить ормалгадо?

— Истямо подлецтнень кувалт аволь ансяк орма мутанзат, — кодаяк а ойми мирдесь, — превстэяк лисят. Турвастост поте ловсоькак эзь коське — сынсь покш ломанть тонавтомо снартнить...

— Корштак, — полась нуртясь тензэ кельме ведь. — Оймак ды ёвтнек. А ней тапарят тонськак а содат мезть.

Макс Тариасович симизе веденть, озась, аламось аштесь ды, койники, мерсь:

— Ансяк маринь, фельетон сёрмадсть минек кувалт..

— Мезе? — келейгадсть од аванть менелень кондят сельмензэ.

— Фель-е-тон! — чапозь чапизе валонть мирдесь. — Чарькодить?

— Мейле мезе, — варштась зеркаланть пачк Валя. — А мезть тенст тейнемс. Киньгак лангс ды кенгелема.

— Тон кунсолок парсте! — пизьякадсь мирдесь. — Фельетонсь минденек!

— Кода минденек? — эзь кеме полась. — Аздан мезть лавбордат..

— Кунсолок, — кундызе кедте мирдесь ды озавтызе ваксонзо чевте диванонть лангс. — Содавлитькак, кода пштистэ сёрмадозь! Печатындерясызь!..

— Мейс? — кепединзе лавтовонзо Валя.

— Весе те лиссь авать кувалт. Фельетонсонть сёрмадозь, бутю мон мания сонзэ — тердия тей, миевтия велестэ кудонзо, рамия «Москвиченть», мейле пания. Ней, келя, бабинесь яки велеле велес: верде — менель, алдо — мода.

— Те кенгелемка! Кияк сонзэ эзизе пане!

— Монгак истя меринь, — кенярдозевсь мирдесь. — Мейс панемс? Сонсь тусь. Паряк, тосо тензэ седе паро.

— Аздан мейс фельетон сёрмадомс, — дивси Валя, — Кодамо газетасо, мерят, печатызь?

— Беряньстэ кунсолат. Мерян, те видсь теvesь эзь пачкоде, — вадяшизе коклацензэ мирдесь. — Редакциясто кучизь ректоратс. Кевкстимизь: истя, а истя ашти теvesь эли, паряк, лавгамот? Ялатеке эряви редакциянтень конёв кучомс. Секс, сяткинем, сави теть модемс велев, муемс авать ды саемс пельдензэ справкань кондямо: весе те ашти а истя, кудонть сонсь мизе. Ярмактнень казинзе тонеть. Тестэяк кияк эзизе пане. Ошонь эрямось аволь сонзэ шумбрачинть коряс. Велесэ седе паро. Ды тень мон аноктаса, зярс пурнат-сэрнят.

— Нейке? — талакадсь полась.

— Учомась тесэ, Валюша, — эсь прянь маштома, — Макс Тариасович сайсь конёв ды озась столь экшс. — Чинь-кавтонь ютазь конёвонть максомка.

Секе чинть Валянь ильтизе.

— Эряволь аванень мезеяк казнекс рамамс, — станцияв пачкодемстэ пшкадсь од полась. — Истяк а ён кода-бути молемскак.

— Аволь эйкакш, — яходсь мирдесь. — А кежиявты. Эстенекак ламо карми эрявомо. Крымев якамонть марто ламо ютыть. Ды вана нейгак теть билет саинь. Инжекс молят. Андтадызь-симдтыдызь.

Озавтызе вагонс, палызе ды тусь.

Весе те ютась истя капшазь — Валя эзь кенереяк парсте арсе-ме, кода ды мезе. Ансяк ней, зярдю кадовсь ськамонзо, озась вагононь вальманть алов ды макссь оля талакавтыця мельтненень. Ков сон арды? Мейс? Кода варшты аванзо сельмс? Мекс ды кода сон пачкодсь истямо эрямос, зярдю цяк эзь теewe фельетононь героинякс? Мейстэ весе те ушодовсь? Мекс кияк сёрмаяк тензэ а кучи? Ансяк текень кисэ: мирдзэ доцент, сонсь курок карми уле-ме аспиранткакс. Ломантне сельмень сьвадьцят. Стяко эзь ардо

эсест «Москвичсэнтъ». Кадык вановольть. Стяко Макс пельсь невтемензэ.

Арсезевсь лия ёндо. Вана сынъ тонавнтить средней школасо. Весемеде вадряльть Кельвядина Настя ды Эрямкин Нико ялганзо. Зярдэ сынъ тонавнтность кавсоце-кеменце класстнэсэ, школасонтъ ульнестъ весемеде неявикусэкс. Кеменце классонть прядомадо мейле колмонест, Нико, Валя ды Настя, снартность тонавнтнеме университетсэ: Нико историкекс, Валя географокс, Настя ветеринарокс. Конкурсошь ульнестъ покш. Валя ютась пек парсте, а беряньстэ ютась Никояк. Ансяк Настяненъ эзть изняво сондензэ виев абитуриенттнэ. Ютась заочной отделенияс. Пек апароль, ды тейнемс а мезть. Тусь кудов, кармась аванзо таркас важдеме колхозсо.

Весемеде парсте сестэ тустъ Валянь тевензэ. Сон пек кенярдозевсь ошсо эрямонтень. Экзаментнэнь максынзе пек шождынестэ. Шказо ульнестъ. Ве чинть — кино, омбоцентъ — театрав, колмоцентъ — парков, нилецентъ — лияв ковгак. Часиянзонзо, муевсь ломаньгак, кона тензэ лездась. Васенце экзамендэнтъ икеле консультациясонть сонзэ марто пек чевтестэ кортась Макс Тариасович доцентэсь. Ильтизе квартирав. Чокшне сайнизе кино. Омбоце чокшнентъ — театрав. Седе мейле, чинь-кавтонъ ютазь, Валя ульнестъ инжексккак Максонъ кедьсэ. Превензэ цютъ эзть чаракадо, зярдэ неIZE истямо питней мебелентъ: столть, дивант, креслат, чевте стулт, покш телевизор, радиоприёмник, шкафт ды лият-мезть.

Седеяк дивазевсь велестэ сазь тейтересъ сестэ, зярдэ озась шампанской сулика марто столентъ экшс. Мезе тосо ансяк арасель! Секенъ вант, нармуненъ ловсоьяк ульнестъ. Виде, Валя эзь симе, турванзояк эзинзе начто. Ярсамс ярсась. Макс сонськак симсь ансяк вейке бокал. Меньгак а берянь кортамот-мезть эзь сыргавтне. Каванясь ды кортась мартонзо седейшкавань паро ломанекс.

Истя тевесъ мольсь экзаментнэнь ютамс. Косоьяк стака эзь вастане. Сови экзаменс, саи билет ды карми ёвтнеме. Экзаменатортнэ аламос кунсолыть, вешсызь билетэнтъ, пугыть тензэ «вете» ды мелень ванозь ильгасызь. Коридорсо мельспаросо васты Макс ды кеместэ сювордасы кедензэ. Ансяк сестэ, зярдэ Валя теевсь студенткакс, Макс Тариасович сыргавтеь мартонзо седей ёжонъ кортамот, кевкстизе: моли-арась тензэ полакс.

Содазь, Валя учось истямо кортамо. Ялатеке мекс-бути эзь арсезевкшне седе, карми-арась вечкеме те ломанентъ. Ней савсь теде арсезевемс. Варштась лангозонзо ды нолдызе прынзо.

— Вант, Валя, арсек парсте. Тейть истя, кода теть паро. Тон пек мазыят ды превеят.

Неть валтнэ сеске нардызь тейтерентъ седейстэ Никонь чачонтъ. Макс неявишь тензэ алкуксонъ превей ломанекс. Теке марто, ледствявь тензэ, козонъ азоравакс тердитъ эйсэнзэ, ды лавшомсь седеезэ. Истя теевсь сон Макс Тариасовичень никс.

Мезе ульнестъ седе тов? Прок исяк весе те ютась. Сентябрянь васенце чинтень сась Саранскоев Никояк. Сон пек бажась Валянь нееме. Ансяк эзь саво: мирденень лисицясь кодаяк эзь понго сельмензэ икелев, кекшнестъ яла эйстэнзэ, сонськак эзь сода, мезде пельсь. Сестэ Нико мольсь квартиразонзо, косо эрясь Валя экзаментнэнь шкасто. Тосо азоравась ёвтась тензэ: «Эх, од цёра-парочи, мезть истя тон тейнить? Кода менстик мазый нармушкинентъ? Койсэнъ, сон мирденень лиссь. «Волгасо» саIZE тестэ мирдезэ. А кемат? Олясь тонъ. Моненъ а мейс кенгелемс. Ансяк пек уш апаргадынъ. Эно мирдесъ улевель... А ней мень-бути индеръ пильге. Прок а шкасто чачозь вазнэ».

Седе мейле кавтошка чить университетэвгак Нико эзь яка. Пек стакаль цёрантень. Апаргалесъ аволь ансяк сень кис, мекс Валя истя шождынестэ стувтызе; алкукс чумондсэ эсь прынзо сень кувалт, кода эзIZE чарькоде те шожда прев тейтерентъ икеле? Зярсья майсесъ цёрасъ. Ды okayники изнинзе стяконъ ёжомарямотнентъ ды макссэ эстензэ вал: а кортамсккак Валя марто. Кармась тонавнтнеме, прок мезеяк мартонзо эзь ульнеяк. Теде мейле апак учо университетэнь коридорсо васодеветъ сынъ карадо-каршо. Валя лотказевсь, венстIZE кедензэ ды пшкадиксэль. Нико прок эзIZE нееяк, кеместэ эскелязь, ютась ваксканзо.

Ялатеке седе мейле аламо шканъ ютазь сынент савсь васодемс. Вестъ чокшне Нико кувать аштесъ библиотеканъ ловнома залсонть. Меельцекс кадовсь ськамонзо.

— Шкась ютась, — мольсь эйзэнзэ од библиотекаресъ. ЭзIZE нееяк, кода удалце столентъ экштэ стясъ тейтерева ды лиссь мельганзо.

— Нико! — салава ды кода-бути мелявтозь, покш ёжомарямо марто пшкадсэ сон.



Содазь, Эрямкин сеске содызе Валянь вайгеленть. Сон а лоткиксэль, капшазь туиксэль, ансяк пильгтне эзизь кунсоло, мерят, педясть кияксонтень.

Валя мольсь эйзэнзэ ды кундынзе кавонест кедензэ, кеместэ-кеместэ сюрордынзе. Сонсь сорнось, мезесь кортась ёжодонзо.

— Паряк, озатано аламос? — невтсь Валя чаво диванонт лангс, кона аштесь коридоронт пезэ, парсте апак валдомто таркасонть. Никонь виезэ эзь сато а модемс.

— Содазь, тон марить, — озамоност мейле ушодсь Валя. — Илямак чумондо. Монськак а содан, кода те лиссь. Пек ней янксян. Ансяк а мезть тейнемс...

Нико вал эзь ёвта. Те энгамтызе Валянь кортамо бажамонтъ-как. Зярсья сынь каштмольсть.

— Содат мезе? — Валя ушодсь одов. — Жаль монень Настя. Пек тонь вечктянзат. Ды умок. Иля юта ваксканзо.

— Мезе меремс тень каршо? — стясь Нико. — Пасиба ёвта-монтъ кисэ, — ды тусь вакстонзо. Эзь аштеве. Пельсь: илязо ёвта тензэ а паро валт.

Оршизе Эрямкин плащензэ ды лиссь экше ушонтень. Мерят, сувтемень пачк сувтнесь чова пиземе. Сыргась тротуаронтъ ёнов. Се шканть чиезь сасызе Валя ды каявсь кирьгазонзо.

— Аштек, иля туе, — энялдозевсь ды бажась паламонзо. — Иля туе. Настядо мон кенгелинь. Монь седейсэ ансяк тон аштят. Марят? Ансяк тон... Нейке туян те мирденть эйстэ. А молянгак тов. Ансяк мерть...

Нико капшазь тусь.

Валя зярсья аштесь пиземень ало прок ёжовтомо. Апак учо каятотсть эскелкст, кие-бути капшазь мольсь сонзэ малав. Валя варштазевсь ды вастовсь мирдензэ марто.

— Мезе истя? — мелявтозевсь Макс Тариасович.

— Библиотекасо ульнинь, — весе талноматнень изнязь, — коротазевсь полась. — Сизинь пек. Превень чаракадсть.

— А мон сынь — арасят, — мелявтозь коротазевсь мирдесь. — Косат, арсян. Ды седе курук тей...

Кудосо, зярдю Валя неинзе тензэ рамазё питней оршамопельтнень, сельмензэ валдо тештекс налксезевсть. Вейке пальтось ансяк мезе ашти. Сеске ёжозо паркстомсь, кутмордызе мирдензэ ды палызе. Ды таго тусь эрямоуст чудеме эзь лувганзо. Валя кармасть якамо истя парсте оршазь, кода кияк эзь яка аволь ансяк университетсэнтъ, паряк, мик ошсонтькак.

\*\*\*

Нико марто меельцеде вастовомадонть мейле аламо шкань ютазь Валя ловнось Эрямкин Никонь заочной отделения ютавтомадо приказ. Мекс истя? Ков тусь? Валя кувать арсесь. Мейс? Сон парсте чарькодсь: Нико марто кист явсть. Зярдояк а вастыть. Ялатеке седеезэ палсь, бажась содамо, ды комсомольской газетасто несь снимка, алонзо ульнесь истямо сермадовкс: «Якстере теште» колхозонь фермань скалтнэнь ваныцясь Эрямкин Никон Карпович». Валя кувать эзь кеме. Мезе истя лиссь мартонзо? Колхозонь пастух! Телень перть киньгак ялгатнеде эзь нее. Тунь эзь сода, косот ды мезть тейнить. Ды эзь бажаяк содамо. Ялатеке мекс-бути сынь эзь стувтово. Ды окоиники... Газетанть рамакшнызе мезень-бути тапардамс. Саемстэнзэ неIZE тосто Никонь фотонтъ. Седе курук озась автобусонь лотксема таркасо июненъ чинть каршо аштиця эзем лангс ды келемтизе газетанть. Тосо очерк Никодо.

Седе, косо мольсь кортамось Никодо, Валя ловномояк эзь карма.

Ды ялатеке мельтне эзь ойма. Ледстизь тензэ сень, кода нилеце курссо тонавтнемстэ, вейке велень средней школасо практикасо улемстэ, сон таго неIZE икелень весемеде паро ялганзо. Те велесэнтъ ульнесь Верховной Советс депутатокс кандидат марто кочкицятнень вастовома. Кандидатось ульнесь Кельвядина Анастасия Еремеевна.

— Валя, те эдь тонь ялгась? — кевкстизе вейке практиканткась. — Кона минек марто ве шкасто снартнесь университетс понгомо.

— Аздаса, — чаравтсь прысонзо Валя. — Монь ялгань ютксо арасть скалонь потявтыщят.

Меньгак кенярдома те сонензэ эзь максо. Арсемаськак мик стака марявсь тензэ. Ды окоиники изнинзе мельтнень. Лездасть тенень лия мелявтоматнеяк...

...Весь ютась. Ва курук сон пачкоди эсест велев. Ансяк косот вешнесь аванзо? Косо эри? Вана кодат тевтне! Авазо куляк тензэ эзь пачтя. Кинень ней тензэ совамс?

Валя валгсь поездсэнтъ ды ванны. Зяро иеть тесэ арасель! Кода весе лиякстомсь! Марясы, вейке цёра кевкстни, косо «Алатырь» гостиницась.

— Ды теске вана, — ёвтни тензэ цёрыне, — тия видьстэ лисят центрантень ды — вить ёнов.

Валяненгак савсь лоткамс гостиницас. Вешнезь-кевкстнезь марясь авадонзо: эри Никонь аванть кедьсэ. Седеяк апаркстомсь. Ансяк тейнемс а мезть. Савсь модемс. Капшавтомка теvesь.

Кавто пенсионеркатне: Валянь авазо, Прасковья Кирилловна, ды Никонь авазо, Анна Степановна, кустема лангсо ансяк кочказь викторият урядьльть.

— Ванта, Проска, — кепедизе прянзо Анна Степановна, — те Валя...

— Сон, — кода бути апаркстомозь укстась Кирилловна. Кадьк сы. Ней уш а тандадан. А мезем саемс. Весе манчизь: кудонек-скалнэк, ревенек-саразнэк.

Те шкане Валя мольсь эйзэст ды авардезь каявсь аванзо кирьгас.

— Сяткинем, — тошкасть сорныця турванзо, — содавлить-как, кода тошнаинь кисэть...

— Ков тетя? — кутмори эйсэнзэ авазо. — Ва пель ие топоди, кода туинь эйстэнк. Мик сёрмаяк эзить кучо, киньгак эзить кевксте, кува ней якан кудовтомо-чивтеме.

— Мейс истя кортат? — сельведензэ нардтнемстэ педясь ёжозонзо тейтересь. — Эрямо таркат лембель, пароль. Пекеть пешксель. Лангот оршазь. Мезе тетя эрявсь? Кияк эзинзить пане.

— Эх, Валя Валя, — укстась Прасковья Кирилловна, — паневлимизьгак, пек седе шождыне тень улевель. Вановтсонк ды «чевте» валсонк кармавтымизь туеме.

— Адя мекев, — кутмордызе таго Валя. — Косо ней кармат пиеме-паломо?

— Масторлангось, тейтерем, аволь паро ломантеме, — нардьинзе сельведензэ Прасковья Кирилловна. — Тесэ мон содавликс ломань ютксан. Прок кудосан. Цёра вастсамам — шапканзо сайсы, ава каршон понги — сьукпря кази. Кода а кода малав ниленьгемень иеть важодинь вейсэнть паксятнесэ. Аволь аламо паро теинь ломантненень. Сынть аволь тынк кондят: беряньсэ а пандсызь. Тыненк Паз илязо мере модемс. Иеде ламо прок кандолаз потсо эринь. Жив ломанень вайгель зярдоак а марят, ванькс коштсо ойметь а таргасак.

— Тунь жаль тетя а марьян, — таго кармась ниреждеме Валя, — жалывлимикак, истят валт аволить ёвта.

— Авань седей ёжонть, Валякай, тон, бульчом, а содасак, — витизе прянзо Прасковья Кирилловна. — Паряк, а несак, кода

жалам тонь эйсэ? Весе вием путозь кастытинь ды тонавтыгинь. Те — аламо? Максья тетя мезем ульнесь. — Монсь кадовинь — тонсь несак кода: верде — менель, алдо — мода. Учине, кемине. Паряк, паро ломань эйстэть лиси. Ансяк, неяви, манявинь.

— Ней, койсэть, мон берянян? — калгодкстомсь тейтеренть вайгелезэ. — Тонь койсэ, те аламо: прядынь университет, карман тонавтнеме аспирантурасо. Кавто-колмо иень ютазь те-еван наукань кандидатокс. Те, тонь койсэ, аламо?

— Паряк, ламояк, — укстась авазо ды поладсь: — Мон, сечень вант, а чарькодьянтак тебезэнк-валозонк. Эрямонть лангс ванан эсь койсэнть. Вана Нико марто Настянь сайсынек. Сынть седе чарькодевить. Эрить тондеть парсте. Газетасо эйстэст сёрмадыть, радио вельде кортыть, телевизорсоак невтнить эйсэст. Аволь аламо лия велестэ сакшныть тенст превень кевкстеме. А тон Максот марто кода эрят? Шкап ды шифоньер ютксо?..

— Тон мезе, алкукс сёвнат мартон? — вишка сяткинеть верьгедсть тейтеренть сельмсэ.

— Эно саты, бульчом, мезть а эрявить тапарян, — мерсь тень каршо бабинесь. — Сыре ломанень келенть ожданзо аволь кеметь. Кадсынек тень. Ёвтак видьстэ, мейс сыть? Мезе монь пельде эряви? Содаса, неемань кисэ аволить са.

Тейтерентэнь савсь видькстамс, мейс сась.

— Тень эйстэ ушодомальгак тетя, — прок оймась авась. — Косо конёвось?

Валя таргизе сумкинестэнзэ конёвонть. Мартонзо венстась аванстэнь ручка.

Прасковья Кирилловна сёрмадызе фамилиянзо ды велявтынзе мекев.

— Весе?

— Эряви кемекставтомс, — кенярдозевсь тейтересь. — Паряк, молят велень Советэв? Тонетя седе курокук тейсызь.

— Тов уш тонсь якак, Валякай, — мерсь тензэ авазо. — Вансак велентькак, эсь пряткак невтськак.

Валя амельсэ палызе аванзо ды тусь.

— Бути удомс тетя сави теске, лияв иля яка, — серьгедсь мельганзо корьмаезэ, — сак тей.

— Чокшненень поездсэнть мекев туян, — ёнонзо апак вано, ёвтынзе валтнэнь Валя.

А ён ульнесь тензэ велень Советэв молемась, мик веленть кувалт ютамоськак. Виздсь ды мезде-бути пельськак. Мерят,

кодамож чумо тейсь. Маряви тензэ весе ломантне содыть аванзо марто истя теемадонть. Ансяк стяко мелявтсь. Содавикст-нэдеяк кияк эзь пшкаде тензэ, мик эзь варштаяк ёнонзо, куш сон оршазель пек парсте. Кияк эзь дивсе. Бульчом, аволь аламо нехшнесь сонзэ кондят.

Велень Советсэ секретаресь ульнесь съкамонзо, од ава. Валя содызе: школасо вейсэ тонавгнесь. Ялатеке теизе прынзо а содыцякс, кевкстизе:

— Кода неемс велень Советэнь прявтонть?

— Сон бригадасо, — чевтестэ пшкадсь каршонзо секретаресь. — Озадо аламос. Курок сы.

Валя таргась сумкастонзо цильдёрдыця зеркалыне ды ушодсь тейнезь кудрянзо витнеме.

Те шкане кенкшесь панжовсь ды кие-бути совась.

— Никон Карпович, — пшкадсь тензэ секретаресь, — ломань тыненк сась.

Тарск тейсь Валянь седеезэ, кепедизе прынзо ды прок чувтомсь. Кенкшенть лангсо аштесь Нико — шумбра, од мазый, черензэ, кода икеле, яходезь удалов.

— Арась, арась... — капшазевсь Валя, — мон лиянень совиксэлинь... Велень Советэнь прявтонть...

Путызэ зеркалынэнзэ ды капшазевсь кенкшентень.

— Валентина Алексеевна, — арась каршонзо Нико. — Пек апаргадан, бути а соватадо. Мон — Советэнь прявтось.

Валя сонськак эзь сода, мезе кирдизе. Васодевсь сень марто, кинь неемадо весемеде пек пельсь. Мерят, ёжовтомокс те-евсь. Прок а сонськак аштесь. Мелезэ ульнесь ношкстамс. Лиссь мекевланг. Нико чевтестэ саизе кавалалдо, совавтызе эсензэ кабинетс ды озавтызе кресла лангс. Валя каштанчинзэ невтискэлизе, ансяк мезеяк эзь лисе: аштесь нардевтеекс.

— Икелевгак, Валя, простямак сестэ тонеть аволь парсте мереманть кисэ, — кортась Нико икелензэ стядо аштемстэ. — Од ульнинь.

— Тень кисэ а мейс апаргалемс — монсь чумолинь.

— А ней мезе? Бути авать кувалт сыть — иля мелявто. Сон минек кедьсэ. Авань марто эйкакшпингень ялгат. Эрить. Сы тензэ мель башка эрямс — мутано лия тарка. Онот, — невтсь вальмаванть, — колхозось стявты кемгавтово квартирань кудо. Тосто вейкенть сонензэ макссызь. Инжекс сатадо — весе кельгтядо.

— Покш суюк теть, Нико, — сельведензэ нардынзе Валя. — Ансяк мон лия темень кувалт. Вана авань кедьпутовксонзо кемекстама. Печать, келя, эряви. — Ды венстизе тензэ сюдозь-азозь конёвонть.

Нико ловнызе, чаравтсь прысонзо ды венстизе мекев.

— Мезекс те конёвнесь? — аламос каштмолемадо мейле кевкстизе икелень ялгазо.

Валянь виезэ эзь сато сёпомс. Ёвтнизе весе, кода ашти теветсь.

— Мон истя арсиньгак, — стясь таркастонзо Нико ды кармась якамо кабинетканть мекев-васов. — Арась, Валя, конёвонть мон а кемекстаса. Те — кенгелема.

— Моралень ловномадо, Нико, монгак колан, — стясь Валя. — А кемекстасак?

— Малавгак!

Валя велявтсь, казизе цёранть а паро вановтсо ды капшазь лиссь. «Мезть ней теема? — арсесь сон. — Макс мерсь: конёвонь апак кемекста иля са. Ков ней модемс?»

Сыргась райисполкомов. Шказо уш вете част. Совиксэль председателентень — ламо учицят. Секретаресь, келя, ков-бути тусь. Валя кадовсь учомонзо. А паро арсематнеде истя сизесь — секень вант, пильге лангсто пры.

Окойники исполкомонь кузтемпенть икелев лоткась менелень пона «Волга». Эйстэнзэ лиссь валдо-сэнъ платиясо од ава. Витинзе нурькинесть керязь ашназа кудряв черензэ ды капшазь кузь кузтемаванть. Кенкшканть совамсто неIZE нусмакадозь аштицианть ды лотказевсь.

— Валя! — кенярдозь пшкадсь сон ды пурдась ёнонзо.

Тона стясь, ды кеместэ кутмордасть кавто мазый од аватне. Зярсья апак корта аштеть вейс кутмордазь.

Вай, кода тошнаинь, — тошкась Валя ды, авардезь, кутморьясь ялганзо эйсэ.

— Паро, паро, оймак, — салава кортась тензэ Кельвядина. — Адя монень.

Мошьсть аламонь тарка коридорганть ды лоткасть вейке кенкш вакс. Зярс Настя панжсь эйсэнзэ, Валя ловнызе лангсонзо сёрмадовксонть: «Кочкиятнень марто Верховной Советэнь депутатонть Кельвядина Анастасия Еремеевнань вастнемань кабинетэзэ».

— Озак, — ветизе Настя чевте креслантень. — Оймсек ды ёвтнек. Зярдэ уш эзинек корта. Паряк, содат, минек ферматне

ней паксясот. Чуросто кудовгак сакшнотано. Валскень перть седеем ризнэсь. Пелинь, эйкакштнэнь марто мезеяк аволь те-еве. Звонинь — кучизь «Волганть». Ардынь кудов. Ават мери: «Валя тесэ. Ды, неяви, аволь ён ёжозо. Кортавлитель мартонзо». Мон седе куро машинантень — ды адя мельгат. Ды вана муитинь. Течи кочкият а приман. Кортнетяно седейшкава. Эрь, ёвтнек васня тон. Кода эрят?

Валя варштась лангозонзо, кувакасто уктась ды нолдызе прянзо. Мейле апак учо аварьгадсь.

— Тон мекс? — каявсь эйзэнзэ Настя. — Мезе марто? Мекс а кортат. Мейсэяк лездама теть?

— Манявинь, Настякай... — ниреждеманть пачк тошкась Валя. — Содавлитыкак, кода манявинь...

— Аштека, аштека, — озась малазонзо Настя. — Мезть тон истя? Кодаяк а чарькодян. Мейсэ тевесь? Мирдеть паро, прейвей, доцент..

— Курок карми улеме доктор, профессор, — эгилязь ладсо прась валонзо трокс Валя.

— Секс кортангак, — поладсь Настя. — Чарькодемак, аволь эрьвантень пракшны истямо уцяска. Вант, кода парсте тевесь ашти. Тон парсте прыдык университетэнтъ, кармат тонавтнеме аспирантурасо. Эрьва мезенк ули...

— Ансяк вейке арась, — таго сезинзе валонзо Валя.

— Мезенк?

— Тень вана стака ёвтамозо, — уктась инжесь. — Помня-сак Леонтий Павловичень?

— Истямо ломанентъ кулаткак — а стувтсак.

— Сон ломантнеде истя кортась. Эрямосонтъ — кить ды киулот. Улить ломанть — кинь теицят ды киулосот. Кинь теицятне ёжост маштомс, эсь виест, эрямост апак жаля важдить, молить икелев, теить од, мезе икеле арасель. Киулотнесэ ашти-цятне пижнить, цяпить тенст, сынсь аштить ве таркасо, а эщить тюремань толонтень. Ды эрить а беряньстэ. Мик уцяскавт. Ды вана, монень неяви, тынь Нико марто виде, покш ки лангсо-тадо, мольгядо икелев мезеяк лангс апак вано. Мон кадовинь киулос.

— Валя! — пижакадсь Настя. — Мезть истя кортат? Курок улят учёноекс. Пек эрявить миненек истят ломантне.

— Арась, — яходсь кедьсэнзэ Валя, — истямо тевс а маштован. Виде, мирдем бажи темень учёноень звания мартокс.

Ярмактнэнь, мери, седе ламо пандыть. Вана мезде мелявты. Содавлитыкак, кодамо апаро.

Ды таго аварьгадсь. Оймамодонзо мейле зярсья кортасть эрямодост-аштемадост. Мейле Настя тердизе кудов — Валя эзь моле.

Каванизе ресторансо ды ильгизе вень поездсэнтъ. Алтасть сёрмалемс вейкест-вейкест туртов, васолемс.

Мекев ардомсто Валя таго арсезевсь эрямо лувдонзо. Ды ней видькстась эсь прянзо туртов оште вейке теве, конадо Настя мартояк эзь корта. Арсезевсь седе, кодат сынст юткост-ёжост мирдензэ марто. Ды сась истямо мельс: а вечксы сонзэ. Лиссь тензэ секень кисэ: тона доцент.

«Седе берянь вешнемс а косто, — тошкась эстензэ. — Мезес пачкодинь! А карман эрямо мартонзо. Явома! Туян. Мезезеяк а эряви!»

Неть мельтне эзь тукшно прястонзо вокзалов пачкодемазонзо. Тосо эйсэнзэ учось мирдесь.

Макс вастызе кенярдозь. Палызе ды саизе кавалалдо. Стяко кучнитинь. Аволь эрявгак якамс. Конёвонть теске теинек. Месткомсто редакциявгак сёрмадсть. Ловизь кенгелемакс. Весе прыдовсь. Тень коряс а мезть кортамскак. Ванды тутано оймсеме. Кода? Самолётсо эли «Москвичсэнтъ»?

— Кода мелеть, — мерсь Валя.

Ды вана машинаст, чевтестэ утякснезь, укссь эйсэст асфальтонть ланга.

«Кодамо паро эсетъ «Москвичсэ» ардомась!» — мельспаросо арсесь Валя. Седеяк шождынестэ таргизе оймензэ кудосо, мазыйстэ цитница шкафтнэнь ды шифоньертнэнь юткосо. Тантейстэ ярсамодо мейле совась удома тарказонзо, прась оймсеме.

Валскестэнтъ самолётсо ливтясть сынь Раужо морянтъ чирев.

— Прок мазый он неинь, — кенярдокшнось Валя, — кодат уцяскавт свал тосо эрицятне! Саевлимизьгак тов санаториянь кияксонь тенсиякс, нейке туевлинь.

— Истя мелезэть тусь? — кутмордызе мирдезэ. — Кияксонь тенсиякс! — пейзазевсь сон. — Аштек ужо, седейпелькскем! Седикелень сиятельной княгинякс молят тов. Ансяк макссызь тень докторонь лементь. Арсят, седе мейле мон теске карман аштеме? Вейке чи а кирдеван! Сеске туян. Ды аволь ковгак лияв. Видьстэ се таркантень, кона истя пек тусь тонь мельс.

Седе мейле ушодовсть эрва чинь мелявкссто пештызь тевтне. Вана Валя уш аспирантка. Вадрясто мольсть Макс Тариасовичень тевензэяк. Докторонь диссертациязо анокставсь. Кадовсь ансяк учомс сонзэ ваннома шканть. Ды кемсь: весе юты седе парсте а ков, часиянь нолажа пулось ули коморсонзо.

Ансяк аволь сеедьстэ эрси истя, кода арсят.

Ульнесь декабрянь якшамо даволов чокшне. Валя ветеце чассто сась кудов. Совавтынзе почтань ящикстэнь газетатнень ды путынзе мирдензэ столенть лангс. Кайсесь, тонгсь пильгезэнзэ тапкат ды серьгедсь кедьсэст эрищанть:

— Варвара, анок ярсамопелеть? Макс звонясь. Курок сы.

— Нейке анок ули, — каятотсь аволь од авань чевте вайгель.

Валя ютась залонтень. Нолдызе телевизоронть. Мелезэнзэ эзь туге, мекев лоткавтызе. Аштемадо сайсь газета. Тия-тува ваннызе васенце страницанть, омбоценть, варштась колмоцентень. Теньгак велявтыксэлизе. Ды лотказевсь: сельмезэнзэ понгсть прок эсензэ аволь умок ёвтазь валтнэ: «Пек паро, зярд-до ули «Москвичеть»! Ваны — фельетон. Кармась ловномо — сынdest. Сеске кельме ливезь валызе. Весе ёвтазь истя пшти-стэ, эрва валось толонь салмуксокс совась седезэнзэ. Ды аволь ансяк мирдедензэ, сондензэяк. Ёвтазь мик сеяк, кода сынь манизь аванзо ды панизь, кода мейле якась аванстэнь конёвонь кисэ, кода энялдсь велень Советсэ. Кувать аштесь прок чувтомозь, газетанть кедьсэнзэ кеместэ кирдезь. Мейле ёртызе.

— Арась, арась... — тошкасть сэньшкадозь турванзо. — Арась! Илязо понгоне сельмень икелев!..

Те шкане цюдавсь икелензэ аванзо сельведев ловтаня чамась.

Чумондозь вансть лангозонзо беряньстэ неиця сонзэ сельмтне. Валянь седеяк апаркстомсь ёжозо. Сон стясь ды седе курок оршнесь. Ношкстась кенкшентень.

Велявтсь. Сёрмадсь мезть-бути конёвнес. Газетанть марто вейсь путынзе Максонь столенть лангс. Лиссь. Мекев велявтсь.

— Варвара! — серьгедизе мельгасть якищанть. — Мезть илязо кевкстне кедьстэть, мезеяк а содат. Мертть, а содан...

— Валентина Алексеевна, — талакадсь тона, — ды мезе истя?..

Каршонзо каятотсь кенкшенть кеместэ эшкама.

Макс Тариасовичень фельетонотъ невтизь сеске поланзо марто телефон вельде кортамодо мейле. Сонзэ васня прок пурьгине вачкодизе. Озась чаво диванонть лангс, келемтизе газетанть ды пезнавтынзе сельмензэ фельетонотень. Ловномадонзо мейле зярся аштесь чувтомозь. Ды теке марто арсесь седе, кода «коськстэ» лисемс те «начко» тевстэнь. Ялатеке а пек кувать аштесь нусманясто. Тапардызе газетанть, тонгизе зепезэнзэ ды, кодамо-бути мелодиянь вешкезь, лиссь.

Истямо ён ёжо марто совась квартиразонзо.

— Валюшенька, Варвара, — кенярксов вайгельсэ пшкалесь кайсемстэ, — пурнадо ярсамс. Пекем куломс вачсь. Ды нуртядо тень цяркашка коньякке.

Каршонзо пшкадиця арасель.

— Валентина! — серьгедсь ды совась залонтень. Тосояк кияк арась. Каявсь удома тарказост — сеяк чаво.

— Варвара, косо Валя? — рангстась кухняв.

— Тусь ков-бути, — кавто тарелка марто лиссь тона. — Сась, аламос аштесь ды тусь. А содан ков.

— Те истя мезе таго? — путызе трубкантъ. — Косо те шкас? — Мелявтозь кармась якамо залганть. Ды нерьгставсь эсензэ столентень. Неизе Валянь кедьсэ сёрмадозь конёвнень. Каподизе, ловны: «Туинь! Илямак вешне!»

Варштась седе парсте ды неизе фельетонотъ марто газетантькак.

— Вана мейсэ тевесь, — медеризе газетанть ды ёртызе. Мельганзо ильгизе омбоцентькак, кона ульнесь зепезэнзэ.

Мейле озась ярсамо. Корштась вейке цярка, омбоце, колмоце.

— Мезеяк, Макс Тариасович, — кортась эсь прянзо марто, — мезеяк... Весе юты. Аволь истят синдтрить. Тень коряс а мезть мелявтомс. Кортан мартонзо — ды, киштезь, сы мекев. Иляк ёмавто истямонтъ. Мазычинь коряс истямо а муят. Ды превензэяк сатышкат. Ва-люша! — пижакадъ.

— Ды сон арась, — пшкадсь кухнясто Варвара.

— Виде, виде... Арась... Косо ней сон? Косо? — иредьксэзэяк ютась. Седе курок оршась, ливтизе гаражсто «Москвиченть» ды — станцияв. Весе вокзалонтъ ютызе — косяк арась. Ардтнинзэ содавиксэнзэ — кияк мезеяк эзь марьяк эйстэнзэ. Веньперть эзь удо — вешнесь. Эзь муеве...

**ПИНГЕ ПЕЧТЯМС —  
АВОЛЬ АНСЯК ЦЕЦЯТ СЕЗНЕМС**

**С** така ульнесь Варвара Петровнанень ваномс те тарканть лангс. Крута, комсешка эскельксэнь кувалмосо лей чире. Эзганзо менчевезь валги теине яннэ. Сон вети леенть маласо валаня тарканть, косто лиси ванькстэяк ванькс, валдосто цильдёрдыця лисьмапря. Чуди келейстэ, теке вишка эркине. Весе курилкась тестэ кандтни веде.

Вана нейгак те яннэванть стамбаро, аволь кеместэ пильгензэ путнезь, валги од ава. Ве кедьсэнзэ ведра, омбоцентень кундазь котошка иесэ кудряв ашо пря тейтерне. Сон вети аванзо эйсэ веде. Вана пачкодсть лисьмапрянтэ малас. Седе тов эряви модемс ведеганть башка-башка путнезь кев ланга. Тейтернесь эскельди икелев, авазо — мельганзо. Лиясто аванть пильгезэ мени кевенть вакска ды сон ваи кумажа видьга, сеедьстэ пракшны мик ведентень. Авольт весть пупордекшнесь береканть куземстэяк.

Малав кизэнь перть истя седейшкава ризнэзь вансь учительницась-пензионеркась сокор аванть майсеманзо лангс. Ламоксть лиснекснесь лездаможак те од авинентень — Письмаркина Зоя Акимовнанень. Варвара Петровна тонавтсь эйсэнзэ васенце-нилеце класстнэсэ. Сестэ сон ульнесь кедьпесэнзэ тейтерненть кондымо: ашо кудряв пря, кырксала чамине, виздиця ды сэтъмине, пек кунсолыця. Тонавтнесь ёнсто.

Ды вана мезе лиссь мартонзо седе тов.

Те ульнесь Ине Отечественной войнань шкасто, зярдочуросто вастовиль кудо, конань аволизь содавто лайшематне-авардематне. Эзть юта сынэ Зоямезень сэтъмине кудонтэ вакскаяк. Тетязо, колхозонь лишметнень мельга паро якицясь Письмаркин Аким Фролович, фронтсто сась калеккак: керш пильгезэ сезезель кумажа видьга ды вить кедезэ лавтовонтэ малава. Ламо сельведть валсь Зоя. Авадонзо уш а мезть кортамскак.

Истя васенцеде Зоянь вачкодизе эрямось.

— Авольт шождыне карми улеме, тейтернем, — кутмордызе сестэ авазо. — Ансяк мезеяк а теят. Тетят минек кисэ путызе шумбрачинзэ. Сонзэ эряви пек жалямс. Тон тонавтнек. Кодаяк трядадызь съкамонгак.

Ды Зоя тонавтнесь. Парсте прядызе сисемеце классонтэ. Тусь тонавтнеме медицинской техникумов. Авазо учось эстензэ лездыця. Зоя тосояк васенце иентэ прядызе парсте, весе предметнэнь коряс «вететь». Тетязо-аванзо пек кенярдсть.

Эз аште каштлангсо Аким Фроловичкак. Сон те шкастонть тонадсь протез лангсо а беряньстэ якамо, ды аравтызь цёранть колхозонь умарь пирень ванстыцякс.

— Иля ризнэ, Анфиса Мироновна, — кенярдозь кортась поланстэнь, — яла мейсэяк тетэ лездан. Монень салыщась чиезь, секень вант, а сасави, сень кисэ разведчикень сельмень чопода венеяк васов неить. Ды кыргыпаремгак эзь потомо. Рангстындерян — ого-го! — васов марьяван! Видьстэ тетэ ёвтаса, вейкеяк салыця а сови умарь пирентень.

Анфиса кунсолось эйсэнзэ ды эсь пачканзо пеедыкшнесь. «Мень уш салыщань кундыцят, — арсесь сон. — Адя хотэ протез лангсо якат ды келеть корты. Теяк паро».

Ды сынэ эрясть. Виемеме кармакшнось семияст, прок стака даволонь ютамодо мейле оштё аволь сыре тумо. Ды мик кассь сон: чачсь цёрынест, Лёва. Кенярдомаст пезеяк арасель!

— Эрятано, Анфиса! — кортась столь эхксэ Аким Фролович цёрынэнзэ лемдема чистэнтэ. — Кодамояк Гитлернэнь а изняви советской ломанесь. Шка сы, весе масторонтэ лангсто пуворясынек пряст. Вансак ва!

— Ды тусь эрямост седе парсте. Ансяк а кувать валдосто ваннос лангзост чись. Зыянос сась, кода мерить, икелев апак ёвта, кенкш удало апак стукаде. Седе мейле иень ютазь, тикшень ускемстэ, пандо чирес сяворсь сэрейстэ вачказь тикше марто автомашина. Анфиса Мироновна понгсь алонзо. Весе янговкшнось. Кото ковт ульнесь больницясо. Тосто сонгак лиссь калеккак: кеднек-пильгенек этэ маштово, пенч кургонзо эзь кепедеве.

Сеске, кода аванзо путызь больницяс, Зоя кадызе тонавтнеманзо ды сась кудов. Ней семиясь кадовсь сонзэ кедь лангс. Эрявьстэ трямс тетязо-аванзо ды вишкине ялакскензэ, Лёвань. Мольсь скалонь фермав. Васня вазт андсь, мейле аравтызь скалонь потявтомо.

Сестэ сонэнзэ ульнестэ ансяк кемготово иеть.

Скалтнэнь мельга тейтересь якась истя жо парсте, кода тонавтнесь. Тусь весемель мельс. Ялганзо седейшкава лездасть тензэ. Кенерсь кудососяк, эзинзе кирде вачо тетязо-аванзо,

ялакскензэ. Андсь-симдсь эйсэст, шлясь-нардасть, муськсь-човась лангозост. Эрямозо таго тусь седе валанясто. Сон ловсо потявты ломантненень. Пандыть тензэ парсте.

Колмо иеть истя Зоя важдось. Топодсть тензэ кемгавксочово, тусь кевейксэецес. Те шкане эрясть ёнсто. Кармась лиснеме ульцяв ялга юткс, снартнесь киштеме ды морамо. Вайгелезэ седейс педицьяль, чамазо валдо, кудряв ашо черензэ новолезь лавтовонзо лангс, седе рауждыця сельмечирькензэ содавсть парсте — сэнь сельмензэ косто-косто кайсинзе од цёрань пелевгак.

Ды сестэ Зоя вастовсь эсест велень лангс ваномс паро од цёра марто. Те — Чиряскин Евсей, кона кеменце классонь прядомадо мейле кадовсь эсест велес ды роботась шоферэкс. Сынь алкукс кармась вейкест-вейкест вечкеме. Эрязь-аштезь Евсей кучсь покш кудат. Зоянь тетязо ды авазо кенярдозевсть-как, талнозевстькак: мезть сынь, кавто калекатне, кармить тейнеме, бути туй кудостонтъ тейтерест?

— Мон вечкса Евсеень, — виздезь видькстась Зоя, — мирденень тензэ лисевлинь. Ансяк вана тетянь-авань шумбрачист пек берянь. Мон сынст ськамост а кадсынъ.

Чокшне скалонь потявтомсто самсто Зоянь вастызе Евсей.

— Тон мекс ажиат мекев пурдыть? — кундызе кедте. — Эдь парсте содасак, — седейшкава кортазевсь сон, — кода монень эриват. Содат мезе? Улиндеряй мелеть, молян эрямо тыненк. Монь ниле братон. Тосо монтеменьгак а кельгитъ кудонтень.

Зоя кенярдозевсь. Кортась тетязо-аванзо марто. Ды Евсей сась эрямо сынест. Ютавтсть од коень свадьба. Аволь аламо пиштемань неиця семиясь кенярдсь: окоиники часиясь содавтызе сынст кудопотмонтъкак. Аким Фролович протезэнзэ лангсо якась прок алкуксонь шумбра пильге лангсо. Анфиса Мироновнаньгак шумбрачизэ седе паркстомкшнось.

Свадьбадонтъ мейле васенце иентъ Зоя марто Евсейть эризь пек парсте. Чачсь тейтернест, путсть тензэ лем Мая. Покш кенярксок эйкакшось ульнесь тетястэнь-аванстэнь, седеяк — покштанстэнь-сырькаенстэнь.

Омбоце иеськак ютась ёнсто. Зоя теевсь содавикс дояркакс, аволь вестъ шнызь газетасояк, ламоксть казизь ламо ловсонь потявтоманть кисэ. Евсейгак эйстэнзэ эзь кадново. Пандсть тенст сатышка. Ульнесь мезе путомс столентъ лангс, мезе оршамс ломань юткс лисемстэ.

Колмоце иестэнтъ тунь апак учо нусмакадсь кудопотмост, чопода пель кепететсь вельксэзэст. Евсей мекс-бути сеедьстэ кармась машинетеме, мейсэяк мелезэ эзь ваново: те тензэ а истя, тона аволь сонзэ койсэ. Ды, окоиники, видькстась.

— Вана мезе, Зоя, — мень-бути аволь вадря седей ёжо марто кортазевсь сон, — тон, тень, мезеяк берянь иля арсе. Мон тонь вечктян кода икеле. Ансяк вана мезе лисни. Тонсь содасак, сыре патям эри ськамонзо. Кудозо оно знярошка. Терди эйсэнек. Садо, мери. Тынсь азорт ультядо. Кулан — весе тыненк кадови. Монь койсэ, эряви молемс.

— Тон мезть? — дивазевсь ды талакадсь Зоя! — Тезэнь, паряк, а кельгтяно?

— Кельгемс кельгтяно ды ансяк тень... — Евсей кода-бути нулгодезь сормизе судонзо ды варштась удалце кудонтъ ёнов.

— Чарькодян, — нусмакадсь Зоя, — монь калека тетянь-авань марто арась мелеть эрямс. Тон арсека, мезть сынь кармить тейнеме, кадындерясынъ мон?

— Кода мезть? — кельместэ кортазевсь Евсей. — Сыненст сатышка пенсия пандыть. Лездемо карматано...

— Эх, Евсей, Евсей, — лиссть Зоянь сельведензэ. — Содавлика кодамо паро ломанекс сынь ловить тонь эйсэ. Озномо анокт лангозот! Кода тетъ а визькс? Аштек, аштек... паряк, тон истяк, тандавнтят эйсэнь?

— Арась, — сыргась лисеме Евсей. — Седейшкава кортан. Арсек тонгак.

— Сестэ кода мелеть, — яказевсь кудованть Зоя. Сон содаськак ды эзь содаяк мирдентъ туемань алкуксонь тувталдонтъ. — Олят. Тейть, кода тетъ паро. Мон тетянь-авань а кадсынъ. Улевельтъкак шумбрат, масторонь омбоце пев туевлинь марто.

Истямосто а кадсынъ... — ды ниреждезь аварьгадсь.

Евсей каштмолезь лиссь ушов.

Вестъ истя кортасть, кавксть, колмоцеде кортамодо мейле Евсей тусь. Ды сеске кадызе велентъкак. Кортыть, косо-бути ошсо важди. «Лисни, — арсесь Зоя, — аволь сыре патязэ тензэ эривсь, бути кадызе велентъкак?»

Кодамо стака вачкодъксэкс те ульнесь Зоямезень весе семиянтень! Тетязо кавто-колмо чис кода-бути весе сормавсь, седеяк шержейгадсь, протезэнзэ стакалгадсь. Авазо прась пильге лангсто ды одов седеяк пек ормалгадсь. Зоя прок ёжовтомо

якась, мезеяк эзь нее, эзь маря. Ялганзо пельсть, прынзо илязсо ёмаво. Секс кавто-колмо чить эзизь кадно ськамонзо. Зярсыя истя майсесь. Авазо эзь цидярдо — кулось.

А ёвтавияк, кодамо стака те ульнесь весеменень. Тетязо зярсыя мик эзь якавоаяк протезэнзэ лангсо. Зояяк таймазкадокшность, тунь эзь сода мезес кундамс. Якась, прок сулей. Мезе кадовсь ней тензэ? Мейс эрямс ды якамс моданть ланга?

— Арась... Авам чумондовлимим бу неть мельтнень кисэ, — прынзо кепедизе Зоя. — Монь ули семиям — тетям, ялаксем, тейтернем. Сынст часиянть кисэ эряви эрямс.

Ды мекев Зоя кеместэ чалгась пыльге лангс. Седеяк парсте кармась скалонь фермасонть важдеме. Ламо ловсонь потявтоманть кисэ сёксня казизь вадря казнесэ ды шнызь паро те вензэ кисэ. Ды таго кенярдозевсь Зоя. Весе те виемгавтызе од аванть. Мезе лия эряви ломанентень? Ды Зоя эрясь, путсь вий лиятнень часияст кисэ, эсь прыдонзо апак арсе.

Вете иеть Зоя истя важдось, оймамонь апак сода. Комськово иеть тензэ топодсть. Шумбра, виев, мазый, ансяк часиясь вана а пек капши содавтомонзо. Аволь аламо алят чарасть перьканзо, ансяк стьяконь кисэ шканть ютавтнесь. Зоя арсесь алкуксонь часиядо. Учось. Евсей мик ве сёрмаяк эзь кучне. Эзизе кевкстнеяк, кода эри-ашти тейтернезэ. Зоя ялатеке учось мирдензэ. Ансяк стардызе седеяк стака како.

Весть чокшне, скалонь потявтомсто, сон лоткась неемадо. Кудов ветязь ветизь. Валске ускизь больницяв. Зярсыя кирдизь тосо, лецясть эйсэнзэ — лезэ кодамояк арась. Зоя пек тандадсь. Чинек-венек авардсь, кодаяк эзь оймавтово. Усксизь ошонь больницявгак. Тосоаяк зярсыя кирдизь. Лезэ арась. Мейле мерсть ускомадонзо Московов. Бути тосоаяк а лездыть, сестэ сави тензэ эрямс сокорсто.

Усксизь Зоянь кудов ды кармасть арсеме, кода ней сонзэ пачтямс зняронь тарка. Эрявсть ярмакт ды мартонзо кучомс ломань. Виде, Зоянь ульнесь таштазь зяро-бути ярмаконзо, ансяк сыннь ютасть ды кадовикстнэ малавгак ней а сатыть. Аким Фроловичень пек лавшомгавтызе те зыянось. Ялатеке пачкодсь колхозонь правленияв знялдомо. Тосо сонзэ вастызь мелявтозь. Ризнэсть мартонзо вейсэ ды алтасть лездамо, келя, курок пурныть правленияв заседания, кортнить тосо тень кувалт ды, нама, муить ярмакткак. Паряк, ломаньгак кучить мартонзо. Кода эно? Зоя шумбрачинзэ путызе колхозонь теветень.

Аким Фролович кенярдозь сась кудов. Ёвтнизе, кода теवेशь ашти, Зояяк оймазевсь ды кармасть кемезь учомо.

Ансяк темень теемась ульнесь аволь алтамонть кондымо. Ютасть недля, ютасть кавто, ютасть цела ков. Виде, правленияв заседания пурнакшность. Тосо ульнесь Аким Фроловичкак. Весе седей марясть, ризнэсть мартонзо. Алтасть. Ансяк ярмакт истят костояк эзь муе. Весе строямонь теवेशь лоткась ярмаконь аразенть кувалт. Сави учомс аламос. Вана уш иесь прыдови ды, паряк, костояк пурныть-сэрнить.

Ды таго кармасть учомо.

Зоя те шкане истяк эзь аште. Васня, виде, ризнэсь-авардкшнесь. Мейле мерсь:

— Сельведьсэ кажось а изняви. Эрить ломанть сокорстояк — ловнытькак ды мик сёрмадытькак. Паряк, моненьгак муеви те?

Ды сон кундась кудосо кой-мезень тееме. Кармась кияксонь тенсеме, шлямо, пенчень-ваканонь ёрвалеме; пенгть канды, кудо ушты; лавкав эйсэнзэ ветнесь тейтернезэ, Мая, сонзэ марто яксесь лисьмапярив ведьскак. Ризксэсь седе явсь эйтэнзэ. Шкась седе эзь карма марявомо. Ялатеке те эзизе вите седеензэ. Сон бажась фермав, ялганзо-оянзо юткс. Паряк, тосто муить тензэ кодамояк те. Мекс бу а кармавтомс сонзэ кедьгень шлямо? Кудосо сон шождынестэ теи те теветень. Эряви кортамс теде киньгак марто. Ансяк кинь? Ды сестэ ледсь мелезэнзэ вечкевикс сыре учительницазо, Варвара Петровна. Эряви седе курок модемс сонензэ.

Ансяк эзь кенере Зоя сыргамо. Сыре учительницась сонсь сась. Кутмордызе, прок эсь тейтерензэ, ды палызе.

— Кода истя весе те лиссь? — седеймарязь кевкстизе Зоянь ды озась эземс — Бульчом, аволь аламо савсь теть кирдемс, пиштыка. Мезть кортыть врачтнэ?

Ды Зоя марто Аким Фролович ёвтнизь тензэ весе, кода теवेशь ашти. Варвара Петровна ризнэсь мартогост аламос ды тусь.

Ансяк аволь кудов капшазевсь сон. Ютамсто совась колхозонь правленияв, председателенть кабинетс. Захар Трофимович, истя жо, кода Зоя, сонзэ ученикезэ, лиссь столенть экштэ каршонзо ды озавтызе чевте креслас.

— Захар, кунсолока, — седейшкава мелявтозь ушодсь учительницась, — тон колхозонь паро прывт. Теде а мезть кортамс. Мекс а максат ярмакт Письмаркинанень? Паряк, колхозось истямо кажов?



— Стяко мелявтадо, Варвара Петровна, — стядо ашти икелензэ председателесь. — Кода а макстано? Минь алтынек тензэ. Кодак кармить уleme...

— Зярдо?

— Ды вана... Эрявить сынь костояк явомс...

— Захар, — прась валонзо трокс учительницась, — тон пек превеят ломанесь. Чарькодят парсте. Эрямосонть улить тевть, зярдо учомась вети ансяк стака зьянс. Кортасынек гувталонь апак вешне. Зярдо лездатадо Письмаркинанень? Зярдо?

Захар Петрович арсезевсь.

— Сы недлястонть:

— Кодамо чистэ? Иляк стувтне, Аким Фроловичнень аволь шождыне протез лангсо чийнемасть.

— Саст пондельникстэ, — кемевтизе председателесь.

— Покш пасиба тенк, Захар Трофимович, — мерсь учительницась, чевтестэ простясь ды тусь.

Сеске пачтясь теде куля Зоянень ды Аким Фроловичнень. Сетькак кенярдозевсть. Окойники тевесь сырги.

Сисем читнеяк кувакакс марявсть Варвара Петровнанень. Мик удоськак, ярсаськак те шкане беряньстэ, истя мелявтсь Зоянь кувалма ды кемсь: Захар Трофимович макссь тензэ вал. Секс те шкастонть анокстась ломаньгак, кона моли Письмаркинань ильгямо. Мерсь ки лангс анокстамодо Зояненьгак. Сонсь якась больницяв, сайсь кодат эрявить конёвт.

Пондельникень валске сыре учительницась седе курук тейнинзе кудуютконь а покш тевензэ ды мольсь Письмаркинтнень Зоянь ильгямо. Совась ды абунгадсь. Зоя авардсь. Аким Фролович аштесь прянь нолдазь.

— Мезе? — кевкстинзе. — Таго секе жо?

— Кинень ней минь эрявтано, Варвара Петровна, — кедьсэнзаяк яходсь Аким. — Марят, Захаронь тердизь ошов сисем чинь семинарс. Туемстэнзэ киненьгак мезеяк эзь мере. Таго учомс сави...

— Илядо мелявто, — оймавтынзе учительницась. — Мезеяк а теят, эрсить истя тевть. Колхозонь прявтонть аволь аламо мелявксонзо. Эрси, лиясто, стувтыяк мезеяк. Тон, Зоя, пурнак-сэрняк. Мон чийнян правленияв. Телефон вельде кортан Захар марто ды кандан тенк ки лангс ярмакеть. Течи ильгятадызь. Мартот моли пионерэнь вожатоесь, Танюша. Усктанзат ков эряви. — Ды, прок од ломань, капшазь лиссь.

Зоя оршась седе парсте, чемоданнэс путсь нардамо ды седе паро оршамопель, сумкинес кши. Мейле озась ды кармасть учомо. Аким атя а кемезь яходсь кедьсэнзэ ды сяворсь койканзо лангс. Ансяк эзь кенере матедеведе: каятотсь автомашинань увт, ды сынст кудонть икелев лоткась правлениянь «Волгась». Эйтэнзэ валгсть Варвара Петровна марто Танят.

— Анокат? — кенкшенть панжомсто кевкстизе Зоянь учительницась. — Захар Трофимович валонзо топавтызе. Илядо апаргале лангозонзо. Ведь кода ашти тевесь. Стувтсак лиясто. Нетнень вана ки лангс тенк, — макссь ярмакт Таняненень. — Нетнень — эйкакштнень марто Аким Фроловичнень.

— Ды минь мезе, Варвара Петровна, — кенярдозь кортазевсь атясь. — Ки ней Захаронь а содасы? Эсенек ютксо кассь. Меельце сускомонзо явсы кавтов. Пасиба тонетькак, Варвара Петровна.

— Мейле, мейле теде, Аким Фролович, — мелявтозевсь учительницась. — Капшамс эряви, кавто часонь поездэнтень кенеремс.

Вана истя ильгизь Зоянь Московов.

Седе мейле чинь ютазь Зоянь сельмтнень кувать ванность сельмень поликлиникасо.

— Аволь шождыне ули одов кармавтомс нееме, — мерсть тосо. — Пек кувать эзизь уско. — Ды кучизь Одессав Филатовонь лемсэ сельмень поликлиникантень.

— Кундатано лецямонзо, — мерсть тосо кувать ванномадонзо мейле. — Стака ёвтамс мезе лиси. Карматано учомо ансяк паро.

Зоянь путызь лецямо, Таня сась кудов ды ёвтнизе Варвара Петровнанень, кода ашти тевесь. Сеске весе колхозниктне марясть теде. Ды весе кемсть. Бути те ломанесь кундась Зоянень лездамо, авась карми нееме. Сынь парсте содасызь эсест сыре учительниаст. Велесэнтъ, секень вант, арась истямо кудо, конанень бу сон аволь тее кодамояк паро. Ансяк седе алов ды мелень ванозь сюконясть тензэ каршо вастомсто.

Ды весе кармасть учомо алкукс седейшкава. Содазь, весемеде пек — Аким Фролович, Зоянь ялакскезэ ды тейтерьказо Мая.

Варвара Петровна нетненьгак эзинзе стувто. Мейсэ виезэ сатотсь, лездась тенст сонсь. Пионерэнь вожатоесь Таня кортась Зоядо пионертнень марто. Кото пионерт эсь олясост кундасть те семиянтъ мельга якамо. Теде башка, Варвара Петровна вешневтизе Зоянь орголиця мирденть, Евсеень, ды судонь

трокс кармавтзызе алиментэнь пандомо. Неть ярмактнэнь эйтэ рамасть оршамот эйкакштнэнь туртов.

Семинарсто самодо мейле колхозонь председателесь сеске сась Варвара Петровна, кона те шкастонть оймсесь.

Сыргозсь Варвара Петровна кудыкелькс кенкшентень стукамодо. Лиссь панжомо.

— Ки тосо? — кевкстизе.

— Мон, Варвара Петровна, — каятотсь Захар Трофимовичень вайгелезэ. — Тынь уш илямизь чумондо. Содаса — сизиде.

— Совадо, совадо, — мелявтозевсь учительницась. — Эж-дьян чай. Тон эдь вечкат варения марто.

— Иля мелявто. Мон куро.

— Иля капша, оймсят аламос. — Ды совамодо мейле пугызе электрочайникенть лакамо.

— Аволь чай тынь, Варвара Петровна, лакавтодо монень, — стакасто озась председателесь диванонть лангс. — Саеде парыне палка ды путодо тень, зяро меленк.

— Мейс? — путсь икелензэ стопка учительницась.

— Тынь парсте содасынк, Варвара Петровна. Чуман мон Письмаркина марто тынк икеле. Пек чуман. Ёвтынк куш, зяро тенк стясь Зоянь ускемась ды лециямось. Курок кармить уле-ме ярмаконок. Пандсынек.

— Илядо мелявто, Захар, — варениянь каямсто кортазевсь азоровась. — Монень а ков капшамс. Ярмактнэ ялатеке истяк аштить сберкассасо. Кулындерян, калмасамизь сеть ярмактнэнь лангс. Ды, паряк, паро валгак ёвтатадо калмом лангсо.

— Тыненк, Варвара Петровна, яла пейдыкшнемат. Мон школасо тонавтнемстэ истя эзинь визде икеленк аштемстэ, кода ней. Чумось семинарось. Капшазь туинь. Ды стувтыя. Тосо чинь-кавтонь ютазь ледсь мелезэнь. Арсян, кодак молян кудов, икелевгак те тевенть тейса. Ансяк тынь эзимизь учо. Ускинк Зоянь монтемень. Содавлидеяк, кодамо визькс тень ульнесь.

— Вана чаеськак лаказевсь, — нуртась тензэ Варвара Петровна. — Симть апак визде. Иля мелявто. Мон тонь эйкакшпингестэ содатан. Пек паро прявтокс ловтано эйэт. Весе виеть максат колхозонтень. Ансяк сеяк эряви ледстямс: аволь шождыне парокс улемась?

— Пек мик стака, Варвара Петровна, — видьстэ тенк кортан. Тесэ шныть эйсэть, тосо шныть, те пасиба теть ёвты, тона — сукпря. Секень вант, кармат эсь прят ловомо ильведь-

ксэнь зярдояк а теицякс. Кияк а сядтанзат. Секс касыть истямо кельме седей прявтнэ. Пек теде пелян. Несынк, мезе лиссь Письмаркинанень лездамонть марто? Сёвномизь парынесть куш тынь тень кисэ партийной промкссо. Паряк, седе а карман ломантнень стувтнеме.

— Оштё нуртась?

— Пасиба, Варвара Петровна, — стясь ды капшазевсь Захар Трофимович. — Оймседе. Илядо мелявто. Кувать а кирдсынек ярмаконк. Уледе шумбра. — Ды, кода свал, капшазь лиссь.

Варвара Петровна ёжозо паролгадсь. Сон истя арсеськак. Захар чарькодизе, кода ашти тевесь. Ды вана сась тензэ кудос, энялды а чумондомс.

Ялатеке весеменень васенце мелявксокс аштесь се, кода тосо Зоя. Кувать учость. Варвара Петровна аволь весть сёрмалесь Одессав, аволь весть кевкстнесь. Ансяк колмо ковонь ютазь сась тензэ телеграмма:

«Вейке сельмем кармась нееме», — сёрмадсь Зоя.

Сыре учительницась эзь кирде. Седе куро ёвтась Аким Фролович марто эйкакштнэнен. Сонсь сайсь билет ды ардсь Одессав.

Зояненъ сеске ёвтасть сонзэ самодонтъ. Анокстызь од аванть. Зяро Варвара Петровна совась палатантень, Зоя озадо ульнесь койканзо лангсо. Кодак неизе учительницантъ, стясь ды пейдезь сыргась каршонзо. Чамазо аламодо якстерьгадсь, чамаумарьганзо кеверсь сиянь кондымо валдо петнявкске.

— Тон истя мейс? — кутмордызе Варвара Петровна ды палызе, — Оймак, оймак. Ризнэмс тунь а мезень кисэ. Ней врачтнэ кеместэ мерсть: тон кармат нееме.

Кудосотнень кувалма иля мелявто. Тетят шумбра. Лёва марто Маяткак. Иля мелявто. Весе апарось кадови удалов. Тоньгак уцяксь эзинзить стувто. Эдь ломанесь чачияк апаронтъ изнязь эрямо.

— Пасиба тенк, Варвара Петровна, — нардынзе сельведензэ Зоя. — Покш пасиба. Содатадо? Мон ней ансяк алкукс неия часиянтъ. Кувать сельмень ульнесь марлясо тапарязь. Мейле юкснизь ды мерсть: «Панжить сельметь». Мон пек пелинь. Мейле панжинь ды пижакадовинь мик. Неян! Кодамо мазыель те валдось! Кодамо мазыель весе, мезе ульнесь перькан, — ломантнеяк, стенатнеяк,

вальматнеяк, кува совась чинть сырнень валдозо. Истя, монь койсэ, часиясь одс совась монь эрямонтень. Паряк, прядовить майсеман.

— Истя, истя, Зоя, — ветизе мекев койкантень учительница, — пинге печтям — аволь ансяк цецят сезнемс, сави нартемксэнь сэпаяк ноламс. Ансяк теде ней а мезть мелявтомс. Мадть вана ды оймсек, пурнак-сэрняк вий ды седе куроку велявт кудов.

Колмо чинь ютазь Варвара Петровна ульнесь уш эсест велесэ. Икелевгак мольсь Аким Фроловичнень. Кенярдовтызе сень, каванинзе васолдо ускозь ламбамопельде Лёва марто Маянь ды чинзэ валгома шкане сась умарь чувто потс ваязь кудынезэнзэ.

Седе мейле, колмо ковонь ютазь, сась Зоя кудов. Прок од тейтерь — кенярксов, мазый, шумбра, сельмензэ валдосто цивтёрдыть, теке сиянь тештинеть. Станциясто Захар Трофимович усковтызе «Волгасо».

Кенярдоматне а ёвтавитькак кодашкат ульнесь. Аламось оймсемадо мейле од авась таго арась эсь тарказонзо — скалонь потявтомо.

Покш мельспаросо вансь лангозонзо Варвара Петровна. Зоя ашо халатсо, шождынестэ моли ловсонь кавто ведратнень марто, кеместэ чалгси моданть лангс. Чамазо валдо, мельспаров, кодамо эрси эрямонтень пек кенярдыцянь. Секс, бульчом, эзь изнявояк зняро майсематненень. Кемемась ды парочинь виесь одов кастызь эрямонтень мелензэ. Те кепединзе кеме пильге лангс тетянзояк, ялаксонзояк, кона ней тонавтни уш школасо, тейтерьканзояк.

Ды ялатеке седе мейле оштё весть Варвара Петровнанень савсь мелявтомс Зоянь кувалма. Весть талнозь чийсь тензэ Письмаркина ды каявьс кирьгазонзо.

— Лездак, Варвара Петровна, — энялдозевсь сон, — а содан мезть тейнемс...

— Мезе? Мезе таго лиссь? — седейшкава мелявтозевсь сыре учительница.

— Марят... Евсей сась...

— Вай, кода, Зоякай, тандавтымик, — шождынестэ таргизе оймензэ Варвара Петровна. — Те, паряк, а берянь.

— А содан, кода тенк меремскак... Мольсь миненек. Сынь, мери, мекев. Простямак, Зоя... — Ды аварьгадсь.

— Мейс ней сельведеть нолдыть? Тандадыть?

— Чинек-венек учинь эйсэнзэ...

— Эно мезе лангс лоткась тевесь? Ней кенярдомс теть эряви...

— Тетям панизе. Костыльсэ мик вачкодизе. Кудонтъ малавгак эзь мере тензэ сакшномадо...

Те шкане, истя жо талнозь, совась Евсей.

— Вана теть сонсь учомапелеськак, — пейдезевсь учительница.

— Илямизь чумондо, Варвара Петровна, — энялдозевсь Евсей. — Неия, Зоя тей чийсь...

— Тон мельганзо? Ёвтыка, кода те чарькодемс? Васня кадык, оргодить азё вешнек ков. Тейтеретькак мик стувтык. Милициянь вельде мик савсь вешнемс адресэть. Видьстэ мерьса теть, Евсей, эзинь учне тонь пельде истямо берянь тев. Тонавтнемстэ ульнить пек превей, видечинь кис аштиця. Кенгелицят эзить вечке. Ней жо вана мезе.

— Чуман, Варвара Петровна, — нолдызе прянзо Евсей. — Сестэ эсенектне истя минек явовтымизь. Икелевгак сыре патям. Алтась тень улипаро, кудонзо. Ней сон арась уш. Кудонтъ, келя, монь лемс сёрмадстызе. Меснян мартонзо? Пек сестэ ильвединь. Мекев визькс ульнесь модемс. Секс тукшныньгак. Кува эзинь яка, косо эзинь робота — Зоя мельстэнь эзь тукшно. Седеяк карминь майсеме сестэ, зярдэ сёрмадсть тень сельмензэ сэрдемандонтъ. Тарка-эзем эзинь муе. Сестэ максынь вал: самс тей. Бути Зоя а примасамам, карман эрямо маласонзо ды лездамо тензэ. Пек чуман икелензэ. Монь кувалт сынь ламо мельсапаро кирдсть. Ансяк Аким Фролович панимим. Аздан, мезе ёвты тень Зоя... Лездадо моненьгак, Варвара Петровна. Седейшкава бажан лисеме эрямонь те тапазь лувстонть.

— Эх, чаволат, чаволат, — чаравтьсь прясонзо сыре учительница. — Тейтеренк куроку чокшне улыцява чийнеме карми, тынь оно мезть тапарятадо. Кортадо. Кода чарькодия, монтеменьгак валонк ве лувсо туить. — Ды лиссь умарь пирев. Ютась умарь чувттнэнь алга, лейнень чирева, валнынзе цецянзо.

Зярдэ велявьтсь мекев, Зоя марто Евсейть, прок одирьватсодамот, аштетьсь диванонтъ лангсо озадо. Сынст валдо чаматнень коряс чарькодинзе: уцяскась велявьтсь тенст мекев.

Нама, Аким Фроловичкак каршо молеме эзь карма. Кенярдозевсь сынст уцяскантень. Ды капшазевсь эрямост, прок лембе тундоне налксезь чудиця лей.

ВЕЧКЕВИКС СОДАВИКСЭНЬ

1

Июнень васенце читнестэ монень ульнесь мерезь сёрмадомс очерк Атаманов Аркадий комсомолецтэнтэ, кона макссь вал кастомс тѣжа тувот.

Валске стинь рана, лисинь кинть чирес машинань учомо. Аштинь аламос ды сыргинь ялго. Паряк, арсян, кодамояк машина понги. Ютынь вайгельбе, кавто — кияк эзимим саса. Часошка молинь кинть кувалт. Чись ансяк лиссь. Сонзэ валдось сыреждевтсь келей пиже паксянтэ. Росась човалякс понгавтневсь кинть чирева цецятнес. Сон цильдѣрды эрѣва кодамо толнэсэ. Покш мельспаросо ваньнэ весе те мазынтэ лангс. Стувтыя мик машинадо арсемамгак.

Те шкастонть пилезэнь каятотсь тейтерень морамо вайгель. Лоткинэ ды варштынэ удалов. Киванть ардсь алаша. Крандазсонть калдордсть ловсонэ чаво флягат. Трокс лазонтэ лангсо озадолэ тейтерэ. Прясонзо ашо пачине, конанэ алдо черьбулонзо новольстэ мештезэнэ.

Зярдэ пачкодсь монэ видсь, лоткавтызе алашанть, велявтсь монэ ёнов ды пейдезевсь.

— Ков кинк кирдтядо, од цѣра? «Валдо кив»?

— Чарькодинк, видьстэ тов.

— Бути виде, сестэ илядо покшкавтне, озадо, янксемс тенк а сави, — пейдезь ладсо кортась мазыйкась. — Усктадызь апак лотксе.

Мезень уш тосо покшкавтнемат! Истямо мазый тейтерентэ марто ялгояк масторонтэ перька ютавлинь. Ёвтынэ тензэ сюкпря, озынэ крандазонть.

Видькстан, аволь оймавозь седей марто озынэ. Тейтерентэ вечкевиксчись сеске кодамо-бути а чарькодевикс вийсэ сюлмим малазонзо.

Алашась ноцковтызе крандазонть ды, прынзо верев кепедезь, тусь ардозь.

Мон аштинэ ды ваньнэ тейтерентэ кедензэ лангс. Кодаяк эзинэ варштаво чамазонзо. Эрjavоль бу кортазевемс мартонзо, монень жо тувтал кодамояк а миеви, куш ломанэ марто кортамо маштылинь, эсь койсэнэ, а беряньстэ. Монэ ускицясь, неяви, тунэ эзь визде монэ эйстэ.

— Кона ёндо ды кодат вармат кандыть эйсэнк минек пелев? — кевкстимим.

— Редакциясто, — мерян. — Молян Атаманов Аркашанень. Арсян очерк эйстэнзэ сёрмадомо.

— Редакциясто? — дивазевсь тейтересь. — Окойники сыргозсть. А минэ арсинек, тынэ а содатадо минек эйстэ, стувтынк: косо-бути ули «Валдо ки» колхоз.

— Секенэ вант, мерян, видеть валонк. Чуросто эрсетяно колхозтнэсэ. А тынэ весемеде васоло эрjададо.

— Васоло! — дразнезь ладсо ёвтызе валонтэ алашанэ ветичьясь. — Лия колхозтнэде сёрмадтадо. А минек колхозось прокковонтэ лангсо, кодаяк а пачкодить эйзэнзэ редакциянэ роботниктне. Паряк, а мезе сёрмадомс минденек. Арсетядо, арасть минек паро ломаненек? Лиясто костояк зняро а мутадо! Косоак арасть минек колхозонтэ кондымо сад.

— А содан, — мерян.

— Якстерькайтэ косяк истят касыть?

Мон каштмолинь, эзинэ сода, мезь кортамс.

— Косто неиде истямо тувонэ ферма, кодамо минек?

— Виде, а содан, — видькстынэ. А кармат жо кенгелеме истямо бойка тейтерентэ икеле.

— Эно мезе тынэ содатадо, журналист ялгайтэ?

Мон пейдезевинэ: кортамс каршонзо а мезь ульнесь. Савсь кунсолемс те виде критиканть.

— Аволь вадря, — поладсь тейтересь. — Кодат паро ломанть улиць минек колхозсо, содавлидеяк тынэ! Минек садоводось, Матвей Павлович, мик виноград кенерстсь. А Каргина Веранэ звенась? Косо истямо кукуруза кастсть? Ёмат потмозонзо! А клуб кодамо строясть минек комсомолецтнэ? Те аволь клуб — Культуранэ дворец! Весесе а содатадо! Эли, видеак, савемс Аркашанэ. Кастака зняро тувот. Тѣжа эдь! Ансяк вана редакциянэ роботниктне кодаяк а пачкодить миненек. Бульчом, машинанк арасть? Гайневтевлиде — ардовлинек кисэнк.

— Ялатеке а кода меремс: минэ овсе мезеяк эзинек сёрмале тынк колхозонтэ. Колхозонтэ ули минек велькоронк — Видманов Никита Павлович. Весе, мезе сёрмалесь, печатынек.

— Тенэ кисэ сюкпря, — мерсь ускицясь. — Паро минек Никит Павлович. Весе виензэ путы колхозонэ теветентэ. Сон агроном ды колхозонэ председателентэ полавтыцязо.

Чись те шканть кепететьс уш верев.

Минь ютынек сэрей ды тусто вирь колкань пачк, васня со-  
винек проулкас, мейле лисинек келей ульцяс. Весе велесь сад  
потсо. Неия келей плошаденть, конань куншкасо, красязь пи-  
рявкс потсо, аштесь сэрей, жесьсьсэ вельязь кудо, крыльцяно  
вельксэ лыйни якстере флаг. Те самай клубось, конань коряс  
истя пек шназь кортась монь ускицясь.

Ютынек клубонтъ вакса ды кавто ёнга сад марто проулка-  
ва лисинек пиретнень пес. Тестэ кись пурдась вить ёнов, кер-  
шев тусь а покшке яннэ. Тейтересь лоткавтызе алашанть.

— Вана те яннэванть листядо видьстэ тувонь ферман-  
тень, — мерсь сон. — Тия седе маласо. Монень скалонь фер-  
мав ардомс, — яходсь прясонзо вить пелев. — Бути Аркаша  
тосо а ули, сестэ моледе тензэ кудос. Оно се ашо кудынесь  
сынст.

Мон ёвтынть сюкпря тензэ, кевкстия лемензэ ды косо роботы.

— Моледе чокшне клубов, — чевтъстэ пейдезь пшкадсь  
мазыйкась ды тусь ардозь.

Вана ведь кода эрси! Тунь а содасак тейтеренть, мик ле-  
мензэяк вестькак эзик марсе, ансяк васодить мартонзо, вар-  
штась лангзот, казинзить мизолкссо, ды ёмавтсак удомат,  
арсят сондензэ, бажат таго неемензэ ды теевемс мартонзо со-  
давискэкс.

Монень икелевгак эрявсь совамс Атамановтнэненъ. Аламо  
шкань ютазь, пачкодинь сынст кудынетень. Тесэ вастовинь  
Видманов Никита Павлович марто.

— Монгак фермав сыргинь, — мерсь сон. — Ды ютамсто  
арсян Лукьян Гордеевичень содавтомонзо. Экшендсь атясь.

Кудосонтъ вастымизь шержев атя. Нама, те ульнесь Лукьян  
Гордеевич. Сакалонзо келейстэ аштить мештензэ лангсо. Тюжа  
сельмензэ, келей конязо, кона пирсезь сормавкссо, аламодо  
ловташкадозь чамазо, покш шумбра кедензэ — весе невтсь  
сэтьмечи, аволь вишкине вий, стака тевде апелема.

— Берянь пенсиясо эрямось, — пшкадсь Лукьян Горде-  
евич мартонок шумбрактнемадо мейле. — Весе туить ро-  
ботамо, кадован съкамон. А ней оштё моцъаразь мень-бути  
мукшнымим. Тынь, нама, аволь монень сыде? Аркаша тенк  
эряви?

— Вана редакциясто сась, — невтсь Никита Павлович монь  
лангс. — Сёрмадомо арси фермадонть. Аркаша тосо?

— Сестэ аядо, монськак молян мартонк, — мерсь атясь. —  
Сон минек паро ломань марто кортамояк оштё а машты.

— Тынь бу оймсевлиде, Лукьян Гордеевич, — кортазевсь агро-  
номось. Минь минськак. Тосо а мезть ламо кортамс. Весе неяви.

— Те виде, — мерсь атясь. — Кода мерить, ки апак пижне  
теи, се седе васов маряви.

Фермась аштесь вирь неренть экшсэ, веленть пес валгиця  
латконть чиресэ. Колмо вейкетъ кардт. Теезь вадрясто.

Тувонь трицанть, Аркадий Лукьяновичень, муинек кудос-  
тонть, косо эрить фермань роботниктне.

— Инже тетъ, Аркаша, — пшкадсь Лукьян Гордеевич. — Ре-  
дакциясто.

Аркадий шумбрактнесь мартонок. Те комсьнилеешка иесэ  
од ломань, чамас пек моли Лукьян Гордеевичень пелев. Аволь  
пек сэрей, кеме ды шумбра.

— Вана те алясь самай тѣжа тувот три, — мерсь Никита  
Павлович. — Кинень лияненъ изняви истямо тевесь? А ку-  
рок мусак истямонтъ. Да! Вана Мартъянов ялгась, — невтсь  
монь ёнов, — сёрмады эйстэть очерк. Невтик тенек, Аркаша,  
ферманть.

— Улиндеряй меленк, аядо, — мерсь Аркадий Лукьяно-  
вич. — Тосо ёвтнеса тенк, мезе эряви.

Ды лисинек кудостонтъ.

— Вана ванодо, — невтсь тувонь трицясь ферманть ёнов, —  
меньгак тамаша тесэ арась. Минек кардонок весемезэ колмо.  
Икеле эйсэст кастылинек колмосядт, сехте ламо нилесядт ту-  
вот. А ней тѣжа трятано. Кельгить кавксть седе ламотнеяк.

— Кода весе те ушодовсь? — кевкстия Аркадий Лукьяно-  
вичень. — Мезес икелевгак кундыде?

— Тень уш, паряк, весе содасынк, — мерсь. — Ушодовсь  
весе те сеске сисем иень планонтъ кемекстамодо мейле. Эрва  
кие сестэ лиякс, седе парсте, кармась роботамо. Минек ике-  
левгак арась те бажамось — максомс государствантень седе  
ламо сывель, секс эряви кармамс прямо седе ламо тувот. Мар-  
синек од койсэ тувонь трямондонтъ. А мейс сѣпомс, кавтолды-  
нек васня. А лисиндеряй мезеяк. Мейле яходинек кавтолдомат-  
нень лангс ды карминек роботамо. Куроксто тувотнень, конат

трявкшность се шконтень, ускинек сывелькс. Весе пирявкст-нэнь яжинек. Кавто пева теинек гайнат\*. Ацынек лазсо, каинек лангозост олгт. Куншкасонтень оно теинек «столовой». Аравтынек автопоилкат. Нолдынек эрва кардонтень, косо гайнатне, тосо ветесядт тувот, однэть.

Васенце читнестэ пек савсь майсемс андоманть марто. Зярдо ардыть тувотне «столовоентень», оргодть маласто! Сусконить вейкест-вейкест, тулкаить, цирнить, ёмавгнить коромонть. Мень тамашат? Покш стакачи арась икелень. Чинек-венек оймамо эзинь сода. Савсь чипола теемс, аламонь-аламонь нолдамс ярсамо. А мейле тонадсть. Оляв якамо пансесынь латконть кувалт, косто-косто ютавтсынь виренть чирева. Вана курок ниле ковт топодить, зярдо истя трянь, ве тувояк оштё эзь ормалгале. Покш лезээ истямо ладсо тувонь кастоманть, стияк аволь питнейстэ.

Аркадий Лукьянович ёвтнизе тенек оштё сень, бути андоманть, коромонь ускоманть аравтомс механизматнень вийсэ, сестэ шождынестэ карми прямо-андомо кавто тэжат тувот. А бути стявтомс оштё вейке кардо, колмо тэжаткак касты.

Ютынек ферматнень. Тувотне те шкастонтъ кекшнестъ экше таркава — латконть чирева, фермань стенатнень ёжова ды лиява, козонь а токи чись. «Столовоесь» ванькс. Кором анокстазь уш чокшнененьгак.

— Вана весе фермась сельменк икеле, — кортазевсь Аркадий. — Мезе лия ёвтамс? — варштаксь Никита Павлович лангс — Тувотне весе шумбрат, касыть ды стакалгадыть. Видьстэ меремс, аволь очерк, заметкаяк а мезде сёрмадомс.

Аркашка велень од цёра, комсомолец. Оштё вишкинестэ савсь тензэ тетянзо марто важомемс тувонь фермасо. Прядсь кемень класст. Кавто иеть служась Армиясо. Сась — таго фермав. Тетязо тусь пенсияс — кадовсь тетянзо таркас.

Те шкастонтъ кудынентъ икельде лиссть каршозонок кавто од цёрат. Вейкесь сэрей, омбоцесь седе алкине. Прясост конёвонь пилоткат.

— Тынь истя косто прыде? — капшазевсь эйзэст Лукьян Гордеевич. — Мекс сыде?

— Сёрмадсть тенек: сэредят, — кортазевсь седе покшось. — Энялдозевинек. Деканось нолдымизь, кавто чить тенек макссь. Ды вана сынек.

\* Г а й н а — тувонь удома тарка.

— Лукьян Гордеевичень трявксонзо, — ёвтась монень Никита Павлович, — тонавгнить велень хозяйствань институтсо. Покшось, Борис, — нилеце курссо, вишкинесь, Алёшка, — омбоцесэ.

Цёратне мольт вейке-вейкест ёнов, ансяк аволь Аркашкань ды покштянтъ понасольть.

— Ну, Евгений Петрович, мон капшан, — варштаксь часонзо лангс агрономось. — Тынь кортнеде тесэ. — Простясь весень марто ды бойкасто тусь латконть трокс, паксянтъ ёнов, косто марявсть урномодо тракторт.

Лукьян Гордеевич ды Аркаша кортасть студенттнень марто. Мон аштинь ве ёно ды мельспаросо ваньинь уцяскав семиянтъ лангс. Монень а мейс ульнесь тезэ кадовомс: эдь мезе эрявсь — ёвтнизь тень. Шка кадомс ломантнень ськамост. Секс пурнынь-сэрнинь туеме.

— Тынь ков? — дивазевсь Лукьян Гордеевич. — А нолдатадызь, Евгений Петрович, — кундызе кедем. — Минек арась истямо коенек: инженерк туевель кедьстэнек столь экшс апак озавто. Аядо миненек.

Лукьян Гордеевичень кудозо вельгязь шиферсэ. Кудыкельксээ лазонь. Удалонзо, леентъ видьс, путозь умарь сад. Кудо потмось, виде, аволь пек сюпавтнэде. Кувака эзем, клеёнкасо вельгязь столь, ниле-вете табуреткат. Кодак соват, вить кедь ёно, никелень кровать, вельгязь якстере одеяласо. «Родина» радиоприёмник, конань максызь Лукьян Гордеевичнень премиякс тувонь фермасонтъ парсте роботамонь кис. Стенасонтъ аволь покшке зеркалыне ды зярья фотокарточкат. Весе ванькс, эрва мезесь ашти таркасонзо.

— Илямизь лово пенксевекс, — кудонтень совамодо мейле кортазевсь атысь. — Минь эдь ськамонок эрятано. Аваломань кудосонок умок арась.

Мон апак чарькоде варштынъ лангозонзо.

— А кемтядо? — пейдезевсь Лукьян Гордеевич. — Истя, Евгений Петрович, ашти тевесь. Эсень полась, Аркадиень авазо, кулось войнанъ шкастонтъ. Аркаша оштё эзь кенере урьваксто: седе вишкинетне эрявить тонавтомс.

Те шкастонтъ сась Анастасия Прохоровна, шабраст, ведьгеменьшка иесэ ава.

— Вай, сась сяткинень! — кенярдозь каявсь сон Борис марто Алёшкань эйс. — Ды кода истя зярс эзинь фатя. Те шкас бу ярсамопельгак тенк анокставлинь. Сизиде, бульчом?

Алёшка марто Борис ёвтасть тензэ сюкпря мелявтоманть кисэ, сайсть нардамот ды тусть экшелямо.

Анастасия Прохоровна, прок эсь кудосонзо, кармась обе-днень анокстамо. Бульчом, аволь васенцеде.

Лукьян Гордеевич аламось лездась тензэ. Мейле озась монь ваксс.

— Борис марто Алёшкат, — мерян, — нуцкакк тенк савить?

Истямо апак учо кевкстема атясь, неяви, эзь учо. Сон кува-касто укстазь мерсь:

— Те, Евгений Петрович, цела история. Сынь войнань шка-стонть урозокс кадовсть. Саинь эстенъ, тринь эйсэст ды вана кастьнь.

Те седеяк сыремтизе монь меленть. Энялдозевинь икелен-зэ: ёвтневлизе, кода весе те лиссь. Ды вана мезе карминь сода-мо экшелямо туицятнеде.

Лукьян Гордеевич сонсь аволь тестэнь, чачсь Псковонь об-ластьсэ. Тосо кась ды эрясь. Ульнесь аволь вишкине семьязо. Важдось колхозонь тувонь фермань прявтокс. 1940-це иестэнтъ тувонзо марто ульнесь Московсо, велень хозяйствань выстав-касо. Отечественной войнань васень иестэнтъ покш цёразо ды тейтерезэ Марина (се шкантень прядокшнось медицинской техникум) эсь олясо тусть фронтов. Сонсь жо, зярдэ фронтось пачкодсь малав, козяйканзо ды Аркаша марто, конань сестэ ульнесь кото иензэ, сась тей, Рав леенть томбалев. «Валдо ки» колхозсонть, косо ней сон эри, вастызь парсте. Ды тесэяк кармась роботамо тувонь фермасо.

Ансяк стака ризксэсь тезэньгак эзизе кадо атянтъ, тейгак сась мельганзо. Фронтсто сась стака куля: цёразо героекс ча-вовсь Ленинград ошонть кисэ тюремстэ. Тейтерентъ пельде эзь сакшно вейкеяк сёрма: ёмась кулявтомом. Аваст туртов эзь кир-деве весе те стакась, ормалгадсь ды куроксто кулось. Лукьян Гордеевич ды Аркаша кадовсть кавонест. Пек стака ульнесь тенст. Секень вант, сонськак атясь праволь пильге лангсто. Сюкпря ломантненень.

Весть сёксня колхозонь правлениясь кучизе Лукьян Горде-евичень районь ракшань трицянь промксов. Вокзалсо сон васодсь кавто цёрынетненень марто. Вейкесь нилешка иесэль,

омбоцесь — кавтошка. Эйкаштнэ ташто ды сезнезь пиджак-кесэст аштесть якшамо залсонть диван лангсо. Лукьян Горде-евич кортазевсь мартост. Пакшатне кенярдозевсть эйзэнзэ, ёвтнизь: сынъ ардсть поездсэ. Мартост ульнесь бабаст, кона тусь исяк кшинь вешнеме ды те шкас вана арась.

— Бабинесь прась ульцяс, — салава ёвтнизэ Лукьян Горде-евичнень залонь тенсия авась, — ёжовтомо саизь больницяв. Тов ускомстонзо кулось. Нетъ кадовсть кавонест. Милицияяк соды эйстэст. Сайсызь ва.

— Мон а молян милицияв, — чаравтсь прясонзо пок-шкесь, — сы бабам ды тутано тетиденень.

— Монь пекем вачсь, — кортазевсь вишкинесь. Лукьян Гор-деевич таргась плащ зепстэнзэ конёвонь тапаркс, конань пот-со ульнесь капстань пряка. Синдизе кавтов, максызе эйкаш-тнэнень. Сынь капшазь ярсась ды цильдёрдыця сельмсэст ванность ёнонзо.

— Авать кода лемезэ? — кевкстизе покшкентъ.

— Валентина Фёдоровна, — пшкадсь цёрынесь. — Сон учительница. Сы иестэ монгак школав молян.

— Кода леметь? — таго кевкстизе Лукьян.

— Монь Боря, сонзэ Алёшка, — невтьс братонзо лангс.

— Ават косо?

— Ки соды. Минек бабань марто ильгимизь. Мерсь, курок сы мельганок. Тосо а кода эрямс. Тосо фашистт.

— Бабать мезезэ сэрездь?

— А содан. Мерсь, седеезэ палы.

— Сонзэ эдь больницяв путызь.

— А минь ней ков мольтяно? Больницяв бабань ваксс а нол-дасамизь?

— Минь тынк марто тутано минек колхозов, — мерсь Лу-кьян Гордеевич. — Зярдэ бабат пички, сонзэяк тов усксынек.

Лукьян Гордеевич ветинзе крандазонзонзо, озавтынзе, копа-чинзе эсензэ чапансо ды ардозь тусь кудов.

Кудосо кенярдозь вастызь сынст Аркаша ды Анастасия Про-хоровна. Авась авардезь кутмордынзе цёрынетненъ ды седе ку-рок уштсь баня. Лукьян Гордеевич сонсь шлинзе-нардынзе. Анастасия Прохоровна ды шабрань лия аватне те шкане пур-насть-сэрнясть тенст ванькс понкскеть-панарнэть, карсема-пельть ды кандызь мельгаст баняв. Мейле парсте андызь-сим-дизь. Валскес вестькак апак сыргозе удость эйкаштнэ.

Истя кармасть улеме атянтъ колмо цѣранзо. Эрязь-аштезь кучинзе школав. Цѣрынетне ульнестъ превейть, тонавтнестъ вадрясто. Аркашанень теевсть ялаксокс. Покшоль мельспарозо Лукьян Гордеевичень.

Прядовсь войнась. Весе, ки кадовсь живстэ ды шумбрасто, састь кудов, кармасть роботамо. Лукьян Гордеевичкак кенярдсь весеме марто вейсэ. Секе шкастонть арсезевсь сень коряс, паряк, живть Борис марто Алѣшкань тетятне-аватне. Сон содась: бути живть, кармить вешнемест. Ды куш пек стака улевель тензэ сынст марто явомась, ялатеке кенярдовтовлинзе тетяст-аваст, максовлинзе эйкакшост. Сон вадрясто содась седе, костонь Алѣшка марто Борис, кить тетяст-аваст. Колмоксть сѣр-малесь тов. Ансяк кулясь каршост сась берянь: тетяст чавовсь Москов ало бойтнесэ, аваст кулось стакасто ранявомадо мейле. Ды ансяк теде мейле Лукьян Гордеевич эвтась тенст тетя-дост-авадост ды невтинзе куломадост получазь конѣвтнэнь. Ризнэсть-тейсть вейсэ ды кадовсть теске, ве семьясо эрямо.

Анастасия Прохоровна те шканть пурнась столь. Борис марто Алѣшкат оштѣ эзть са. Зяряя шка мон аштинь каштмолезь. Эзь корта Лукьян Гордеевичкак. Монь седеем алкукс токавсь те ѣвтнемасонть.

Вана састь Борис марто Алѣшкат. Озынек обедамо. Анастасия Прохоровна кванимизь парсте. Обедамодо мейле аламос Лукьян Гордеевич марто оштѣ кортнинек Аркашань роботадонть.

Чизэ уш чиремсь валгома ёнов. Монень эрявсь анокстамс материалось, секс капшиньгак. Седейшкава ѣвтынъ сюкпря Лукьян Гордеевичнень ды Анастасия Прохоровнанень парсте вастоманть кисэ ды простишь марто.

Станцияв ардомань перть арсинь те паро семиядонть. Секе басом эзь тукшно мельстэнь мазый тейтересь, кона чокшне тердсь эйсэнь клубов. Кода лемезэ? Ды арсинь кодаяк седе ку-рок одов ардомс тов ды вастомс тейтеренть марто.

Окойники, июленть ковсто, зярдэ анокстась уш розень нуеме, монь таго кучимизь «Валдо кив» — эрявсь сѣрмадомс, кода анокстась колхозось сюронь урядамонтень.

Ардынъ тов чопоньпелев. Лоткинъ, содазь, Лукьян Гордеевичнень. Сон вастымим седейшкава. Икелевгак аламо-

до сѣвнымим газетасо сынст тувонь кастыщятнень пек шна-монтъ кисэ.

Монь арасель мелем кувать аштемс Лукьян Гордеевичень кедьсэ ды пелькстамс мартонзо. Арсинь: чинзэ валгомс модемс скалонь фермав, валске ютамс бригадатнева, ванномс техни-канть.

— Мерят, скалонь ферманть арсят содавтомонзо? — кор-тась сон. — Эряви, эряви, Петрович. Кармат содамонзо фер-мань заведующеентькак, Дарья Дмитриевнань. Комсьветее ие роботы фермасонть. Скалтнэ сонзэ весе паро племань. Вой-нань шкастонть ульнесь колхозонь председателъкс. Пек паро ломанесь. Кирдемскак тензэ савсь ламо. Мирдзэ чавовсь вой-насо. Эзь синдеве горянтень. Ней фермасонть роботыть кол-монест: сонсь ды кавто тейтерензэ. Зина скалт потявты, Анись-ка ваз мельга яки.

Ансяк чинзэ валгома малав менинь инжень вечкиця атянтъ кедьстэ.

Скалонь фермась, конань нееме истя бажинь, ульнесь Ки-нель леентъ чиресэ. Кирьпечень ниле кардт, ашосто белязь, аштестъ вирьсэ копачазь пандтнэнь ёно. Тесэ трить нилесядт скалт, малав зняро ведрекшть ды вишка вазнэть. Тесэ весе те-в-тне теевить механизма вельде. Эрьва скалсто иень перть по-тявтыть малав колмо тѣжат килограммат ловсо. Весемеде паро потявтыщятне — Ландышева Нина ды Симурзина Зина ком-сомолкатне. Семилеткань омбоце иестэнтъ алтасть потявтомо ветень-ветень тѣжат литрат эрьва скалсто.

Весе тень ѣвтнизэ монень Дарья Дмитриевна, фермань прявтось.

— Тееви тенк фермась коммунистической трудонь фер-макс? — кевкстия сонзэ.

— Кинень эно бороцямс те покш лементъ кис, бути аволь миненек? — мерсь Дарья Дмитриевна. — Тынь арседеяк, ми-нек тесэ кодат вадрят роботыця тейтерь-аватне! Эйтэст вете коммунист, кемгавксово комсомолкат. Ламот сынст эйтэ прядсть средней школа. Нейгак весе тонавнтить: кить заочна институтсо, кить училищасо, техникумсо.

Кардтнэ пек ванькст, валдт. Минь ютынек вейкентъ эзга. Дарья Дмитриевна ѣвтнесь монень потявтыщятнень фамили-яст, лемест. Веенстнэнь шнась, омбонстнэнь сяддсь — эзь кек-ше берянь ёнкстнэнь.



Мейле совинек вазонь кардонтень. Тосоаяк ваньксчи. Ушов лисемадо мейле кевкстия:

— Кода бу неемс тынк паро потявтыцятнень?

— Ландышева Нинань? — лотказевсь Дарья Дмитриевна. — Эряволь бу тенек тов совамс. Ну, паро. Курок тевест прядови. Весе течи капшить. Концерт карми клубсо. Да, стувтокшныя. Аздан, сави-арась течи кортамс тенк Нина марто. Ризксэзэ покш тейтеренть.

— Мезень? — кевкстия мон.

Дарья Дмитриевна эзь кенере отвечамо, кода вейке потявтыцясь ёвтась: скалозо мекс-бути ормалгадсь. Сон ношкстась тов. Монень мерсь учомс якстере уголоксо.

Те шкане ванныя стенгазетасть. Эйсэнзэ зярыя заметкат, вад-рясто ладсезь частушкат ды парсте рисовазь карикатурат.

Кеменьшка минутань ютазь Дарья Дмитриевна сась кавто тейтерь марто.

— Вана тенк Ландышева Нина, — мерсь сон. — А те Зина, тейтерем, — невтсь омбоценть ёнов.

Шумбракстнинь мартост ды дивазевинь: икелень аштесь самай се мазый ды кенярдыця тейтересь, кона зярд-бути ловсонь бидон марто ускимим «Валдо кив». Ансяк ней мекс-бути аламодо нусманя чамазо.

— Вана мезе, Евгений Петрович, — пшкадсь Дарья Дмитриевна, — весе кортамотне савить кадомс вандынень. А ней эряви капшамс клубов. Минек тейтертне малав весе хорсо морыть. А Нинанень вана колмошка морот съкамонзо оштё эрявить морамс.

— Вейкеяк а моран, клубовгак а молян, — мерсь Нина.

— Ладияк истя комсомолканень! — мурнезь ладсо кортазевсь Дарья Дмитриевна. — Виздевлить куш ве ёндо сыця ломандень.

Нина витизе ашо пачинензэ ды пейдезевсь. Зярд-во весе вейсэ сыргинек, Нина мерсь:

— Дарья Дмитриевна, а Мартьянов ялганть мон умок уш содаса. Весть станциясто уския тей. Сестэ сёвныя сонзэ, мекс чуросто сакшныть минек велев редакциясто. Секс ней, бульчом, содавтымизыгак.

Дарья Дмитриевна эсензэ тейтеренть марто капшазь тусь икелев. Нина кадовсь монь ваксс. Кевкстия, зярд-во кармась роботамо фермасонть.

— Паряк, газетас арсетядо сёрмадомо? — варштась лангозон. — Мезеяк а ёвтан. Тынь оно Зинадо сёрмадо. Мондень а эряви. Аздан мезе лиси. Мон, секень вант, туян тестэ...

— Ков? — дивазевинь.

— Ковгак седе васов.

— Мекс? Монень а ёвтасынк? — кевкстия.

— Истямо тевде цёраломань марто а кортнекшнить, — мерсь. — Мезекс теде тыненк содамс?

— Кода тенк меремс, — ушодынь. Тон комсомолка. Мон коммунистан ды, секень вант, тынденк аламодо покшан. Кой-мезе савкшнось неемс тень эрямостонть. Паряк, лездавлинь тенк?

— Аздан, саты, арась киньгак виезэ лездамс истямо тевсэ, — уктась Нина. — Те эсень тевесь, Мартьянов ялгай.

— Зярдояк, паряк, ёвтнеса, бути те тыненк эряви. А ней вана кудонок. Учосамизь? Монень эряви оршамс седе парсте.

Алтынть учомс сонзэ.

Чокшнень зорясь уш мадеме кармась. Ульнесь опаня, варма кошт мик костояк а зэхельди. Нинамезень вальмаст панжадат, ды те панжадо вальмаванть мария сень, мезде бажинь содамо.

— Аволь Костя сась мартот? — кевкстизе авазо.

— Иляк ледстне, авай, — нусманя вайгельсэ пшкадсь Нина. — Стувтызе сон те ёнов кинть.

— Адя, иля ризнэ пек, — мелявты авазо. — Истямонть кис ризнэмскак а мейс. Одат. Сы шка, вастат эсеть коряс ломань. А ярсат?

— Арась. Монень эряви туемс.

— Ки мартот сыцясь? — кевкстизе авазо.

— А мейс пек те тонеть? — маштнетезь отвечась тейтересь. — Редакциянь роботник.

— Азё, азё. Ансяк кувать пек иля яка. Оймсемяк а кенерят.

Нина лиссь ашо парсеень платиясо. Аздан, кода ёвтамскак, кодамо лазыекс невясь тейтересь монень се шкане.

— А сёвносамизь монь? — кевкстия модемстэ.

— Мезень кис? — дивазевсь.

Монгак ней содаса, мекс ацирьгалиде.

— Маримизь авань марто кортамодо?

— Простямизь, Нина. Тунь а чуман. Вальматне панжа-дольть, кортыде аволь салава.

— Сестэ ёвтнемскак тенк а мезекс, — эзь кежда.  
 — Арась, ёвтнинк, — энядозевинь. — Кие те Костясь? Бульчом, аволь паро ломанесь?  
 — Мекевланг, пек паро цёрась.  
 — Сестэ ёвтнеде. Тынсь содамо мелем сыремтядо.  
 — Мезе теят, сави, — укстась Нина. — Костя марто минь эйкакшпингестэ содатано вейке-вейкенек. Вейсэ тонавтнинек начальной школасо, мейле среднейсаяк. Паро ялгат ульнинек. Вадрясто роботынек пионерэнь звеньевокс. Самодеятельностьне вейкеяк тев эзь юта минтеменек. Вейсэ примимизь комсомолс сисемече классо тонавтнемстэ. Те теимизь седеяк паро ялгакс. Кавксоце классо тонавтнемстэ ялгакчись кассь седе покш ёжомарямос... Кеменце классонтъ прядомадо мейле максынек вал зярдояк а явомс. Сон тусь тонавтнеме институтов — мон роботамо — фермав. Тетям войнас чавовсь. Авам съкамонзо, кудосо мондень вишкинетъ оштё улить. Авань шумбрачизэ лавшо. Кие, мондень башка, карми тенст лездамо? Секс оштё вейксэце классо тонавтнемстэ аванень карминь лездамо. Истя ушодовсь покшонь эрямонок. Мон фермасо — сон институтсо. Сёрмат сёрмалинек карадо-каршо. Кавто иеть истя. Ансяк вана меельцъпелев лоткась сёрмалемеде. Ней вана сась каникулас. Монь марто эзь вастово. Вастневи лия марто. Сеяк ялганок ульнесь. А шождыне явомс паро ялга марто. Мон пек кемилинь ломаньс. Ды ней самай малавикс ломанем тейсь вана кода. Кинень седе мейле карман кемеме?  
 — Лисни, берянель ялгась, — пшкадинь.  
 Нина эзь кенере каршо валонь каямо: клубонтъ маласо сонзэ эйс чийсть ялганзо. Ды клубонтень совамодо мейле сеске тустъ сценанть удалов. Монь вастымизь Борис марто Алёшкат, озавтымизь седе паро таркас.  
 Кеветеешка минутань ютазь панжовсь занавесэсь. Сценанть лангс лиссь од цёра.  
 — Те Бамбуров Костя, — салава ёвтась тень Борис. — Институтсо тонавтни ды оштё поэт, сёрмады стихть. А умок сась каникулас ды вана уш концерт ютавты. Пек паро цёрась.  
 Содазь, мон сеске чарькодинь: те самай се алясь, конань кувалт истя ризны Нина.  
 — Шумбрачи, од тейтерть, од цёрат! — весёласто ушодсь Костя. — Течинь концертсэнтъ эсенек велень киштемань-мо-

рамонь вечкицятне таго невтьсызь тенк, мезень тееме сынъ маштыть. Ансяк вана мезе! Весе содасынк: артисттнэ — пек мелевть ломантне, сынъ вечкить, зярдю тенст седейшкава цяпить, ёртнить цецьянь пусмот, цюркат-палкат.  
 Каятотсь ракамь. Сценанть лангс ливтясь паксянь цецьянь покш пусмо. Костя ливтямсто каподизе.  
 — Те аванс, — пейдезевсь ветиясь. — Зярс эзинек козкстаяк, а тынь уш казнеть ёртнетядо.  
 Таго марявсть кенярксов ракамот.  
 — Васенце номер, — окойники, ёвтась концертэнь ветиясь. — Владимир Маяковский, «Весе вайгельсэ» поэмантень икельце валось.  
 — Ёвтнесы Бамбуров Костя! — яволявть Симурзина Зина, кона те шкастонть лиссь сценанть удалдо.  
 Костя сеске весе лиякстомсь: седеяк видимсь ды сэрейгадсь, прок рунгосонзояк невтьс вечкевикс поэтэнтъ покшчинзэ, прянзо аламодо каизе удалов, яходсь верев вить кедьсэнзэ ды ушодсь ловномо. Ловнось пек седейшкава, мелень путозь, сыремтсь кунсолыцятненъ тиринь масторост вечкеме, тензэ лезнь тееме.  
 Мон паро артистт марсинь, кода ловныть Маяковскоень стихотворениятненъ. Ялатеке Костянь ловномась токимим.  
 — Сон «Владимир Ильич Ленин» поэманть превсэ кирди, — ёвтась тень Борис.  
 Ды арсезевинь. Кода истя? Вечкемс Пушкинэнь, Маяковскоень, содамс произведенияст, истямо паро ёжомарямо марто ловномс сынст ды теке марто улемс визькстэмекс, кармавтомс ризнэме ды майсеме истямо паро тейтерь, кодамо Ландышева Нина.  
 Содазь, монень савкшнось некшнемс истят, конат тейтерь-авань манямонтъ ловсть кодамо-бути ине тевекс. Ансяк сеть а содыть паро ёжомарямот, сынненст а сыремтевить лиянь седейс паронь тееме бажамонь мельть.  
 Виев цяпамот сезизь арсеман: конференсьесь яволявть од номер.  
 Велень хорось морась эрзянь ды рузонь морот. Мейле Аркаша ёвтнесь Твардовскоень «Василий Тёркин» поэмастонть саевкс.  
 — «Пшеница золотая!» — яволявть Костя. — Морасы Ландышева Нина.

Видькстан, седейшкава мелявтозевинь. Кода карми морамо истямо мельтнень марто? Изняви-арась тензэ седейриксэсь?

Ландышева лиссь валдосто пейдезь. Мазый ды шумбра рунгозо виде-паро цецяв кужо куншкасо кудряв од килейне. Сельмензэ цильдёрдсть, якстерьгадозь чамазо палсь а умок панжовозь ашназа-якстере цецякс. Седясть тензэ аккордеонсо.

Морась тейтересь пек парсте. Весе кунсолыцятнень кармавтынзе нееме колхозонь келейдеяк келей товзюронь паксятнень ды седей ёжосост марямо мельспаронь се виенть, кона лаки товзюронь кастьцятнень седейсэ эсь масторост туртов покш лезень теемстэ. Пек виевстэ цяпасть тензэ.

Мон кунсолынь ды арсинь. Кодат парт ды мазыйть Костя марто Нина од ломантне! Аштить сынъ вейке-вейкест, сень лангс апак вано: вейкесь эйстэст — скалонь потявтыця, омбоцесь — студент ды поэт. Сынъ те покш велень од ломантнень ютксо, секень вант, весемеде вадрятне. Весеместэ неяви: весе вечксызь, седейшкава ды покш мельспаросо шныть эйсэст. Ансяк мекс энэ истя лиссь? Мезень тамаша теевсь мартост? Мекс каладсь сехте мазый шкастост сюлмавозь ялгаксчись ды вечкемась? Кода чарькодемс од цёратнень-тейтертнень ютксо пингень-пингс а чарькодевица ёжомарямотнень, салавань лувтнень-койтнень?

Те шканть ульнесть киштемань номерт. Нина ялганзо марто морась кавто морот.

Концертэнтъ прядомадо мейле, кона ютась пек парсте, ушодовсть киштемаст. Арынъ ве ёнов ды карминь ваномо чарыця паратнень лангс. Арсинь: кона тейтерентъ лангс Костя полавтызе Нинань? Кевкстемс ульнесь а кие: Борис марто Алёшкат тустъ киштеме. А Костя косо? Неия кенкшентъ маласто. Вакссонзо мазый тейтерь. Кортась кода-бути кольнезь, неявсь, прок мекс-бути покшкавтни. Бульчом, Костя киштеме тердсь эйсэнзэ. Ды вана okayники сынъ човоргадсть весень юткс.

Нина ансяк ней лиссь сценантъ удалдо. Сеске колмошка од цёрат мольсть эйсэнзэ ды кармасть тердемензэ танцовамо. Эзь карма. Мольсь малазон ды тердимим.

Тунъ эзинь учо истямо тев. Содазь, пек кенярдозевинь. Те шкас кияк эзимим нее, теке араселиньгак. Друк весе кармасть

ваномо лангозон. Весе прок кевкстнестъ: те ки истямось, косто прась ды кишти истямо мазый тейтеренек марто?

— Тынь ковгак а капшатадо? — кевкстимим Нина.

— Кияк, а пишти монь эйстэ, — меринь.

— Паряк, мольтядо ильтемень?

— Молян, — алтынъ.

Вальсэсь прядовсь, лоткинек сценантъ малас. Мейле туинек. Лисинек пси клубстонть, чопавтынек экишентень, сыргинек ульцянть кувалт.

А сёпса, эрва кодат мельть сакшность прязон. Кода чарькодемс те тердемантъ? Паряк, моненьгак уцякась пейдезеви? Арась, лиякс тевесь ашти. Аламодо содаса тейтерень коентъ. Сынъ, зярдэ понгить истямо тевс, кодамос эртевсь вакссон молицясь, бажить лия цёра ёнов чиремеме ды теньсэ снартнить те эмс апаро сынст стувтыцянть. Паряк, Нинаяк истя?

— Тынь, Евгений Петрович, паряк, беряньстэ арсетядо монь эйстэ? — кевкстимим тейтересь ды каршо валонь апак учо поладсь: — Илямизь чумондо.

— Парсте ютась концертэсь, — ушодынъ лиядо кортамо.

Ансяк Нина эзинзе маря валон. Бульчом, майсевтсь эйсэнзэ мезе-бути лия.

— Неинк? — кевкстсь. — Конферансьекс ульнесь. Маяковский стихть ёвтнесь. Кодамо?

— Сялдомс а кона ёндо, — меринь, — куш васенцеде неемстэ стака ёвтамс, кодамо ломанесь.

Ансяк аздан, кода те вана чарькодемс: мезень се ломань, кона эсь ялганзо сельведьс пачтысы?

— Илядо корта истя, — лоткавтымим Нина. — Тынь сонзэ а содасынк. Монь икеле илинк сялдо. Кадсынек тень. Весе...

— Капшамс, нама, тесэ а эряви, — аламос каштмолемадо мейле меринь. — Кортамс тенк эряви мартонзо паро ладсо.

— Монень кортамс сонзэ марто? А содасамизь... Зярдояк! Кадык одан, ламос а чарькодян. Ансяк пульзямс киньгак икелев... Тень кадык кияк илязо учне! Вечкемась — аволь сускомо. Энялдозь сонзэ а вешсак.

— Энэ мезть арсетядо тейнеме? — тевкстия таго.

— А содан, — мерсь Нина. — Монь койсэ, тейтереськак, цёраськак мельсь туи паро тевензэ ды мазычинзэ коряс. Мон весемеде питнейкс ловса превень ды седей ёжонь мазычинть.

Лисни, зярс истямокс эзинь тееве. Аволь истямо мазыян, што-бу пингезэнзэ вечкевлимим истямо од цёра, кодамо Костя.

Аздан ансяк, мекс вечкса. Вечкса нейгак, зярдэ тейсь монень истямо стака сэрдькс.

Пачкодинек сынст кудонть икелев. Монь седейстэ мадсь кемемась, кона сыремкшнесь. Мештьсэнь ульнесь аволь ансяк те ёжомарямось, ульнесь сонензэ лездамонь бажамояк. Куш истямо тевсэ ёроком арась, ялатеке мекс-бути кеминь: сынст кершавксось витеви.

— Мертядо монень Костя марто кортамодо? — кевкстия Нинань.

— Сюкпря паронь арсеманк кисэ, — чевтьстэ пшкадсь тейтересь. — Ансяк кортамодо а мерян. Те ялатеке энялдома.

Снартнинь кемевтемс: лезды истямо кортамось. Косто-косто эрявить превс путомс талакалиця од ломантне.

— Тынсь урвакстозтядо? — апак учо кевкстимим Нина.

— Эзь саво теемс истямо эскелькс.

— Арсекшниде теде?

Мон тунь аволь анок ульнинь истямо тевде кортамо.

— Содазь, — мерян, — ськамот пингезэть а эряват. Ансяк эряви вешнемс ломань эсеть коряс.

Аламо шкань ютазь минь явинек.

Мадинь ды кувать арсинь. Эзть кадо эйсэнь те тейтерденть мельтне-арсематне. Васня дивсинь сень кувалт, кода сон, мезеньгак апак сёпо, панжизе монень седеензэ. Ансяк мекс кевкстимим — урвакстозян-аволь? Мезекс те сонензэ?

Валске Никита Павлович марто туинек колхозонь бригадатнень ванномо, кода сынь вастыть од урожаень урядамонть.

Кортамс а мезть, колхозось нуемантень парсте анокстазь, куш нейке листь паксяв. Ялатеке Никита Павлович мукшнось асатыкст ды мурнесь бригадиртнэнь. Монень мик марявсь: косто-косто стяко сёвнось.

Анокстазь техниканть ванномадо мейле тердимим од стенгазетанть варштамо, конань нолдыть клубсо. Тосо прядсь стенгазетань лементь артоманзо Костя. Ды сеске столенть лангсо ульнесть уш анокстазь лия кавто стенгазетат — скалонь фермань ды колмоце бригадань.

— Кода молить тевтне, художник ялгай? — кевкстизе агрономось артыцянтъ.

— Прядан, — пшкадсь Костя. — Пельчасонь ютазь понгавт-сынек.

— Паро, — мерсь Никита Павлович. — Минек Костянь прясъ ды кедтне сырнень. Тынъ ванодо, кодат газетат нолды. Выставкас ансяк кучомс!

Мельспаросо ваннынъ газетатнень. Вейкесэнтъ артозь паро потявтыцянтне Ландышева Нина ды Симурзина Зина.

— Пек паро тынк те тейтересь, — невтинь мон Нинань лангс.

— А косто вешнемс седе мазый ды превей, — пшкадсь Никита Павлович. — Уцяскав ули се од цёрась, конань кочкасы мирдекс. Ялатеке, Мартъянов ялгай, кой-китъ тень а чарькодъ-сызь. Тынъ кунсолодоя, кодамо тев лиссь. Мезеяз а теят, мукшновить оштё юткстонок ташто коень ломанть, конат колыть эрямонзо мик истямо паро тейтерентькак. Тевесь истя ашти. Нина вечксь вейке од цёра. Шкань ютазь се од цёрась теевсь студентэкс, путсь прязонзо шляпа ды кепедизе судонзо эсь конядонзо верев. Ошсто самодо мейле уш а кортыак те паро тейтеренть марто. Мусь лия. Вана кодат улить масторонть лангсо!

— Тон кинь пирес истя кевтнень ёртнят? — лоткась артомодо Костя.

Минь эзинец варштаяк ёнонзо, марицякскэ эзинец тее.

— Вана ведь кода тевесь ашти, — поладсь агрономось. — Седе мазый мусь. А соды: превтне ды мазыйчись аволь кудрятнесэ. Тынъ кода вантадо истят ломантнень лангс, Мартъянов ялгай?

— А мезень кисэ шнамс, бути истя тейсь те студентэсь, — пшкадинь. — Ялгань манямось — ломаньсэнтъ ёнкс.

Костянь пиле прязно прок кумацень теевсть.

— Чарькодьян, кинь эйсэ истя пезат, — пшкадсь Костя. — Куш аволь васенцеде, Никита Павлович, марятан беряненъ те-ицянь чумондомадо, ансяк истя кежейстэ кортамодо зярдояк эзитинь маря.

— Эно кода, паряк, прява вадяшамс тонъ кондытнэнь?

— Куш студентат, ды те шкас а содасак, мезесь паро, мезесь берянь, — мольсь малазонзо Евгений Петрович. — Истямо тейтерь тонъ кувалт арси роботанзо кадомо ды туеме ковгак! Мезень кисэ эно тонавтнят ды комсомолонь билетэнтъ кандтнят?

— Аштек ужо, Никита Павлович, — пейдзевсь Костя. — Дай парсте кортасынек.

Никита озась, моненьгак невтсь вакссонзо чаво стулонтъ лангс.

— Содазь, Нинадо кортат, — мерсь студентэсь. — Моньгак истямо мелем сонзэ кувалт, кодамо тонь. Вант, кода артыя стенгазетас. Парсте чарькодьса, кодамо роботыцясь. А се, мезе лиссь минек ютксо, тень кисэ а мейс киньгак чумондомс. Эдь эрвась кочки ялга эсензэ коряс.

— Истя ней, эсь койсэть, пек паро кочкить? — таго стясь агрономось. — Эмалия, содазь, машты наряжамо. Ансяк питнезэ синдень трёшник базар чистэ. Мазычинть краскасо а тейсак — тевсэ, важдемстэ мусак.

— Тень кувалт тыненк а мезть мелявтомс, — кеждясь Костя.

— Газетатнень тонсь понгавтсыть эли лездамс теть? — кевкстизе Костянь.

— Колхозонсентъ саинк мартонк, — пшкадсь теицязо. — Фермав ды бригадав монсь пачтысянь.

Никита Павлович саизе стенгазетанть, ды туинек.

— Кеме обуця цёрась, — кортась правленияв модемстэ. — Стака лувс совавтомс.

— Тынь мезе арсетядо? — прынь валонзо трокс. — Паряк, арсетядо: одов кармавольть вастневеме?

— Ансяк текеде, — пшкадсь Никита Павлович. — Лиякс а кода.

— Монь койсэ, — мерян, — пек ламо сайтядо эсь лангозонк.

— Костя ялатеке велявты Нинанень. Вансак ва.

«Валдо кисэ» тевень прядовкшность. Ансяк а кода туемс Нинань апак нее.

Кудосо Нина арасель. Муинь сынст Дарья Дмитриевна марто фермасто. Ловныльть од стенгазетанть. Пек кенярдозь вастымизь.

Нина лиснесь ков-бути. Фермань тевтнеде кортамонтъ прядомадо мейле Дарья Дмитриевна ушодсь таго сондензэ:

— Пасиба тенк, Мартьянов ялгай. Нина течи валске сась икеле ладсо кенярдозь. Ризксэнтъ, бульчом, изнизе тынк марто кортамодо мейле.

— Ды, — мерян, — мезеяк истямо эзинь ёвтаяк тензэ.

Авась пейдзевсь:

— Содан. Монень илядо корта. Чарькодеде, аволь меньгак берянде арсян. Нина тынк кунсолыдизь. Монень аютко кувать

мартонк кортнемс. Сакшнодо. Берянь потявтыцятнеде сёрмадодо седе кеместэ. Илядо арсе: коммунистэнь трудонь лементь кисэ бороцяньмоли моли сядломавтомо.

Туемстэнь сась Нина ды ильгимим кинть видьс. Тейтересь ульнесь паро ёжосо, истямошь, кодамошь минек васенцеде вастомастонть.

— Эзиде корта Костянь марто, зярдс сакшнось стенгазетань кандомо? — кевкстия.

— Мезекс? — мерсь. — Кодак неия самодо, туинь.

— Монь койсэ, васодтядо мекев.

— Аздан.

— Ёвтынк видьстэ, кода тынсь арсетядо ней сонзэ кувалт?

— Кода? — шождынестэ укстась Нина. — Мезть теде кевкстнемс? Вечкса...

Седе мейле аламос молинек апак корта.

— Тынк зяро иенк? — кевкстимим.

— Мон уш атян, — пейдзевинь каршонзо. — Комськавксово куроку топодить.

— Весеметь кисэ сюкпря тенк. Пачкодтядо «Валдо кив» — совадо видьстэ миненек.

Те шкастонть сасымизь машина. Кепедия кедем, машинась лоткась. Простинь тейтерентъ марто ды туинь.

— Совадо, зярдс сатадо! — серьгедсь мельган.

Варштынъ удалов. Нина аштесь сеске кинть чиресэ. Вармась лыйкаесь ашо пачине пулонзо.

Редакцияв пачкодемс арсинь яла тейтерентъ марто меельце кортамондонтъ.

Ушодовсть нуематне. Монень сеедьстэ савсь ардтнемс районганть, ансяк аволь тона ёнга, кува тень пек эрявкшность. Весть ардынъ машинасо «Валдо кинь» паксянть трокс, ульнинь тракторной бригадасо, комбайнатнень вакссо, Лукьян Гордечичень шабрадонзо башка, киньгак эзинь васто. Се ёвтнизэ, кода эри-ашти монь паро содавиксэсь Лукьян атя эсензэ вечкевикс цёранзо марто. А седе, кода эри Нина, эзинь марсе.

Ютась кизэсь. Те шканть эзь саво тень улемс «Валдо кисэ». Костя те шкас, бульчом, тусь уш институтов. Вастовкшность-арась Нина марто?

Сентябрянь васенце читнестэ карминь анокстамо колхозт-нэстэ туезь материалонть. Тевесь таргавсь обед малас. Друк, прок верде прась, совась Никита Павлович.

— Тынь мезть? — кода свал, капшазь мольсь монь столенть малас ды шумбрактнесь мартон. — Чаракавтынк тейтеренть превензэ ды ней а варштатадомяк минек ёнов? Тосо урваксто-мо учить эйсэнк.

Те кулясь истя талакавтымим, натой вал тень кодаяк а ёвта-ви, теке келем кундатотсь.

— Никита Павлович, — окойники пшкадевинь, — тынь свал истя пеедькшнетядо ломань лангсо эли ансяк косто-косто?

— Ванодо вана лангозонзо, саик сонзэ семишникте. Тосо истямо мазый тейтерь учи эйсэнзэ, а сон... Эзинь учне истямо тев тынк пельде, эзинь.

— Тон куш пейдезевть.

— Илядо кежиявтне, — пшкадсь Никита Павлович. — Мон пеедькшнинь. А ней адя обедамо, — пшкадсь монень салава.

Мон кадыя тевем, кона уш прыдовкшнось, ды туинь.

— Мекс стувтынк «Валдо кив» кинть? — кевкстимим, зярдо ресторансо озынек столь экшс.

— Истя савь, — мерян, — пансить эйсэнь лия колхозтнэ-ва, а тов а кучить. Кодат тосо тынк тевтне?

— Аволь беруть, — пейдезевсь. — Кунсолук, бути эряви теть содамс. Васняк, сеске, тынк туемадо мейле, велеванть тусь куля, буто Ландышева Нинань ули од цёразо. Кие, тынк койсэ? Тон, Евгений Петрович.

— Кода истя?

— Лажсо кортыть, — прок эзизе марьяк монь кевксте-манть. — Курок, келя, сы чиявтомонзо.

— А Нина кода ваны тень лангс? — таго кевкстия.

— Эзь апаргадо. Мелезэнзэ паро. Весёлгадсь. Роботы кавксть седе парсте. Ней уш максозь валонзо топавтсы. Ван-сак ва, весе областенть келес кармить кортамо эйстэнзэ.

— Мезеяк а чарькодян, — дивазевинь.

— Тесэ весе чарькодеви, — пейдезевсь Никита Павлович. — Бульчом, мезе-бути ули. Костянь мик а ледстнесыяк.

— Эзть снартне вастомо?

— Весть лездынь тенст, — ёвтнесь. — Ды Нина эзь кар-ма мартонзо кортамо. Вана эдь кода тевесь ашти. «Кода

тенк а визькс?» — мерсь ды тусь. Эряви меремс видьстэ, Кос-тя кизэнь перть парсте роботась. Стенгазетат ды боевой лис-токт холдась, концертт ютавтсь. Тусь кода-бути апаргадозь. А тынь кода? Эзиде корта Нина марто истямо тевде мезеяк? Уль-матнень эзинк кайсе?

Те видьстэ кевкстемась талакавтымим аламодо. Ансяк Ни-кита Павлович сеске полавтызе кортамонзо:

— Паро теде. Содаса: тынськак чарькодтядо, мезть тейнемс. Ней вана мезе. Лездадо монень вейке тевень кувалт. Тевесь вана мейсэ. Минек колхозонь председателесь а берянь ломанесь. Колхозсонть тевензэ молить парсте. Ды ушодсь эсь ёнов мен-дямо: пек уш азоркс мари эсь прынзо. Райпотребсоюзонь председателентень кодгемень килограммань сталмосо тулевкс ильгсь. Пек жали сватонзо-братонзо, роднянзо-раськензэ. Сватонстэнь фермасто полавтсь берякшке ведрекш лангс паро скал, лиятненьгак эзинзе обидя. А сёрмадтадо фельетоннэ тень кувалт? Мон монськак бу черькставлинь, ды а ён. Сялдия тень кисэ кавксть-колмоксть. Кармась кортамо, буто мон предсе-дателекс бажан, секс сёвнан эйсэнзэ.

— Те тевсэнтэ лездан покш мельсэ. Ансяк васня эряви ис-ковамс седе ёнсто. Кортатано райкомсо. Колмошка чинь ютазь ёвтатано.

Никита ёвтась тень сюкпря ды стясь.

— Кодаяк ардодо «Валдо кив», — мерсь сон. — Колхозник-тне сынсь тенк ёвтнесызь.

Тень лангс прыдовсь кортамонок.

Куроксто печатынек «Валдо ки» колхозонь председател-денть фельетононт. Те бизмолгавтынзе аволь ансяк сынст ве-лень колхозниктнень, натой райононь кой-кона роботникт-неньгак. Икелевгак чийсь редакцияв райпотребсоюзонь пред-седателесь Кувыркин ды кармась пижнеме:

— Те манчема! Кода истя тынь апак арсе, парсте апак ис-кова печататадо фельетонт? Тулевксэнтэ, улиндеряй меленк со-дамс, виде, саия. Ансяк аволь истяк. По-лав-тозь! Мон тенст — товар, сынь монень — тулевкс!

— А кие макссь тыненк истят прават? — кевкстизе газетань редакторось.

— Кода кие? — пижни Кувыркин. — Мон председателесь эли аволь?

— Да, тынь председатель, — пейдезевсь редакторось, — ялатеке кияк тыненк эзь максо прават истя тейнемс. Нолдыде госуларствань товар, а сень, мезе полавтыде, сайнк эстенк. Ён тулевксэсь, кодгемень килограммат сталмозо. Парсте тейтядо, нейке мекев ускындерясынк.

— Мон? — пижни председателесь. — Малавгак! Сонзэ ней центнердэ ламо сталмозо. Мон!.. Мон райкомов молян. Мон питне пандынь.

— Содазь, — мерсь редакторось, — райкомов тердтядызь. Ансяк янксемс сави тенк тулевксэнтъ кувалт.

— Вансынек! — кежейстэ мерсь Кувыркин ды капшазь ношкстась.

Сонзэ туемадо мейле зярыя шкань ютазь раказь совась Никита.

— Тынь мекс истя, Видманов ялгай? — кевкстизе редакторось. Никита Павлович ёвтнесь: скалонтъ уш мекев фермав ветизь. А тей самсто неизе, кода усксть тувонтъ.

— А ней вана мезе, — поладсь Никита. — Содазь, фельетонось покш лезэ тейсь. Ансяк пельтяно председателентъ кисэ. Атысь талакадсь. Муевсть ломанть, конат кармасть кортамо тензэ: «Кальдявт, келя, теветь, Ерофеич. Сявдикс ланга ней каить тетъ. Сави простямс правлениянтъ марто». Печатентъ ёртызе монень ды тусь. Симсь. Нейгак иредьстэ. Лездадо. Роботникесь сон аволь берянь. Эряви витемс. Минь ведь а истя арсинек. Тесэнь критикась, мертяно, эзь лезда тензэ, паряк, газетанть седе кунсолосы.

Редакторось алтась лездамс те тевсэнтъ.

Никита Павлович простясь весеме марто ды сыргась. Лисемстэ кончтась монень — ильтевлия.

— Зярдэ минек ёнов арсят молема? — кевкстимим ушосо.

— Кучиндерясамизь, куш течике... Тев ней прок кодамояк истямо арась.

— Виде-паро? — пейдезевсь Никита Павлович. — Паряк, стяко тосо содамокс эйсэнк учить?

— Пеедькшнемась, Никит Павлович, — паро тевесь, — апаргадозь кортазевинь, — ансяк сонзэяк эри ушодксозо ды пезэ.

— Стяко кежиявтнетядо, Евгений Петрович, — путызе стака кедензэ лавтовом лангс... — Мон седейшкава кортан. Мезть

сёпомс? Иенк, монь койсэ, аволь кемзисемге. А истямо тейтересь, кодамо Нина, эряви вешнемс. Чарькодян, кода арсентядо. Бажатадо — Костя марто вастовольть. Моньгак истямо мелем. Паряк, мазыйкась тынк кочкатадызь? Ведь а содасак седейпотмонзо. А тынь каштмольтядо. Содаса, Нина тусь мелезэнк. Ансяк тынь лиякс вантадо эрямонтъ лангс. Олясь тынк.

— Агитаторось тынь аволь берянтядо, — пейдезевинь. — Вансынек, кода седе тов тевтне кармить кевереме.

— Ардодо, — кончтась Никита Павлович.

— Бути тев лиси, молян.

— Илядо учне. Шкась а вечки кувака арсемат. — Сювордызе кедем ды капшазь тусь.

Видькстан, Никита Павловичень кортамондонтъ икелеяк а весть арсинь эсь эрямондон, содазь, урвакстомадояк. Ансяк кодамояк лувс эзинь пра. Ды нейгак ламо тевтнень марто истят арсеман аштеть кода-бути сравтневезь. Вейке ансяк юткост явови седе виевстэ — те «Валдо кив» бажамось. Агрономонтъ марто кортамондонтъ мейле сон седейк виемсь. Ансяк сеске кодаяк эзинь молеве. Мейле сась октябрья ковань. Зярыя пизестъ пиземеть. Аволь васов, маласо колхозтнэ-неньгак чуросто яксинек. Седейшкава мелявтозь учинь, зярдэ сави молема «Валдо кив». Шкась жо эзь учо. Нина сонсь сась районов.

Октябрьянь 24-це чистэ панжовсь райононь комсомолонь конференция. Монь тов кучимизь редакциясто — сёрмадомс конференциянтъ молемадо. Тосо вастыя Нинань. Озадоль президиумонь столентъ эхшсэ. Тейтересь, нама, неимим, лембестэ мизолдозевсь.

Ютко шкасто мольсь монь малас.

— Мекс те шканть вестькак эзиде сакшно миненек? — уль-несь васенце кевкстемазо.

Мон карминь пиземетнень лангс чумонтъ каямо.

— Никита Павловичте мариде мезеяк? — кевкстимим Нина.

— Арась. Мезеяк лиссь мартонзо? — дивазевинь.

— Нинзэ марто явсь.

— Кода истя?

— Чарькодемс а стака, — мерсь Нина. — Фельетононтъ кисэ ламот кежиявтсть лангозонзо. Истя пандсть тензэ кеж.

Марусянь тынь а содасынк? Сон вадря ломанесь. Клубсо весть киштсь Боря марто. Тынь содасынк сонзэ. Мейле, чопода вестэ, ильгизе Марусянь кудов. Председателенть тейтересь, Мотя, неинзе ды сеске нолдась куля, було Маруся марто Борист вастневить салавинька. А Никита Павлович ведь кодамо ломанесь. Сонсь а кенгели, секс арси — лиятнеяк видестэ кортыть. Кеминзе неть лавгамотнень ды явсь Марусянь марто. Ней сонськак пии-палы, Марусяяк. Тунь аздатано, мезть тейнемс. Киньгак а кунсолы. Монь койсэ, тынк мельде сон пели. Лездадо тенек.

— Берянян истямо тевсэ лецицясь, — меринь, ансяк алтынь кодаяк вастовомс агрономонт марто.

Седе мейле ульнинек вейсэ. Чокшнень заседаниянть прядомадо мейле ванынек кинокартина. Арсинь ильтемензэ квартирав, козонь, кода маринь, лоткасть сынст велень делегаттнэ, ды апак учо эртевинь истямо тевс.

— Мартьянов ялгай, — пейдезь ладсо кортазевсь Нина, — мекс а тердсамизь инжекс?

А сёпса, а курок пшкадевинь каршонзо.

— Простямизь, мерян, Ландышева ялгай. Пелинь кежиявт-тадо лангозон, тердиндерятадызь.

Эринь сестэ коммунальной кудосо, вейке комнатасо, кона ульнесь вейсэнть кухнянт маласо.

— Э-э, ды тынь бояркс эрятадо, — весёласто кортазевсь Нина. — Зяро книганк! — Кайсесь седе курок ды мольсь книга марто полкатненень.

Мон те шкане пурнынъ ужин. Таргинь алт, арсинь сынсть рестама.

— Тень тейса мон, — мольсь ваксозон Нина.

Зярс рестама алт, шлясь-нардась кедьгеть, мон чийнинь лавкав, раминь шоколадной конфеткат, шампанской ды оштё кой-мезть лият.

Нина прок эзь дивазевеяк, зярдо весе рамазтнень путынть столь лангс.

Столесь пурнавсь. Тердия ужинамо. Озась апак покшкавтне. Нуртинь цярканы-цярканы шампанской.

— Мезень кисэ симсынек? — саизе цярканыт ды пейдезь варштась монь лангс.

— Костя марто одов тынк вастнематнень ушодоманть кисэ, — эзинь фатяяк, кода меревинь.

— Тень кисэ покш мельспаросо, — токавтызе турвазонзо цярка пенть ды путызе мекев. — Ансяк тенень а кеман, — ды аламодо нусманясто поладсь.

— Меньгак, мерян, а неян тувталт, конат пирявлизь тынк вастомань кинть.

— Арась, те виде, ды вастомс а вастано, — шождынестэ уктасть. — Паряк, лиядо а мезде кортамс?

— Лиядо, тык лиядо, — окойники чачсь монь эйс апелема. — А кода, мерян, тынь варштавлиде сень лангс, видькстав-линьгак: вечктыдызь тынк?

Сон прынзо каизе удалов ды дивазевезь варштась лангозон.

— Алкукс эли пейдтыдо? — кода-бути салава ёвтынзе валтнень.

— Ванькс седей ёжом ёвтыя тенк, Нина, — монськак а содан, мейс стинь ды мекев озынь.

— Апак кенгеле? — видьстэ варштась лангозон.

— Седейшкава, — мерян.

Сон стясь столенть экштэ. Арсинь, туи.

— А курок чарькодевить эрямонь-аштемань лувтнэ, Евгений Петрович, — озась Нина мекев столенть экшес. — Ве ёндо учинь тынк пельде истямо кортамо; омбоце ёндо — эзинь. Мезе ёвтамс тенк тень каршо?

— Ёвтадо видьстэ, — меринь, — кода тынь вантадо тень лангс. Монь мельтнень кувалт илядо кавтолдо.

— Илядо кежиявто лангозон, ёвтындерян мезеяк а истя. Тынь, Евгений Петрович, вадря ломанесь. Мелезэнь пек туиде. Ёвтаса тенк видьстэ. Монень мельспаро: минек велесэ молить кулят, було тынь чиявтомон якиде. Ансяк тынсь содасынк, кода тевесь ашти. Эсенк пингстэ авардинь се ломаненть кисэ, конань вечкса. Улить эдь истят седейть, конат вечкить ве ломань. Арсинь: лепами вечкемась. Ней вана арседе.

Монень кадовкшнось ансяк энялдомс Нинань икеле чумом каямодо.

Конференциянтъ прядомс вейсэ ульнинек, прок паро ялгат. Ламо кортнинек. Седей ёжонь мельтненень-валтнэненъ эзинек велявтне. Те шкане аволь весть сёвныя эсь прям Нинань марто истя кортамонт кисэ. Тейтересь эзь кежиявто лангозон. Мекевланг, седеяк кода-бути чевтыстэ ды мелень ванозь кортась мартон.

Колмоце ялгакс сеedyстэ якась мартонок Аркадий Лукьянович, кона максозь валонзо топавтызе вельксака ды алтась те-емс седеяк ламо.



Конференциясонть Нинань ды Аркашань кочкизь облас-  
тень конференциянь делегатокс. Омбоце чистэнтъ туинь «Вал-  
до кив» Никита Павлович марто.

Пачкодинь тов ды васняк содавтыя Дарья Дмитриевнань.  
Зина ансяк сакшнось фермасто вастовомо.

Кода свал, монь парсте андымизь, ды теде мейле Зина мар-  
то вейсэ туинек агрономонтъ содавтомо. Сонсь кудосо те шка-  
стонть арасель. Вастымизь авазо.

— Обедамо учан эйсэнзэ, — ёвтась тенек. — Мерят, ёжозо  
маштсь. Сы, ярсы ды таго туи. Ферматнень ней теленень анок-  
стыть, строить яла. Мон ваннынь книгат, Зина кортась баби-  
ненть марто. Окойники Никита Павлович сась.

— Таго адвокат, — пшкадсь сон кудос совамсто. — Васня  
вейте-вейте сакшность, а ней артельнек.

— Ды тон куш шумбрактнек мартонок, — пшкадсь Зина.

— А мейле кевкстимизь, мейс сынек, — поладынь мон.

— Содаса мейс, — кода-бути кельмстэ сюрордынзе кедене-  
нек. — Мольсь Нина, ёвтнизэ тенк весе: «Лездадо, Мартыанов  
ялгай. Никита козайканзо марто явсь». Тынь мезе, эйкакшокс  
монь ловтадо? Паряк, эсень превень сатыть? Кунсолодо, ме-  
ленк содамс. Монсь чумось. Пизямкшнынь, зардо кеминь лав-  
гицятненень. Секе басом пания Марусянь. Покш ильведькс  
теинь. Витьса. Неть лавгицятненень келест цяпоесынь. Ды весе.  
Аядо мартон обедамо.

— Мон кенеринь тынденк икеле, — меринь.

Мейле молинек строямо тарконтень. Тосо прядсть ревень  
од ферма. Эрявсь теэмс кияксось — лазт арасельть.

— Вана вант, — кортась Никита Павлович. — Ванды нояб-  
ря, курок лов пры, а минек ревенек а козонь пекстамс. Ней  
тонсь содат, сисем иень план. Икелень коряс кавксть седе ламо  
реветь кадынек.

Совинек фермантень, тосо ве ужосонтъ ансяк ушодсть ки-  
яксонь тееме, ацызь кавтошка метрань келесэ.

— А плотникенк косот? — кевкстия.

— Вана весе тесэяно, — невтсь Никита кавто од цёратнень  
лангс. — Тынь содавлинка, кода тевесь ашти. Ферматне кап-  
шавтомкат. Бригадирэсь теवंть калавтызе. Панинек. Монсь  
кундынь. Председателесь ломантнень лияв саинзе. Мусь седе

эрявикс тев. Монь койсэ, те шкане кардазтнэнь теленень анок-  
стамось — сехте эрявикс тев. Мезеяк а теят, кежиявтни ланго-  
зон фельетононтъ кисэ, куш сёрмадыя овсе аволь мон. Вана  
кодат эдь неть а виде ойме ломантне. Ансяк а лиси сонзэ ко-  
ряс. Валскенень фермась анок ули.

— Ки марто тейсынк? — дивазевинь.

— Зняро ломанть сыть, а ков теэмс, — мерсь Никита Пав-  
лович.

— Ансяк лездадо тень. Содазь, фельетонтомо. Тынь ансяк  
аштеде вакссонок. Покш лезэ тейтядо.

Сеске эзинь чарькоде сонзэ валтнэнь. Аламо шкань ютазь,  
ванан: эрьва ёндо кармасть само од цёрат. Колоньгеменьшка  
састь. Машинасо усксть лазт. Неть кеменце классонь ученикть.  
Содазь, Никитанень (истя мерсть тензэ удалга) лездасть сынст  
тердемс. Эрьвась сась кодамояк кедьёкс марто. Никита Пав-  
лович сеске ёвтнизэ, мезть тейнемс. Маряса кортыть:

— Те лелясь таго тия яки, — монь лангс невтсь вейкесь.

— Таго киньгак прязо сэксыясь, шлясы аламодо.

Тевесь лакась. Никита чийнесь фермаванть. Тесэ невтсь,  
кода строгамс, тосо тонавтсь, кода путомс. Эрьва кинь превс  
путсь, шнась ды тонавтсь.

Омбоце чистэнтъ таго васодинь Никита Павлович марто.

— Эзиде миря Маруся марто? — кевкстия.

— Тыненк те пек эряви содамс? — мерсь сон.

— Иля кежиявтне, — путыя кедем лавтовонзо лангс, — весе  
седейшкава мелявттано кувалмат. Иля стувтне, паро ялгат  
ламо.

— Авольть улеяк, алкуксонь эрямонь танстькак аволинь  
сода, — пейдзевсь Никита. — Пасиба тенк. Зярдэ прядовить  
дипломатонь кортамотне, сестэ ёвтан тенк. Садо содавтомонок.

Содазь, алтынь самс.

Ютась ноябрьсь. Састь якшамот. Ней чуросто савсь яксемс  
тень колхозтнэнь ланга. «Валдо кив» вестькак эзинь пачколе.  
Ансяк седей ёжонь тевтне, конатнень марто вастынть те кол-  
хозсонть, вестькак эзть тукшно мельстэнь.

Декабрянь 10-це чистэ тердимизь од писателень област-  
ной совещанияв. Видькстан, монгак косто-косто снартнян

сёрмадомо. Виде, фельетонт зярыя сёрмадынь. Кортыть, а берянтъ. Паро аволь се, кода мон понгинъ те совешаниянтень. Костянь тесэ вастыя. Промксонтъ перть ульниек вейсэ. Прядомадонзо мейле ютавтсь литературанъ чокшне, косо од писательгне ловность эсест произведенияст. Ловность Костяк. Ловность парсте. Седейшкава цяпинъ тензэ. Мельспаросо кунсолынь, кода минек областень содавикс писательгне ды Московсто сыцятнеяк кортасть сондензэ прок ламонь алтыця од поэттэ.

Мейле вейсэ ужиныек ресторансо.

— Евгений Петрович, — аламодо виздезь пшкадсь Костя, — арсян кевкстемек вейке тевень кувалт, а сёвносамизь?

— Кортадо, — мерян, — видьстэ.

— Тевесь вана мейсэ, — монъ лангс апак вано, ушодсь сон. — Кизна, зярдэ ульнинъ эсенек колхозсо, маринъ кулят, буто тынь Ландышева Нинанъ цёра ялгазо. Ломанть кортасть: Нина тень эзь сёпо ды ульнесь покш мельспаросо. Ёвтадо, виде те эли аволь?

Видьстэ ёвтамс, эзинъ учне истямо кевкстема. Ялатеке чарькодинъ: Костяненъ те неяви аволь стяконъ тевекс. Ды чачсь прызон мель, содамс весе седе парсте.

— А мезекс теде эряви содамс тыненк? — кевкстия. — Тынь, кода маринъ, овсе лоткиде вастневемадо.

Костянь чамазо нусмакадсь. Сон, бульчом, янксесь, мейс сьргавтызе те кортамонть.

— Илядо кежиявто лангозон, Евгений Петрович, — окойники, пшкадсь Костя. — Эдь кода тевесь ашти? Неяви, виде-як аволь шождыне чарькодемс седей ёжонъ тевтнень. Ансяк илямизь лово истямо ломанькс, кодамокс сестэ ловимим Никита Павлович. Нина, кода тынь содасынк, эйкакшпингень ялгам. Сех малавикс оям ульнесь. Вечкилия. Нейгак вечкса. Ансяк, бульчом, маласто эзь неяво, кода а неяви маласто пек парсте аргозь картинась. А ней, зярдэ лиссь те тевесь, мон неия сонзэ ве ёндо, неия весе паронзо ды мазычинзэ. Видьстэ тенк меремс, пек ильведевинъ. Арсян ильведьксэнтъ витемензэ. Ансяк, бути тынь... сестэ монень сави ризнэмс... Арсинъ тенк сёрмадомс. Паро, вастовинек.

Чатьмонинъ, эзинъ капша кортамо. Мелезэнь паро ульнесь: цёрась чарькодсь, ды, содазь, вастовить таго мекев неть кавто од ломантне.

— Мезе лангс тевесь лоткась? Эряви витемс ильведьксэнтъ.

— Кода? — мерсь Костя. — Велестэ туемстэ снартнинъ кортамо мартонзо. Кунсоломоак эзь карма.

— Чарькодян, мерян, ялгай. Сэпейть ильведьксэнь умартне. Ялатеке виев ломанъ нильсынзе сынст. Коли сатотсь виенк чарькодемс ильведьксэнк, саты сынст витемсака. Покш сэредькс теиде тензэ. Истямо тевде мейле аволь шождыне ломанентъ чумонзо стувтомс. Эряви невтемс: тон алкукс вечксака.

— Кода?

— Сёрмадодо тензэ сёрма.

— Сёрмалинь. Чатьмони.

— Сёрмадодо. Максса тензэ. Кортан мартонзо. Ёвтасы мелензэ. Костя теске кармась сёрмадомо.

Мейле ильгимим вокзалов. Шкась эштё ульнесь ламо.

Радио вельде те шкане ёвтнесь меельце кулят. Костя марто вейсэ велявтынек прянок радионтъ ёнов: маринек содавикс фамилият. Ловность СССР-нь Верховной Советэнь Президиумонъ Указ минек областень животноводческой ферматнесэ роботыцятненень Социалистической Трудонъ Героонъ лемень максомадо. Ютксост Атаманов Аркадиень ды Ландышева Нинанъ лемтнеяк. Дарья Дмитриевнанъ казизь Ленинэнь орденсэ.

Сювордынек кеденек. Мейле чиинек почтав ды вейсэ кучинек весемень туртов поздоров марто телеграммат.

Костя мелявтсь яла: те шкастонтъ арась эсест колхозсо. Явинек мартонзо пародояк паро ялгакс.

Валскестэнтъ, зярдэ пачкодинъ эсенек районов, тосо уш весе кортасть те покш каземадонть. Редакциясо анокстасть номер минек райононъ Социалистической Трудонъ Геройтнеде.

— Анокстак, — мерсь монень редакторось шумбрактнемадо мейле. — Кодак печатасынек газетанть, саят ведьгеменьшка экземплярт ды ардат «Валдо кив».

Монень, содазь, теке эрявськака. Молинъ типографияв ды карминъ капшавтомо газетанъ лисеманть.

Зярдэ ушодсть печатамо, капшазь совась Никита Павлович ды мерсь:

— «Валдо ки» колхозонъ председателесь Видманов Никита Павлович.

— Зярдо истя? — дивазевинь.

— Отчётной собраниясо кильдимизь, — мизолдсь тень. — Беряньстэ роботатадо. Эряволь бу газетас сёрмадомс: Никита Павловичень кочкизь председателекс. Вана мезе, Мартыянов ялгай. Течи минек торжественной собраниянок геройтнень лемс. Тейтертне мерсть ускомодот. Бульчом, виде-паро туить мелезэст.

— Ды мон, мерян, апак тердеак молевлинь.

— Содан, — яходсь Никита. — Курок анок улят?

— Вана печатасынек газетанть ды сыргатано.

— Мон часонь ютазь сован. Молян оштё кой-кинь тердян.

Кавто часонь ютазь ардынек «Валдо кив». Модемстэ Никита Павлович ёвтась: сынъ ладясть козяйканзо марто.

Ёвтния тензэ Костя марто вастоманок ды кортамонок.

— Паро цёрась, — седейшкава шнызе, — Куш ламоксть сёвныя. Ялатеке вечкса. Истямо уш, натъ, коем: кинь вечкса, сень седеяк пек сёвноса, ильвединдеряй. А монъ вана кияк истя седейшкава паронь арсець эзимим сёвно. Сёвновлимизь куш тынь парынесть, паряк, ёжо тень саволь.

Истя пачкодинек «Валдо кив». Молинек клубов. Тозонь кармасть пурнавомо инжень районсто ды лия колхозтнэстэ.

Газетатнень арсинь явшемест сестэ, зярдо ушодови промкось.

— Сестэ а кона шкане ули ловномс, — мерсь Никита ды санизе кедьстэнь. — Ловнодо! — серьгедсь весеменень ды путынзе сценанть икеле столенть лангс.

Промкось ульнесь кенярксов. Сценанть лангсо якстересэ вельгязь столенть экшсэ райкомонь секретаресь, райисполкомонь председателесь, Аркадий Лукьянович, Нина ды Дарья Дмитриевна. Никита Павлович ёвтинизе эрямоств ды сень, кода роботась, кода кассть геройкс. Изниятнень лемс ламот ёвтасть лембе валт. Меельцекс кортась райкомонь секретаресь, сьювординзе геройтнень кедест ды арсець тенст седеяк покш изнявкст. Аркадий ды Нина алтасть роботамс оштё седеяк парсте.

Пелеведе майле тукшность инжетне. Нина монъ тердимим удомо сынест.

Кудосо мерсь:

— Ды весе те минек вишкине роботанок кисэ?

— Аволь вишкине, Нина, — меринь. — Героень лемть а макснить вишка тевень кисэ.

Тумбочка лангсто сайсь зярыя телеграммат. Муизе минекенть, конань сёрмадынек Костя марто вейсэ.

— Сонгак, — варштась монъ лангс. — Вейсэ ульниде?

— Од писателень совещаниясо вастовинек.

— Кода сон?

Каршо валонь таркас максыя тензэ Костянь сёрманть. Нина капшазь ловнызе. Аламось аштесь чатьмонезь. Таго ловнызе. Ды ёвтния тензэ минек кортамонть.

— Илинк майсевте, — мерян. — Сонензэ январьстэ экзамент эрявить максомс. Аволь шождыне ули.

— Сьюкпря тенк, — чевтьстэ кортазевсь Нина. — Кодамо паро тон ялгась, Евгений Петрович! — Кеместэ сьювордызе кедем ды зярсыя вансь лангозон. — Васенцеде востан истямо паро седей ломань.

## ЭСЕТЬ КУДО

Зярдо Леонид Корнилович роботась оштё райкомонь секретарекс, велень коммунисттнэнь ютксто пек тусь мелезэнзэ Виктор Романович Ярцев. Ломанесь сон лангс ваномс аволь пек неявикс, ансяк вадря вожодиця. Сэрей, прязо свал нолдазь, кода эрси ламодо арсиця ломаненть. Чамазо валдо, чопода-тюжа сельмензэ весементь лангс ванить кенярдозь, паронь арсець. Эри ансяк вейсэнъ тевень кисэ. Эрявиндеряй киненьгак лездеамс, апак корта кадсы эсь тевензэ ды кунды лездеамо. Специальностень коряс сон литератор. Роботась сестэ Равлей велень средней школань завучекс. Пек паро тонавтыця. Ламо иень перть вейкеяк тонавтниязо эзь кадново омбоце иес. Школань прядыцятнэстэ ламотне поладать тонавтнемаст вузсо, теевильгь пек образованной ломанекс; конат кадовильгь колхозсо роботамо — эрьва тевсэ молилгь икеле. Эйкакштнэ вечкилизь сонзэ, прок эсь тетяст. Учителень тевтнеде башка, ветясь покш общественной работа. Ульнесь областень ды райононь газетань велькорокс. Районсонть арасель сонзэ кандямо лектор. Сынст велень лекторонь курсось, конань эйсэ сон ульнесь прявттокс, районсонть васенце таркасолъ. Видьстэ меремс, те ломанесь алкуксонь коммунист.

Апак учо Ярцев сась райкомов ды яволявтсь секретарентень:

— Сынь рононь заведующеенть лангс пеняцям, Леонид Корнилович, — кода-бути сормавь конязо учителенть. — Ту-еме арсян те районстонть. Сон а нолды эйсэнь.

— Кода истя туеме? — пштистэ варштась лангозонзо Сузанов.

— Кучить эйсэнь лия таркав.

— Кие?

— Министерствась.

— Тонсь кода тень лангс ванат?

— Эзинь тонадо меремань а топавтомо.

— Кодаяк а чарькодян, — озась секретаресь. — Минек апак кевкстне пансить кадренок эйсэ, — саизе телефононь трубканть ды мерсь сюлмамс сонзэ Просвещениянь министерстванть марто.

— Стяко мелявтгадо, Леонид Корнилович, ялатеке туян, — лангозонзо видьстэ ванозь, мерсь Ярцев.

— Аштека, аштека, — мелявтозь варштась секретаресь. — Мезеяк а чарькодян. Лисни, эсеть ули мелеть туемс. Мекс? Эрят ней а беряньстэ. Лездынек теть сатышкасто. Нолдавтынек теть ссуда. Кудот ней эсеть. Мейсэ эно тевесь? Паряк, тандадыть безарькстнэде, конатнень фельетонсо пезыть? Сынст пурнызь-сэрнизь зарс. Муевить оштё ломань лангс кедень кепидицят — сетнень седеяк пек киртясынек канжост. А макстано пря таштонть. Чарькодть, Виктор Романович, тонь кондят ломантне миненек пек эрявить. Секскак ковгак а нолдатадызь.

— Сестэ монсь туян.

— Кода истя?

— Сайса семиям ды килангов.

— Тон коммунистат?

— Тень тынь умок содасынк.

— Сестэ а мезть коргамскак.

Косо мери теть партиясь, тосо кармат роботамо, — аламо-до сыремсь Сузанов.

— Весе?

— Азёдо!

Ярцев нусманясто лиссь.

Котошка чинь югазь, Сузановнэнь телефон вельде ёвтась рононь заведующеесь:

— Мезть тейнемс, Леонид Корнилович? Ярцев сась приказ марто. Лияв кучить эйсэнзэ.

— Нейке совазо райкомов! — бойкасто путызе трубканть секретаресь.

Виктор Романович кода-бути пелезь чалгась кабинетэнь поровтонть трокс.

— Истя, мерят, — стясь каршозонзо Сузанов, — туят эйтэ-нек?

— Сави, Леонид Корнилович.

— Паряк, арсят оштё? — диван лангс озась ваксозонзо. — Эдь таркат пек паро. Школанть кодамокс теик!

Зяро вий тон путыть эйзэнзэ! Мон бу малавгак аволинь туе. Эдь учителень роботась сестэ пек паро, зярдэ ломанесь кувать важоди ве таркасо.

— Аволь шкасонть онкстневи тевесь, Леонид Корнилович, — шождынестэ укстась учителесь. — Теветь коряс кармить ледстнеметь.

— Виде, беряньстэ кияк а карми ледстнеметь, — мерсь Сузанов. — Ансяк туемс аволь эряво.

— Сави, Леонид Корнилович, — ноцковтынзе лавтовонзо Ярцев ды венстсь тензэ конёв.

Секретаресь варштызе конёвонть ды дивазевсь.

— Аздан, кода меремскак теть, — чаравтсь прясонзо. — Чарькодеви се, зярдэ заводсо паро бригадасто бригадирэсь туи лавшо бригадас. Эрси истя колхозсоjak. Тонь аздан кода чарькодемс. Паро средней школань завучсто туемс берянь начальной школань заведующееск. Ды районоськак берянь. Тосо райкомонь секретарекс роботы монь содавиксэм. Сонгак арси тосто туеме. Арсек, Виктор Романович.

— Мон уш школантькак примия.

Сузанов варштызе примамонь актонть, чаравтызе прынзо ды венстизе мекев Ярцевнень.

\*\*\*

Ютасть ниле иеть. Ламо пиземеть пизесть, ламо вармат пу-васть. Леонид Корнилович ней Сурской колхозно-совхозной управлениянь парткомонь секретарь. Ламо эрва кодат ломанть несь, ламонень савсь тензэ лездамс, кой-кить савсь черень каршоjak судрям. Пек ламо паро ломанть вастнесь. Ялатеке эзь стувтово тензэ Ярцев. Эзь стувтово паро тевензэ кис. Весть, райкомсо роботамстонзо, Равлейга ютамсто совась Ярцевень кудонтень, истяк, варштамо, ки эйсэнзэ эри, мезде миизе. Ды

тесэяк дивазевсь: сон кудонть эзизе мие. Нолдась эйзэнзэ ламо эйкакш марто аволь од учительница, конань мирдезэ чавовсь Отечественной войнасо. Ды, эсензэтнеде башка, касты уро-зокс кадовозь колмо эйкакшт. Кото трявкст! Вана кинень кадызе кудонть! Мик квартирань кисэяк а пандовты.

Се районось, ков тусь роботамо Ярцев, ней совавтозь Сурской колхозно-совхозной управлениянть. Леонид Корнилович аволь весть ловнось газетасто заметкат содавикс учительденть. Эсест парткомонь газетасонтькак сёрмадсть сондензэ прок паро лектордо. Иезэнзэ ловнось малав сядо лекцият ды ютавтсь сядодо ламо кортамот. Вейсэндявомадо мейле васенце кизэнь июнень меельце читнестэ Сузанов ардсь Пиченьбуе велентень, косо роботы Ярцев.

Виктор Романовичень муизе школань умарь пирестэнтъ. Директорось ваннось, кода нилеце классонь тонавтницятне валность чукушторовонь ды умарь чувтонь питомниктнень.

Вастовсть кода пародояк паро ялгат. Ярцев эрясь ней школань квартирасо. Зярс Зинаида Семёновна аноктась тенст ярсамопель, сынь ваннызь школанть, перьканзо умарь пиренть, площадкатнень, мастерскоенть. Весе пек паро! Ды Леонид Корнилович чарькодизе: весе те теезь Виктор Романовичень пингстэ. Зярдэ озасть столь экшс, сестэ мерсь:

— Ней ансяк чарькодинь, мекс сестэ туить Равлейстэ.

— Мекс, тынк койсэ? — пейдезевсь Ярцев.

— Сонсь тевесь невти. Косо мезеяк арасель, теезь вана мезе, — невтсь секретаресь перьканзо, — образцовой школа.

— Аволь тень кисэ туинь тосто, Леонид Корнилович, — ризныця вайгельсэ кортазевсь Виктор Романович. — Равлеень школастонть кодаяк аволинь туге. Тувталось лиясо.

— Мейсэ! — таго кевкстсь секретаресь.

— Кудо путокшнынь, Леонид Корнилович.

— Мезень тесэ ильведьксэсь?

— Покш, Леонид Корнилович. Бути аволинь туге, нилевлимим колиясь.

— Мезеяк а чарькодянь, — кедьсэнзэяк мик яходсь инжесь, — а ёвтындерясак.

— Ули шканк?

— Тынк кунсолумс свал муян.

— Тевесь истя ашти, Леонид Корнилович, — васолдо ушодсь Ярцев. — Равлеев молинь пединститутонь прядомадо

мейле, 1950-це иестэ. Школась, кода содасынк, берянь ульнесь, учителень квартират арасельть. Ве ёндо сыця учительтне эрясть колхозникень кедьга. Семиям аволь вишкинелъ. Вете иень ютамс котошка квартирасо эринь. Весе веленть ютыя. Банясояк лиясто ковонь-ков эзинь парсе. Монь койсэ, истя эрявьскак. Ды а кона шкане ульнесь арсемскак эсетъ кувалт, зняро тевть ульнестъ. Виде, семиянтень а пек паро ульнестъ. Косто-косто пилясть эйсэнь. Весе ссудат сайть, эстет кудот строить, мон вана кода майсевтян эйсэст. Учителънедеяк ламот истя путсть эйсэнь превс, рононь заведующееськак. Весемеде пек мелявтсь Сакулов Яков Игнатьевич. «Мезть истя майсят? — эсь койсэнзэ паронь арсезь, кортась тень сон. — Сайть ссуда ды путт кудо. Тонеть максыть. Пиресь кавто колмо иес пандсы сонзэ. Эсетъ кудосо эрямось — рай. Чават колия — сон тонь, аволь киньгак лиянь. Иезэнзэ ламо пезнавтат! Ванат, лиси кардаз. Неят, кода эрян. Раминь каладо кудыне. Ней несак мезе. Икеле поптнэ истя эзть эря. Монь эрва мезем ули». Виде, кудозо сонзэ вете стенас, вельтязь жествэ, эйсэнзэ вете комнатат, семиязо — ниленензэ. Кардазозо, прок горобия, банязо лембе кудыкелькс марто. Чеерькс авардть икелензэ — уштомодонзо а мери. Кенкшензэ лангсо цепсэ содозь вашошка киска. Пирензэ эйсэ эрва иене яла келемтсь. Ваксканзо проулкавать стадат яксестъ, ней ве ломань а кельги ютамо — весе пиризе. Истямо сэррей пирявкс тейсь перьканзо — озяз а ливтяви троксканзо.

Партийной собраниясо монень а вестъ савкшнось кечкеремс Сакулов марто. Яла сэрэди, чамасонзо жо стена кирвазти. Субботникс, воскресникс ды лия истямо тевс эзь яксе. Сень таркас кудосо сисемень кисэ важдсь, кавто кедьсэ а саевиця чочкт велявтнесь ськамонзо. Пек а вечкилия сонзэ, чуросто савкшнось кортнемскак мартонзо. Сон жо яла «тонавтсь» эйсэнь: «Путт кудо. Райсэ кармат эрямо! Кона колиянтъ чавсак, се тонь ули».

Ды монгак стявтынь кудо. Вейке кизэнь перть пивтинь перьканзо. Лекторонь куросонть иень перть сисемшка лекцият ансяк ловнынь. Сёксня пиринь палисадник, пугынь умарь чувтт. Зярья колия савсь тень чавомс. Ды, чарькодтядо? Мельспаро кармась саемень: весемесь монь! Мень уш тосо лекцият! Колиятне сынст полавтызь. Райактивень собраниясо тынсь ледстник. Равлеень лекторонь куроськак, мериде, мекс-бути удалов кадовсь. Тень минь кодаяк эзинеке учне Ярцевень пельде.

— Чуман, — пейзажевь Леонид Корнилович, — ульнесь истямо тев.

— Содазь, сядломдонть эзинь тандадо, — поладызе кортамонзо директорось, — сон, секень вант, ульнесь васенце багинекс, кона видьстэ ёвтась тень ильведькстэнь. Ды истя лисськак. Омбоце кизэнтъкак стяко ютавтъя. Лисьма чувинь. Колмоце кизэстэнь бая чапиль. Тунь эзь кадново шкам кундамс вейсэнть тевс.

Сась нилеце кизэсь. Ней, мери, тень Зинаида Семёновна козяйкам, эряви чувомс тенек парыне мацт. Ды сестэ арсезевинь: маштыть-арась пест зярдояк неть «колиятнень»? Мезе сави сы кизэстэнь теэмс? Секс, бульчом, кортыть: «Кудонть ниле уголонзо, ниленьгемень тевензэ».

Ды лиссь сестэ истямо тев. Мейс-бути якинь районов. Ульнесь базар чи. Монгак молинь тов. Мезе, тынь арседе, неинь? Ванан: спекулянткатнень ютксо ашти озадо Сакулов. Икелензэ минень-сюнонь нулат-валат, эйкакшонь ташто ботинкинеть, кемть, сезнезь пальтынеть. «Садо! Садо! — пижни. — Стяко макссынть! Однэть оштё! Трёшникть питнест!»

Чувтоминь ве таркас ды кодаяк а сыргаван. Се шканть кодамо-бути ломань мольсь ды кевкстизе: мезе питнезэ каладо фуфайканть. Сакулов истяшка питне ёвтась, конань лангс кавто одт рамавлишь. Марявлинкак, кода аштесь эрвя трёшникенть кисэ! Собакевиченьгак сельмезэ сядаводоль лангозонзо. Чиезь ношкстынь тосто. Вана мезес, арсян, ветизе ломаненть «колиясь».

Теде мейле карминь содамо, кие те Сакуловось. Ульнесь рононь заведующеекс. Кодамо-бути махинациянь теезь путсь паро кудо. Миизе, сайсь ламо ярмакт. Панизь роносто — аравтызь школань директоркс. Школань вирьстэ путсь омбоце кудо, миизе — таго ярмакт баксордась. Тостояк панизь. Кучизь Равлеев рядовой учителекс. Тезэньгак путсь кудо. Ды, те кудодонть башка, мезеяк тензэ а эряви. Сезевсь ломанесь эрямодонть. Роботы мельде-валдо. Уроконзо киньгак мельс а тукшнить. Рононь заведующеесь аволь весть кортась кувалманзо. Кшувавтомс, мери, роботасто ды а нолднемс школанть малавгак.

Ды сестэ арсезевинь. Теке жо лиси монь мартаояк, карминдерян мелявтомом ансяк эсь кудодон. Тынь арседея, Леонид Корнилович, кода ашти тевесь! Потязь поти седееть эйсэ седе

ламос бажамось. Модамарть пирезэнек чачить седе парт а ков. Ды ламояк. Арась! Ломаненсетне ялатеке седе парт неявишь. Ды тондеть ламо. Азорксчись таргазь тарги эйсэть кудоютксо котьмамо. Бути аволь колия, эске козоньгак чават, яла седе шождыне ули а пештявикс седеентень. Ох, кодамо тандавтниця сюпавонь смустесь, Леонид Корнилович! Ламо оштё сонзэ каршо бороцямка! Секс туиньгак Равлейстэ. Тоско а ён ульнесь кудостонть лисемс. Савсь туемс ве ёнов, кадык сельмень икелевгак илязо понгоне.

— Паряк, жаль маряви? — кевкстизе Сузанов.

— Жаль, кирви толс палозо! — стясь мик Виктор Романович. — Кудонть марто мезть ней кармат тейнеме! — лиссь столенть экшстэ секретаресь.

— Кода мезть? — лиссь Ярцевгак. — Кудосонть эри заслуженной учительница. Кадык эри шумбрасто. Од эрямось, косо весемесь ули вейсэнть, ней уш аволь васоло. Тосо кияк сянгора вайгельсэ а карми пижнеме: «Монь кудом! Монь пирем! Монь кискам!» Ёмить неть а паро валтнэ.

Лембестэ явсь мартонзо Леонид Корнилович.

— Ульть шумбра, мазыйдеяк мазыйломань! — кеместэ сювордызе кедензэ. — Пачкодят Сурскоев — совак. Сюкпря тенк!

## ГРАНАТКИНЭНЬ ЧАСИЯЗО

Июнь ковонь лембе ды маней чокшне. «Маяк» заводонь клубось весе цеця потсо, пешксе кенярксов од ломанде. Весень чамаст валдт. Залсонть седи радиола, ушосо — аккордеон. Киштить ды морыть тейтерть, од цёрат. Моли комсомолонь свадьба. Урваксты коммунистической трудонь бригадосо важодицясь Вениамин Гранаткин, сая гипсоблоконь тейница роботницанть — Малинкина Таисиянь.

Клубонь покш залсонть кувака столь. Лангсонзо ансяк нармунень ловсо арась! Экшсэнзэ весе бригадась, урвакстыцяньты ды одирьванть ялгасть-оят. Столенть песэ — одтнэ. Тетяньавань таркасонть озадо велень Советэнь председателесь ды РСФСР-нь Верховной Советэнь депутатось Галина Фёдоровна Сыресина.

— Мезе, оят? — саизе цярканть ды стясь. — Неяви, весе пурнавсть. Ушодтано эно. Икелевгак мерян тенк вана мезе.

Илямизь чумондо а эсь тевезень кундсеманть кис. Тынсь со-  
дасынк, кода тевесь ашти. Венка марто Тасянь тесэ арасть те-  
тяст-аваст. Секс кармавтымизь васенце валонь ёвтамо. Видь-  
кстан, ялгат, монень чуросто савкшнось яксемс истямо тевга.  
Ялатеке ёвтаса видьстэ: те свадьбась моненьгак покш кеняркс.  
Эдь вейс сюлмизь эрямост тынк заводонь кавто пек паро ва-  
жодицятне.

Виде, аволь шождыне киява састь сынь уцяскантень. Ды сон  
истя аштияк тевесь.

Шождыне кинь кочкsezь, алкуксонь уцяска а муят. Ан-  
сяк се паро уцяскась, конань кис ливезь валат апак жаля. А  
мезть кортамс, парсте работасть Венка марто Тасят, мазый-  
стэ эрясть меельце шкастонть. Сынь, неяви, аволь мала-  
викстэметь, аволь майсиця урозкеть. Перькаст ялгатне —  
пародояк паро раськеть. Теде паро костояк а муят. Мезе  
оштё ёвтамс тенк? — аламось арсезевсь председателесь. —  
Роботатадо тынь парсте, эрядояк истя! Лездадо вейке-вей-  
кенк туртов, мелявтодо вейке-вейкенк кисэ. Ялганкак  
илинк стувтне. Сон эдь кода тевесь ашти? Тоят паро ломан-  
тненень — эстеть кавксть седе паро пандыть. Мезе максат  
ломантненень, секень велявтсызь теть мекев. Паро эно.  
Прядса тень лангс. Арсян тенк парсте роботамс, алкукс  
уцяскавсто эрямс!

Сондензэ башка, кортась бригадирэсь ды Венка марто Та-  
сянь ялгатне. Весе арсесть тенст паро эрямо. Казсть ламо пит-  
ней казнеть. Мейле ушодсть киштеме-морамо.

Галина Фёдоровна аламось аштесь мартост, киштьсь, мейле  
простясь ды сырғась кудов. Лиссь фойентень, аламонь тарка  
мольсь ды лотказевсь: икелензэ, кенкшенть эйстэ аволь васо-  
ло, стенантень нежедезь, аштесь ниленьгемень ветешка иесэ  
серой костюмсо ава. Вакссонзо путозь чемодан, ланганзо ка-  
язь пиже плащ. Сон, бульчом, авардсь, ней капшазь нардтни  
сельведензэ. Сыресина зярсыя вансь лангозонзо, мейле мольсь  
малазонзо ды кевкстьсь:

— Те тынь, Елена Васильевна?

Тона, прок тандадозь, варштась лангозонзо, мейле аварь-  
гась ды нежедизе пряно депутатонь мештентень.

— Простямизь, Галина Фёдоровна, — ниреждезь кортась  
сон. — Нолдынк чумом каштмолеманть кисэ, а сёрмадо-  
манть кисэ.

— Мекс эзиде сова? — кевкстизе Галина Фёдоровна. — Тосо  
свадьба. Венка урьваксты. Мон тенк сёрмадынъ.

— А содан, мезть тейнемскак, — нардтни сельведензэ Еле-  
на Васильевна. — Сон кортамояк а карми монь марто.

— Оймадо, — вадяшизе лавтовга Сыресина. — Тон Венкань  
авазо. Молян тердсья.

— Вай, илинк, — кундась кедезэнзэ сыщясь. — Илинк тер-  
де аламось. Кунсолормизь васня. Паряк, кортамояк а карматадо  
мартон. Мон меельце ульнинь кассирэкс. Мирденть кувал-  
ма теинь асатома: симсь. Инеськеть, илядо апаргадо. Весе пан-  
дыя. Улипаром мияя. Кадовинь вана весе тень марто, мезе лан-  
гсон ды чемодансонть. Тосо киненьгак а эряван. Модемс а ков.  
Ды сынь вана тей...

— Видестэ кортатадо? — сельмезэнзэ ванозь кевкстизе Га-  
лина Фёдоровна.

— Мельсэнгак арась кенгелема.

— Ярмаконть весе пандык, мерят?

— Трёшникень пес. Вана докуметгнэньгак туинь, — панжи-  
зе сумканзо ды кармась вешнеме.

— А эрявить, — яходсь депутатось. — Учодо. Мон нейке.

— Пелян, Галина Фёдоровна. Сон ломань пингстэ сёвно-  
самам.

— Стяко мелявтгадо, — пейдезевсь Сыресина.

Кеменьшка минутань ютазь лиссь Венка марто. Мельгаст —  
бригадирэсь.

— Шумбрань парочи тенк, авай! — мольсь эйзэнзэ Венка.

Елена Васильевна каявсь кирьгазонзо ды макссь оля сель-  
ведтненень.

Зярсыя савсь тенст ладсемс сонзэ. Ансяк зярдо алкукс ой-  
мась, сестэ совасть залонтень.

— Ялгат, — серьгедсь бригадирэсь. — Варштадо весе тей!  
Нуртядо цяркат! Венкань родной авазо сась! Сон ней минек  
ютксо! Елена Васильевна, уледе содавиксэкс весеменень!

Цёратне кеместэ сюрордызь кедензэ, аватне лембестэ па-  
лызь. Таисия кутмордызе, прок вечкевикс аванзо. Мейле се-  
деяк виевстэ ушодовсть киштематне-морамотне.

Галина Фёдоровна аштесь озадо Елена Васильевнань  
вакссо ды мельпаросо ваннось весемень лангс. Кодамо  
паро ломаннень уцяскань каземась! Ды арсезевсь седе, кода  
те ушодовсь.

\*\*\*

Ульнесь сентябрянь сумбора чи. Менелесь копачазель чопода-сэнь пельсэ. Пувась кельме варма. Сувтнесь чова пиземе.

Галина Фёдоровна ютыль станциянь площадень песэ пивань микшнама ларёконть вакска, конань икеле аштеть пива кружка марто ниле-вете цёрат.

— Тон мезе, превстэ лисить? — каятотсь депутатонть пилес иредьстэнь сянгора вайгель. — Паряк, чинть алга якамодонть мелеть мольсь?

Сыресеина лоткась ды варштась лангозост. Цёратнеде аламодо ве ёно, ларёк уголонтень керш лавтовонзо нежедезь, аштеть аволь сэрэй, рудазов ды нулав од ломань. Умок апак нара, тюжала черь, ансяк касомо ушодыця чуро сакалонзо педесть-чачованзо. Пряно аламодо удалов каязь, а покш суликасто симсь мезде-бути раужодо.

— Седе курок бу венстемс пильгтне, — кургстонзо суликанть саемадо мейле кортазевсь симицясь, — вейке назолодо седе аламо карми улеме. Мезть эно лият тейнемс? — умок апак шля чаманзо сормсезь поладсь сон. — Арседе тынсь. Минек эдь кода теvesь ашти? Бути пупордясь ломанесь, чавт эйсэнзэ. Зярс а пачкоди пес. Арась тензэ тарка ломантнень ютксо! Промкссо, газетасо — эрва косо пижнить: «Илязт ульне истятнэ минек ютксо!» Ков эно модемс? Ёвтадо! Ковонть лангов кись эштё эзь тееве. Каднови вейке — венстемс пильгтнень. Бутравгадомо кармиця сэнь сельмсэнзэ кежейстэ варштась сон цёратнень лангс ды одов тонгизе кургозонзо суликанть.

Галина Фёдоровна капшазь мольсь малазонзо — вачкодизе кедь ланга. Суликась прась кевтнень лангс ды порксавсь. Симицясь виевстэ юхадсь кедьсэнзэ, снартнесь вачкодемс аванть. Лия цёратне каявсть ялганть кирдеме. Ансяк Сыресеина эзь тандадо. Аштеть икелензэ ды кежейстэ вансь симицянь келейстэ теткевезь сельмтнес. Тона ризнэзь варштась сулика пелькстнэнь лангс ды нолдызе кедензэ.

— Адядо! — саизе ожадо Галина Фёдоровна. Симицясь апак корта сырғась. Пива кружка марто цёратне дивазь вансть мельгаст.

Сыресеина ды а содавикс од ломанесь пачкодсть парикмахерскоенть видьс ды совасть тозонь.

— Нарынк, инеськеть, те од ломанень, — энялдозевсь парикмахертнэнь икеле депутатось.

Ваньксавтовсь рудаз марто човор сакалов чамазо. Галина Фёдоровна пандызе нарамонтъ кисэ питненть ды саизе од цёранть мартонзо велень Советэв.

— Кода леметь, фамилият? — диван лангс озавтомодонзо мейле кевкстизе.

— Гранаткин... Вениамин, — пряно нолдазь пшкадсь од цёрась.

— Вана мезе, Венка, — чевтэстэ кортазевсь депутатось. — Тон, неяват, цёрась чарькодицят ды аволь превтемакка. Ларёконть вакссо а видестэ кортыть, буто минь эрванть, кона манявсь, пантяно ломантнень ютксто. Тон зняро класст прядыть?

— Вейксэ.

— Сестэ а мезть тетэ ёвтнемс. Эстетькак эряви чарькодемс. Минек васенце теვენек — лездамс весе ломантнень паро эрямонь ладямосонтъ. Мик сетненьгак, конат зярдэ-бути пупордекшнестъ. Лездамс прыцанть, стявтомс сонзэ пильге лангс. Истямо минек коенек. А ней ёвтнек эсь прядот.

— Мейс? Одов пекстасамизь? — келейстэ теткезь сельмсэ варштась Гранаткин. — Тынь кие? Следователь?

Сыресеина ёвтызе тензэ, кие сон.

— Визькс аштемс истямо ломанень икеле, аволь ёвтнемс, — нолдызе пряно Венка. — Мезе мон ёвтиян тенк эсь прядон? Берянде башка, мезеяк арась монь эрямосо. Тынь парсте тень несынк. Ломанесь пачкодсь, кода мерить, седе вассов а ков. Аздан, мейстэ ушодомскак, — уктась сон. — Мон Сызрань ошто. Тетянь а помняса: колмо иеть тень топодекшнестъ Отчественной войнань фронтов туюмстэнзэ. Сон чавовсь. Авам лиссь лиянень. Сень марто явсть. Мусь омбоце. Сень мартаюк эзь ладя. Бульчом, мон ульнинь чумось. Войнадонть мейле школав карминь якамо. Авам нилецеде лиссь мирденень. Эрямом ульнесь пек стака.

Тонавтинь а беряньстэ, хоть лиясто оршамскак ульнесь а мезе. Вейксэце классонть прядомадо мейле ялгань марто симинек. Тюрьгадынек. Мон поркснинь рестораноень вальмат ды пива кружкасо вачкодинь официантка. Судимизь. Авам судонтень эзь яка. Бульчом, визькс тензэ ульнесь. Паряк, мелезэ молекшнестъ эйтэнь. Судямодон мейле сёрмаяк тень эзь кучне. Ней а содангак косо, — таго стакасто уктась. — Аштия сроконтъ. Север ёно завод строинек. Нолдымизь. Ярмакон, зяро ульнестъ, ютавтынь



чугункань кинть видьс самс. Ардынъ билеттэме. Мезе ульнесь лангсон — микшнинь, сэвинь. Кундымизь ды тынк станциян-тень валгстымизь. Кеменце чи тесэ эрян. Вачо. Саламо а машинтан, вешемс — виздян. Ботинкан ульнесь вадрят, миинь, ярмаконт лангс раминь чапамо ведь. Седе тов содасынк...

— Комсомолсо ульнить? — кевкстизе Сыресина.

— Кавто иеть.

— Мекс эзить сова комсомолонь райкомс?

— Ней эдь мон аволь комсомолецан.

— Сынь ялатеке тетъ лездавольть. Мезть арсят тейнеме?

— Робота бу костояк муемс, — энялдозь варштась сон депутатонт лангс.

— Теске кармат роботамо?

— Куш косо.

Галина Фёдоровна телефон вельде ёвтась Гранаткиндэ комсомолонь райкомонь секретарентень, кона алтась кинь-бути тей кучомо. Сень самс Сыресина звонясь гипсозаводонь директоронтень роботань кувалт. Эзизе стувто кевкстемс эрямо таркадоак.

— Карьерс эрявить робочейть, — ёвтась сон Гранаткиннэнь. — Гравиень таргамо ды пештямо. Молят?

— Хоть нейке.

Сась ломань комсомолонь райкомсто. Сыресина ёвтнизе тензэ, мезе ульнесь Венка марто.

— Азёдо, инескеть, ветинк гипсозаводонь директоронтень, — энялдозевсь депутатось. — Сон максы тензэ робота ды тарка общежитиясто. Тонеть, Венка, вана колоньгемень целковойть. Садстыть зарплатань максомс. Зярдэ ярмакот кармить улеме, пандсыть.

Гранаткин талнозь ваны лангозонзо.

— Саить! — капшавты Сыресина.

— А бути оргодян? — стясь диванонт лангсто Венка.

— Ковгак а оргодят, — лиссь столенть экшстэ председателесь ды тонгинзе ярмактнэнь цёранть коморс.

Гранаткин варштась Галина Фёдоровнань валдо сельмтне-нень ды, вайгельсэ авардезь, прась мекев диванонт лангс. Шумбра лавтовонзо зярсая сорность а кирдевица авардема-донть. Мейле стясь ды апак корта лиссь комсомолонь райкомонь роботницанть мельга.

Седе мейле, кавто ковонь ютазь, Гранаткин совась Галина Фёдоровнанень од костюмсо, ваньксстэ наразь. Путинзе ике-

лензэ ярмактнэнь, ёвтась тензэ паро валт ды суюкпря. Кенярдозь ёвтнизе, кода ней эри сон. Кармась тонавтнеме чокшнень школань кеменце классо. Бригадась, косо роботы, бороци коммунистической трудонь лементь кис.

— Аватъ ледстнесак? — кевкстизе депутатось.

— Ледстнеса, — аламодо нусмакадсь Венка. — Стакасто моли сонзэ эрямонь лувозо.

— Эряви сёрмадомс тензэ.

— Монь а кунсолосамам.

— Монень бути сёрмадомс?

— Тень кисэ пильгезэнк суюконян, — седейшкава кенярдозевсь од ломанесь. — Монь марто беряньстэ тейсь. Ялатеке жаль.

Седе мейле Галина Фёдоровна сёрмасо вешнизе, косо эри ды роботы Венкань авазо — Елена Васильевна. Ансяк авась эзь кучо каршо вал. Кавто иеть ютасть седе мейле. Зярдэ Венка арсесь урваксто, оштё кавто сёрмат кучнесь аванстэнь Сыресина. Ёвтнизе, кода полавтовсь ней сонзэ цёразо. Тонась жо яла чатьмонсь. Ды ней вана друк сась тей.

Кодашка Венкань кенярдомазо! Авазо сась сонензэ ды теске карми мартост эрямо. А седе вишкине ульнесь кенярксозо Галина Фёдоровнаньгак. Свадьбадонть мейле Гранаткиннэнь макссть од квартира. Авазо кармась роботамо заводонь конто-расо. Оштё вейке ломаннень лездась депутатось.

## ИСТЯК САКШНЫ УЦЯСКАСЬ

### I

— Мезе, мезе? — пижнесь Матвей телефононь трубкантень. — А молян! Кадык. Содан: обкомонь членан. Паряк, эсь тевем а топавтан? Бригаданок аволь пуло песэ ускови. Тувталось? Буто а содасынк? Паринат сокатано! Эка, кодашка тевесь! Выговор? Хоть сисем! — Сон кежейстэ путызе трубкантъ ды, конястонзо ливезенть нардтнезь, лиссь экше коридоронтень, косо оштё кавто бригадирт учость колхозонь председателенть.

— Ёнсто, бульчом, псинть каясть? — кевкстизе вейкесь, конань чамасонзо ульнесь покш аржо\*.

\* Аржо — шрам.

— Обкомонь член, обкомонь член, — мекев-васов яказь ды машнетезь, кортась Матвей; сонсь таргизе сурсемензэ ды кавксть-колмоксть яходинзе удалов якстерть мериця черензэ. — Сынст койсэ, бути обкомонь член, сестэ сизьгемень сисемев сезевть.

— Ков командировить эйсэть? — кевкстизь ялгатне.

— Толбандя кирвазтить. Минек средней школань кеменце классонь тонавтниятне весе кадовить эсенек колхозс. Тень кувалт, содазь, кармить улеме кеняркст. Монень, комсомолонь обкомонь членэнтень, тосо улемка. Вал ёвтама. Сёрмадомс газетас. Мерят, лиянень а кинень. Муизь сёрмадыцянтъ...

— Тов молема, Матвей, — пшкадсь сыре бригадирэсь Туманов, кона ветни трактор васенце колхозтнэнь чачома шкатнестэ саезь.

— Кеменце классонтъ прядомадо мейле весе цёратне истя парсте содасызь тракторонтъ, куш течи макст тенст машинат. Ведь монь кондямо атятненень шка туемс каштлангсо аштеме. Эрявить одт кастомс, алкуксонь ёроков трактористт.

— Содан, — мерсь Матвей ды мекс-бути седеяк верев илештинзе ожанзо. — Тонеть, Максимыч, эряволь бу молема тов. Ули тетъ мезе ёвтнемс. Мон весемезэ омбоце ие бригадиран. Мезде карман кортамо?

— Аволь иетнесэ теvesь, Харитоныч. Теvesь, браткем, сеньсэ, кодамо таркасо аштят, — мерсь Туманов ды озась стенанть ёжосо скамиканть лангс. — Тов молема, Матвей. Тон сынненст весемеде паро невтевкс. Эдь аволь умок тонсь стить сеть партатнень экшстэ, косто ней сынъ лисить.

Сась колхозонь председателесь, ды весе совасть мельганзо. Тевензэ прядомадо мейле Матвей озась мотоцикланзо лангс ды ливтязь ливтясь паксяв, косо роботы бригадазо.

«А молян, — кортась цёрась эсь пачканзо, ды сеске сельмензэ икелев теевсь мазый тейтерень ашо чама, валдо-сэнъ сельмть, превей вановт, весела пейдема. — Молема, неемс ды мейле таго майсемс? — арсесь Матвей. — Мейс одов сыремтемс седеень ташто сэредематнень. Ниле иеть эзия нее. Ялатеке чинек-венек ашти икелень. Эх тон, варьга курго! — кармась од цёрась эсь прянзо сёвномо. — Таго максыть оля сокор седеентень...»

Ялатеке Матвейнень эзь саво оргодемс толбандянтъ эйтэ. Комсомолонь райкомонь секретаресь сонсь токшесь будказост.

— Абунгадыть монь самонтень, Харитонов ялгай? — кортась сон будканть вакссо. — Тон райкомонь ды обкомонь членат. Областьсэнтъ икелев молиция бригадират. Ансяк покш теветень эрявикс питне а путат. Тон арсека: средней образования марто ниленьгемень од ломанть кадовить роботамо колхозсонок. Тонсь чарькодят, кодамо покш те теvesь. Од ломантне тонъ вечкядызь. Монь койсэ, меньгак тувталт арасть а молема толбандянтъ ваксс.

«Эх, алуж, — укстамодо мейле арсезевсь Матвей, — содавливть как, кода теvesь ашти, чарькодевлемик ды тов аволемик кучо».

Тувталось, видеяк покшоль. Теvesь вана мейсэ. Средней школасо Матвей васенце классто саезь кеменцентъ прядомс тонавтнесь вейке пек превей ды мазый тейтерька марто. Лемезэ Эльза. Эх, кода морыль, ёвтиль стихть ды сцена лангсо налксыл! Тонавтнеськак вадрясто. Сырнень медаль марто прядызе кеменце классонтъ. Матвейгак пароль тонавтницясь, кавто иеть ульнесь школань комсомолонь организациянь секретарькс. Тонавтнесь сонгак аволь беряньстэ. Ансяк алгебрась ды геометриясь кирдсть эйсэнзэ, кодаяк «нилень» трокс эзь кирнявтово. Зяро виздема кирдсь тень кувалт! Ды оштё неть тюзала чертне. Паро бу, улелельтькак истяк тюзат, а ней якстереть мик. Зяроксть бритвасояк нарсевтинзе, ялатеке истямокс касыть. Ды оштё чамасонзо пизьгататне. Косто саевсть? Эрьва тунда, самай мазый ды паро шкасто, прок ожо цецят, панжить чамаумарьганзо ды судонзо лангаяк мик. Мейсэ ансяк эзизе шлякшно чаманзо! Кодаяк а маштыть. Куш аволь вестъ марясь Матвей: тейтертне ловить сонзэ мельстуциякс — цёрась ялатеке ловсь эсь прянзо аволь уцяскавокс.

Те теvesь ушодовсь вейксэце классо тонавнемстэ, зярдо Матвеень васенцеде кочкизь комсомолонь комитетэнь секретарькс, а Эльзань — комитетэнь членкс. Ёжовтомо кармась вечкемензэ. Кортамс теде вестькак эзь корта мартонзо. Эсь пачканзо ансяк, салава вечкизе. Покш мельспаросо кунсолось тейтерентъ мазый вайгелензэ, салавинька ваннось лангозонзо. Зярдэ Эльза кодаяк казилить валдо ды лембе варштавкссо, карциганонь сёлмот чачилить алянтень ды анок ульнесь ливтямо пельтнеде верьга. Ламоксть чокшне ланга ильнилизе тейтерентъ кудо видьскак. Содазь, аволь кавалалдо кундазь. Ве ёно мельганзо молезь. Салава. Пачкоди се видьс, косто Эльза сови кудов, уксты кавксть-колмоксть ды, прянь нолдазь, туи мекев.

Ламоксть снартнесь кортнемяк мартонзо. Икелев те покш теветень анокстыль, валтнэньгак весе ладсилинзе истя, кода эрjavсть ёвтамс истямо шкане. Ансяк кодак кадови Эльза марто ськамонзо, ледить мелезэнзэ тюжа чертне ды пизьгататне, якстерьгады ды стувтсынзе весе парсте аравтнезь валонзо. Снартнесь сёрмасо ёвтнемс тензэ эсь седей ёжонзо, стихотворенияткак ламо сёрмалесь. Зяро конёв ютавтсь! Ялатеке эзь сато виезэ максомс сынст тензэ. Ды истяк кадовсь те салава вечкемась апак ёвта.

Эльза кеменце классонтъ прядомадо мейле тусь тонавтнеме институтов. Матвей жо оштё школасо тонавтнемстэ эрjва кизна лелянзо марто каникулань перть важодсь трактор лангсо. Вейксэце классо сонсь парсте ветниль трактор, сеедьстэ полавтнилизе лелянзо. Тракторонь ветямось сонензэ марjвсь покштяок покш уцяскакс. Ды кода эно? Велень хозяйствань механизатор! Сюронь видицятнень ютксо васенце ломань! Матвей умок арсизе: ули трактористэкс. Ды ялатеке эсь прязо кодаяк эзь аравтово Эльза марто рядсек. Секс кеменце классонтъ прядомадо мейле сонензэ уш ваномскак эзь саво Эльзань лангс: тейтересь тонавтнесь пединститутонь литературань факультетсэ. Матвей кизэнь перть роботась тракторонь бригадасо, сёксня саизь армияв. Ялатеке тейтересь эзь явово мельстэнзэ: тейсь седеяк кеме пизэ алянть седеезэнзэ ды кадовсь тозонь а паневиця, весень кирдиця азоркс. Косо бу аволь уле Матвей, Эльза аштесь икелензэ, кенjрдовтсь ды эждjась эйсэнзэ валдо вановтсонзо ды лембе пейдемасонзо. Кавто иеть служась армиясо — лиядо эзь арсе, куш содась: те тейтересь сонензэ аволь ансяк зjрдояк а сави кутмордамс, секень вант, а сави мик неемскак. Армиясо ульнесь танкистэкс. Тосто самодо мейле кармась роботамо эсест МТС-сэ — васня ансяк трактористэкс, мейле аравтызь бригадирэкс. МТС-стэ техниканть рамамодо мейле роботы эсест колхозсо. Васенце иень кизэнтъ уш бригадазо лиссь районсонть васенце таркас, сёксень роботатнень прядомсто областьсэнтькак лиссь весемеде икелев. Ламо сёрмадсть кувалманзо, областной газетань васенце страницасо печатъзь портретэнзэ. Паро куля срадсь цёрадонть. Велесэнтъ весемеде паро тейтересь молевель тензэ одирьвакс. Ды Матвеень мельсэ нейгак аштесь ансяк Эльза. Авазо ламоксть кортнесь мартонзо урjвакстомадо, кевкстнесь, кинь бу саемс, ёвтнесь тензэ велесэнтъ паро тейтертнеде. Матвей ансяк кунсолось ды кувакасто таргсесь оймензэ.

Истя яла мольсь эрjвась. Райононь конференциясо Матвеень кочкизь комсомолонь райкомонь членкс, областнойсэ — обкомонь членкс ды комсомолонь съездэв делегатокс. Якась Московов. Тосто самодо мейле парсте витнизь трактортнэнь. Тундонь роботатнесjак сонзэ бригадась ульнесь васенце таркасо.

Июль ковсто Матвей марjась: Эльза прядызе пединститутонтъ ды сась роботамо эсест велев. Те кулясь сонзэ пек кенjрдовтызе ды теке марто тандавтызеек. Кода Эльза сась? Паряк, мирде марто? Нама, тевесь сонзэ. Матвеень тень кувалт а кевкстьсы. Ялатеке алясь арсесь кодаяк, куш ве ёндо, варштамс лангозонзо.

Весть ардсь Матвей паксясто мотоцикласо. Прясто пильгс ваднезь мазутсо: веньперть аштесь кунст «ордалиця» вейке трактор ало. Совсесь правленияв, лавкас, мейле велявтызе мотоцикланзо верепе ёнов. Покш сэдъгань ардомадо мейле ве ёндо несъ кавто тейтерть. Сынъ молилеть кинть кувалт пиже наронть ланга. Матвей сеске содызе Эльзань. Тейтересь ульнесь ашо шляпинесэ, лангсонзо валдо-пиже платия, пильгсэнзэ ашо танкеткат, кедьсэнзэ цильдёрдыця ашо сумкине. Кругловой чамазо валдомтозь кенjрдозь мизолкссо. Рунгозо икелень корjас седе виевгадсь, мазылгадсь.

Алясь нолдызе мотоцикланзо састо. Зjрдо Матвей ютасъ вакскаст ды весе мелензэ путозь вансь лангозост, Эльза ялганзо марто мезде-бути кортасть ды ракасть, мик вановткак эзть кая сонзэ ёнов. Матвей вановсь лангозост, цяк эзь пра мотоцикланзо марто канавантень. Мейле ламолгавтызе газонтъ ды ливтязь ливтясь ульцянтъ кувалт, мельганзо кадовсь ансяк пулень кувака кесак. «Эх, чавола, чавола! — сёвнось эсь прязно кудов ардомсто ды кудосояк. — Шкасто эзить стукадть седей кенкшезэнзэ — ней малавгак а нолдатанзат. Мезе улавсто прась, се ёмась. Весемесь эрjви теемс эсь шкасто».

Кувать майсесь цёрась седе мейле. А ёвтавияк, мезе мольсь седейсэнзэ. Кавто ёнкст тюрсть эйсэнзэ. Вейкесь сёвнось, визделгавтнесь сонзэ, эзь мере мик тензэ варштамодожак Эльзань лангс. Омбоцесь, мекевланг, эждjась эйсэнзэ кемемасо, тердсь неемензэ, мартонзо кортамо.

«Сагы, — окойники мерсь эстензэ Матвей. — Мон оштё превстэ эзинь лисе. Кадык апак урjваксто кадован, ялатеке пейдемс а максса прям. Эка, кодамо! Прядсь институт ды кепедизе судонзо конjдонзо верев. Некшнинек минь истjат кисеянь куклат... Эх,

ялгай, ялгай! — поладсь аламос аштемадо мейле. — Чаво мешоксо вачкодидизь письмаронь кудонть ланга! Мейс чумондат истя те мазыйдеяк мазый ды ванькстэяк ванькс тейтеренть? Кие тонеть макссь истят прават! Мейсэ чумозо? Сеньсэ, мекс паро ды превей? Паро ды аволь тонь коряс, автень курго!»

Кода эзь сёвно алясь эзь прянзо, кода эзь визделгавтне, яла-теке Эльза эзь паневе седейстэнзэ — бажась неемензэ.

«Оштё ансяк весть варштан — ды весе! — арсесь тракторонь будкань полка лангсо аштемстэ. — Кодамо вадря сонзэ лангс ваномась!»

Неизе Матвей Эльзань сентябрюнь меельце читнестэ. Средней школань кеменце классонь прядыцятне клубсо ютавтсть концерт. Матвей чульть-чальть марясь: концертэнтэ анокстызе Эльза. Сон кеменце «А» классонь ветиця. Пек учось те чокшненть од цёрась. Парсте шлясь, оршась вадринестэ ды мольсь. Народось ульнесь пек ламо. Озась весемеде удалов, уголс, ансяк истямо таркас, косто седе парсте неяви сценасть, ды седе-ень токнозь учось, зярдо ушодови концертэсь.

Окойники панжовсь занавесэсь. Сценанть удалдо лиссь Эльза, лангсонзо менелень тусонь платия, кавонест черьбулонзо новолезь мештензэ ланга. Сон васня кортась концертэнь программдонть, мейле ёвтызе васенце номерэнтэ.

Концертэнтэ прядовомс Матвей вансь ансяк Эльзань лангс, ды те марявь тензэ покш мельспарокс. Пек паро, зярдо мазый ды превей ломанть чачить масторонть лангс! Зяро уцяска кандыть сынь весеменень! Кода кенярдозь ды мельспаросо весе вастыть эйсэст! Кода цяпить эрва номердэнтэ мейле! Седеяк пек сестэ, зярдо Эльза сонсь морась колмо морот, конань ютксо сонзэ вечкевикс романсось «Я помню чудное мгновенье».

Пелеветь прядовсь концертэсь.

Матвей залстонть лиссь весемеде икеле ды арась фойесэ чопода таркантень. Мезть арсесь тееме, сонськак эзь сода. Паряк, арсесь Эльзань ильгямо ды кортамо мартонзо? Кие соды? Аштесть ды учось. Ломантне, концертэнтэ шнамо валсо кортазь, ютасть ваксанзо. Вана лиссь Эльзаяк. Вакссонзо аламо-до сондензэ седе сэрей, серой костюмсо ды истямо жо тусонь шляпасо цёраломань. Мезть-бути кортась мартонзо. Зярдо лиссть ульцяв, цёрась саиксэлизе кавалалдо, ансяк Эльза менстизе кедензэ ды тусь мартонзо рядсек. Матвей сыненст

а неемга мольсь мельгаст. Сынь тусть ульцянтэ куншкава, Матвей — вальматнень алга.

— Пек парсте тынь, Эльза Филипповна, морынк Чайковскоень романсонть, — мелень ванозь кортась цёрась. — Стяко прыдыде пединститут, аволь консерватория.

— Павел Николаевич, — амельсэ кортазевсь Эльза, — мон пек а вечкан шнамот. Илядо корта истя, бути арась меленк савтомс кежень.

«Вана мейсэ теvesь! — талнозь арсезевсь Матвей. — Од врачось ильти эйсэнзэ. Адя, алуж, пурдак тестэ руленть ды тук эсь кияват. Тесэ тонеть а мезть теemс». Лотказевсь ды меельцеде варшатазь ульцянтэ куншкава молицятнень лангс. Те шканть таго каятотсь врачонть вайгелезэ: ёжо марто кортась мезть-бути Эльзанень, ансяк Матвейнень кодаяк эзть чарькодеве валонзо. Ды сырғась мекев, вере пе ёнов, пильгтне жо кандыть эйсэнзэ ало пев, тейтеренть мельга. Эзь фатяк, кода пачкодсь Эльзамезень кудонть икеле умарь пиренть ваксс ды лоткась пирявксонть ёжос.

— Арась меленк оймсемс истямо покш ды, мон бу меревлинь, пек эрявикс теventь ютавтомадо мейле? — эсь прянь вечкевтеме бажазь, кортась врачось.

— Сюкпря, — кортазевсь Эльза. — Монь мелем ней седе курок прамс тарка лангс. Сиземс эзинь сизе, ансяк прям аламо-до сэреди: псиль клубсонть. Шумбрасто пачкодемс тенк.

— Эльза Филипповна, — чевтестэ пшкадсь врачось, — энялдан икеленк. Озадо, инескеть. Мерееды прядоманзо ушодозь кортамонть.

— А мейс, Павел Николаевич, — ков-бути ве ёнов ванозь кортась каршонзо Эльза. — Эдь секетнень карматадо одов кортамо. Лия мон тенк мезеяк а ёвтан. А мейс стяко шка ютавтомс. Ды сырғась пирявкссо кенкшкенть ёнов.

Матвей сонськак эзь сода, мезть тейнесь. А помнясыяк, кода совась садонтень ды тусто сирентнень юткова мольсь малазос.

— Эльза Филипповна! — пшкадсь се шкастонть врачось, зярдо тейтересь панжизе кенкшкенть. — Эльза Филипповна! Энялдан икеленк, илядо туе истя, илядо уле истямо казямокс. Кунсолынк весе седей вийсэнзэ тынк истя вечкиця ломаненть. Паряк, а чаркодтядо, кодамо уцяскавтомокс кадсамизь истя туемасонк. Аштеде куш аламос... — ды сонсь кода-бути стакасто озась эзementь лангс.

Эльза лоткась, кенкшенть састо пекстызе мекев.

— Павел Николаевич, — покордыця вайгельсэ пшкадсь тей-тересь. — Мезекс те кортамось? Прок седикелень романсо. Мезеяк сон тыненк а максы. Паряк, секе кесакошь одов ушодомс? А мейс. Меельбееде кортан. Мерьса видьстэ: тынь пек паро ломанесь. Превейтядо, илинк алкинъгавтне парочинк.

— Эльза Филипповна! — стясь врачось ды мекев озась. — Со-давлидеяк, кодашка часиядо пирятадо тынь эсь седеенк, кодамо покш уцяскань цецят апак арсе ёрттадо эрямонь кинть лангсто!

— Мазый валось: цецят, — арсезевезь кортазевсь Эльза. — Ансяк цецяткак ломантне вечкить аволь вейкеть. Кой-кинть мельс туи резеда, кинь — магнолия, кинь — куколокшо\*, кинь — чавкань пря\*\*; а кой-кинть мельс тукшны пурьгине палаксонь панжовкскаяк. Сонгак эдь мазый эсь койсэнзэ.

— Лисни тынк ули кочказы цецянк? — лепштявозь вайгельсэ пшкадсь од цёрась.

— Да, — аламодо укстась Эльза. — Ули. Сялгиндеряса меш-тезэнь, сялгса ансяк се цецянтъ. Бути а сави... Сестэ пингем сави ютавтомс цецявтомо.

— Пек уцяскав, бульчом, ды мазый се цецясь, — стясь озам-канть лангсто врачось. — Пек васоло касы?

— Пек маласо ды теке марто пек васоло, — нусманясто ук-стась тейтересь.

— Сестэ простямизь, Эльза Филипповна, — жалиця вановт-со варштасть нусмакадозь тейтерентъ лангс врачось, — илядо кежиявто лангозон.

— Уледе шумбра, — мерсь Эльза ды капшазь совась кенк-шканть.

— Врачось таргась папироска. Зярсья майсесь спичкатнень марто — окояники кирвазтизе ды капшазь тусь проулкаванть больницянтъ ёнов.

Ансяк ней Матвей лиссь кекшема таркастонзо ды, эсь прянзо сядоцеде сюдозь, сыргась вере пе ёнов. «Кодамо локшосо бу тонь парямс, — коргась сон эсь пачканзо. — Ков тон эцнят? Оно ко-дамо аля, врач, цють а аварди икелензэ, тон мезе аштят сонзэ ко-ряс?» Теде мейле мик неманзояк Эльзань эзь бажа. Зярдэ вель-милъ те мелесь превезэнзэ, весе вийсэ бажиль мадстемезнэ.

\* Куколокшо — цикорий.

\*\* Чавкань пря — клевер.

Зярыя ковт ютасть седе мейле, Матвей те шкастонть седеяк содавиксэкс теевсь. Примизь партиянь членкс. Покш очерк печатасть роботадонзо «Комсомольской правдасо». Сеедьстэ сёрмалесть эйтэнзэ областень газетатнесэ. Те шканть перть вестьяк тензэ эзь саво вастневемс Эльза марто. Ней вана сави: содазь, толпандянтъ вакссо сон карми улеме.

## II

Толпандясь ульнесь Сок леенть чиресэ мазый кужосо, ко-нань перька касыть пекшетъ, килейть, тумот ды селейть. Пенг-тне вачказельть колмошка метрань сэрсьсэ. Толось кепететсь чувто прятнеде верев. Весе виресь валдолъ. Соконтъ трокс тар-гавсь валдо келей кесак. Виресь гайгсь вайгельтнеде: кайсе-тетстъ морот, гармониянь кенярксов жойть, гайгсть пионерэнь горнат ды барабант, раксемат ды кортнемат — весе те срастовсь васов леентъ кувалт.

Матвей сась ськамонзо, прянзо апак невте. Коргась комсо-молонь райкомонь секретарентъ марто ды арась сыре пекше алов. Ансяк а куватьс савсь тензэ аштемс ськамонзо. Сеске муизь кеменце классонь сеть цёратне, конат кавто иень перть тонавтнестъ автотракторной кружоксо. Ушодовсть певтеме кевкстнемат, кортамот ды ёвтнемат. Сезинзе сынст седейшка-вань баямотнень пионерэнь горнась, кона ёвтась кеняркскчинь ушодомадонть.

Пек парсте ютась пионерэнь линейкась. Васенце вал ёвтась школань директорось, ёвтнине, кодамо покш патриотической тев теить кеменце классонь тонавтнициятне эсест колхозс ва-жодеме кадовомасост. Сюкпря ёвтась од ломантненень колхо-зонь председателесь. Седей ёжонь валт мерсь комсомолонь райкомонь секретаресь.

— Ней макстано вал, — ёвтась директорось, — весе обла-стьсэнть содавикс трактористэнтень, комсомолонь обкомонь членэнтень — Харитонов Матвейнень, кона истя жо прядызе минек школанть ды роботы трактористэкс.

Матвей васня ушодсь пек виздезь, валтнэ-мельтне сеске эзть пурнаво тензэ паро лувс. Мейле аламось-аламонь виензась. Се таркасонть, зярдэ ёвтась сюкпря учительтненень сонзэ се-дейс патриотической толонтъ сырtemanзо кис, каятошь виев цяпамот. Весемеде пек (бульчом, истя сонензэ неявсь) цяпась

Эльза Филипповна. Те макссь цёрантень вий. Сон, весе седей лембензэ путозь, кортась минек од ломантнень ине уцяскадост, мазыйдеяк мазый эрямодонтъ, кона эрва чине яла мазылгады, прок цветямодо а лотксиця сад, ды конань эйсэ строить сынсь од ломантне, кодамояк стака тевде апак пеле.

Виев цяпамосо ильгизь алянть толпандянтъ ваксто.

Парсте кортасть кеменце классонь тонавтницятнеяк. Теде мейле ушодовсь концерт. Весемеде неяви таркас лиссь Эльза: тесэяк сон ветясь концертэнтъ.

Тей самсто Матвеенъ мелезэ ульнесь истямо: ёвты приветствия ды седе курок мекев. Ансяк истя эзь лисе. Кодамо-бути а ёвтавикс вий кирдизе сонзэ тесэ. Сон аштесь концертэнтъ прядомомс ды ве ёндо, эчке пекше алдо, ваннось Эльзань ёнов. Кода ней туеви Матвей тестэ!

Валске ёнов прядовсь кенярксчись. Весе од ломантне, моразь ды раксезь, сыргасть кудов. Матвей тусь весемеде мейле. Кись кавто ёндо ульнесь копачазь лопава тарасо, конатнень пачк ансяк аламодо неяви чевтестэ цильдёрдыця тештне ды валдомтыця менелесь. Виресь тумадост мейле општ мерсь. Удалонзо кадовозь кужось ваясь оймавтыця каштмолемас. Ансяк икельде марявсть гармониянь жойть, гитарань чевте гайть ды од тейтерень седеень кутстиця морот.

Матвей састо мольсь аллеянь кондымо кияванть. Эрва кодат мельть ульнестъ прясонзо.

Морыщятне те шкане аламось-аламось тусть яла седе васов. Матвей эскелясь, вирень мазынтъ лангс мельспаросо ванозь. Икелензэ мольсть колмо ломанть. Каятотсь тейтерень ракамо, прок баягинень гайть сравтовсь сэтме вирьганть. Вана вейкесь комась цецянъ сеземе, явсь ялгадонзо ды кадовсь аламодо удалов, васня аламось таркат, мейле седе васов. Матвей яла эскели. Икеле молицясь а капши: вана пачкодсть истямо таркас, косо седе чуросто аштить кинть велькссэ тарадтнэ, валдось седе виевстэ пургась лангозонзо. Тейтерентъ кедьсэ лопава тарад, конань эйсэ стамбарнэ яхой кавто ёнов. Матвей пачкодсь малазонзо. Те ульнесь Эльза. Ней уш марявсь тензэ ашо платянь чевтестэ каштордомаськак, сонзэ туфлянтнень аламодо чикордомаськак ды моданть лангс чалгамозояк. Матвей арсесь кадовомс, велявтыксэль мекев. Паряк, цёра марто вастовомо кадовсь? Варштась удалов — перьканзо кияк а неяви. Тейтересь лоткась. Сон пачкодсь малазонзо.

— Окойники муевсь ёмаськеськак, — кортазевсь учительницась ды венстизе тензэ кедензэ.

Матвей талакадсь, келезэяк прок кундатотсь. Ашти ды сельмень апак кончтне ванны лангозонзо.

— Паряк, а содаван? Матвей, кода тенк а визькс?

— Кода истя? — окойники велявтовсь цёранть келезэ ды каподизе Эльзань вишкине кедентъ эсензэ покш ды казямо коморонтень. — Эльза Филипповна! Мекс тынь ськамонк вирьганть?

— Тыньгак ведь аволь кавоненк.

— Ды... мон ваннан. Оймсян. Пек уш паро истямо шкане вирьсэнтъ. Вадряль толпандясь, Эльза Филипповна!

— Матвей, — пейдезевсь учительницась, — мерее монень икеле ладсо. Куш те ледстясы школасо тонавтнемань мазый шканть. Вете иеть ютасть ансяк школанть прядомодо мейле — весе тукшность. Тынь теске кадовиде. Мон сеске, кодак сынъ, бажинь неменк. Тынь прок кекшнетядо эйтэнь. Ансяк газетасто яла ловнынъ кувалманк. Пек паро мелезэнь, зярдю марян ялгадон паро куля. Косот ней весе ялганок? Мезекс роботыть? Тынь вана кодамо содавикс ломанекс теевиде. Монь койсэ, минек классонь ялганок ютксто весемеде мазый кинк.

— Эрванть эсензэ кинзэ, киулонзо, — аламодо нусманясто мерсь Матвей. — Ансяк монень неяви, тынь пейдтядо монь лангсо. Трактористэсь, виде, почётной ломанесь. Ансяк аволь весе бажить тень чарькодеме.

— Матвей, — аламодо апаркстомсь Эльза, — ульнесь зярдюяк истя, зярдю мон а виде мель марто кортавинь ялгадон? Эдь кемень иеть ве классо тонавтинек. Кемень иеть! Те аволь нурькине шкась.

— Содаса, содаса, Эльза Филипповна...

— Таго Филипповна? — чиремтизе аламодо прынзо од учительницась ды лембестэ варштась трактористэнтъ чамас.

— Простямизь, — токизе кедензэ Матвей. — Видеть валонк, — аламодо лувтомо кортась сон. — Видьстэ ёвтаса, вень молить а беряньстэ. Те аволь прынь шнамо, ансяк ялатеке сельмем сявады сеть ялгатнень лангс, конат прядсть высшей учебной заведения. Монь сатотсь вием ансяк эсь прям аравтомс велень хозяйствасо. Тынь вана, Эльза Филипповна, ве тундос ниленьгемень ломанть аравтыде вадря ки лангс.

— А сёпса. Таликаст учительтнень те тевсэнтъ ули. Ансяк миненек тесэ невтемапелекс ульнить тон, Матвей.

— Мезе тень кувалт меремс тенк? — аламодо визделгадсь трактористэсь. — Сюкпря паро валонк кис... — кундызе кедензэ ды кеместэ сюрордызе.

— Тень кисэ вана сюкпря а сави тенк ёвтамс, — кармась кедензэ риктееме Эльза, — икелепелев седе ёжомарязь сюк-прят ёвтнеде.

Кавонест раказевсть ды сыргасть вирень кияванть. Кувать мольсть састо, апак корта, мерят, пельсть: илязсо калавто валонь ёвтамось сынст истя апак учо вастоманть. Икельдест кись явсь кавтов: вейкесь туи вить ёнов, виренть куншкав, омбоцесь — пурдась кершев, пойманть ёнов, косто эль марявикс-стэ кайсететсть моронь вайгельтне.

Эльза мольсь вить ёно. Сон апак корта пурдась виренть потмов ветия кияванть. Молить сынь виренть куншкав, сыремеме кармиця зорянть каршо. Кись пильгест ало прок алкуксонь садонь аллеясо, ансяк тюжа чуваронть таркас ацазь прыця пужозь лопасо. Менелесь вельксэст кармась валдомомо; чоподась аламось-аламось чурокстомсь; лопатнень пачк пургсесь зорянть сыреждть мериця вецана валдозо. Сэтьмечись аштесь а ёвтавомашка: а варма кошт, а тарадонь чирьказевема, а лопань апак учо соракадома; марявсть ансяк, кода пильгест ало каштордсть коське лопатне ды косто-косто цяторгалесть тарадкеть.

— Кодамо мазый те шкане виресь! — сезизе каштмолеманть Эльза, варштась верев ды синдсь укшторонь лопав тарад. — Зяро мель, зяро бажамо сыржавты седеезэть! Аштеде, тынь ведь парсте ёвтнилиде стихть. Арседе, буто нейгак минь кеменце классонь тонавтницият. Ёвтнеде куш вейке стихотворения.

— Кемемизь: ве валгак тень а ёвтави.

— Кунсолодо, сестэ мон ловнан.

Матвей аштесь икелензэ аламодо виздэсь, прок васенце классо тонавтниция учительницанзо икеле. Эльза жо теевсь прок виде-паронь кеменце классонь тонавтнициякс. Раксесь, ёвтнесь стихотвореният, морась. Те шкане чинь валдось менсь тарадтнэнь юткова ды токась сонзэ чамас. Седеяк мазыйкс неявсь тейтересь. Прок аволь чинь валдодонть, сонзэ пейдзевемадонть ды весёласто цильдёрдыця сельмтнеде валдомсь весе виресь.

— Аштеде, мон каштаз кодан, — мерсь од цёрантень ды тусь вирьганть цецянь кочкамо.

Матвей эстензэяк а чарькодевикс кенярдома марто кадовсь вирень кинть куншкас. Шождынестэ таргизе оймензэ ды озась кинть чиресэ мукоренть лангс. Ламоксть неIZE Сок лей чирень виренть мазынзэ, ламоксть мельспаросо ваннось лангозонзо. Ды истямо мазыйкс, кодамо ней, эзизе некшне зярдоак. Те мазысь пештизе од цёранть весе седеензэ, весе рунгонзо кодамо-бути певтеме бажамонь вийсэ.

Виресь те шкане лексезевсь вень удомадонзо мейле: гайтев-стэ морасть цёковт, вешксть вирь озязт ды, прок ламо келень ды вайгелень музыка, гайгсь апак лотксе. Чись те шкане кузсь аламодо седе верев. Весе виресь валовсь валскень сырнень валдосонть.

Матвей покш мельспаросо ваннось весе те мазычинть лангс ды, виензэ касоманть тантейстэ марязь, лексесь коштонть.

Те шканть аволь васоло кужосонть каятотсь Эльзань вайгелесь. Сон морась.

Минутань-кавтонь ютазь кармась неявомо кинть лангсто. Прясонзо укштор лопань каштаз, конань эзга сялгонезь ашо, тюжа, валдо-сэнь, якстере ды лия эрва кодамо тусонь цецят. Кедьсэнзэ вирень мазый цецянь пусмо, сэнть сельмензэ цильдёрдсть валдосто, турвасонзо налксесь чинть кондымо мизолкс.

— Простямизь, Матвей, — мольсь трактористэнтэ икелев, — мон эдь течинь чистэ отпусксан. Ютко шам ламо. Тыненк, паряк, капшамка. Ёжовтомокс прок теевинь, зярс кирдян эйсэнк. Тень вана тыненк, — венстизе тензэ пусмонть, — минек вастомадонть ледстнема.

— Тень кисэ сюкпря, — саIZE од цёрась казненць ды стясь. — Озадо, Эльза Филипповна. Тынь, неяви, сизиде.

— Арась, Матвей. Мон истякак ламо шканк ёмавтовтыя, паряк, сыргатано кудов?

Трактористэсь варштась часонзо лангс.

— Да. Монень шка.

Листь вирьстэнтэ ды видьстэ валгсть ало пес. Зярдо пачкодсть Эльзамезень кудонть икелев, тейтересь кевкстизе:

— А кежиявтнетядо лангозон? Эдь зяро шка стяко ютавтыде мартон.

— Пек кежиявтынть, Эльза Филипповна, — мизолдозевсь Матвей видьстэ сельмезэнзэ ванозь. — Паро бу улевель, бути саволь оштё истя вастомс валскесь Сок лей чирень вирьсэнть.

- Улиндеряй меленк, садо, — валдосто варштась тейтересь.
- Сан.
- Карман учома.

Чевтьстэ сювордызе кедензэ Матвей. Эльзань сельмсэ цель-дёрдсь мельспаро.

Верев кепедевезь чись валсь лембе ды сырнень валдо. Валь-мало садсонть цёковтнэ морасть мазый моро. Матвей кудов мольсь мештезэнзэ а кельгиця кенярдома марто. Сонзэ кон-дыамо уцяскав ломань те шкане арасель масторонть лангсо.

### ЛЕКТОР

Купесэнтэ ардынек колмоненек: ламонень содавикс лекторось Фёдор Александрович Иритов, заслуженной учителесь Антон Филиппович Сураватов ды мон, республикань газетань сотрудиноксь. Иритов ды Сураватов вейкест-вейкест, неявсь, содасть парсте. Монгак сынст содылинь. Мондень жо сынть, бульчом, эзть марсеяк. Ды содамскак тенст а косто. Ниле иеде теде икеле прядынь кемень класст. Средней школасо тонавт-немстэ карминь вечкеме литературанть. Покш мель марто як-синь литературань кужос. Аламодо тонадынь заметкань ды сти-хень сёрмадомо. Васня стенгазетасо печатасть эйсэст, мейле райононь ды мик республикань газетаскак. Секс школанть прядомадо мейле саимизь роботамо райононь газетас. Пек покш кенярксокс те ульнесь монь эрямосо!

Колмо иень ютазь саимизь республикань газетас.

Неть паро ломантнень марто вастомась кармавтымим ар-семе эсь эрямодон. Алкукскак, кода мон эринь те шкас? Сё-помс а мезть, эсень лементь ды фамилиянтъ газетасто неемась ульнесь тень весемеде покш кенярксокс. Седе жо, кодамо лезэ максы ломантненень монь сёрмадомась, вестьяк эзинь арсе. Секс те вастомась лиякс кармавтымим ваномо эрямонть лангс.

Купентень совамодо мейле сеске жо Фёдор Александрович ды Антон Филиппович поладызь, бульчом, икеле ушодозь кортамо.

— Мертядо, комсьвейксэе иеть роботыде Ташто Эрмезён-касо? — кевкстизе лекторось Сураватовонь.

— Куроксто колоньгеменце тонавтнема ие ушодан тосо, — вагон вальмаванть ваномсто мерсь тонавтыцясь. — Комсь иесэ од цёракс молинь тов, педтехникумонь прядомадо мейле.

— Кодамо покш тев тейтядо, Антон Филиппович! А стяко эрятадо масторонть лангсо, — мерсь лекторось учителенть лангс сывадыця сельмсэ ваномсто. — Колоньгемень иеть! Шождыне ёвтамс. Снартта сынст ютамо. Ламо веть, буль-чом, савсь апак удо печтямс. Нама, тынь весе веленть сода-сынк?

— Секень вант, арась эйсэнзэ истямо кудо, козонь мон эзинь совсе.

— Ломаннень савсь лездамс?

— Кодамо тевень кувалт ансяк а молитъ учителентень ве-лесэ! — валдосто варштась Сураватов лекторонть ёнов. — Сёр-мадомс мезеяк — чиить учительнень; арась цёраст пельде сёр-ма — сонензэ; сими аванть мирдезэ — таго тов превень кевк-стеме.

— Ды весе теть яла суюкпря ёвтыть?

— А стувтнесызь.

— Теньшка покш казне арась! — сурсонзо ков-бути ве-рев невтсь лекторось. — Суюкпря ломантнень пельде. Кода-мо мазый те валось!.. Покштояк покш тев теи учителесь, — поладсь аламось арсемадо мейле. — Миньгак вана, лектор-тнэ, койсэнек, тейтяно аволь вишкине тев. Ансяк, содасынк, седеем ялатеке кода эряви а витеви. Виде, эрва лекциядонть мейле ёвтыть тень суюкпря. Путёвкантеньгак сёрмадыть. Ялатеке весе те аволь се, мезе эряви ломанентень. Содата-до, кода тевесь ашти? — монь ёновгак варштась Иритов. — Монень курокуксь ведьгемень кото иеть топодить. Малав ко-лоньгемень иеть, кода лекцият ловнокшнан. Котоце ие ро-ботан ансяк лекторокс. Ды содатадо мезе берянесь? Те шканть перть вейкеяк ломань эзь сакшно тень ды эзь мере: «Суюкпря тенк! Тынк лекциясь виде ки лангс аравтымим». Тынь, Антон Филиппович, эрва чистэ превс путтадо од ло-мантнень. Прок скульптор тевень содазь тейтядо ломанень обуцят. А мон мезе? Ловныя лекциям ды туинь. Кие соды, зярдо вастоват оштё неть ломантнень марто? Секс эрва лек-циястонть туян седеень апак ойма. А содан, теинь эли эзинь кунсолыцятненень кодамояк паро, лездынть эли арась тенст эскельдыамс икелев.

— Стяко тынь истя, Фёдор Александрович, — пейдезевсь учителесь. — Минек лектортнэ пек покш тев теить. Миллионт тонавтыть. А учителесь мезе? Ве школа, вейке класс.



— А содан, а содан, — ютась лекторось купеванть мекев-  
васов.

— Тынь, од цёра-парочи, кода вантадо тень лангс? — кев-  
кстимим монь Иритов.

Мон мик аламодо тандадынь ды теке марто кенярдозевинь:  
окойники, те покш ломанесь пшкадсь моненьгак.

— Тынк лекциянк, Фёдор Александрович, мельстуицят, —  
кортазевинь, — весе шныть эйсэст, ков илязат моле. Миненек  
жо, — тень уш прянь شناзь поладыя, — газетань роботникт-  
ненень, конат чинек-венек эвтить республикаванть, сеедьстэ  
сави теде марсемс.

— Валт! — яходсь кедьсэнзэ лекторось. — Мон сынст мар-  
синь. Тынь васов? — кевкстимим озамодонзо мейле.

— Сурской районов.

— Сестэ вейсэ. Сёрмадомо кидеяк?

— Ули тосо, — мерян, — пек паро ломань, Софья Никола-  
евна Виряскина. Сон РСФСР-нь Верховной Советэнь депу-  
тат. Очерк кувалманзо эряви сёрмадомс.

— Содаса, — валдомсь чамазо лекторонть. — Сонзэ кондя-  
мо, — невтсь учителенть ёнов. — Комсеце ие роботы велень  
Советэнь председателекс вейке велесэ. Омбоцедэ кочкизь Вер-  
ховной Советс. Теде сёрмадомка. Эряви невтемс, кода эрзянь  
тейтересь кассь государственной деятелекс.

Поездэсь лоткась. Минь простинок учителенть марто ды валги-  
нек. Шказо ульнесь чокшнень сисем част. Лоткинек гостиницас.

Монгак молинь Фёдор Александровичень лекциянзо кун-  
соломо. Сценанть лангс сон лиссь од ломанькс. Сэрей, виде  
рунго, од костюмсо, ваньксстэ наразь, ашолгадозь черензэ пар-  
сте судрязь удалов. Эзь моле трибунантень, эзь путо лангозон-  
зо цитата марто эчке портфель. Мик конёв панкскеек арасель  
кедьсэнзэ. Арась сценанть пес, ломантненень седе малав, ды  
ушодызе лекциянзо. Васенце валсонзо тусь весе кунсолыцят-  
нень мельс, сезинзе эрва чинь эрямостод.

— Вана вант, — кортась Фёдор Александрович гостиницав мо-  
лемстэ, — кунсолостье було а беряньстэ. Цяпасть. Сюкпря ёвтасть.  
А кодамо лезэ теинь тенст? Косто теде кармамс содамо?

— Пек покш, Фёдор Александрович, — мерян. — Тынк лек-  
циядонть мейле весе кунсолыцятне аламодо седе вадрылгадсть.  
Ды ванды сынь роботамояк кармить седе парсте.

— А кемеви мекс-бути. Те бути тынь ансяк истя арсетядо.

— Весемень истямо мелест. Азёдо куш кинь кевкстедэ.

Валкестэнтъ савсь явомс тенек. Сон тусь мебелень фабри-  
кав, мон ардынъ Валдо Кужо велев Софья Николаевнань мар-  
то кортнеме. Муия сонзэ школасто.

— Мертядо, сёрмадомо арсетядо мондень? — чевтьстэ ми-  
золдозь вастымим. — Карми-арась улеме тень эйстэ кинень-  
гак лезэ?

Кода маштынь, ёвтния тензэ, мейс те эряви.

— А содан мезть тейнемскак. — Арсезевсь, сайсь икельден-  
зэ конёвт, варштынзе ды мекев путынзе. — Сестэ кевкстедэ,  
мезе тенк эряви, — аламодо сизезь варштась лангозон. — Тунь  
а содан, мезде кармамс ёвтнеме.

— Весе эрямодонк, — мерян, — од шкадонк, седе, кода кар-  
миде роботамо Советгнэсэ.

Софья Николаевна уктась ды арсезевсь.

— Стака ульнесь од шкам, — ушодсь аламос каштмолема-  
до мейле. — Нилененек ульнинек. Мон весемеде покшопинь.  
Тевень теемадо кол ульнинь. Лангс ваномскак тейтерькс а сял-  
довилинь. Арсинь комсомолс совамо, тонавтнеме. Ансяк эзь  
саво. Сась се шканть велентень косто-бути Ламбарь Ига. Пар-  
ровой мельницасо машинистэкс роботакшнось. Ульнесь сон-  
зэ цёразо, Алька. Аволь берянель. Гармониясо парсте седиль.  
Тусь мелезнь ды лисинь тензэ мирденень. Прок сельмень эзть  
нее. Ламот кортасть: а капшамс, ды киньгак эзинь кунсоло.  
Мирдесь кармасть ветямо эсь прянзо беряньстэ. Колмо иеть  
батрачкакс майсинь кедьсэст. Мейле кадымим кавто эйкакш  
марто. Сынсь тусть велестэнтъ ков-бути лияв. Кадовинь съка-  
мон. Мезть тейнемс? Кудов модемс визькс. Эринь содавиксэнъ  
кедьсэ, кинень муськан, кинень мезе. Те шканть ормалгадсь  
вишка эйкакшось. Нина ульнесь лемезэ. Колмошка чить сэ-  
редьськак. Кулось... Сельменьгак лотккесть неемадо: истя авар-  
динь. Аволь улыгак покшкесь, Андрейка, килькштявлия прям.  
Эрявьс эрямс: эйкакшось вешсь ярсамс. Андомс а мезде. Мезть  
тейнемс? Авань сазорозо эрясь Оренбургсо. Се марясь зыяндонть  
ды тердимим тов. Кучсь тень ки лангс ярмакткак. Пурнынъ ну-  
лан-валан, саия эйкакшонть ды туинь. Шказо ульнесь сёксъ.  
Станциянть видсь колоньгемень вайгельбетъ. Пачкодинъ чокш-  
не, чоподава. Арынъ билетэнь саеме. Штюп-кап — ярмакон ко-  
сожак арась. Аздан велесэнтъ ёмавтынъ, аздан ки лангсо. Но-  
вольсть кедень-пилыгень, — меельце кемемапелеськак ёмась.

Туемс а мейсэ, ярсамс а мезде, удомс а косо. Озынь диван лангс ды максынь оля сельведтненень. Зярсая авардинь. Ламо ломанть ютасть вакскан. Ульнесть седеймарицяткак, ульнесть истяткак, конат эзть варштаяк монь ёнов. Весе капшасть. Эрьванть эсензэ тевензэ. Ушосонть мольсь пиземе. Ды сестэ арсезевинь: вана кодамо эрямось. Умок-арась ульнинь кенярдыця, мазый тейтерь. Ней... Киненьгак а эряван. Кода мелеть, истя ёмак-арак. Ансяк стяко талакалинь. Улить истят ломанть, конат монь кондянтэнь кисэяк мелявтыть ды теить эйстэст алкуксонь ломанть. Ансяк сестэ эзия чарькоде тень.

Видьстэ меремс, лиссь вана мезе. Совась вокзалонтень сэрей, кедень оршамосо ломань. Истя, колоньгеменьшка иесэ. Прясонзо сёрмав кепка. Чамазо ванькс ды вечкевикс. Рикстедизе начко кепканзо ды озась монь ваксс. А монь сельведтне кодаяк а кирдевить. Варштась лангозон ды мелявтозь кевкстимим:

— Ковгак мольтядо эли тей сыде?

Монень валгак эзь ёвтаво, седеяк виевстэ карминь авардеме. Сестэ уш эзимим кадо. Ды мон ёвтния тензэ весе, мезе ульнесь мартон.

— А мейс тенк ковгак сыргамс, — чевтыстэ мерсь, — карматадо роботамо теске. Эйкакшось яслясо карми эрямо.

Ды сонсь лиссь. Аламо шкань ютазь совась, мартонзо колоньгеменьшка иесэ ава. Цёрась сеске сайсь билет ды озась поездс. Авась саинзе монь нулатнень-валатнень ды ветимим эсензэ квартирас. Андымизь ават-цёрат ды мадстимизь таркас. Те авась ульнесь яслянь заведующей, Марьянова Ирина Васильевна.

— А цёрась кие? — кевкстия.

— Те Сурской райкомонь омбоце секретаресь Фёдор Александрович Иритов.

Мон мик таркастон кирнявтынь, истя кенярдозевинь.

— Валскестэнтэ, — поладсь Софья Николаевна, — карминь роботамо теке станциясонть эрьва кодамо роботамо, мезес кармавтсамизь. Андрейкань саизь ясляв. Ды мон таргинь ойме. Содасынк, кодашка сестэ ульнесь кенярдомам? Анок ульнинь озномс се ломаненть лангс. Седе мейле те шкас пасиба ёвтан Фёдор Александровичнень. Мариндеряса радио вельде лемензэ — алов суюконян; бути газетасто муса — паласа.

— Паряк, вастник седе мейлеяк? — кевкстия.

— Савкшнось, — витизе пацинензэ депутатось, — кавтошка иень ютазь минек клубсо ловнось лекция. Васенцеде вастомсто таргимим рудазсто ды стявтымим пыльге лангс, омбоцеде вастомсто аравтымим виде ки лангс. Зярдояк а стувтса, кода лекциянзо прядома ёнов мерсь: «Минь сеедьстэ кортнетяно седе, мезе ды зяро макссь тенек Советской властесь. Содазь, Советской властесь пек ламо макссь тенек. Ансяк эряви, ялгат, ванномс тевенть омбоце ёнксонзояк. Эряви арсемс седеяк, мезе тон максат Советской властентень. Чокшне кадовт ськамот эсеть ойметь марто ды кевкстик эсь прят: «Мезе мон теци максынь Советской властентень?» Алкуксонь ломантне истя арсекшнить. Бути тейсть лезэ ломантненень, сеске кеместэ матедевить, бути стяко чинть ютавтызь — веньберть а удыть». Неть валтнэ истя токизь седеем, сельведень мик лиссь. Монень, эсь койсэнэ, Советской властесь пек ламо макссь. Мон жо сонензэ — мезеяк. Секс, зярд лекциясь прядовсь, кевкстия сонзэ: «Ёвтынк, — мерян, — кода седе ламо лезэ макссомс? Мон важодиця. Пек покш мелем седе ламо лезэ тееме Советской властентень». — «Парт меленк, ялгай, — кенярдозь кортазевсь сон, — пек парт. Эрьва ломанентень ули мейсэ ды косо эрьва чистэ теемс лезэ эсензэ родной властентень, кодамо бу вишка тев аволь тее. Роботадо парсте. Зярдояк а манявтадо. Покш лезэ макстадо. А стяко ведь кортыть: «Вейке паро теят народонтень, сон тенть кемень теи». Те кортамось панжсь тень келей ки. Карминь роботамо икеледеяк парсте. Стака тевть тень арасельть. Весе шождынельть. Суюкпря кармасть тень ёвтамо эрьва чистэ. Неть суюкпратне вий тень поладсть. Ды аламонь-аламонь эрямом алкукс мазылгадсь. Примимизь партиянь членэнь кандидатокс. Васня кочкимизь месткомонь членкс, мейле — председателъкс. Тосоаяк важодинь аволь беряньстэ.

Примимизь партиянь членкс. Велень Советс кочкамсто кочкимизь депутатокс, кавто иень ютазь — велень Советэнь председателекс. Кемгавтово иеть райононь Советэнь депутатан. Ютазь кочкамонтень эйстэ омбоцеде кочкимизь РСФСР-нь Верховной Советс. Кода роботан, тень кувалт кевкстить ломантнень, конат кочкимизь. Кадык сынэ ёвтнесызь. Совак куш кодамо кудос. — Аламос арсезевсь, варштась часонзо лангс ды прядызе ёвтнеманзо истямо валсо: — Истя вана теевинь ломанькс. Аволинэ вастовояк сестэ Фёдор Александрович марто,

кие соды мезес понговлинь. Паряк, ледстницямгак те шкас козоньгак аволь кадово. Вана прок весе. Меринь эдь а мезде тенк сёрмадомс. Ды а мейскак. Вейкеде бути ансяк эряволь ёвтнемс. Седе, кодамо покш лезэ теить минек алкуксонь лектортнэ, конат а усксить мартост цитатат улавсо, конат, весе седей виест путозь, ёвтнить народонтень Ленинэнь ине идеятнень. А ней — уледе шумбра, монень кавто чассто улемка Никитенковонь бригадасо, кортыть, сонзэ участкасонть комбайнёрось беряньстэ нуи сюротнень.

Ёвтынть тензэ сюкпря ды капшазевинь Фёдор Александровичень нееме. Сон сась гостиницав чокшне. Те шкантень а покш очеркенть уш сёрмадокшныя. Сеске жо ловнынь тензэ сеть таркатнень, косо сёрмадозь Софья Николаевнаень сонзэ лездамодонтъ. Васня кунсолынзе, мейле сонсь ловнызе.

— Ледсь, ледсь мелезэнь, — од ломанькс кенярдозь кортазевсь, — ульнесь истямо тев. Ансяк те шкас эзинь сода: те ульнесь Софья Николаевна Виряскина. Лисни, монгак аволь стяко эрян масторонтъ лангсо. Сюкпря тенк, — велявтызе мекев сёрмадовксом, мейле поладсь: — А сёпса, течи пек сизинь, колмо лекцият ловнынь. Мадиндерян — пушкасо леднест, а сыргозян. — Ды оймазь седей мадсь койканть лангс. Сеске кеместэ матедевсь турвасонзо чевте мизолкс марто. Секс, бульчом, кортыть: «Ванькс оймесь — весемеде чевте тодов».

Мон кувать эзинь матедеве, велявтнинь ве бокасто омбоцентъ лангс. Арсинь. Ульнесь мезень кувалт арсемс.

### БИОЛОГИЯНЬ УЧИТЕЛЬ

Урмалей велестэ нилешка вайгельбень таркасо ашти «Сятко» колхозонь умарь пиресь.

Кепедезь кись тия видестэ таргавсь райононь куншкакуронтень. Кавто ёнганзо путозь котонь-котонь рядсо кеменьшка иесэ килейть. Вить ёно аштить вирьсэ копачазь аволь сэррей пандт, конань тэкшкетнева тесэ-тосо касыть сэррей пичеть. Кинть эйстэ керш ёно, кавтошка вайгельбень тарка, сравтовсь пакся. Седе тов ушодови килей вирь. Кинть ды пандтнэнь ютксо виртеме тарка, конань куншкава канды эсензэ ведензэ Шошма леесь.

Весе те мазычинть куншкасо путозь «Сятко» колхозонь умарь пиресь, конань пеледензэ ламо тарканть лангсо касыть умарь чувтт. Кона ёнов иля варшта — аштить виде рядт, эрва чувтось прок пильге лангсо латыне. Ламо атямартъ, крыжовникть, инзейть, чукушторовт, эрва кодат ягодат. Кадовикс таркасонть озавтозь эмежть. А саты виеть а совамс те умарь пирентень ды ааштемс сёлтонть вакссо, конань перька касыть виде топольть.

\*\*\*

Шкась ульнесь июль. Пси, ойметь а таргави. Китнень лангсто машинатнень мельга кепсевсь тусто пуль. Паксятнень ды виртнень велькссэ аштесь ашо сув, кона чинь псидентъ аламодо сорнось. Келей розь паксятне кармасть ожолгадомо. Лангаст састо, теке ине морясо, лымбасть толкунт\*.

Райкомонь секретаресь Григорий Порфирьевич, исполкомонь председателесь Антон Павлович ды РСФСР-нь Верховной Советэнь депутатось Галина Федоровна обед шкане ульнесь «Сятко» колхозонтъ. Тосто сыргастъ «Партизанов». Зярдэ лиссть Урмалей велестэнтъ ды «Победась» ардстынзе пандынентъ лангс, икелест панжовсь «Сятко» колхозонтъ самай те умарь пиресь.

— Пурдак топольтнень алов, — мерсь шофёрэнтень Григорий Порфирьевич, — оймсетяно аламос сёлтонть чиресэ.

Чувтотнень самай валныльть. Тосо роботы тонавтнициянь бригадань вейке звена. Ниле од цёрат ды котошка тейтерть нолдтнить умарь чувтонь ундокстнэс ведь, кона вишка чудикерькска пачтяви сёлтстонтъ. Ютксост Урмалей велень средней школань биологось Гаврил Никитич Гамаев, ведьгеменьшка иесэ ломань. Прысонзо олгонь шляпа, понкспильгензэ илештызь. Кирьгазо, кедензэ ды лавтовонзо теке бронзань: калявсть чинть каршо роботамсто. Кедьсэнзэ кшнинь койме. Эрязасто яки умаринасто умаринас ды невтни эйкакштнэнь туртов, кода эряви нолдамс ведесь чувтонтень. Зярдэ неинзе малазост молицятнень, максызе койментъ вейке седе покш цёрантень ды капшазевсь инжетнень каршо.

— Вана тенк сонсь умарь пирень азорось — Гаврил Никитич Гамаев, — пейдезь кортась Григорий Порфирьевич.

— Те самай биологиянь се учителесь, — поладсь Галина Фёдоровна, — кона колхозонь вейкеяк трёшникень апак ютавто кастась вана кодамо мазый сад.

\*Толкун — волна.

— Зяро лезэ макссь мелят колхозонтень? — кевкстизе Гамаевень Антон Павлович.

— Сядо ведьгемень тыщат ярмаксо, — пшкадсь биологось.

— Тедеде, тынк койсэ, зяро пурнави?

— Кода тенк меремс, — арсезевсь Гаврил Никитич. — Мелят пелест умарь чувттнэ цветякшность. Тедеде малав весе. Пек виензасть крыжовниктне, инзеесь, чукшторовтнэ. Монь койсэ, кавтонь знярт, секень вант, карми улеме.

— Колмосядт тыщат? — дивазевсь Антон Павлович.

— Истя.

— Паро валт тетя ёвтыть колхозниктне, —путызе кедензэ биологонть лавтов лангс Григорий Порфирьевич. — А ней тон простямизь минек, илямизь лово нузяксокс. Аламось оймсетяно сёлтонть чиресэ. Шлятано.

— Мон молян курдат\* тенк кундан ды пидян. Кода седе вечтядо: штюрба\*\* эли рестаэ? — мелявтозевсь Гамаев.

— Илядо мелявто, — капшазевсь райкомонь секретаресь.

— Илинк кунсоло, Гаврил Никитич, сынст, — пейдезь мерсь Галина Фёдоровна. — Кундадо ды пидеде седе куроц штюрба. Валске стада марто туинек, те шкас апак ярса.

— Да, Григорий Порфирьевич, — мерсь Гамаев. — Сась монень инжекс Галина Фёдоровна, конанень пингем перть а пандови парось. Бути видьстэ ёвтамс, аволь улевельгак сон — те умарь пиренть таркасо икеле ладсо касовольть кирмалавт. Ды Галина Фёдоровна кедьсэнзэ невтсь икелев, тердсь мельганзо молеме.

— Тынь эдь отпусксотадо? — кевкстизе секретаресь.

— Июнень колмоце чистэнтъ саезь.

— Истя оймсетядо?

— Ков седе парсте?

— Мекс курортов эзиде моле? Июль ковнэнь эдь путёвка тенк Кисловодское анокстазель. Аволь парсте тейтядо, Гаврил Никитич. Ревматизмадо майсетядо, тынсь ведьга кепе якатадо.

— Путёвканть лиянень максовтызе, — пшкадсь кисэнзэ Галина Фёдоровна, — пенсионернэнь, сыре учительнень.

— Сонсь пек од?

— Тевесь, Григорий Порфирьевич, аштесь истя. Ломанесь колмоце ие знялды. Пильгтне атянтъ допрок лоткасть якамодо. А мон оштё чийнян. Ды сеяк а кода стувтнемс: ниленьге-

\* Курда — карп.

\*\* Штюрба — уха.

мень вете иеть атысь тонавтсь эйкакшт. А мон ансяк колоньгемень. Сонензэ максомаль путёвкась.

Григорий Порфирьевич мезтькак эзь мере каршонзо, ансяк лембе вановтсо варштась чамазонзо.

Пачкодсть сёлтонть чирес. Антон Павлович озась тополытнень ало пиже луганть лангс, Галина Фёдоровна — чова илёвсто теезь диванонь кондямонтень. Гаврил Никитич серьгедсь вейке цёрыне ды тусь мартонзо калонь кундамо.

— Мекс истя, Григорий Порфирьевич, бути Галина Фёдоровна аволь лезда, те садось, секень вант, а улевельгак? — кевкстизе Антон Павлович. Сон васенце ие ансяк те районсонть, секс ламодо а соды, мезе ульнесь тесэ икеле.

А тошнаямонь кисэ, — мерсь пиджаконзо каямсто секретаресь, — Сыресина ялгась ёвтнесы тенк те теवंть. А мон молян лездан курдань кундыцятненень.

Галина Фёдоровнанень савсь ледстямс сень, мезе ульнесь кемень иеде икеле.

\*\*\*

Те ульнесь сеске Ине Отечественной войнадонть мейле, зярдэ Галина Фёдоровнань васенцеде кочкизь депутатокс. Весть сась тензэ эсензэ зыянонзо марто ниленьгеменьшка иесэ цёраломань. Лангсонзо валдо-серой костюм, кирьгасонзо якстере кикске марто галстук. Чамазо келей, шержевгадомо ушодыця черензэ судрязь удалов. Сельмензэ эйстэ мольсь кодамо-бути чевте валдо. Вансь видьстэ, сельмензэ ве ёнга апак кайсе, истя, кода ваны ломань, конань седеензэ лангсо арась мезеяк раужо. Кедьлапушканзо покшт ды келейть, нурька суронзо эчкть, кодат эрсить роботас пек бажицянь. Те ульнесь Гаврил Никитич Гамаев.

— Энялдан икеленк, Галина Фёдоровна, кунсолормизь, — пек мелявтозь ды талнозь кортась сон. — Кото ковт роботавтоман. Аволь мездеяк — визькстэнтъ вием маштсь. Тынь кунсолодо, мезе тейсть мартон... Аздан уш, мейстэ ушодомскак. Тынь содасынк, ульнесь война. Фронтсо, чуросто эрсиця ютко шкане, сеedyстэ арселинек седе, кода карматано эрямо войнадонть мейле. Сеedyстэ марсинь кортыцят садонь путомадо. Ды моньгак те мелесь эждысь седеме. Арсян: кадовиндерян живстэ, «Сятко» колхозонтъ копачаса садсо. 1944-це иень кизэнтъ стакасто раньякшнынъ. Кото ковт ульнинъ госпитальсэ. Теде мейле нолдымизь кудов. Ды 1945-це иень тунда тонавтницятненень марто

озавтынек питомник. 1947-це иестэнт минек ульнесь уш вете тѣжадо ламо умаринанок, ламо чукушторовонок, инзеенек ды крыжовникенек. Вете гектарт путынек колхознэнь, озавтынек школанть перька. Весе парсте тусть. Кодамо мель марто роботасть эйкакштнэ! Ды те эзь туде колхозонь председателенть Тараскинэнь мельс. «Минек таркатнесэ ансяк сюрэ виднить. А мезть теваразень тевть тейнемс». Саизе ды сокавтызе садонть, конань колхознэнь путнинек. Весе народнэнь дива ульнесь. Мон васня мартонзо пек сѣвнынь. Анок ульнинь тюрьгадомо каршонзо. Мейле колхозникень промкссо сяддыя. Кисэнзэ пек аштесь минек школань директорось, Ватлашов Архип Иванович. Сон жо роботась парторганизациянь секретарекскак. Мон эзинь тандадо эйтэст. Вешинь: мекев путомс садонть. Кортынь клубсо, бригадасо, фермасо, — эрва косо, косо савсь тень ветямс агитаторонь робота эли ловномс лекцият. Тердимизь весть директоронть кабинетс ды мерсть тень: «Лоткак председателенть авторитетэнзэ калавтомадо. А лоткат — чумондт эсь прят». Мон кортамо як эзинь карма мартост. Сѣрмадынь кувалмаст районь газетав. Сынь кода-бути кармасть содамо теде. Мейле, кавтошка недлян ютазь, тердимим директорось ды макссь тень рононь кармавтома роботасто монь панемадо. Тувталось: арась, келя, педагогической образованиям. Мон васня арсинь: те пейдема. Мейле снартнинь кортамо, кандтнинь документэнь. Сон эзинзе варшта як сынст. Молинь ронов, тосо як тевем эзь лисе. Ардынь облонов, тосо алтасть тевенть ванноманзо. Кувать учомадо мейле, молинь облононь прявтонть. «Мезе ёвтатадо?» — кевкстимим. Ёвтния тензэ тевенть. Конязо сѣрмавсь, сельмечирькензэ дивазь кепедевсь. «Марсинь истямодо, — таргась столь потсто папка, — мезе тенк эряви монь пельде?» — «Ёвтынк, мерян, тувталтнэнь, мейс панимизь, ды максодо тень робота». — «Тонь ведь кодамояк образованият арась, аволь уш тосо педагогической». — «Кода, мерян, арась? Мон прядынь педагогической техникум, велень хозяйствань высшей коммунистической школа. Войнадонть икеле прядынь заочна пединститутонь химико-биологической факультетэнь нилеце курс. Тедеде молема тень госэкзаменс». Путын икелензэ весе документэнь. Ваннынзе. Таго варшта сь икелензэ аштиця папкасонть конѣвтынень лангс. Мейле ёвтынзе тень «алкуксонь» тувталтнэнь: буто мон чавинь Салмаев Виктор марто Вириякин Петянь (неть минек школань тонавтницият), чинек-венек симан, ветецеде урвакстынь, а маштан уроконь

ветямо, а содаса методиканть, валонь кандтницян, калавтыя педагогической коллективенть, а лездан кодамояк общественной тевсэ, а ладян парторганизациянь марто. Кунсолынь весе тень, Галина Фѣдоровна, ды дивсинь, кодамо ломанесь, кона визькстэме сѣрмадызе весе те кенгелеманть. Неть «фактнэнь» каршо монь кодаткак документэнь арасельть. Энялдынь, кучовольть Урмалеев комиссия, кевкстевельть ломанть, тонавтницият, учительть. Алтась. Комиссия кучнесь. Кортасть директоронть ды месткомонь председателенть марто. Монь мик эзимизь тердтнеяк. Тусть ды таго каштмолить. Якинь облонов, таго мерсть учомадо. Пель ие аштян роботавтомо. Аздан, мезть тейнемскак...

— Семиянк покш? — кевкстизе депутатось.

— Котоненек: ним ды ниле эйкакшт. Колмотне тонавтнить. Роботынь ськамон.

Галина Фѣдоровна васенцеде эртевь истямо тевс. Тунь эзь сода, мезть тейнемс. Сон кемсь Гаврил Никитичнень, теке марто эзь сода, кода улемс.

— Мезе тенк меремс? — арсезь кортазевсь сон. — Сави учомс аламос. Мон кой-кинь кевкстян. Колмо чинь ютазь ёвтан тенк.

Гамаевень туемадо мейле Сыресина сеске мольсь Григорий Порфирьевичнень, кона омбоце ие роботыль райкомонь секретарькс те районсонть, ёвтынзе тензэ Гамаевень тевенть.

— Монгак дивинь, Сыресина ялгай, — стясь столенть эхштэ секретаресь ды ютасть мекев-васов. — Исяк Урмалеень вейке коммунист сакшнось тень кувалма. Ды монгак содаса Гамаевень. Вадря учителесь. Весть лекциянзо кунсолыя. Тесэ мезе-бути а виде. Содаса, Галина Фѣдоровна, тевенк ламо. Саинка теньгак эсь лангозонк. Моледе Урмалеев. Самодо мейле ёвтатадо.

Сыресина сеске ардсь Урмалеев. Мольсь школав. Икелевгак тердевтнзе сеть эйкакштнэнь, конань буто Гаврил Никитич «чавинзе». Аламос кортасть мартост тонавтнемадост, колхозсо роботадост, мейле кевкстинзе Гамаевде.

— Кить роботасть Гаврил Никитич марто садонь путомсто?

Весе лездынек, — пшкадсь вейксэце классонь тонавтнициясь Салмаев. — Минек Петя марто прививкань теемеяк мик тонавтымизь.

— Кортыть, пек кежей Гамаев учителесь, — видьстэ цѣрынетнень лангс ванозь, ёвтынзе валтнэнь Галина Федоровна. — Келя, эйкакш мик чавсь?

— Кинь? — дивазевсть цёрынетне.  
 — Мон аздан, истя кортыть.  
 — Те а виде, — стясь Салмаев, — сонзэ кияк рангстамодо-  
 як зярдояк эзизе маря.

Оштё аламос кортась мартост Галина Фёдоровна ды нолдын-  
 зе. Мольсь тетяст-аваст туртов.

— Тынк кургсто васенцеде теде марятано, — седейшка-  
 ва дивазевсь Салмаевень тетязо. — Ды минь веленек моль-  
 тяно Гаврил Никитичень кис валонь каямо. Весе велентень  
 превень путыцякс ашти. Тень весе Тараскин марто Ватла-  
 шовт теизь. Эйкаштнэнь кувалт а мезть кортамскак. Ми-  
 нек Витя лездась Гаврил Никитичень садонтъ путомсто.  
 Минськак колонгемень чувто озавтокшнынек. Тынъ неев-  
 линька, кода парсте тукшность. А колхозонь умарь пиресь  
 мезе ульнесь?! Эрявсь ведь, Тараскин сокавтызе! Судямс тень  
 кис эряволь бу. Тон арсека, колмо пель марто тёжат чувтт!  
 Кемень тёжат целковойде ламо питнест. Гаврил Никитич пу-  
 токшнынзе питневтеме.

Текень жо ёвтызь лия тетятне-аватне. Ды весе лияськак  
 поцезель сур прясто.

— Мон истя арсиньгак, — апаронь кирдезь мерсь Григо-  
 рий Порфирьевич, зярдю ёвтнесь тензэ Галина Фёдоровна.  
 Сеске гайневтсь облононь заведующеентень, ёвтась: Гамае-  
 вень кувалт сёрмадозь весе материалось — кенгелема. Энялдсь  
 Гамаевень аравтомадо эсь тарказонзо, Урмалей велень сред-  
 ней школасо роботамо.

Сеске жо тердевинзе Тараскин марто Ватлашовонь.

— Монень вана мезе эряволь бу содамс, — кортазевсь сек-  
 ретаресь, зярдю совасть чумотне, — мезень кисэ панезь робо-  
 тасто Гамаев Гаврил Никитич?

— Эли сонзэ панизь? — прок дивазевсь Тараскин.

— Мон, видьстэ ёвтамс, аздангак теде, — мерсь Ватла-  
 шов, — местком неть тевтнень якавтынзе.

— Тынъ мезе, монь пакшакс ловтадо? — стясь столенть эк-  
 штэ Григорий Порфирьевич. — Вейке мезеяк а соды, омбо-  
 цесь — кекшни месткомонь экшс. А сень а несынк: видечинь  
 кис аштица ломань тынк кувалт котоце ков ашти роботавто-  
 мо? Тынъ мезть тейнетядо? Покш семия лангсо нарьгатадо.  
 Кода тенк а визькс? Тынъ ведь коммунистадо! Сёрмадынк,  
 кода ашти теvesь. Бюросо ванносынек.

\*\*\*

Гамаевнень ульнесь пандозь се шканть кис, конань сон  
 ютавтызе роботавтомо овсе аволь эсь чумонзо коряс. Лома-  
 нентень чачсь од вий, сеске кундась умарь пирень одс озав-  
 томанзо. Весе седейсэ лездасть тензэ тонавтнициятне ды ве-  
 лень эрициятне.

### ШОЖДЫНЕ ПРАМОСЬ — СТАКА МЕКЕВ СТЯМОСЬ

Гайнурин Панька кассь, кода мерить, прок Пазонтъ кавал-  
 ало. Сонзэ авазо, Тамара Ивановна, цёранзо кастомань мелявк-  
 сонть саизе эсь лангозонзо. Панькань тетязо, Леонид Петрович  
 Гайнурин, роботы районсо ответственной роботникекс. Сонензэ  
 аютко эйкакшонзо кастомадо арсема: теვენзэ пек ламо. Эйсэнзэ  
 усксить «Волгасо». Валске — роботамо таркав, обедстэ — обеда-  
 мо, роботадо мейле — кудов, куш эряськак сон посёлкань цент-  
 растонтъ колмосядошка метрань тарка. Квартирасонзо телефон.

Сень кис Панькань авазо, Тамара Ивановна, пек парсте со-  
 дасы эйкакшонь кастомань ды тонавтомань теვენть. Сон зяр-  
 до-бути прядсь учителень институт, роботась химиянь ды био-  
 логиянь тонавтыцякс. Ансяк зярдю лиссь мирденень Леонид  
 Петровичень экшс ды чачсь чинть алов Панька, кадызе лиянь  
 эйкакшонь тонавтоманть ды кармасть кастомо эсензэ седей-  
 пельксэнтъ.

Оштё ясляв Панькань кармасть усксемензэ «Волгасо», аволь  
 кода лиятнень, — крандазкесэ ды салазкесэ. Мейле Панька тусь  
 школав. Баягинедентъ кавто минутодо икеле усксызь маши-  
 насо. Уроктнэ а прядовить, «Волгась» уш учи эйсэнзэ школань  
 кузтемпесэнтъ.

Котоце классо Панька кармакшнось ардтнеме школав ве-  
 лосипедсэ. Ансяк те эзь туде аванзо мельс. Стака эйкакшонтень,  
 зяро пильге вий эряви путомс чаротнень чаравтомс!

Коезэ цёрканть ульнесь тетянтъ кондымо, кеме: кода мерсь,  
 истя улезэ. Бути кияк а теиль истя, кода мерсь, сёвнылизе, лияс-  
 то мик вачкодilizеяк. Сеедьстэ марсевсь, кода пижнесь ялганзо  
 лангс: «Кинень мерсть? Теик нейке жо! Чийть апак корта!»

Мартонзо тонавтнициятне сельмень сывадозь вансть ланго-  
 зонзо — героекс неяви тенст. Сон аламонь-аламонь виде-паро

кармась ловомо эсь прынзо весе ялгадонзо вадрякс, виевекс ды превеекс.

Эрва чистэ мейсэяк дивавтылинзе оянзо ды ризнэвтылинзе тонавтыцянзо. Сисемеце классо тонавтнемстэнзэ талакавтынзе тетянзо-аванзояк. Весть телевизор вельде вансь футбол. Советской Союзонь сборноеь налкесьь кодамо-бути лия масторонь сборной марто. Панькань мельс истя тусть налксицятне, мик таркасонзо эзь аштеве: пижнесь, кирнявтнесь.

— Мон карман улеме футболистэкс! — кеместэ мерсь алясь, зярдо прыдовсь матчось.

Авазо ёжовтомо цютэ эзь пра. Сеске кармась энялдомо икелензэ: кадовлинзе истят а паро мельтнень.

— Тон кармат улеме инженерэкс, — кода свал, казямосто мерсь тетязо. — Лиядо тетя а мезть арсемскак. Чарькодить?

— Рамадо монень футболонь оска! — пижакадсь Панька. — А раматадо — школавгак а карман якамо!

— Превезэтькак тень иляк сайне! — рангстась тетязо ды сайсь газета.

— Нейке рамадо монень оска! — пижакадсь Панька. — А раматадо, сестэ кудонтэкак кадса. Оргодян эйстэнк!

Авазо ниреждезь кармась энялдомо икелензэ — илязо оргоде, илинзе кадо. Тетязояк чевтемсь, мелявтозь кармась сялдо-монзо футболонть. Пелевес майсевтинзе тетянзо ды аванзо. Бабазо ве ёндо вансь лангозост ды чаравтнесь прысонзо.

Валске Панька се шкас эзь сырга школав, зярс эзть кандо тензэ лавкасто оска. Школав мольсь колмоце уроктонть мейле, зярдо ушодовсь покш переменась. Кодак неизь цёрынетне кедьстэнзэ осканть, сеске пурнавсть перьканзо.

— Кунсолодо! — прынь шназь пшкадсь Панька. — Мон пурнан футбольной команда. Кие эйстэнк моли?

— Лия классто а сайтядо? — каятотсть зярыя вайгельть.

— Тынэ эстенк пурнадо команда! — Сынст лангс апак вано мерсь Панька. — Чарькодиде?!

Ды секе чистэнтэ сисемеце класстнэстэ пурнавсть футбольной кавто командат. Созаь, прывтокс весе те тевсэнтэ теевсь Панька. Сынст классонь командасонть сон капитан, налксемстэ — нападающей. Ды сёпомс а мейс, кармась налксеме а беряньстэ. Кавксоце, вейксэце, кеменце класстнэсэ тонавтнемстэ теевсь районсонть содавикс футболистэкс. Аволь весть

сонзэ командась налкесьь лия райононь команда мартояк. Видьстэ эряви меремс, Панька командасонть ульнесь а полав-товицякс.

Аволь аламо цяпамот марясь Панька «сэредицятнень» пельде. Ды ков кассь, тов седеяк яла шнасть эйсэнзэ. Бути чумо теиль, а чумондылизь: од, эрязь-аштезь весе те юты. Налксемстэ сон киньгак мель эзь вано. Седеяк пек сестэ, зярдо каршост налксицятне кеместэ тюрильть изнямонть кис.

Весементень эрязь-аштезь сы пе. Аламось-аламось сась сон Панькань шнамонтьнягак. Средней школанть прядомадо мейле, зярдо алянтэ зепсэ ульнесь уш аттестатось ды сон анокстась университетсэ тонавтнеме, школань футбольной командась налкесьь Ромодановань райононь команданть марто эсест стадиононть лангсо. Панька мезть кода эзть бажа кирдемс, Ромодановань футболисттнэ кавто голт совавтеть сынст ортатнес. Сестэ Панька невтизе эсь прынзо пек а паро ёндо. Тевесь прыдовсь сеньсэ: налксеманть савсь сеземс, Панькань саемс милицияв.

Авазо сёвнозь тусь мельгаст, тетязо — райкомов.

Кабинетсэнзэ секретаресь арасель. Леонид Петрович чийсь тензэ кудов. Капшазь ёвтизе тевенть, буту аволь Панька колмо ломанть чавсь, мекевланг, сонзэ эйс колмо прыбезарькст эртевкшнесь.

Филипп Васильевич зярсья арсесь.

— Вана мезе, вечкевикс Леонид Петрович, — okayники кортазевсь сон. — Умок арсян басямо мартот Панькадо. Ансяк шкась яла арасель. Тон уш илямак чумондо. Жежгак иля сае. Эдь аволь васенцеде истят тевть сон тейни. Эстенгак мик савсь неемс. Монь койсэ, нейгак сонзэ эйстэ ушодовсь, стяко бажат лиянь лангс чумонть каямо. Видькстак, истя эдь ашти тевесь?

— Васняк, виде, сон...

— Мезть эно кортамс? — стясь мик таркастонзо секретаресь. — Мейс эсеть чумонть каямс лиянь лангс? Чарькодить, Леонид Петрович, пек ланга нолдык цёрат. Кундак седе кеместэ эйзэнзэ. А витиндерясак ней, мейле позда ули. Майсемскак сави тетя мартонзо аволь аламо, визькскак кирдеме сави сатышка.

— Весементь тейса, мезе мертядо, Филипп Василич, ансяк ней нолдавтынк милициясто, — энялдсь Леонид Петрович. — Тамара

Ивановна а цидярды. Тынсь содатадо, кода сон майси седеен-  
зэ марто. Гайневтеде телефон вельде ды весе тевесь прыдови.

— Ильведьксэнтэ шождыне теемазо, ансяк аволь шожды-  
не витемазо, — прок эстензэ мерсь секретаресь ды аламос ар-  
семадо мейле поладсь: — Милициясо сынськак содасызь, мезть  
тейнемс. Текень кис аравтозтькак сынъ. Минь тенст ансяк лез-  
датано, зярдо эряви.

— Сестэ хотъ кевкстинк, мезть арсить мартонзо тейнеме, —  
талакадозь кортазевсь Леонид Петрович.

Те шкастонть гайнезевсь телефонось, Филипп Васильевич  
саизе трубканть.

— Нейке сырған, — мерсь аламос кунсоломадо мейле, пу-  
тызе трубканть ды кармась сыргамо.

— Кода эно Панькань кувалт! — мелявтозевсь тетясь.

— Азёдо тынсь милицияв, Леонид Петрович, — видьстэ  
варштась лангозонзо секретаресь. — Вейсэ арседе тосо, мезть  
тейнемс мартонзо. Мон эсь мелем ёвтъя тенк. Сонзэ эйс кун-  
дамка. Ды седе курук. Кувать кадозь орманть стака лециямс.

Леонид Петрович ульнесь милициянь начальникентъ кедь-  
сэяк, ламодо кортасть мартонзо. Панькань нолдызь. Кудосо  
сон снартсь мартонзо кортамс истя, кода мерсь тензэ райко-  
монь секретаресь.

— Вана мезе, Панька, — казямосто ушодсь сон, — весе те  
тевсэнтэ чумось тонсь. Пек уш ланга туить. Бути седе товгак  
истя кармат тейнеме, тюрманть вакска а ютат...

— Саты! — рангстась Тамара Ивановна ды стукадсь пильг-  
сэнзэ. — Эйкакшось истякак зяро кирдсь. Пильге лангсоак а  
аштеви. Тетя! Мезень кис, пиштакань ломань, кандтнят тон  
те лементь! Вейкине цёранзо кодамо-бути прыбезарьксэнь  
кедьстэ чавовтызе! Кадовсь ней ансяк судявтомс. Вейке чи а  
карман мартот эрямо, бути течике а лоткавтсак тевентъ ды а  
пекставтсыть сетнень, конат кепсизь кедест монь цёрынем  
лангс. — Ды авардезь тусь икельце кудов.

Акулина Ивановна, Панькань бабазо, умок уш чарькодсь:  
нуцьказо аволь се кияванть тусь. Сонзэяк сэредсь седеезэ Пань-  
кань кис.

— Пелян, Панькакай, аволидизь пекста, — уктась нуць-  
канзо марто кортамсто.

— Пицевить, — кода свал прянь шназь пшкадсь каршонзо  
футболистэсь. — Кедест нурькинеть монь пекстамс. Тетям кор-

тась прокуроронтъ марто. Тевентъ лоткавтсызь. Милиционер-  
тнэнь сынсест сэмедьсызь тень кис. Мейле кармить содамо,  
кода монь эйс кундсемс.

— Кода истя, тон эдь ломанентъ кавто пеензэ синдить, —  
мерсь бабазо ды пштистэ варштась лангозонзо. Сон бажась  
чарькодемс, янкси-арась нуцьказо.

— Эрявольть весе яжамс, мейле аволизе венстне келензэ ко-  
зонь а эряви, — мерсь Панька.

— Ох, Панька, Панька, — кувсезевсь Акулина Ивановна. —  
Тунь а арсят, мезде кортат. Иляк стувтне, цёрам, кельсэнтэ он-  
гат — апарос понгат, а бути кедьсэ токат — сестэ острогс озат.  
Валсонть, кода сонзэ иляк ёвта, ломанентъ ловажазо а сиви.

— Улить валт, бабай, пеельде пштитъ.

— Истямокс маряви виде валось сенень, кие, эсь прыдонзо  
башка, киньгак а вечки.

— Саты, бабай! — рангстась Панька. — Тонгак ней уш мо-  
нень моралень ловномо кармить. Марсинь весе тедэ мон.  
Школосо уш седеенек кельмесь эйстэст. Ломанесь аволь одат,  
эрят кезэрень койсэ. Тынк ташто превтне одтнэненъ мезеяк а  
максыть.

— Тевесь тонь цёрам, — зярсья арсемадо мейле ризнэзь  
кортазевсь Акулина Ивановна. — Ули мелеть — кунсолук,  
арась — монень а кармавтоват. Ансяк видьстэ тетъ ёвтаса: мон-  
гак чарькодьсынъ од койтнень. Ды несынъ ломантненьгак,  
сынст кандыщятнень. Саик вана Вадимень. Васов а мейс якамс.  
Ванса-ванса, сон виде-паро од койть теи. Тон вант. Тетязо, Фи-  
липп Васильевич, тонь тетядонтъ покш прявтукс аравтозъ.  
Вадим тонь марто ве иень. Ве шкасто кармиде тонавтнеме. А  
ведь школав те шкас ялго якси. Зярдо несамам магазинстэ кши  
марто самодо, каподьсы кедьстэнь сумканть ды, зярс мон сан,  
чиевтьсы кудов. Аволь ансяк монень истя лездась. Тон жо  
кшинь магазинэнтэ ёнов кинтькак а содасак. Сестэяк мик а  
кучоват, зярдо сэредян. Истя вана, цёрам. Виде, мон сырян уш  
ломанесь. Эзь стувтово тень ташто койтне. Ды, видьстэ  
ёвтамс, а капшангак весе сынст стувтомо. Таштонть стувтын-  
дерясак, одось а чарькодеви. Секс, бульчом, од койтненьгак  
парсте несынъ.

Панька васня аштесь яла, буто эзь кунсоло. Мейле якстерь-  
гадсь, бульчом, бабанзо виде валтнэ кода а кода кармасть пач-  
кодеме сонзэ лиядо мелявтомо а маштыця седеентень.



— Ды тетязояк Вадимень тон вант кодамо, — поладсь бабась. — Вестьяк а неят кудост икельде машина. Валскеяк туи ялго, чокшнейк истяк сы. Тоско ярсы кой-мезде ды паро. Тевть, ломанть. А кона шкане эсь прядонзо арсемс. Ды эрвьась лиси кедьстэнзэ мельпаросо. Тонь тетянь кабинетэнтъ вана аволь кенярдозь содавтнесызь.

— Бабай! — кирнявть мик таркастонзо Панька. — Мейс тон истя чумондат тетянь эйсэ! Сон ведь цёрат. Кода тетя а визькс?

— Визьксэсь, цёрам, аволь качамо, сельметь а сэвсынзе, — нардынзе сельведензэ пайстому бабась. — Визьксэнтъ кирдевлия. Ансяк седейризксэсь, секень вант, калмов паньсамам. Виде, ульнесь шка, зярдю тетянь кувалт кенярдомскак тень савкшнось. Сестэ ульнесь комсомолонь ячейкань секретарекс, мейле — велень Советэнь прявтокс. Сестэ свал ульнесь ломань марто. Весе бажасть сонензэ, сонгак эзь орголе эйстэст. Ков седе покш прявтокс кассь, тов седе васов ломантнеде явсь. Ды аламонь-аламонь весе стувтызь эсензаяк. Ней аволь паро вал ансяк а марян кувалманзо, ломантне мик монь вакскаяк ютыть кода-бути пелезь. Тонь пельде мезе учомс? Авать ловсось оштё эзь коське турвастот — тон уш чумовтомо ломанть курго ланга вачкодить ды милицияв понгонить. Мезес, арсека, пачкодят седе тов?

— Эно мезть ней тейнемс, тонь койсэ? — окойники пеензэ пачк пшкадсь Панька.

— Кода мезть? — кенярдозевсь кевкстемантень бабазо. — Эрямс истя, кода паро ломанть эрить. Аволь авардест эйстэть ломантне, кенярдост эйзэть. Кадык весеменень паро улезэ, козонь тон молят, косо тонавтнят, роботат. Мезень кис эно эрямс масторонть лангсо, бути ломантненень а теемс паро? Тон арсека, мезень ломань се, конадо авардить перьканзо эрицятне?

— Таго тонавтома, — пурдызе кургонзо Панька.

— Кода мелеть, цёрам, истя мерть, — полады яла виде валонзо сырьякась. — Мон моралень ёвтнеме а маштан. Эрямонть ансяк тетя теть кортан.

— Тонь койсэ, мон вадранть а чарькодьса ды киненьгак эзинь тее паро? — седе оймазь кортазевсь нуцькась.

— Теевлитькак, яла бу кияк паро вал тенек ёвтаволь.

— Мезе, тонь койсэ, весе районотъ кис стадион лангсо бороцямоськак берянь?

— Пек паро улевель, бути тон виде-паро райондонть арсевлить. Ансяк теvesь ашти аволь истя. Тон эсь прят шнавтомань кис налксят. Весень бороцявлитькак, ломанень пейть аволить синдтне. Сеть, кить бороцитъ весень кис, икелевгак мелявтыть ломантнеде, аволь эсь прядост.

— Иля мелявто, бабай, — окойники энгамсь кирдевтеме нуцькась, — ламо паро валт оштё сави тетя марямс монь кувалт. Тень мон тетя видьстэ ёвтаса. Омбоцеде истямо ильведькс, кодамо теинь стадионсонть, а теян зярдояк.

— Те пек паро бу улевель, — уктась бабась. — Ансяк тень кувалткак иля капша прят кемевтеме. Шождыне пупордькш-неме кармамось, аволь шождыне мекев лоткамось. Кие вестъ пупорди, се омбоцеде пры ды а куроцк стявтови.

Те шкастонть совась сонсь Леонид Петрович, понгавтызе шляпанзо ды стакасто новольсь креслас.

— Озак! — невтсь стул Паньканень. — Кунсолук. Тевесь лоткавтозь. Сатышка савсь тень кирдемс визькс тонь кувалма. Чарькодть цёра! Кадык те ули меельцекс. Эциндерят оштё истямо теvs, вейке вал кисэть а каян.

— Ней уш аволь эйкакшан, — прынзо нолдызе Панька. — Теде мейле берянь куля мондень а марятадо. Мон варма мельга валт а ёртнян.

— Вант, цёра, — седе чевтьстэ кортазевсь тетясь. — Шождыне валонтъ ёвтамозо, аволь шождыне сонзэ топавтомазо. Ней жо вана мезе. Футболонтъ стувтык зярс ды кундак университетэв анокстамо.

Истя прядовсь те теvesь. Панька мекев кармасть налксемс футболсо. Одов тусть теvтне истя, кода мольсть икеле. Июньень меельце читне ды июлесь ливтязь ливтясть. Конёвонзо Панькань саизь электротехнической факультетс. Весемесь мольсь седе вадрясто а ков.

Вейке ансяк ацирьгавтнесь од цёранть. Те — Дина. Панька сонськак парсте эзь чарькоде, мезе сынст ютксо. Содась ансяк седе, кодамо а ён тензэ, зярдю мекскак а несы тейтерентъ, а корты мартонзо. Сестэ чоп яки прок а сонськак, мерят мезеяк ёмавтсь. Стадионсонть теvдентъ мейле Дина эрва кода бажась сонзэ марто а вастовомс. Лиясто було аютко тензэ, лиясто оргоди эйстэнзэ. Сестэ Панька мольсь тенст кудов. Динань муизе умарь пирестэ. Тейтересъ шумбрактнесь мартонзо кельместэ, кедензаяк мик эзизе максо.

— Тон мезе, орголят эйстэнь? — кевкстизе Динань Панька.

— Паряк, пильгезэть суюконякшномо кармамс стадионсо тевденть мейле? — конянзо алга варштась тейтересь, ды сонзэ мазый сельмтнестэ цитнезевсть а вечкемань кельме толнэть, сельмечирькензэ кежейстэ кепедевсть верев ды сеске новольсть мекев.

Панька зярсыя таймазкадозь аштесь тейтеренть икеле, мeryт келезэ кундатотсь.

— Лисни, мон истямо берянь тев теинь, конань кис мик ялгангак кармасть орголема эйстэнь? — алкукс нусмакадсь сон.

— Содат, кинь ёнов тон молить се шкастонть? — яла пезы эйсэнзэ тейтересь. — Ёвтамс теть?

— Виде валдо мон зярдояк эзинь тандале.

— Сестэ кунсолок. Тон се шкастонть ульнить пек кежев.

Тейтересь трокс варштась лангозонзо ды сыргась кудо ёнов.

— Дина! — кирнявтсь мик таркастонзо Панька.

— Монень а мезде кортамс тонь марто, — кежейстэ варштась тейтересь удалов ды таго сыргась.

— Стяко капшат, — седеяк нусмакадсь Панька. — Шождыне ташто ялганть кадомазо, ансяк аволь шождыне одонть муемазо.

— Истятнэ киненьгак а эрявить. Паряк, а неят, кода весе, кить содыдизь, удало пельде велявтсть эйстэть. Мон янксеме карминь, мекс ялгакс ловинь эйсэть.

— Ней а ловат?

— Арась!

— Ну олясь тонь, — ловташкадсь Панька. Ялатеке прок ялгань туртов максан теть вал: седе тов берянь куля эйстэнь а марят.

— Паро ули, бути алкукс чарькодить, — апак кеме мерсь Дина ды капшазь тусь кудов.

Панька кекшевемазонзо вансь мельганзо. Сонензэ ульнесь пек стака. Марявсь тензэ: весе валдось тусь сонзэ вакссто ды, секень вант, мекев зярдояк а велявты. Перьканзо теевсь мейсэяк а пештявица кельме чаво тарка. Ды сестэ Панька эстензэяк макссь вал:

«Пандя, цёра, истя тейнемс. Шка теть кундамс превс».

Кудосо сонзэ эйсэ учость кавто ялганзо — Иваша ды Никита, конатнень марто вейсэ снартнить молема тонавтнеме университетэв. Сынь арсизь весементь, кода молить Саранскоев, косо кармить эрямо, кие тенст карми лездамо.

Июлень комсьвейксэеце чистэнтъ цёратне сыргасть Саранскоев.

Университетэв Панька эзь понго: эзь кирдевтть тензэ экзаментнэ. Кудовгак велявтомс ульнесь а кода: сон макссь вал, ды Динаяк теде мейле овсе велявты эйстэдензэ. Аволь шождыне ульнесь Паньканень се шкастонть. Ды кие соды, ков сон пурдаволь, бути аволизе васто Гришань, конань марто вейсэ мольсть тонавтнеме велень хозяйствань техникумов. Сонзэ прядомадо мейле Панька ульнесь кучозь районсонть сехте васоло колхозов трактористэкс. Мартонзо тусь бабазояк. Роботась нуцкась вадрясто, секс курооксто тусь од ялганзо мельс.

Зяро Панькань ульнестъ ялганзо! Кода маласольть весе сынь, а ней кода васолот. Ней, те шкастонть, зяро Панька соки парина паксянтъ, сонзэ ялгатне весе пурнавсть эсест велев, ламот эйстэст састъ кизэнь каникулав: Ивашка, Никита, Дина, Рая ды лият. Ней весе сынь оймсить, чить экшелить Алатырьсэнтъ, чокшне парксо киштитъ. Сонзэ, Панькань, бульчом, а ледстнесызыгак. Кие чумось?

«Эседеть башка, Панька, а кинь чумондомс, — видькстась сон окоиники. — Тонсь теик ильведьксэнтъ, эстетъ витемаяк. Сынь а сыть тонеть — эстетъ сынненст молема»

Те ульнесь субутань каршо вестэнтъ. Сон арсесь недлячистэ ардтнемс весе ялганзо марто вастовомо. Содазь, Дина марто Раят ней, секень вант, кортамояк а кармить мартонзо...

Ансяк аволь истя, кода арсесь Панька, савсь вастовомс тензэ ялганзо марто.

Паринанть пезэ, косо те вестэнтъ сокась Панька, токась кенерезь розь паксянтень, кона васов сравтовсь чилисема ёнов. Тона пестэнтъ комбайнатне ушодсть уш нуеме. Чинь-кавтонь ютазь тейгак пачкодить. Ней ломанде сэрей розесь вармадонть весе лажны, теке давол шкане иневедь нурсеви. Зяро Панька пачкоди малазонзо, мик бензинэнь качамонть мартояк марясы кенерезь розень тантей чинентъ.

Вармась яла виевгадсь. Менельганть кармасть уме чопода пельть, кивчкаеме ёндол. Мейле виевстэ цярадсь пурьгине овсе Панькань прянзо вельксэ. Ёндолось аламос валдомгавтызе весе паксянтъ. Зяро пертьпельксэсь мекев ваясь чоподантень, Панькань сельмс каятотсь розь паксянтъ чирестэ кодамо-бути кирнявтниция валдо, кона бойкасто сэрейгадсь ды келейгадсь. Те мезе истя? Паряк, машина? Варштась седе парсте: палы олго штемесь.

Панька покшолгавтызе тракторонть виензэ ды ардозь тусь тона ёнов. Зярдю пачкодсь малав, сыремиця толось тапардакшнызе весе штементь, каявсь перьканзо касыця розенть лангс. Панька бойкасто кармасть сокамо толонть перька розенть. Пси ульнесь тензэ тракторсонть, оймезэ цяк таргсевсь кабинасонть, качамось потомдась сельмензэ эйсэ. Сон жо яла капшавтсь тракторонть истя, зяро ули сонзэ виезэ.

Окойники пиризе пожаронть ниле метрань келесэ соказы модасо. Ансяк вармась истямо виевель, секень вант сяткотне кирнявтыть сокавксонть трокс ды одов кирвази розесь. Панька велявтызе тракторонть ды кармасть сокавксонть келейгавтомо. Колмоце кругонть прядомсто штементь прясто палыця олгонь кувтась прась видьстэ тракторонть лангс. Машинась сеске кирвазсь. Зярс Панька мадтсь эйсэнзэ, кирвазсть оршамонзо. Сонзэ сатотсь виезэ каямс лангстонзо палыця оршамонтень ды прамс сэрей бороздантень. Мезе ульнесь седе тов, а помнясы.

Нама, велесэ неизь пожаронть. Зярдю ардсть, кармакшнось мадеме. Панькань муизь ёжовтомо ды сеске ускизь больницяв.

Валске кото чассто радиостонть каятотсь:

— Кунсолодо! Корты районь радиоузелэсь! Корты районь радиоузелэсь! Энялды икеленк райбольницянь главной врачось Исаева.

— Вечкевикс ялгат! Пародонь паро оят! — каятотсь аванть мелявтыця вайгелезэ. — Вана мезень кувалт энялдань икеленк. «Изнямо» колхозонь трактористэс Гайнурин Пантелей Леонидович тейсь ине тев. Те вестэнтъ сон ськамонзо мадстизе пожаронть, кона, секень вант, пултавллизе бу колхозонь весе кенерезь розенть. Толонть мадстемстэ пек пицевсь соньскак. Сонзэ идеманть туртов рунгосонзо палозь таркатненень эряви од кедь. Кинь ули мелезэ максомс героентень эсь рунгостонзо зярояк кедь ды верь, нейке садо больницяв. Паро бу улевель, муевельгькак истят, кить сынсь зярдю-бути пицевкшность.

Больницяв икелевгак сась Аржадейкин Гавря.

— Войнасо ульнинь танкистэкс, — капшазь кортазевсь сон, — кавксть невелькшнинь палыця танксо. Монь кедесь ды вересь, секень вант, покш лезэ максыть пицевезентень.

Мейле састь Иваша марто Никитат ды зяряя лия од цёрат, конат зярдю-бути тонавтность Панька марто средней школасо

ды налксесть сонзэ футбольной командасонть. Тейтергнестэ сехте икеле чийсь Килейкина Рая. Весе районьс кортась Панькадо. Районьс газетасо печатазель заметка Панькань портретэнзэ марто.

Зярдю Гайнуриннэнь сась ёжо ды кармасть кортамо, неинзе ялганзо. Тесэльть малав весе, кинь марто сон тонавтность. Эрьвась бажась варштамо лангосонзо, куш бинтэнтъ потсто неьявсь ансяк чамазо. Малазонзо мольсь Рая ды варштась лангосонзо. Мейле тейтересь велявтсь вальманть лангс цецятнень путомо ды кекшинзе сельведензэ. Зярдюяк а стувтсь Панька те вастовоманть.

Виде, вейке тев кармавтнизе сонзэ ризнэме: эзь сакшно ялгатнень марто Дина Вандышева. Сон ней уш мирдень экшэс, эри Саранскойсэ. Соньскак Панька а соды, мекс апаргалесь тень кувалма. Эрямось умок явинзе сынст. Ялатеке мезе-бути кадновсь цёранть седейс.

Эрьва чистэ сыть ялгат, од содавтыцят, ютксост ламо истяткак, конань Панька икеле эзинзе некшнеяк. Мик а содавикстнэяк кандсть тензэ цецят.

Сакшность пионертенэяк, конат пек талакавтызь Панькань седеензэ.

— Оймак, оймак, — пионертенэнь туемадо мейле тошкась тензэ бабазо, кона чуросто тукшнось ваксстонзо. — Те пек паро. Моненьгак учовсь се шкась, зярдю неинь тонеть паро валонь ёвтыцятнень. Истя вана, цёрам, ашти тевесь. Паронть теемазо аволь шождыне, сень кис питнезэ пек покш.

Пичкамодо мейле авазо Панькань саизе кудов. Кода ансяк эзть мелявто перьканзо! Мезде ансяк эзть андо, эзть симде эйсэнзэ. Окойники цёрась пичкась ды пурнась вий. Ансяк кирьгазонзо ды рунгосонзо кадовсть аламодо содавиця кикст.

— Ней уш, цёрам, ковгак ськамот а нолдатадызь, — нирездезь кортась тензэ авазо. — Тетяць эйсэ сайт роботамо Саранскоев. Квартира тенек анокстась паро, колмо комнатат ды кухня эйсэнзэ. Вы иестэнтъ кармат тонавтнеме университетсэ.

Панька варштась бабанзо лангс ды пейдезевсь:

— Стяко мелявват, авай, — мерсь сон. — Ней уш лездыцят тень а эрявить. Эрямо карман «Изнямо» колхозсо.

Авазо мик кедензэяк вачкодинзе ды аварьгадсь, ансяк стяко.

Колхозсо вастызь Панькань пек парсте, прок эсест тиринь цёраст. Университетсэ кармасть тонавтнеме заочна.

КОТО ЭЙДЕНЬ АВА

Од Пекшазейкас, ков монень эрявсь модемс вейке учитель-нищань роботадо материалонь пурнамо, Ташто Кужосто колонь-геменьшка вайгельбе. Ашти сон райононь центронтъ вакска ютыця чугунокань кинть эйстэ керш ёно, кеменьшка вайгельбень тарка. Шкась ульнесь а сёксъ, а теле. Лов оштё эзь пра, сень кис якшамось нежедсь кеместэ, моданть пек кельмевтизе, мик кувака лазкст тейневсть. Китнень ланга истят каворькст — пильгеть, секень вант, сиви. А нурдсо, а крандазсо ардомс. Мезес илязат оза, рестееват ёжот маштомс. Машинасо якшамо тень марявсь. Арсинь поездсэ ардомо Пекшазейкань разъездэнтъ видьс.

Молинь станцияв. Поездэнтъ самс кадновсь малав омбоце пель час. Учицятнеде ульнесь аволь ламо: колмо а пек сыре бабинетъ ды вейке од авине, мартонзо кавто эйкакшт — ветешка иесэ цёрыне ды колмошка иесэ тейтерне. Авась оршазь ёнсто, ошонь оршамопельсэ. Эйкакштнэньгак оршамост вадрыальть. Бабинетне ды од авинесь мезде-бути кортнестъ вейкест-вейкест марто, раксестъ.

Мон озынь эйстэст аламодо ве ёно диванонтъ лангс ды карминь газетань ванномо.

Аламо шкань югазь совась ведьгеменьшка иесэ шумбра ды аволь човине ава. Лангсонзо топода-тюжа пальто, прысонзо пухонь ашо шаль, пильгсэнзэ колоша марто лембе кемть.

— Шумбрачи тенк, паро ломанть, — кеняркс марто пшкадсь весеменень.

— Шумбрачи эстенк, Евдокия Борисовна, — мелень ванозь мерсть каршонзо аватне ды кармасть тензэ таркань чамдомо.

Монгак сюконямосо шумбрактнинь мартонзо.

— Кинь мельга монень арамс билетэнь кисэ? — кевкстсь сыщась.

— Минь оштё эзинек арсеяк, — пшкадсь аватнеде вейкесь.

— Сестэ мон эно меельцекс карман улема, — озась ваксонзост Евдокия Борисовна.

Ды одов ушодсть кортнема. Мон поладыя ловномам.

Ансяк цёрынесь кодаяк эзь кадо эйсэст. Сон овсе эзь аште-ве аванзо вакссо, чийнесь залонтъ келес.

— Витя! — пшкадсь тензэ авазо. — Озак тарказот.

Цёркась оймась. Ансяк а куватьс. Сеске одов ношкстась ды ускизе мартонзо сазорканзояк.

Авазо таго серьгедизе.

Витя озась. Минута-кавто аштесь. Мейле таргась аванзо сумкастонть вишка ооска ды кармасть пансемензэ кияксканть.

— Витя! — серьгедсь авазо. — Паряк, аволь тонеть кортыть? Путьк осканть тарказонзо. Тесэ а мерить кольнемеде.

Витя прок эзизе маряк аванзо. Таго ёртызе осканть, кона кирнявтсь ды прась монь кедьсэ газетанть лангс. Мон, нама, эзинь кежиявто, ансяк авазо седеяк пизямсь.

— Зяроксть теть меремс? — каявсь эйзэнзэ авазо ды колмошкаксть кежейстэ ноцковтызе эйкакшонть пилензэ.

Витя кармасть авардема.

— Истя мезть тейнят, Тая? — стясь таркастонзо Евдокия Борисовна. — Кода теть а визькс? Сака тей, цёрынем, — кутмордызе Витянь ды кекшизе пизякалиця авадонтъ. — Иля аварде. Ужока, мон теть мезеяк максан, — таргась сумкастонзо покш умарь. — Иля пеле. Мон а макстан. Истя а эряви, Таякай, — велявтсь аванть ёнов. — Сон эйкакш. Кирдеви ней теть ве таркасо? Паряк, стувтык, кодамокс тонсь ульнить эйкакшпингестэ?

Цёрынесь саизе умарентъ, оймась.

— Витя! — рангстась авазо ды ноцковтызе кедте. Умаресь ёртовсь, тусь кеверезь рудазов кияксканть.

Тейтернесь чийсь, каподизе.

— Аля! — серьгедсь авась ды сонзэяк тохмадизе тарказонзо. Умаресь таго прась.

— А мейс кольневтемс, Евдокия Борисовна, — Тая куро-дынзе эйкакштнэнь чемоданонзо экшс. — Тонадыть мейле. Яла сынест ды сынест.

— Эно кинень? — укстась мик Евдокия Борисовна. — Сынст кисэ ансяк эрятанояк. Кемть-иля, кото кастынь, вейкень лангскак кедь эзинь кепсе.

— Паряк, секс, мекс сын аволь эсенк? — кевкстизе бабинетнеде вейкесь.

— Тунь аволь, — чаравтсь прысонзо Евдокия Борисовна. — Чавозь, эйкакш а тонавтови. Пелеме, виде, карми, превензэ теде а ламолгадыть. Секс, бульчом, паро ломантне меритькак: чевте валось тонавты, вачкодемась кежть савты. А мейс сёпомс, моньгак кольният ульнестъ. Эрьва кода снартнинь: пижакадат — туить эйстэть, парсте пшкадят — кутмордатадызь. Тонавтомсто превей валдонть виев мезеяк арась.

— Мон аволинь цидярдо тынк таркасо, — видькстась Тая. — Монь эсенсетнедеяк мелем мольсь. Маша тынк ней косо? — лияв пурдызе кортамонть. — Кодамо превей сон ульнесь! Весень туртов лездась школасо тонавтнемстэ.

— Ромашкинасо яла, — мельспаросо пейзазевсь Евдокия Борисовна. — Васня комсомолонь райкомсо роботась, ней — парткабинетсэ. Мирденень лиссь. Эйкакшост туртов уш омбоце ие.

Мон умок путыя газетам зепезэнь ды кунсолынь аватнень кортамонть. Кевкстематне сынсь эцесть прязон. Кода истя? Кото аволь эсензэ эйкакшт? Съкамонзо? Мирдевтеме? Содазь, минек масторсо аволь аламо виев ават. Секс монь покшоль мелем содамс, кие сон, мезекс роботы, кода эри. Лангс ваномс неявсь эсь иедензэ седе одокс. Сэнь сельмстэнзэ мольсь кодамо-бути валдо цивтёрдома, кона оймавтьсь седееть ды паролгавтьсь ёжот.

— Васов мольтядо, Евдокия Борисовна? — кевкстизе Тая.

— Пекшазейкав истя сыргинь, — кода-бути мелявтозь мерсь тона. — Ананий урвакстомо пурнась-сэрнясь. Тердимим.

— Кинь саи?

— Ды буто учительница.

— Сон берянь а саи. Превей цёрась.

— Кие соды, — уктась кото эйкакшонь авась. — Глебгак истямо. Ды ванат, мезе лиснесь ютксост. Явомас мик пачко-лесть козийканть марто. Превей ломантненьгак косто-косто пильгест нолажтнить.

— Ней ёнсто эрить?

— Сялдомс а кона ёндо. Ансяк сестэ сатотсь тень.

— Сынст кисэяк мелявтыде?

— Ды эно кода! Истят уш эрямонь койтне-кирдатне. Зярс эйкакштнэ вишкинеть, сын а кадтадызь удомо, зярдю ка-сыть — тонсь а матедеват. Ветькак кармат арсеми: косот, мезть тейнить, шумбрат-аволь?

Тень лангсо сезевсь истя седейга кортамось: кассанть панжизь. Саинек билетт. Аламо шкань ютазь сась поездсь. Мелем ульнесь ардомс Евдокия Борисовна марто вейсэ. Ансяк эзь саво: озынек башка вагонга. Оймавтынь прям вейкесэ: валган поездстэнтъ, ды вейсэ Евдокия Борисовна марто сыргатано Пекшазейкав, ков монень васенцеде савсь модемс.

Те бажамоськак эзь топавтово. Мон неия, кода Евдокия Борисовна лиссь вагонстонть. Кузтеминенть лангсто сонзэ

кундызе кедте комсьветеешка иесэ сэрэй, шумбра од ломань. Лангсонзо сэнь пальто, прясонзо истямо жо тусонь шляпа. Вакссонзо аламодо сондензэ алкине, пиже пальтосо од тейтерь. Сынсь кавонест палызь Евдокия Борисовна ды кавто ёндо саизь перрононтъ кувалт. Мейле пурдасть керш ёнов, станци-нян кудонтъ удалов, косо аштесь «Москвичесь». Озавтызь Евдокия Борисовна шоферэнтъ вакс, сынсь озасть удалце таркатнес.

Мон чарькодинь: те самай Евдокия Борисовна цёразо, тейтересь, секень вант, урвазо карми улеми. Пшкадewлинь-гак, сын саевлимизь мартост. Ансяк а мейс ульнесь колсемс истямо паро ёжост.

«Москвичесь» те шкане шождынестэ сыргась таркастонзо ды куруксто ёматотсь виренть ёнов пурдыця ульцянтень. Ёматотсть монь арсематнеяк. Кие соды, сави-арась таго вастовомс те ламо эйкакшонь триця аванть марто. Лисинь шоссенть лангс, аламос учинь Пекшазейкав ардыця машина ды пачко-динь тов самай се шкастонть, зярдю школасонтъ ушодовсь омбоце сменась.

Совинь директоронтъ кабинетс ды дивазевинь: столенть экшстэ каршон стясь самай се од ломанесь, кона истя меляв-тозь вастызе Евдокия Борисовна.

— Ананий Михайлович Парголин, — венстизе тень кедензэ.

— Тынь директорось? — кевкстия эсень лементь ёвтамодо мейле.

— Да.

Мон ёвтыя тензэ, мейс сын.

— Тесэ ней Мария Кирьяновна?

— Ансяк тусь урок. Паряк, мольтядо урокозонзо?

— Урокс, — меринь, — молян. Ансяк васня тынь, кода директор, ёвтнинк, кодамо сон учительницась, мезе прядсь, зярдю тей сась, кода роботы.

— Содатадо мезе, Андрей Максимович, — энялдозевсь директорось, — кевкстинк теде парторганизациян секретарентъ ды месткомонь председателентъ. Сын седе парсте ёвтнесызь тенк.

— Мекс аволь тынь? — дивазевинь. — Паряк, а содасынк? Монень учомс а кона шкане. Ёвтнинк седе курук.

— А ён кода-бути, — нолдызе прязно.

— Мекс?

— Тевесь вана мейсэ, Андрей Максимович, — кепедизе прынзо ды варштась сельмезэнь, — сонзэ куроқ сайса никс. Теде весе содыть.

— Арсян тенк кеме шумбрачи ды уцяскав эрямо, — кеместэ сювордыя кедензэ. — Видеть валонк, те тувталось аволь вишкине.

Савсь кевкстнемс тень парторганизациянь секретаренть ды месткомонь председателенть. Мейле якинь урокозонзо, ваннень уроконь планонзо, кортнинь мартонзо весемеде. Сонзэ предметнэнь коряс (химия ды биология) кадовиця арасть. Ульнинь сисемече классо, косо сон классонь ветия. Весемесь пек тусь мелезэнь. Классонзо колонгемень колмо тонавтницят, ды малав весе тонавтити парсте. Школанть перька сонзэ, биологонть, ды эйкакштнэнь вийсэ озавтозь паро сад, эмежпирест ловови районсонть весемеде парокс. Видьстэ меремс, ули мезес тонавтнемс те учительницанть пельде.

Истя мон карминь содамо Евдокия Борисовнань цёрадонзо ды тейтерденть, кона куроқ теэви тензэ урьвакс. Ды, койники, савсь тень кортнемс эсензэ мартаоқ.

Тевесь таргавсь чокшнес. Туеме эзинь кенере. Удомо Ананий Михайлович тердимим эстензэ. Сон эрясь школань квартирасо, кавто аволь покш комнатасо. Вейкесь ульнесь кухнянь кондямокс, омбоцесэнтэ аштестэ книганзо, столезэ ды удома тарказо.

Зярс минь ульнинек школасо, Евдокия Борисовна шлинзе киякстнэнь, муськинзе цёранзо панартнэнь, вальмасо занавескатнень.

— Тон мезе, авай, ве чокшнес весе тевтнень арсят тееме? — кевкстизе Ананий Михайлович комнатанть келес варштамо до мейле.

— Эряви капшамс, цёрам, — столенть пурнамсто мерсь Евдокия Борисовна, — валскень поездсэнтэ туян.

— Мекс истя куроқ?

— Юрка мекс-бути авардсь ютазь вестэнтэ. Яслясто псилгадозь сайнек. Пелян, илязо ормалгадо.

— Мон тердитинь чиянь патянтэ варштамо, тон жо паро ладсо эзик нееяк. Школав эзить совсе, кудовгак тензэ эзить яка.

— А мезть якамс, мон истякак содаса, — ансяк сельмсэнзэ пейдезевсь сон.

— Вант, иля ильведе, авай. Весть неезь, ломанесь а чарькодеви.

— Эх, цёрам, — шождынестэ укстась Евдокия Борисовна, — авань седеенть мейсэяк а манясак. Ды несаяк аволь васенцеде. Икеле савкшнось вастневемс мартонзо. Паро ломаненть весть неемстэяк чарькодьсак, берянтень — сядоцеде вастовомсто а кармат содамонзо. Паро ломанентень кекшемс а мезе, сон весе лангсо, седеезэ панжадо весеменень. Берянтень весе апарозо кекшезь, седеезэ пекстазь сисем панжомасо: пели, илизь нее. Ардынть течи мартонк ды кунсолынь эйсэнк. Сельведень мик лиснесть, зярдо Маруся кортась урококс кадовиця тейтернеденть, сонензэ лездемодонтэ. Истят валт ёвтавить ансяк сенень, кие алкукс вечки эйкакшт. Тень коряс прясто пильгс чарькодеви ломанесь. Кие вечки эйкакшт, се вечки эрямо, се эри ломантненень лезэнь максомань кис. Седе парокс улемс а ков. Эйкакшто пели се, кие а вечксы эрямонтэ, кие эри ансяк эсь прынзо кис. Истямонтэ эйстэ ломантненень лезэ арась. Маруся аволь истямо. Косто вешнемс седе вадря ды мазый? Кадык, иляк кирде, бути сайсы эстензэ се тейтернентэ. Сон алкуксонь авакс карми улеме тензэ.

— Пасиба, авай, — стясь Ананий Михайлович ды кеместэ палызе.

Мон оймень апак таргсе кунсолынь Евдокия Борисовнань, ды седеяк сыремсь эйсэнь бажамось содамс те алкукс мазый ломанентэ эрямо до седе ламо.

Уцясказон, те шкастонть вачкодсть кенкшентень, ды кудонтень совась кемгавксовошка иесэ од цёра.

— Ананий Михайлович, — капшазь кортазевсь сон, — ломантне пурнавсть. Клубось пешксе, учотано тынк.

Директорось варштась часонзо лангс.

— Нейке чиян. Тынь илямизь чумондо, — велявтсь минек ёнов. — Монень клубсо лекция ловнома. Стувтокшныя кортамонтэ марто.

Оршась седе куроқ, сайсь столентэ лангсто тетрадь, газетат ды капшазь тусь.

Минь кадовинек кавоненек. Эсь потмован кенярдынть тенень.

— Евдокия Борисовна, мекс валске станциясо аватне кортасть, бую эйкакштнэ, конатнень кастынк, аволь эсенк? Паряк, эзинь чарькоде? — кевкстия мон.

— Видестэ кортасть, — аламос каштмолемадо мейле пшкадсь авась. — Видестэ. Кото эйкакшт кастынь, монсь вейкеяк эзинь чачто.

— Кода истя? — таркастонгак стинь.

— Кода? — варштась лангозон. — Меньгак тесэ дива арась. Арази аламо урозокс кадовиця эйкакшт минек масторсо? Пек ламо. Пфлаумер инженерэсь ды сонзэ низэ кемгавтово мик кастась.

— Сеть кавонест инженерт, — меринь, — ды лездастькак тенст.

— А монень, арсетядо, эзь? Теке менеленть ало эрян. Моньгак эзимизь стувтне.

— Паряк, ёвтнесынк, кода весе те лиссь? — энялдозевинь мон. — Саинк сынст костояк эли кода?

— Теде вана ледстнемс аволь шождыне, — прыдызе глядя-монть ды озась столенть пес. — Ды мезеяк тесэ арась истямо, мезде эряви ёвтнемс ломантненень. Улиндеряй шканк, кунсолодо, — поладсь сон. — Кортыть, буто ютазесь курок стувтови. Аздан. Виде, эрямонь секе кияванть омбоцедь а ютат. Ансяк ютазесь кодак а явови мельстэть. Сёпомс а мейс, аволь шождыне ульнесь од шкам. Ялатеке а янксян. Савольгак тень одоладомс, одов кенярдозь ютавлинь секе кияванть. Прянь апак шна мерьса: роботынь чинек-венек. Ды эзинь фатяк, кода ялган лиснесь мирденень, а мон кадовинь. Аволь а мазыйгак буто ульнинь. Ялатеке эзь саво тень венчамс. Содылинь вейке од цёра. Мезеяк берянь а мереван эйтэнзэ, куш сон монень тейсь ламо апаро. Саизь роботамо областев, ды стувтымим монь, велень тейтеренть. Сайсь лия. Истя кадовинь ськамон. Роботынь колхозсо бригадирэкс, фермань заведующеекс, зярсыя ульнинь парторганизациянь секретарекс. Ламоксть снартнесь саемень лия велев, районов, ды эзинь сезеве эсь веледень.

Истя эринь малав финской войнанть ушодовомс. Сестэ кулось ялгам, Таня. Мирдезеяк ульнесь минек шкань, Маринин Петя. Кадовсь цёрась колмо эйкакш марто: вейке цёрыне ды кавто тейтернеть. Покшонть ульнесь кото иензэ. Вечкилинь кавонест: Таняньгак, Петяньгак. Эйкакштнэ жалть марьявсть. Лездынь тенст. Петя эзь смея — эзь пшкале тень. Кие моли тензэ колмо эйкакш марто? Молинь весть ды мерян: «Мезе, Петя, стяко потмо а панжат. Мондень паро ава а муят». Сон васня эзь кеме. Мейле чарькодсь, ды совинек вейс. Пек парсте эринек, алкукс уцяскавт ульнинек. Ансяк а кувать. Ушодовсь финской войнась. Петя эсь олясонзо тусь ды эзь велявто тос-то. Кадовинь колмо эйкакш марто.

Мейле ульнесь Отечественной войнась. Ламот чавовсть фронтсо, аволь аламот ёмасть тылсэяк. Минек шабрас усксть колмо эйкакш марто эвакуировазь ава. Кавтотне цёрынеть, вейкесь кавто иесэ, омбоцентень ветешка ульнесь, тейтернесь сисем иесэль. Авась сэредсь. Бомбёжжас понгонсь. Майсесь зярс-бути ды кулось. Таго кадовсь колмо урозкеть. Васня истяк лездынь тенст, мейле саинь эстенъ. Ков эно тейсыть? Истя кармасть улеме кото эйкакшон: колмо эрзянь, колмо рузонь. Аволь шождыне ульнесь. Эрвявсть андомс-симдемс, оршамс-карсемс, тонавтомс. Монсь се шкане ульнинь парторганизациянь секретарекс. Эрва козонь эрвявсь кенеремс. Ды вана кассть. Покшось, Глеб, тонавтнесь агрономкс, ней эсенек колхозсо председатель, Рая — зоотехник, Миша парткабинетсэ роботы, Ананий вана директор, Лида эсенек велесэ библиотекарь. Ансяк Алик эйтэнек ве ёно. Се механизатор, техниканть пек вечкилизе. Урвакстсь, ды нинзэ марто тусть целинав. Роботы совхозонь прявтонь полавтыцякс. Сюкпря тенст: сыредема пелев седеем оймавтызь. Истя вана ютась эрямом, — лекстась Евдокия Борисовна. — Кода несынк, мезеяк покш эзинь тее. Ялатеке эрямом кувалт мельс-паросан, — каштмолезевсь, аламось арсесь. — Тыненк козонь ацамс? — кевкстимим.

— Илядо мелявто, Евдокия Борисовна. Мон диванонтъ лангсояк удан.

Кандсь тень тодов, велькс ды лиссь мекев.

Зярсыя аштинь кунст мадезь. Арсинь седе, зяро паро ломанть минек масторсонть! Зяро Евдокия Борисовнат! Мезеяк а веши авась лиятнень пельде, весеметь, мезезэ ули, мик эсь седеензэяк, максы ломантненень.

Сась Ананий Михайлович.

— Уды оймсемань а содыцясь? — кевкстсь авадонзо.

— Окойники, мери, меельцеськак прась эрямонь лувонзонзо, — ёвтынть тензэ Евдокия Борисовнань валтнэнь. — Теньгак эсензэ пизэзэ карми улеме. Паряк, оймсема шкам карми.

— Учок, — салава мерсь директорось, — оймавтсак сонзэ. Паро пенсия тензэ максыть. Оймсемаль ды оймсемаль. Арась. Вана колонгеменьшка иеть уш велень Советэнь депутат, колхозонь правлениянь член, кеветее иеть родительской комитетэнь председатель. Ды минек кувалмаяк а лоткси мелявтомадо. А эряви киненьгак апак лезда.

Валске стинек рана. Евдокия Борисовна уш арасель. Столенть лангсо анокстазель ярсамопель. Тоско жо — конёв панкске: «Ананий! Мон туинь эсень тевем кувалт. Илядо мелявто».

— Несынк? — венстизе тень конёвонть Ананий Михайлович.

— Мезе теят мартонзо, сон а полавтови, — пейдезь меринь. Шлинь, ды озынек ярсамо. А сон, кото эйденъ авась, ульнесь косо-бути ки лангсо. Капшась ломантненень лездамо.

### ВЕЙКЕ САНТИМЕТРА

Ульнесь ноябрянь чопода чокшне. Пувась кельме варма, пerversь казямо васенце лов.

Валентин Вениаминович сыль мебелень фабрикасто, косо ансяк ютавтсь занятия коммунистической трудонь школасо. Друк каятотсь пилезэнэ авардиця авань вайгель. Мельганзо зярыя эйкакшт истя жо пижакадсть. Тураевень седеезэ мик скирьк мерсь. Сон лоткась ды кодаяк а чарькоди, мезе истя. Валт а марявить, ансяк а чарькодевиця шалтт. Ваны ульцянтъ кувалт — кияк костояк а неяви. Парсте чарькодсь ансяк вейке: маласо кудосонтъ моли мезе-бути аволь паро. Эряви лездамс авардицятненень. Ансяк кода? Телефон маласо арась, милицияв а кода звонямс. Ютамс вакска? Аволь истямо ломанесь Валентин Вениаминович. Кувать арсемскак шка арась. Вана ульцянтъ омбоце пестэ лиссть колмо од цёрат ды сыр-гасть вальматненень алга.

— Ялгат, садож тей! — серьгединзе Тураев. — Тынь ломантне, неявтадо, тескенъ, — капшазь мерсь сон, зярдонат састь малазонзо. — Мезень истя пижнема маряви?

Вейсэ кунсолость аламос. Авардемась седеяк виевстэ каятотсь.

— Ды те Архип Фролович! — яходсь кедьсэнзэ вейкесь. — Адядо, — кундызе ялганзо ожадо. — Аволь васенцеде истят комедият тейни. Весень мелест мольсь эйстэнзэ.

— Тынь комсомолецтадо? Кода тенк а визькс истя кортамс? Адядо соватано!

— Пек эряви, — пшкадсь юткостот седе сэреесь. — Минськак а эцетяно сёвномас, тыненкак а мертяно. Конясот панжсак кенкшентъ ды пупоркшнезь лисят тосто. Адядо. — Ды тустъ од ломантне эсь кияваст.

Валентин Вениаминович дивазь вансь мельгаст. Пижне-мась толкс пицесь сонзэ седеентъ. Капшазь сыр-гась покш кудонтъ ёнов. Токизе кенкшентъ — панжадо. Шалноманть марто кияк эзизе маряж, кода совась кудонтень. Икелензэ панжовсь алкуксонь тюремань тарка. Весе стулнэк, стольнек, эземнек аштеть ёртнезь, кияксось пешксель тапазь кедьгень пельксстэ. Голландканть вакссо пизямкшнось сезнезь панарсо колоньгемень ветешка иесэ цёра. Сон пижнесь сянгора вайгельсэ ды бажась козяйканзо кирьгапакшос кундамо. Аванть чамазо весе верев.

— Давай ярмакон! — стакасто лексесь Архип. — Давай! А макссыть нейке наватан! — кундызе аванть сиведе ды таго бажась вачкодемензэ чама ланга.

Валентин Вениаминович кундызе кедензэ.

— Паряк, апак сёвножк ярмактне вешевить? — калгодосто пшкадсь сон. — Эрья нолдыка ломанентъ!

Архип аламодо энгамсь а содавикс вайгельдентъ. Чамазо якстере, прок кумаць, весе ливезев, топода-тюжа черензэ новольсть сельмензэ лангс, сонсь рудазов.

— Оймадо, Архип Фролович, — чевтъстэ бажась кортамо Тураев. — Марясынк, кода авардить эйкакштнэ?

— А тон кият? — кинжалокс сялгинзе сельмензэ эйзэнзэ Архип. — А? Кият, мерян, кие тей тердинзитъ? Кие тонеть макссь прават совсемс ломанень кудос апак кевксте? — сонсь эскели эйзэнзэ. — Лиссть нейке!

Валентин Вениаминович кедьсэнзэ невтсь авантень кенкшентъ ёнов. Тона чарькодсь ды кавто тейтернетненъ марто лиссь седе курок кудостонтъ.

Архип ношкстыксэль мельгаст. Тураев пиризе кинзэ, арась кенкшентъ лангс. Тона седеяк пизямсь.

— Листядо эли арась кудостон? — сянгорасто рангстась иредьстэсь.

— Архип Фролович, — снартсь оймавтоманзо Валентин Вениаминович.

— Лиседе! — а паро вайгельсэ рангстась Архип ды тохмадизе Тураевень. Тонась кундызе сонзэ кедте ды озавтызе эземс.

— А-а-а, тон тюреме! — чикоргавтынзе пеензэ Архип. Сонсь бакордась вальма лангсто пеель, ды Валентин Вениаминович сеске жо маризе, кода пицезь пицевсь мештезэ. Те шкастонтъ Тураев яходсь вить кедьсэнзэ, ды мокшнась понгсь



тонань улонзо алов. Архип ёжовтомо венемсь кияксонть куншкас, пеелезэяк ёртовсь ве ёнов. Тураев седе куроқ ёртызе лангстонзо оршамопеленть ды лепштизе керявксонть, конань эйстэ чудесь верь.

Те шкастонть совась Архипень козяйкась ды комсомолецт-дружинникть. Икелевгак сынъ седе ёнсто тапаризь Тураевень керявксонть.

— Те карми улеме кемевтемакс, — кепедизе вейке комсомолецэсь верев пееленть.

— Мезе? — озась кияксонтень Архип ды, раужо сельмензэ келейстэ теткезь, ваны перьканзо. — Тынь кить? Кие тей тердидизь?

— Варштак, мезе тон теить, — авардезь кортазевсь козяйказо. — Мезес пачкодить, пиштьякань ломань...

Сестэ ансяк Архипень сельмс понгсь Тураевень верев мештеть. Зярсья вансь сельмензэ келейстэ теткезь. Мейле кундызе прынзо ды нуваргадсь.

— Тынь сайсынк тюрицянтъ милицияв, — мерсь ве дружинникесь омбоцентень. — Валентин Вениаминовичень мон пачтятся больницяв. — Стяк ды оршнек! — мерсь сон Ведявиннэнь.

Архип кепедизе прынзо ды кармасть оршнем.

— А мейс сонзэ токшемс, — пшкадсь Тураев. — Ковгак валскес а туи. Монь кувалткак а мейс тенк мелявтомс. Съкамонгак муса больницянтъ.

— Э-э-э, арась. Минь а кадтадызь се шкас, зярс а ваннотадызь врач.

— Аядо, — совась ушосто вейке комсомолецэсь, — тосо машина учи.

Тураевень лангс оршавтызь пальтонь ансяк ве ожанть, омбоцень истяк тапардызь ды тусть.

Кудосонть каштмольсть. Архип зярсья аштеть апак сыргесе. Мейле стакасто уктасть ды празь прась кроватенть лангс.

Эйкакштнэ оймасть ды матедевсть каштлангс.

Валентин Вениаминовичень ваннызь кавто врачт. Керявксось аволь вишкинелъ. Икелевгак теить тензэ уколт. Рананть шлизь, ваднизь ды одов тапаризь.

— Кие истя тынк? — кевкстизе главной врачось, Георгий Николаевич.

— Вейке иредьстэ ломань оймавтынъ. Койсэнъ, паро тензэ теинь. Сон вана кода сукпря тень ёвтась.

— Судямс истятнэнь эрявить!

— Валске арсетяно, мезть тейнемс, — мерсь Валентин Вениаминович ды сырғась кенкшенть ёнов.

— Тынь ков? — кевкстизе Георгий Николаевич.

— Видьтэ кудов.

— Вана мезе, Тураев ялгай, — мелявтозевсь врачось, — пеелькшнемась, содазь, аволь берянь тевесь, ансяк эряви содамс, косо ды зярд. Истямо геройкчисэ киньгак тынь а дивавтгадо. Те аволь стяконъ тев. Пеелесь васов пезнакшнось, керявксось аволь вишкине. Оштё вейке сантиметра — ды тынь аволиде уле жив.

— Пасиба мелявтоманк кисэ, Георгий Николаевич, — эсь валонзо лангсо ашти Валентин Вениаминович. — Ансяк илинк стувтне: монь ули семиям. Содасынк, мезе ули малавиксэнъ марто, ёвтындерятадо монь больницяс путомадон? Кода меленк, монень молема кудов.

Кудос совась истя, кода совси эрва чистэ.

— Кувать мекс-бути течи, — панжсь тензэ тетязо, — кемгавтовоце час уш.

— Мекс истя больниця чине качады эйтэть? — саизе пальтонзо козяйказо Елена Фёдоровна, — мезе кедеть марто? Чаматкак ловтаня кодамо-бути.

— Эйкакштнэ удуть? — лиядо бажи кортамо Валентин Вениаминович.

— А мезть тетъ сёпомс, — кевкстнесь низэ. — Мезе лиссь марто?

— Мезеяк берянь арась, — састо озась диван лангс Тураев. — Кунсолук. Весе ёвтнеса.

Ды Валентин Вениаминович ёвтнизе теветь истя, кода ульнесь.

— Тонеть яла весемеде ламо эряви, — мелявтозевсь Елена Фёдоровна ды каявтызе мирденть пиджаконзо. — Тапарявксонть коряс неса... Стака керявкст ансяк истя тапарить. Ды мезе тонеть эряви? Ёвтыка тон монень. Тунь а арсят кидеяк. Мадть седе куроқ. Бюллетень куш сайтъ?

— Паряк, андсамак васна мездеяк аламодо?

Столь экиш озась ваксозонзо тетязояк.

— Дивакс маряви тень, — машнетезь кортась Елена Фёдоровна чаень нуртямсто. — Мейс тон эцят тов, косо теветь арась? Неят тюрицят — капшат явомост, марят сёвныцят — бажат мирямост. Зяроксть тетъ кортынъ: чавовтсак прят. Истя лисськак. Мезе тон съкамот теят, пиштьяка? Ули велень Совет, колхозонь правления, партийной организация, актив, профсоюз, комсомол, меельцекс,

суд, милиция, прокуратура. Кадык сынъ бороцитъ симицятнень каршо. Мейс те тонеть эряви?

— Мезеяк а теят, Елена, — пугызе стопканти Валентин Вениаминович, — аволь свал мартот яки общественностесь. Ютасть вакскан колмо од цёрат. Эзь лоткаяк. Пельсть. Лия кияк маласо арасель. Кудосонть ава пижни ды кавто эйкакшт авардитъ. Киненьгак ведь эрявсь кисэст пшкадемс?

— Тондетъ башка, а кинень ульнесь? — чаравтсь прясонзо Елена Фёдоровна. — Эрявсь тетъ пеель лангс эцемс. Эсеть эйкакштнэнь се шканть, бульчом, стувтокшныть?

— Ну саты теде. Истя а стака сёвномаскак пачкодемс.

— Кортатано ламо, — човоргадсь тетязо, — ансяк тейтяно аволь зяро, зяро эряволь бу. Эрьва косо яла общественностень ледстнетяно. Тев а тев — сонзэ чумондтано. Мезе лангс вансь общественностесь? Косо ульнесь те шкане велень Советэсь? Кие жо те общественностесь? Те весе минь, эрьва ломанесь. Бути мон, тон, сон, а кундатано мезескак — общественностесь чаво валокс карми уleme.

Елена Фёдоровна стясь ды саице градусникентъ.

— Колоньгемень вейксэ пель марто! — тандадозь мерсь сон. — Симть, — Елена Фёдоровна венстсь мирденстэнь лекарства. — Молян чийнян Георгий Николаевичень кисэ.

— Стяко талакалят, — машинетезевсь Валентин Вениаминович, — ней монъ ёжом овсе аволь берянь.

— Ялатеке паро ули, бути мадят, — мелявтозевсь тетязояк.

— Общественность, мезеяк а теят, — мизолдозевсь Валентин Вениаминович ды стясь диванонтъ лангсто. Ансяк эскельдясъ — превензэ чаракадсть, ды сон нежедсь комодонтень. Тетязо мадстизе коникентъ лангс. Зярсья аштесь сельмень конязь. Зярдю варштакъ — козьяказо арасель. Вакссонзо стул лангсо озадо аштесь тетязо ды коморсонзо кирдсь сонзэ кедентъ: ловсь пульсонзо. Пшкадиксэль тензэ, ансяк келесь эзь велявтову. Есске маштсь ёжозо. Ды тунь эзизе маря, кода сась врачов Георгий Николаевич.

Валске Валентин Вениаминович сыргозсь чи куншкава. Кудось ульнесь валдо. Сёксень чись вальмаванть вансь истя сыржедзь, кодамокс Тураев эзизе некшне сонзэ тундонь самай мазый шкатнестэяк.

— Кодамо ёжонк? — каятотсь Пётр Даниловичень вайгелесь.

— Эсь койсэнъ, а берянь.

— Илядо мелявто, Валентин Вениаминович, — кежень кирдзь кортазевсь секретаресь. — Тень минь стяко а кадсынек. Весе общественностентъ кепедьсынек, ансяк судявтынек Ведявинэнь.

Врачось ды секретаресь простясть ды стамбарнэ тустъ. Кадовсть ансяк тетязо ды Елена Фёдоровна.

Валентин Вениаминович аламнеде ярсась ды одов матедевсь. Окойники сон парстэ матедевсь. Сыргозсь ансяк обедтэ мейле. Прязо ней эзь сэреде. Ансяк ранась аламодо чулксететсь.

Кавто-колмо чинь ютазь сась Архипень козьякась, Ольга Трифонова. Сонзэ чамазо ловтаняль, сельмензэ нусманят.

— Тынь уш простямизь монъ, Валентин Вениаминович, — алов сюконясь тензэ ды нардынзе сельведензэ авась. — Мезть тейнинь сестэ, монськак а содан. Весе мон чумось. — Аварьгадсь.

— Сельведьсэ теvesь а витеви, Ольга Трифонова, аравтсь Тураев стул. — Озадо.

— Аволь покшан бояравась, — нардынзе сельведензэ авась. — Стядояк аштян. — Озамодо мейле поладсь: — Илядо арсе эйтэнь беряньстэ. Аволь эсенек кисэ мелявтан. Кадык озавтсызь. Тарказояк тосо истямонтъ. Кода а кода тонавтсызь ломань ютксо эрямо. Тынк кисэ ризнэтяно. Аволинь сеереяк сестэ, шумбрасто савлиде кудов. Семиянк туртовгак мелявкс аволь уле.

— Каштмодемс теде а эряви, Ольга Трифонова, — седеймарязь кортась Тураев. — Кекшемскак те а эряви, кадык сон мирдетъ. Эряви кортамс теде. Пижнемс семс, зярс весе а марятадызь. Мезть ней сон тейни?

— Чинек-венек сими, — таго лиссть сельведензэ пиштыка аванть. — Роботамояк а яки. Ялатеке, мери пекстасамизь. Тосо стувтсак винанть танстензэяк. Тынк содавтомо яла кучсь эйсэнь.

— Виде-паро? — дивазевсь Тураев.

— Се чокшнедентъ мейле кавто ветъ эзь удо. Эзь ярсаяк, ансяк симсь. Пек ризны весе тень кувалма. Кадык, мери, судясамизь, ансяк ломанесь бу живстэ кадоволь.

— Мондень мезть мелявтомс, — чевтъстэ варштакъ лангонзонзо Тураев. — Тынденк вана сави арсемс. Мезть карматадо тейнеме, судиндерясызь? Ведь тынк кавто эйкакшонк. Косо роботатадо?

— Мезень роботамот, — нолдызе прянзо авась. — Потягынь скалт. Лоткавтымим. Симицятне ведь, содазь, кодат. Овсе а кемить козьякатненень. «Аштек, — мери, — кудосо. Ськамонгак сисем семият трянь».

— Лисни, мелявтсь кисэнк?  
 — Сёпомс а мейс, — кедьсэнзэ нежедизе улонзо авась, — кшив-теме эзинек аште. Видьстэ ёвтамс, аволь шождыне карми уleme сонстемензэ. Кадык судясызь, — кувакасто укстась сон. — Минь-гак ойматано тюрематнеде. Сон мернесь энялдомадо икеленк оштё вейке темень коряс. Ды уш паро. Теде кортамскак а мезть.  
 — Мекс? Ёвтнеде. Монень капшамс а ков.  
 — Визькс мик теде ледстямскак. Мерсь кевкстемадонк. Паряк, а макстадо судс? Мон, мери, ярмаксоjak пандан тензэ, зяро вешш.  
 — Пели судгонть?  
 — Пек. Визькс тензэ ломань лангс варштамскак. Апак симе, мери, а лисевангак ломань юткс.  
 Валентин Вениаминович зярсья каштмолезь якась кудо-ванть. Арсесь.  
 — Вана мезе, Ольга Трифоновна, — окойники кортазевсь сон. — Садо кодаяк мартонзо кавоненк. Ансяк аволь иредьстэ улезэ. Кортнетяно.  
 Кавто чинь ютазь сынь састь Тураевнень кавонест. Архип ульнесь сэтме, берякадсь.  
 Тураев шумбракстнесь мартонзо.  
 — Симат яла? — кевкстизе зярсья каштмолемадо мейле.  
 — Эно мезть тейнемс? — лангозонзо апак вано кортась Архип. — Ялатеке судясамизь. Ансяк бу курок, кувать аволизь таргсе.  
 — А бути а судявтадызь?  
 — Кода а судясамизь? — сельмензэ келейстэ тетькезь, варштась Ведявин. — Весе тевтне уш теезь. Вете иеть самай аламо алтнить темень. Бути ловсызь тынк эрямонть лангс каявомакс, весе кементнень педявтсызь.  
 — Паряк, судтомо тейсынек?  
 — Аздан, кода тынь арсетядо теде.  
 — Истя, кода кортась Ольга Трифоновна.  
 — Пек паро бу улевель. Ансяк аздан, зяро вештядо.  
 — Зяро тенк а жаль? Мон ломанесь аволь жадноян.  
 — Кавто тэжатне сатыть?  
 Валентин Вениаминович арсезевсь. Зярсья каштмолезь сон вансь мирденть ды нинть лангс. Сынь учость алкукс мелявтозь.  
 — Паро, — пшкадсь сон окойники — те ярмаксонть монь икелень шумбрачись мекев а велявтови.  
 — Ладна, — яходсь кедьсэнзэ Архип, прок ярмункасо торговамсто, — кавто ды пель. Седе ламось а косто саемс.

— Зняронть мусак?  
 — Тень кувалт тыненк а мейс мелявтомс.  
 Валентин Вениаминович таго арсезевсь. Архип то сти, то мекев озы, мезть-бути тошкась поланстэнь.  
 — Вана мезе, Архип Фролович, — озась ваксозонзо Тураев. — Илядо ацирьгале. Ярмактнэде мон пейдыкшнинь. Трёшниккак монень а эряви. Судс темень а нолдаса. Питне жо кедьстэть ялатеке пандовтан.  
 — Кодамо?  
 — Кунсоллок. Течи ноябрянь комсеце чи. Те чистэнтэ саезь ды седе товгак а симемс тетя вина цяркаjak. Лия мезеjak монень а эряви.  
 — Кода, кода? — дивазевсь Архип.  
 — Вана истя. Мон темень судс а нолдаса, бути тон лоткат винадо симемадо. Семият марто кармат эрямо истя, кода эрять паро ломанть. Ольга Трифоновнань нолдасак скалонь потяв-томо.  
 — Арась! — кирнявтсь мик Архип. — Малавгак а цидярдан. Сестэ кадык судясамизь!  
 — Арсек, Архип Фролович, — чевтьстэ варштась лангозонзо Тураев. — Капшамось зярдояк парос а ветятанзат.  
 — А мезть кортамскак, — машнетезевсь Ведявин. — А кман мон тенень. Вестькак эзинь вастне истят ломанть, конат берянень кисэ авольть пандо бу кеж.  
 — Кенгелетядо, Архип, — коня алга варштась Тураев. Тынк колоньгемень ниле иенк. Сисем класст прядыде. Эрятадо советской ломантнень ютксо. Варштак перькат. Пек паро ломанть вастат. Ледстит мелезэть учителеть, командирэть, конатнень марто служить Советской Армиясо.  
 — Видеть валонк, — зярсья арсемадо мейле мерсь Ведявин. — Истямо ульнесь ротань командирэнек. Вадряль ломанесь. Зярдояк а стувтови.  
 — Пек ламо истятнэде, Архип Фролович, — варштась часонзо лангс Тураев. — Кода эно? Тейсынек истя? Мон а нолдаса темень судс. Тынь кадсынк симеманк ды карматадо колхозсо роботамо.  
 — Пелян манятадызь, Валентин Вениаминович, — кавтолдозевсь Архип. Ведь малав сисем иеть апак лотксе симан. Ташто коесь аволь панар, сонзэ а каясак ды а ёртсак. Вана мезе, Валентин Вениаминович. Максодо васня темень кемень чить. Снартан.

Бути а цидярдан, судявтомизы! Тосо вина а кармить максомо. Авардят ды кадсак симемат.

— Тейтяно истя. Снартодо. Кемень чить. Валске лиседе эсенк бригадав роботамо.

Шождыне валонть ёвтамозо, аволь шождыне топавтомазо. Пек стакальть неть кемень читне Архипнень. Икелевгак васенце колмо-ниле читне. Сэредсь мик, ярасмо тензэ эзь моле. Пеень сускозь туиль ялгатнень ваксто, зярдо сынъ сырмить симеме. Сельмень конязь юты лавканть вакска. Зепезэнзэ трёшник ярмак эзь сайне. Нилеце чистэнтъ седе вадрылгась ёжозо. Кармась ярасмо, ёнсто удось, кедензэ лоткасть сорномадо. Вейксэце чистэнтъ, зярдо арсесь уш молема Туравнень, тердизь милицияв. Талакадсь цёрась.

«Вана тетъ теветъ судс а нолдамс! — кежень пачк арсезевсь сон. — Мезть ней кемат! Пейдить лангсот! Эх, Архип, Архип! Молят, ды сёлгтадызь. Ёми весе!» Пильгензэ сынсь пурдасть лавкав. Сайсь четвёрка, арась голландканть экшсэ ужонтень, косо сеедьстэ копорясь, панжизе суликанть ды чукадиксэлизе кирьгапарезэнзэ.

Се шканть совась тов Ольга Трифионовна, неIZE ды мольсь эйзэнзэ. Валгак эзь ёвта тензэ. Истя энялдозь варштасть сельмезэнзэ, Архипень мик седеезэ скирьк мерсь.

— Манимизь, Ольга, — салава кортазевсь сон, — милицияв тердить эйсэнь.

— Архип, — энялдозевсь козяйказо, — кунсоломак. Бути те ломанентень а кемемс, мейле аздан кинень кемемс. Истятнэ а кенгелекшнить.

— Эно мейс тердимизь?

— Ды кие соды. Паряк, истяк мейскак. Инеськетъ, иля симе, Архип. Азё васня мольть тов.

Ведявин варштасть козяйканзо энялдыця сельмтнес, аламос аштесь, амельсэ потомдызе суликанть ды максызе тензэ.

— Бути а велявтан, мольть, — мерсь сон ды капшазь тусь.

Милициясо Архипнень кувать эзь саво учомс. Сонензэ мерсть совамодо начальникентень.

— Озато, Ведявин, — невтсь майорось чаво стулонть лангс.

Архип новолезь новольсь. Начальникесь нолдызе прянзо кодамо-бути конёв вельксэс. Зярсья велявтнесь эйсэст. Архип теке салмуks лангсо аштесь. «Мезть уш таргси теветъ эйсэ, — арсесь сон, — ёвтаволь бу, ды седе куроk сёлговлимизь».

— Тынь ранинк Тураевень? — кевкстизе сонзэ начальникесь.

Архип энгамсь, кодаяк а велявтови келезэ, мейле мерсь:

— Мон, майор ялгай, — окойники пшкадсь сорныця вайгельсэ ды нолдызе прянзо.

— Да-а, — кувакасто мерсь начальникесь. — Вейке сантиметра — ды аволь уле истямо паро ломанесь. Ули чанстенк, Ведявин. Понговлиде лиянень — чукавлиде сисемшка иеть. Тон арсека, кода теvesь ашти. Сонзэ кис весе ризныть, тонъ эйсэ — чумондыть. Мебелень фабриканъ робочейтне ды педучилищанъ студенттнэ миненек кучсть сёрмат, энялдыть судямс тонъ минек законтнэнь кемечист коряс. Сынст ёно ашти весе общественностесь. Сон, Тураев пропагандистесь, сась ды ськамонзо лоткавтызе теветъ. Чарькодть парсте. Аволь мейскак теветъ теизе — эйкакшот жалинзе. Ансяк сынст кисэ а кармата-но судямот. Азё роботаk. Симеманть стувтык! Тон ведь превеят ломанесь. Кедеть сырнень. Пек эриват ломантненень. Кода истя а саеви тетъ эсь прят кедьс-коморс?!

— Сайса, майор ялгай! — стясь Архип. — Сайса! Максантенк вал: а карман симеме! Вадрясто карман роботамо. Стяко а ёми кемеманк.

— Пек паро ули, Ведявин, бути истя теят, — стясь начальникесь. — Роботаk. Арсян тетъ ансяк паро!

Зярдо Архип велявтсь кудов ды весементъ ёвтнize нинстэнь, тонанъ мик сельведензэ тустъ. Аламос аштезь Ольга Трифионовна пурнась обедамс, семьянек озасть ярасмо.

## МАКСОЗЪ ВАЛ

Ульнесь комсомолонъ промкс. Виталий ды Архип трактористтнэ макссть вал: кизэнь перть сокамс кавто пель марто тэжат гектарт. Весе кенярдозь цяпастъ, колхозонъ председателесь, Владимир Филиппович, кеместэ сюрордынзе кедест ды мерсь:

— Кеман, алят: аволь стяко максынк валонк!

Зярсья кенярдозь чавсть седеест од цёратнень сыре коммунистэнь валдонзо мейле.

Куватьс а стувтсы Виталий те чокшнентъ оштё лия теветъ кувалткак. Се промкстонть мейле сон ильгизе кудов вечкевикс тейтерензэ, ловнома кудонъ прявтонть, Верань.

Кенярдозь сынъ мольсть тундонъ сыремиця зорянтъ каршо. Чамазотъ чевтъстэ лыйкаевсь лембе коштось.

Лоткасть Верамезень кудонтъ икеле сэрей топольтнень алов.

— Тон яла морат, — кода-бути нусмакадозь мерсь Виталий. — А кунсолаткак!..

— Кунсолан, кунсолан. Кортак, — пеедькшнесь Вера.

— Мон вечктян. Чинек-венек бу вановлинь тонъ лангс. Тон жо вана кода.

— Кода?

— Кода, кода. Мон весе мельсэ... тон ваннат пертьпельга.

— Истя, натъ, берянь? Тон ванта, кодамо мазый шкась. Зорьясь самай кирвази. Лембе. Коштось чевте, ванькс, чинезэ тантей. Минь тонъ марто кавонек. Эх, кодамо паро! Мезе оштё тетъ эряви?

— Тонеть истя паро?

— Пек. А тонеть?

— Берянь, — уктась Виталий.

— Азё кудов, — пшкадсь Вера ды кундызе кедензэ. Ашолгады куро. Мурнесамизь.

— Мик панят эйсэнь?

— Апак панть. Курок чизэ лиси.

— Иля пеедькшне, Вера! Мекс истямат? Ёвтык видьстэ, тон куш аламошкадо вечксамак?

— Эзинь арсеяк.

— А вечксамак?

— Арась!

— Мекс?

— Мезе теят. А вечктян, ды паро. Эзить тье мелезэнь.

— Эно мекс те шкас пейдькшнить лангсон?

— Пейдькшнить? Эли мон тердтнить эйсэть? Тонсь эдь сакшныть.

Виталий варштась лангозонзо ды нуваргадсь.

— Истя? — мерсь аламос каштмолемадо мейле, сонськак а соды кинь кевктсь од цёрась.

— Истя, — пшкадсь каршонзо Вера.

— Мерят, тень... а вечксамак?

— Мерян, а вечктян.

— Те меельце валот?

— Лия иля учо.

Зярсья аштеть апак корта, мерят эрвейкесь кунсолось эсензэ седеень чавоманть.

— Сестэ мезе... Уледе шумбра, — окойники калавтызе каштмолеманть Виталий, — илядо кежиявтне лангозон.

— Тонгак апаро иля сай.

Виталий уктась, прынзо нолдызе ды састо тусь сэрей чувтгнэнь алга.

Вера нежедсь тополентень ды пейдезь вансь туиця од цёранть мельга.

Виталий аламос лоткась, варштась топольтнень алов ды таго сыргась. Сон сонськак оштё парсте эзь чарькодть эсь ёжозонзо, а содасы, мезе моли мартонзо. Ансяк седеезэнзэ кузьсь апаро, мерят ёмавтсь мезеяк пек покш, пек эрявикс, конадо пешксель весе од ёжозо. Мень-бути чаво тарка теевсь эрямозонзо. Иень перть яксесь цёрась, кортнесь, учось, кемсь. Тоналесь Верань эйс ды эзь арсеяк: сынъ а кармить пингест вейсэ печтямо. Арсекшнине весе икелепелень эрямост, эрва кодат плант тейнесь. Ней на вана! Пек а ёнкстомсь цёрась. Моли ды арси. Снартнесь чумондомонзо Верань, ансяк мейсэ. Мезе теят, бути а вечктянзат? Яходсь кедьсэнзэ ёмавтозь вечкеманть лангс ды тусь кудо ёнов. Уш эсест кудонтъ малас пачколось, зярдэ марьясь удалонзо молиця. Велявтсь, вансы — капшазь сы эйзэнзэ Вера. Виталий лоткась ды каштмолезь ваны. А пшкадевияк. Мень истямо тамаша? Вера бойкасто мольсь эйзэнзэ, кутмордызе, псистэ палызе турвас ды ношкстась мекев. Виталий талакадсь: ашти ве таркасо, а соды мезть тейнемс, а чарькоди, мезе ульнесь, ансяк турванзо палсть толонь паламодонтъ. Окойники сась тензэ ёжо, чарькодсь ды зяро виезэ ношкстась Верань мельга. Вармакс чийсь. Вана Вераяк маласо, неявить кода лыйнить якстере парсей марто кодазь кувака черьпулот. Икельдензэ хлопадевсь пирявтонъ кенкшесь, од тейтересь кекшевсь.

— Вера!

— Мейс таго сыть?

— Тон мезть тейнят истя?

— Нейгак оштё эзить чарькоде?

— Вечксамак? Да?

— Азё кудов. Иля кепсе шалтт. Марятадызь. Кие-бути кардазга яки.

— Лиссть куш аламос.

— А лисян.

— Мекс?

— Ванды чокшне сак, — мерсь ды сонсь совась кудос.

Виталий кенярдомадонть а содасы мезть тейнемс. Сон уль-  
несь анок весемень кутморямо ды палсеме. Серьгедсь моро ды  
моразь тусь кудов. Ёжозо ульнесь истямо, кодамо эрси сехте  
уцяскав ломаненть.

... Кода а ледстнемс истямо паро ды мазый чокшненть! Ней-  
гак вана ашти икелензэ Верань пейдиця чамась, сонзэ цель-  
дёрдыця сельмтне, чевтъстэ кортыця турватне.

Паро шкась нейгак. Паксясь ваясь ков валдос. Кельме кош-  
тось вечкевиксстэ педи Виталень чамас, лиясто эртысь кероси-  
нэнь чинесэ, лиясто тапардасы тракторстонть молиция лембе-  
сэнтъ. Паксясь чаво. Ансяк маряви увномадо сонзэ тракторось.

Весе моли парсте. Оштё кавто чить ды кавто пель марто тё-  
жат гектартнэ улить соказы, иень нормаст ули топавтозь кав-  
тосядт процентс. Бути оштё недляшка а кельмевтъсы ды а пры  
лов, сынъ сокить седе ламо.

Ловтанясто сырёмсь валскень зорясь. Аламонь-аламонь вал-  
домсь, ды лиссь чись. Виталий лоткавтызе тракторонть буд-  
канть вакс: Архип сась полавтомонзо.

— Сюкпря тетя Верань пельде, — малазонзо модемстэ пей-  
дезь кортась Архип, — цяк кандовсь тень.

— Неик? — тракторонть лангсто валгомсто кевкстизе Ви-  
талий. — Таргавтомака. Умок уш маштсть таргамкан.

— Чокшне ловнома кудосто вастния, учи эйсэть. Тейсь  
таргамс.

— Тон таго икельдимик, — цигарканзо кирвазтемстэ кортась  
Архип, — сменань перть кемгавтово гектарт поксарить.

— Веть паро сокамось.

— Течи монгак цярадян.

— Цярадить уш, — пеедькшни Виталий. — Паряк, вень  
перть Дунянь эйсэ кутморить? Таго онстот кармат сокамо.

— Арась, куватьсь эзинь аште. Ансяк ильтия ды туинь.

— Аволь беремастонзо тей сыть?

— Аволь.

— Ванок.

— Истякак ванан. Пек уш паро тейтересь! А улевельгак сон,  
нормамгак некак вестькак аволь топавтово. Улкоть содат мекс  
аламо сокинъ весе сменанть перть?

— Содазь. Дунянь эзик некшне?

— Ёвтаса уш ней тетя, ансяк киненьгак иля корта. Пек риз-  
нынъ се чинть. Дуня марто кортакшнынек: чокшне васттано.  
Молинь — сон арась. Учинь, учинь эйсэнзэ — эзь моле. Мекс  
истя? Ков оргодсь? Паряк, а вечксамам? Кевкстия ялганзо,  
Ортянь Элькань. Сон мери, тень, Арань Паля марто тусь. Сель-  
меньгак чополгадсть. Вень перть эзинь удо, вешнинъ яла. Ко-  
стояк эзь муеве. Валскенть, леляй, мезес а кундан, а тееви  
тень. Чоп арсинь, кода пандомс кеженъ. Пасиба ёвтазо: эзь  
понго кедь малазон Паля.

— Мезе теевлить?

— Судалксонзо нардавлия. Ну вана. Чокшненть ансяк мо-  
линь кудов — шикадсть тень сёрмине. Дуня сёрмадсь: базаров  
якась тетянзо марто, Элькаметзь жо пейдсть лангсон.

— Сынъ олгонь сэдь ланга ютавтыдизь.

— Мон эсесткак ютавтсынъ, — шнась пря Архип тракто-  
ронть куземстэ. — Сокаmodo мейле винадо корштавттан.  
Моли тетя?

— Киштезь. Чинек-венек текень учи. Эръя чаравтыка кун-  
дамонть ды азё. Ютамсто, чей, оштё паласак Верань? Сон ней  
ськамонзо кудосо.

— Пек паро улевель, — сонсь мольсь ды кармасть тракто-  
ронть нолдамо. Вестъ велявтызе кундамонть, кавксть, кол-  
моксть — машинась каштмоли.

— Велявтт седе парсте. Те тетя аволь Вера! А мезть пек коль-  
немс мартонзо, — пижнесь Архип.

Виталий нилецеде кодак чаравтызе — кундамось виевстэ  
велявтовсь мекев ды кода-бути каршо риштитизе керш кеденть  
ланга. Пижакадовсь мик цёрась.

— Вант! — серьгедсь Архип. — Кадоват пейтеме. Вера ма-  
лаваткак мейле а юты.

— Кирьгазот понгавтык Верат! — сонсь таго снартсь кун-  
дамо, ансяк седейк пек кувсезевсь. Кедь сеерьксэсь кода-бути  
мендявсь, Виталий цють эзь пра сэредькстэнтъ.

— Эх, варья курго! — капшазь кирнявтсь тракторонть лан-  
гсто Архип. — Мезеть томбавсь? Паряк, велявтовсь?

— Паряк, паряк, — машнети Виталий. — Мон эли совсинь  
потмозонзо?

— Пек сэреди?

— Оргодть! Сельмезэнь сяткт появакшность.

— Эръя, ванса!

Архип токизе кеденть — Виталий седеяк пек пижакадсь.

— Чийть седе курок больницяв. Ансяк бу аволь сиве.

— Мейле левцакадыть тевенек.

— Меринь, вант.

Виталий оштё мезть-бути мериксэль, ансяк те шкастонть сась варштамост колхозонь механикесь. Архип озась тракторонть ды тусь сокамо.

Виталиенъ автомашинасо ускизь больницяв.

Ардомань перть кедезэ весе таргозсь, панар ожантень а кельги.

Врачось, Александр Петрович, зярсья ваннось эйсэнзэ.

— Да, од цёра-парочи, — кортась сон. — Зыян пек покш эзь тееве. Урьвакстомазот пички, ансяк недляшка кавто сави аштэмс кудосо.

Виталий тандадозь варштась лангозонзо.

— Кеденть эряви оймсевтемс, — поладсь Александр Петрович, — сонзэ чирькавтнемскак а эряви.

Виталий аштесь озадо табуретка лангсо, пеень чикордозь кирдсь виев сэрдьксэнтъ. Кавто ёнганзо аштестъ фельдшерипат. Вейкесь кирдсь сонзэ вить кеденть.

Окойники витневсь томбавозь кедесь, тапаризь ды Виталий састыне тусь кудов.

\*\*\*

Сыргозсь Виталий обедтэ мейле. Вакссонзо табуретка лангсо озадоль Вера.

— Мартон явомо сыть? — мерсь трактористэсь.

— Да, — ансяк сельмсэнзэ кончтась тейтересь.

— Иля ризнэ. Кавалалдо кундамонь кедесь эзь томбаво. Вера кундызе вить кедензэ ды чевтъстэ сювордызе.

— Тошнаинь кисэть, — салава тошкась сон. — Тандадынь, кода ёвтасть. Зярдэ уш учан. Стявтомс жаль тень марявить. Кода истя?

— Тракторось кежиявтнесь лангозон.

— Пек томбавсь. Чей, мезеяк берянь а ули?

— Эзнестэ лиснесь. Александр Петрович кавто недлят арси кирдемень роботавомо.

— Седе куватькак аштят, ансяк пичкаволь.

— А валом? Апак топавто кадови?

— Мезе ней теят? Паряк, аволь истяко томбик кедеть.

— Эх, валось эзь топавтово, — Верань лангс нусманясто вانونь кортась Виталий. — Монсь чумось.

— Иля ризнэ. Сокамс аволь ламо кадовсь. Тень кияк а ледстясаяк. Ловсызь топавтозекс. Эли а содатадызь?

Зярсья истя мелявтозь кортнестъ. Мейле Вера простясь мартонзо ды тусь.

Виталий ярсась ды таго мадсь коникенть лангс. Зярсья аштесь кунст ды арсесь. Таго весе ледсь мелезэнзэ: промкось, ялганзо кенярксов чаматне, сынст цяпамотне. Владимир Филипповичень кортамось, Верань вечкемась. Ды ней вана лисни: сон валонзо эзизе топавто. А ведь комсомолонь промкссо макссь вал! Кода кармить теде кортамо ялганзо, колхозниктне? Эдь алтамось ульнесь печатазь райононь газетасо. Весе теде содыть, учить куля седе, кода сынъ топавтсызь. Ды бути те кадови ансяк конёв лангс...

Варштась вальмавантъ: чизэ валгсь, сундерьгадомась стамбарнэ копачи паксянтъ ды нусманя вирентъ. Шказо котоце час. Кавтошка часонь ютазь сонензэ эряволь модемс Архипень полавтомо, а сон вана косо. Кедезэ весе тапарязь ды сюлмазь кирьгазонзо. Сонсь сэрдемс пек а сэреди, ансяк зярдэ лыкавтсы эли кодаяк токави. Стясь, ютась киякскантъ мекев-васов — ёжозо паро. Вить кедесь шумбра. Вейке кедьсэяк ветяви тракторось. Виталий оршась ды тусь кудостонтъ. Больницянтъ вакска ютамсто вастызе хирургонтъ.

— Тон мекс, Азарин ялгай, аволь кудосо? — коня алга вانونь кевкстизе Александр Петрович.

— Монень эряви модемс ялгань полавтомо, — талакадозь мерсь Виталий.

— Ялгат полавтомо? — абунгадсь врачось. — Тон превсат? Ков молят те кеденть марто? Ды кие тонь кармавты?

— Вить кедем шумбра, Александр Петрович, — седейшкава энялдозевсь Виталий. — Мон ялатеке туян.

— Тон мезть? — пштистэ варштась лангозонзо врачось. — Кедтеме арсят кадовомс? Истя карминдерят тейнеме, керявтсак кедеть. Паро мейле улят од цёрась. Вант.

— Кавто чить оштё эряви сокамс, — нусманясто кортась Виталий. — Комсомолонь промкссо вал максынь.

— Монень куш косо макст, ялатеке а эряви. Тон сэрediat. Комсомолецтнэ парсте содасызь: сэредиця ломаннень а мерев роботамс.

Виталий велявтсь мекев кудов, ансяк ялатеке прястонзо эзинэ ёрто бажамонтъ модемс Архипень полавтомо.

\*\*\*

Александр Петрович ды Владимир Филиппович лоткасть трактористэнь будканть ваксс. Тракторось ансяк велявтсь пестэнтъ, гайгезь моли борозданть кувалт. Вети эйсэнзэ Виталий. Вить кедьсэнзэ кирди руленть, кершесь — сюлмазь кирьгазонзо. Владимир Филиппович яходсь кедьсэнзэ — лоткаволь, ансяк Виталий прясонзо чаравтсь. Александр Петрович кедензэяк вачкодинзе.

— Мезть тейни! — маштнети яла атысь. — Кадови кедтеме! Азёдо, Владимир Филиппович, лоткавтынк кодаяк. Мерть тензэ. Тандавтык аламодо.

Председателесь сасызе тракторонть ды кузсь ветицянтъ ваксс.

— Виталий! — пижакадсь пилезэнзэ. — Мезть истя тейнят?! Натъ, а кинень сокамс? Александр Петрович тей мик сась! Ризны — кедтеме илязат кадово, а тон оргодить. Лоткак ды адя! Кармавтан! Выговор тетъ максан!

Виталий ансяк прясонзо чаравтсь ды тень эйсэ невтсь: сон а валги тракторстонть. Ламолгавтызе тракторонть виензэ ды тона тусь седеяк бойкасто. Паксяськак ды менелеськак гайгеть увттонтъ.

Мезть тейнят? Савсь Владимир Филипповичнень валгомс. Мольсь Александр Петровичень ваксс, ды зярсыя кавонест каштмолезь вансть паксянтъ куншкава виевстэ увнозь ардыця тракторонть мельга. Тейсть таргамс. Цигаркаст кирвазтемстэ пейдезевсть карадо-каршо, озасть автомашинантень ды тустъ кудов.

Виталиень тракторось яла ардсь икелев.



## МЕЗЕ КНИГАСОНТЬ

Книгань пурныцянтъ пельде. . . . . 5

### Ёвтнемат

Комсомолонь седей . . . . .	9
Комсь иень ютазь . . . . .	22
Визькс. . . . .	31
Оксана Карповна . . . . .	41
Давол . . . . .	64
Кить ды киулот . . . . .	75
Пинге печтямс — аволь ансяк цецят сезнемс . . . . .	90
Вечкевикс содавиксэнъ . . . . .	102
Эсеть кудо . . . . .	133
Гранаткинэнь часиязо . . . . .	139
Истяк сакшны уцяскась . . . . .	145
Лектор . . . . .	158
Биологиянь учитель . . . . .	164
Шождыне прамось — стака мекев стямось . . . . .	171
Кото эйденъ ава . . . . .	182
Вейке сантиметра . . . . .	190
Максозь вал . . . . .	199





Литературно-художественное издание

*РАДАЕВ Василий Кузьмич*

**ИЗБРАННЫЕ ПРОИЗВЕДЕНИЯ**

Составитель

РАЗГУЛЯЕВА Татьяна Васильевна

На эрзянском языке

Мордовское книжное издательство

Литературно-художественной издания

*РАДАЕВ Василий Кузьмич*

**КОЧКАЗЬ ПРОИЗВЕДЕНИЯТ**

Редакторнэ

Е. В. Б о ч к о в а, Н. А. К и п а й к и н а

Художественной редакторось

Н. Е. Г о р ч а к о в а

Технической редакторось

Е. И. С и н я е в а

Компьютерной вёрсткась

Н. М. Ф е д о т о в а

Сёрмадстозь печатьс 17.06.2008.

Форматось 84x108 <sup>1</sup>/<sub>32</sub>. Усл. печ. л. 10,92.

Тиражось 1000 экз. Заказось 2838 №.

005 — 93(ОКП), 953000

«Мордовской книжной издательства» ОАО-сь,  
430000, Саранск ош, Ботевградской ульця, 18.

Печатазь «Красный Октябрь»  
республиканской типография РМ-нь ГУП-со,  
430000, Мордовия Республикась, Саранск ош, Советской ульця, 55а.